

SPECIMEN VARIAE LITERATURAE

Q U A E

IN URBE BRIXIA EJUSQUE DITIONE
PAULO POST TYPOGRAPHIAE INCUNABULA
FLOREBAT

Scilicet vergente ad finem Sæculo XV.
usque ad medietatem Sæculi XVI.

*Unde præter Brixiani ingenii gloriam, tam Annalium Typo-
graphicorum Series, quam Historia literaria temporis illius,
quo bonarum Artium renata sunt studia, illustrantur.*

P A R S S E C U N D A
G R A M M A T I C A, O R A T O R I A,
P O E T I C A, P H I L O S O P H I C A
C O M P L E C T I T U R.



B R I X I A E
Excudebat JOANNES - MARIA RIZZARDI
C I D I O C C X X X I X .
S U P E R I O R U M A P P R O B A T I O N E .

AD LECTOREM.



On adeo cæco studio Brixiani ingenii gloriæ amplificandæ abripitur bujus Operis AUCTOR, ut Scriptores omnes in eo recensitos, ac propterea Grammaticos, Oratores, Poetas in hac altera Parte laudatos (nam ad tertiam Philosophos rejicere, præsentis Voluminis moles adegit) primis subselliis dignos in ea, quam pertractarunt, disciplina arbitretur. Vicissim vero sperat ipse, neminem gloriæ illi ita infensum fore, ut plerosque ex ipsis singularem prorsus laudem sætibus suis sibi comparasse, in dubium revocet. Illud itaque tantum in hac Præfatione investigandum erit, an nimirum in singulis illis Artibus Brixiana literatura unum saltem Scriptorem jactare valeat, qui ad principem omnino locum adeo feliciter contenderit, ut aliarum gentium homines, qui eadem tempestate in iisdem Artibus primas tulerunt, si non procul a se reliquit, nec ipse longo intervallo ab iisdem distare comperiat. Id, inquam, in hac Præfatione discutiendum suscipimus, bona cum Lectoris venia aliquanto copiosius.

Atque ut a Scriptoribus illis, qui primi in hac Operis Parte comparent, initium ducamus, illico Augustinum Saturnium Lazaroneum palmæ inibi antem Grammatica offert disciplina; nec enim putat, illius laudi quidquam decedere

ex oppidi, cui ortum debet, tenuitate, Buenni scilicet in Oreola Valle, quam vulgo Camonicam dictitamus. Palmam illam Saturnio omnino adjudicasse censendus est Janus Pincius, Poeta laureatus, in Epistola Saturnii Mercurio præposita; nam ibi disertè affirmat, in Saturnio vires suas potissimum expertam esse Grammaticam, præcipuosque ejus Artis Doctores, qui ante ipsum scripserant, plus ab eo splendoris accepisse, quam illi tribuisse. Pugnam a Saturnio cum Laurentio Valla initam postea describens, celeberrimum hunc Latinarum Elegantiarum parentem, pedem referre, & se se dedere coactum repræsentat. At Saturnii excellentia ex ipso Saturnio dignoscenda. Quare ex fragmentis bene multis, quæ ex ipsius Mercurio excerpta suo loco recitata sunt, quædam dumtaxat Proœmia Lectorum oculis hic iterum exponuntur, quæ, vel sola, demonstrant eximiam hominis peritiam; qua factum est, ut ipsæ Grammatices seu tricæ, seu brevia, & scopuli (ut vocari solent) hujusmodi pondus, ac decus nancisci valuerint, perinde ac si ad percipienda sublimioris cujuscumque facultatis principia aditum patefacerent. De Impersonalibus, inquam, de Participiis, de Gerundiis, de Supinis ita sapienter, ita acute præfatur Saturnius, ut tantum dignitatis seu Philosophi, seu Theologi etiam eloquio inesse vix, aut ne vix quidem contingat, dum gravissimis argumentis Proœmium constituunt.

Non

Non defuerunt Grammatici, qui Impersonalibus bellum indixerint, & tanquam Platonis, atque Aristotelis dogma evertentia, e Scholis eliminarent. At Saturnius noster nec horum hominum impetum, nec emetiendi in explicandis illis itineris salebras pertimescens, ita Impersonalium causam defendit, ut professus præterea sit, divinum latinæ splendorem sine his baud posse consistere. En ejus verba l. 3. c. 1.

Et bonam latinæ partem Impersonalia sibi vendicant. Quæ summa cum diligentia ni per nos teterimis e tenebris, ac situ inveteratæ, ac deploratæ illius ignorantæ, tandem aliquando in lucem redimantur, baud causa est, quin de literis pessime dici meritus velim. Quid enim verba hæc non modo suscipiam, verum etiam & exosculer, & amplectar, quando sine his splendor ille divinus latinæ haud consistere potest? Neque tamen clam me est, quantum sudoris, vel potius quantum sanguinis mihi fundendum sit in his explicandis. Quando & natura longe sunt intellectu difficillima, & hostes quam plurimos habeam tum acerrimos, tum infestissimos, & alioquin incredibilis quædam expectatio mihi gravis adversaria jam sit constituta. Aggrediar igitur, & quam citissime potero, tantum negotii absolvam.

Ob hanc ipsam de Impersonalibus tractationem impotenter debacchatus est adversus Saturnium Gaspar Scioppius l. 3. c. 1. Miner. Sanct. idque nil mirum, nam quantum præstantissimis, & de re literaria optime meritis Viris oblatrare consue-
rit

rit *Vir ille, nec ipsi parcens Ciceroni, aut Var-
roni, satis compertum. Ad Participia explican-
da digreditur Saturnius l. 6. dumque in Proæ-
mio affirmat, Participiis orationem nusquam non
reflorescere, delectare, ac movere, adhibet ipse
orationem iis ipsis dotibus effulgentem. Ita enim
ejus libri c. 1.*

Participia latinitati breviter conferunt, appositi-
simum providentis naturæ ad condecorandam oratio-
nem ministerium: non concisam illam quidem, ac
mancam, cui obscuritas agnata, sed quæ multa com-
plectatur verbis non ita multis, quæque pro rerum,
ac sententiarum complexu apparent etiam pauca; si-
mulque genus dicendi faciunt in primis fulum, lene,
æquabiliter incedens, non contortum, non intume-
scens, non corruptum. Ad hæc, brevitati cognatam
celeritatem, quæ cum aliis rebus comparatur, tum
vero Participiis septimo in casu constitutis, vel maxi-
me si plura consequantur. Postremo varietas præci-
puum naturæ bonum, ubi opes, deliciasque suas am-
bitiosius ostentat, quam in Participiis, ut oratio ipsa
nusquam non his reflorescat, delectet, moveat.

*Gerardus Joannes Vossius de Arte Grammat.
l. 5. c. 9. negans transitivam Verborum constru-
ctionem propriam esse Participiorum notam, Sa-
turnii quidem opinionem impugnat; eodemque
loco ab eo pariter dissentit, quod spectat ad Câ-
nonem quendam, tanquam Lydium, ait Vossius,
a Saturnio propositum ad expendendam Gerun-
diorum, ac Supinorum doctrinam. At id agens,*

a Scioppii furore adeo absuit, ut contra, Saturnium appellare non dubitaverit, doctissimum, & acutissimum Virum. De Gerundiis hæc ille l. 7. c. 1.

Rem controversam aggredior, & plenam dissensionis; verum Superis bene faventibus per nos tandem aliquando dijudicandam. Neque enim nos hi sumus, quorum vagetur animus errore, quique certi nihil habeamus, quod sequamur. Illuxit, illuxit tandem nobis veritas hæc toties perita, toties pugnata. Scripsere, scio, plerique alii de Gerundiis, Viri illi quidem acuti, ac docti; verum ita, ut aliorum potius opinionēs, quam sepositi, atque abditi aliquid deprompsisse videantur. Quanquam ne Veteres illi quidem, quibus antiquitas nil habuit doctius, nil exactius, tales extritere, ut viam industriæ posteris præcluserint. Super hæc, in disputando, auctore M. T. Cicerone, non tam quid Majores senserint, observandum, quam rationis momenta quaerenda sunt. Ut in agro colonus, in uxore vir sterilitatem odit, sic infocundam animam odit illi complicita, & associata mens divina.

Supina aliqui dicta putant, quod, instar supinorum, otiosorumque hominum, omnia habeant confusa, permixtaque. At de illis ita differit Saturnius, ut nil certe minus, quam supinum, otiosumque hominem referant. Sic loquitur l. 8. c. 1.

Litem superiori Syntagmate disceptavimus plenam perplexitatis, plenam discordiarum. Nunc Supina nobis aggrediunda, negotium sane plurimi tum sudoris, tum consilii; ambagum autem non minus differata, quam larebrose difficultatis. Argumentum aliqui

qui dignum, in quo Veteres etiam illi nervos suos intenderent. Verum fit, nescio quo fato, ut non omnia sciamus omnes. Tradidere porto principes illi pleraque digna scitu, digna observatu, sed non pauciora posteris investiganda, atque dijudicanda reliquere. Etenim in omni artium genere cum plurimum actum fuerit, semper tamen omnis posteritas habet, quod agat. Excedit enim, multumque supereminet humanæ captum cogitationis; rerum infinita multitudo. Fuere, scio, Veteres illi viri quidem eruditissimi, homines tamen, quippe quibus non tota veritas sese infuderit. Itaque omnes, ut fallere potuerunt, & falli, ita in rebus dubiis nemo eorum opinionibus perinde sese addicat, ut facultas libere dissentienti non usque potior existat. Leganturque omnes, sed cum delectu. Neque enim vis naturæ in nobis effæta est, ut ipsi nihil ex nobis parere possimus, sentiamusque bonum esse, quod rerum multitudine, ac magnitudine vincimur. Nemo ad cognitionem veritatis magis accedit, quam qui intelligit, ubi multum profecerit, semper tamen sibi superesse, quod quærat. Quapropter cunctis adnitendum, pallendum, sua cuique vix faciunda, ut novo semper aliquo fœtu artem Grammaticam adaugeat, atque illustret.

His Saturnii Proœmiis quid elegantius; quid sublimiori quovis dignius argumento? Novi equidem, monente Horatio in Arte Poetica, quænam vitanda sint vitia, Inceptis gravibus plerumque, & magna professis, & quam studiose cavendum, ne speciosa quædam exordia censura illi subjaceant,

ceant, Amphora cœpit institui, currentē rota cur
urceus exit? At Saturnium nostrum personam,
quam sibi in Proœmiis illis imposuit, pro digni-
tate sustinere, quæcumque ex ejus Mercurio in
medium allata sunt Specimina, cuivis, ut spero,
persuadebunt. Neque verobæc omnia, velut Gram-
maticorum minutia, deridenda, quum ab eorum
notitia, non multa modo Poetarum, aut Historico-
rum loca, sed & gravissimæ Juris controversiæ,
lucem fœnerentur, ex augustæ Antiquitatis judi-
cio, ut monuit Vossius de Arte Gram. l. 5. c. 13.

Ad Oratoriam Artem accedo, in qua peregri-
nus, & hospes sit oportet, cui minime notum Jo-
vitæ Rapicii nomen. Qualis, quantusque in ea
fuerit Rapicius, Orationes plures ad demonstrati-
vum genus pertinentes, quas conscripsit, osten-
dunt; at multo adhuc manifestius libri quinque
de Oratorio Numero, cedro utique dignum Opus.
Hanc Rhetoricæ disciplinæ partem ab aliis ne-
glectam, ab aliis, quasi percipi nullo modo posset,
depositam, ac desperatam, adeo docte, & copio-
se tradidit, ut in eadem Rapicius unus (absit ver-
bo invidia) legi mereatur. Fusiora ex illo Tra-
ctatu suo loco recitantur excerpta, quæ Lector
adeat. Unum tantum ex ipsis hic iterum affere-
tur, Operis utilitatem, ac præstantiam paucis
verbis ob oculos ponens. Ita Rapicius lib. 5.

Cum igitur pedibus, ac syllabarum quantitate, &
tono, & quasi cantu constet hic numerus; nec sylla-
barum quantitas, nec tonus, nec spiritus ab antiquo-

P. II.

* *

rum

rum consuetudine quicquam variaverit: quid obstat, quo minus numerum hunc conficere, & de eo præcepta, Veterum more, tradere possimus, ac debeamus? Quis enim ignorat, ubicunque omnes fuerint alicujus rei partes, quanquam disjectæ, ibi tamen, si in unum adduxeris, totum posse constitui? constitui autem solere, & debere, quam fieri potest, apertissime; nisi quis aut tam heberi, aut tam præpostero sit ingenio, ut, cum parata, expolitaque ante oculos, atque inter manus extent membra omnia, e quibus vel Phidix Minerva, vel Polycleti Hercules possit confici, disjecta illa malit jacere, quam in aptum ordinem redigi, atque in signa orbe toto celebranda consurgere. Quis porro, cum ædes struere desideret, nec quadrati lapidis, lignorumque, & laterum, ac reliquæ materiæ desit copia, struet quidem opus, sed adeo negligenter, ut nihil curet, cum quo lapide, lignove, aut latere, quem lapidem, lignum, aut laterem conjungat? nec consideret, quo modo copulari possint, & qua sui parte stabiliorem, firmioremque queant exhibere structuram? nec saltem abscondat, removeatque, si quid obstat, nec addat, si quid deest, ut tota structura firmior fiat, tum etiam aspectu ipso pulchrior; sed omnia incondita, utcunque fors tulerit, coacervet, ac sibi non tam domum, quam ruinam parat? Huic similes sunt quicunque contemptis his, quæ traduntur de numero, præceptis, mente circumscriptas sententias incondita potius, atque indistincta oratione jactari lætantur; quam, quæ delegerint, verba ita dimittere, ut suo quodque loco respondeat; nec, cum possint,

sunt, curant, ut periodi, colaque, & commata omnia, & prima, & media ad finem spectent, & alia, atque alia terminatione claudantur.

Hunc ipsum Rapicius Poetica disciplina admodum valuisse, metrica illius in nonnullos Psalmos Paraphrasis fidem facit, quam cum celeberrimis illis M. Antonii Flaminii, & Georgii Buchanani de principe loco dimicantem AUCTOR in medium proferre non dubitavit. At quoniam Laurentii Gambaræ de Columbi Navigatione Poema a Paulo Manutio, dum ejus exordium multis præsentibus Patavii legeret, voces illas extorsit Cedite Romani, ut ipse Manutius refert in Epistola suo loco citata, ac præterea falsus est, eo in judicio adhuc, qui a se dissentiret, invenisse neminem; Laurentius ipse Gambara potius, quam Jovita Rapicius, quam Jacobus Bonfadius, quam Nicolaus Siccus (præstantissimi profecto Brixiani Poetæ) hoc loco in exemplum proponi, suo quodammodo jure deposcit. Poematis illius initium ad Antonium Perenottum Cardinalem Granvelæ hujusmodi est.

Perenotte, virum referam, qui littora primus.

Ingentis tetigit Cubæ, non cognita nauris.

Hactenus, oppositumque polum, novaq; astra retexit
Nuper, & inventas cancri sub sidere terras.

Accipe, quæ quondam jussisti carmina, ab Afris

Cum domitis Cæsar dulcem, claramque redisset

Parthenopen victor, qui fortî milite densas

Tot Tûrcarum acies validis superaverat armis.

* * *

Et

Et pulsum Regem regnis induxit avitis:
Non sine te maris immensos invadere fluctus
Tentassem ratibus, nec vasto in gurgite vela
Tendere, sed Mellæ tenuissem parva fluentia,
Hic ubi Chinæ arces, atque arma, virosque,
Et fines latos canerem, terramque feracem
Tor frugum, & ferri venas. Urbs condita ab alto
Sanguine Cenomanum ducit genus, aspera bello
Quæ fuit, & lætis Italos successibus auxit.

Quoniam vero suspicari quis posset, Manutii illud de Gambaræ Poemate iudicium a nimia hominis ad ipsum Gambaram scribentis facilitate, & humanitate profluxisse, liceat in novum exemplum fœtum Poetæ nostri Benacensis adducere, Iosephi, inquam, Milii Voltolinæ Saloensis, qui Hortorum culturam Epico carmine cecinit. Paululos ex eo hic asseram versus (sat multi suo loco recitantur) Nuncupationis, Invocationis, & Partitionis ipsius Operis exordia tantum designantes.

Huc teneræ, huc huc ferte pedem, mea flamma, puellæ,
Est quibus Hortorum cordi cura, huc, precor, omnes
Currite; Tuque adeo Sociæ pulcherrima gentis,
Virginei decus una chori, Isabella, venito.
Hortorum hic cultus disces; quid scilicet Hortos
Perpetuo lætos faciat bene olentibus herbis &c.
Bonfadi pia Musa; colis quæ hæc frigida Tempe,
Antraque opaca, sonans rapido quæ flumine Clifis
Gazano vicina tuo prata irrigat, umbras
Inter ubi, nemorumque comas zephiritides auras
Perpetuo tecum, comites tibi ludere fama est &c.

Huc

Huc niveis allabere pennis,
Hicque mihi, teneras mecum miserata puellas,
Da canere Hortorum cultus, faveasque canenti &c.
Quam velit Hortus humum; quæ illius cura colendæ;
Ponere quo sepes deceat; quoque ordine vites;
Nobilis hic optet quas sedes qualibet arbor;
Et quæ, quotque modis, hinc condimenta parentur;
Semina delectu cultæ quo credere terræ;
Quique herbis locus edulibu', qui floribus aptus;
Nascentis quæ cura oleris, qui cultus alendo &c.

Milium nostrum eo in Poemate superasse Veteres omnes, qui de Hortorum cultura præcepta doctissime, & elegantissime literis mandaverant, & Columellam quoque, qui id ipsum Poeticis numeris diligentissime præstiterat, affirmat Euphrasius in Epistola Poemati illi præposita. An autem Renati Rapini, qui post ipsum de eo ipso argumento celebratissimum Poema condidit, Musam æquaverit, suo loco aliorum judicio relictum est. At dubitari nequit, Saloensem Musam multum absuisse ab ea animi exultantia, qua Rapinus post jactatam in Præfatione multis, multisque verbis suscepti a se Operis arduitatem, perinde ac si ipsum Virgilium, aliosque omnes post ipsum Poetas deterruerit, deinde in Prologo secundi libri ita sibi plaudit, ut quercus ipsas frondosa cacumina, unde meritam ipse capiti suo coronam imponat, inclinare jam cernat, & sylvas jam audiat læto fremitu, assensuque secundo respondere. Saloensis nostri Poema Rapino ignotum fuisse, nil

mi-

mirum, quum Brixianos ipsos nihil de illo rescivisse, ex *Conradi Bibliotheca*, in qua omittitur non *Poematis* tantum, sed & *Scriptoris* mentio, facile pateat; at *Columellæ Poema Rapinum* ignorasse, baud parum miremur. Parè ratione dignum admiratione est, *Poema de Columbi Navigatione* ab *Ubertina Carrara* ætate nostra compositum, & *Aneidi ipsi Virgilianæ* a quibusdam par habitum, in *Arcadiæ Romanæ Olympicis ludis celebratum* a quopiam reperiri bis. versibus,

Primus hic Eudoxus, qui carmine per mare magnum

Ausus, ad ignotas Columbum ducere terras.

Gambaræ nostræ Poema tum *Editiones* plures, tum *Epistolæ Mannii*, tum sexcenta *Scriptorum* ea ætate testimonia, lippis, & tonsoribus notum reddi derunt, ac propterea in eo detegendo non adeo laborandum, ac *Columbo* fuit in illa sua ad novum Orbem *Navigatione*. Ejusdem argumenti *Poema* post *Gambaram* scripsit etiam *Julius Cæsar Stella* suo loco in hoc *Opere* laudatus, saltem libros duos priores, quos doctis *Viris* sui temporis admodum probatos fuisse, abunde testatur *Epistola Francisci Bencii* eis libris præfixa. Si quis tria hæc *Poemata* *Gambaræ*, *Stellæ*, & *Carraræ* inter se comparaverit, nihil fortasse *Brixianorum Poetarum gloriæ* (nam *Stella* quoque pro *Brixiano* habendus) officiet postremum, licet ei improbum quadraginta annorum laborem *Carrara* sacraverit, & licet singulis annis ejusdem librum unum in frequentissimo, lectissimoque

Vi-

Virorum confessu, toto plaudente theatro, Roma consueverit ipse recitare.

Atque hi sunt, quos arcem ipsam obtinuisse ejus disciplinæ, quam ingenii sui sætibus in altera hac Operis Parte memoratis excoluerunt, Brixiana gloriatur literatura. Sua & aliis Scriptoribus in eadem recensitis decora minime defuisse, facta suis locis de ipsis mentio comprobabit. Certe Quintiano Stoæ laurea Corona, e Ludovici XII. manibus recepta, non defuit. Sabæo ornamento fuit Bibliotheca Vaticana, in cujus cura septem Romanis Pontificibus inservivit, quamque collectis ex Septentrionalibus etiam peregrinationibus spoliis ditavit. Taberiam Aldi Manutii judicium honestavit, quum ab hoc dignus habitus fuerit, cui in eo doctorum Variorum proventu, quem ætas illa ferebat, suam Stephani de Urbibus Editionem inscriberet. Græcarum literarum peritia plures alios Taberii cives exornavit, inter quos T. Prosper Martinengus in condendis Græcis carminibus ita excelluit, ut ipsum Pindarum referre, quorundam judicio, censeatur. Homerus, Hesiodus, & Aristophanes Brixiano prælo debuerunt, ut primum ab his etiam legi possent, qui Græcam linguam ignorabant. Andrea Marone non alius in extemporali fundendi carminis facilitate præstantior, ita sentiente, cum Eruditorum ejus temporis caterva, Leone X. qui eximiis animi sui virtutibus, politioris literaturæ, quin Poeticæ illius extemporalitatis laudem, teste Jovio, conjunxit.
tho-

tholomæo Parthenio, & Bonifacio Bembo ex Academia Romana, in qua publice docuerunt, decus accessit. Pater Octavius Pantagathus, decus ipse fuit non Brixianæ tantum, sed Romanæ quoque Urbis, nam hæc, ut diserte scribit P. Manutius ad Octavianum Magium, huic non tanti esse debebat, quia Roma est, quæ præstantes olim Viros tulit, Imperii terminos cum Oceano conjunxit, quanti ob unius hominis consuetudinem, cujus est humanitas doctrinæ par, doctrina vero, quæ potest esse, maxima. Is est Octavius meus, qui Urbem, a qua cæteri honestantur, sua ipse virtute nobilitat. Locum autem in hac Operis Parte invenit ob insignem, quæ illi minime defuit, Poeticæ disciplinæ peritiam. Academiam Occultorum dictam, quæ Brixianæ ea ipsa tempestate floruit, Latinos versus, Hetruscosque suavissimos protulisse, fidem faciunt evulgatæ eorum carminum Collectiones. Tandem Laura Cereta, Veronica Gambara, & aliæ doctissimæ Mulieres effecerunt, ut Brixia non hominum tantum, sed & Feminarum Academia appellari meruerit.

Tot, tantisque Viris, si Lector miretur, minime hoc loco conjungi Vincentium Madium, docti, & celebris Commentarii in Aristotelis Poeticam conditorem, sciat, locum ei asservatum fuisse in tertia bujus Operis Parte, quæ Philosophica complectetur. Fuit enim Madius noster, ut plures, & præsertim Sigonius eum appellarunt, Philosophiæ Italiciæ lumen.

PARS

PARS SECUNDA¹

GRAMMATICA, ORATORIA, POETICA, PHILOSOPHICA

COMPLECTITUR.

GRAMMATICA.

QUONIAM Grammaticæ potissimum Artis subsidio Brixiani Scriptores vindicandis ab interitu Poetis, de quibus in prima hujus Speciminis parte dictum est, operam suam contulerunt, posteriorem hanc ab ea ipsa Arte exordiemur, illico ostendentes, quam præclare in illa quoque excolenda eorum hominum ingenia desudaverint; utque semel initam scribendi rationem sectemur, Brixianæ ditionis fines, prout occasio feret, identidem prætergressi, aliorum etiam doctorum Virorum in ea Sparta adornanda labores, & studia inspiciemus: unde, quinam fuerit rei Grammaticæ id remporis status, dignoscatur, & cujusce generis Institutiones illæ, quas pueris imbuendis oriens Typographia in literarios ludos invexit.

I. Pylades Buccardus, quem de Poetarum Latinorum Principe M. Accio Plauto egregie meritum Brixiana, ut vidimus, literatura in ipso hujus Operis exordio in medium protulit, hoc pariter loco primus omnium prodit, Grammaticæ Arti suppetias ferens adversus Alexandri de Villadei Doctrinale, quod, Arti licet illi tradendæ parum, aut nihil opportunum, maximam tamen apud Ludimagistros auctoritarem obtinebat, ac

P. II.

A

pro-

proinde puerorum manibus assidue in Scholis terebatur. Jam siquidem in iis valere iussi fuerant veteres Grammatici, quos in unum collegit præter Heliam Putschium Antuerpiensem, & Joannem Theodorum Bellovacum memoratos a Fabricio Bibl. Lat. T. 2. l. 4. c. 7. Lucas Panetius Olchinensis, de quo in priore hujus Operis parte dictum est, testatus in Epistola Nuncupat. ad Franciscum Rhainerium, se de eorum Grammaticorum medio tetra verborum portenta, collatis multis exemplaribus, sustulisse, & varia passim loca Cimmeriis obducta tenebris illustrasse. Ita ipse in Veneta Editione an. 1522.

Alexandri Doctrinale cum Commentario, in ditione Brixiana, scilicet Collibus Vallis Trumpiæ, impressum an. 1526. mihi exhibent Gabrielis de Fracacini typi, qua ex Editione Proæmium afferam, quod satis erit ad demonstrandum inepti hominis ingenium, ac propterea susceptæ a Pylade operæ in eo oppugnando emolumentum.

Opus Alexandri Grammatici pro eruditione puerorum.

Liber primus incipit.

S*cribere clericulis paro Doctrinale novellis:*

Quia textus est planus, non indiget explanatione; sed tamen pro forma servanda in sequentibus sic construe: Ego magister Alexander paro scribere Doctrinale, idest librum dantem doctrinam novellis Clericulis, idest Scholaribus, & non pro provectis hoc Opus scribitur, sed pro rudibus.

Pluraque doctorum sociabo scripta meorum.

Construe: Ego sociabo plura, idest multa scripta meorum doctorum, idest magistrorum. Hoc dicit ad arrogantiam evitandam, ut ostendat quod scripturis præstantium viro- rum, & non propriis auctoritatibus est valiturus.

Jama

*Jamque legent pueri pro nugis Maximiani,
Quæ veteres sociis nolebant pandere caris.*

Idest hæc per me scribenda legent pueri pro nugis, idest loco nugarum Maximiani, qui fuit Scriptor fabularum; quas res veteres, idest antiqui nolebant pandere sociis caris; qui ita caras habebant, seu tenebant has nugas, ut & carissimis occultarent illas. Ideo dicit, hunc librum legent loco illarum nugarum, scilicet fabularum.

*Præsent huic Operi sit gratia pneumatis almi,
Me juvet, & faciat complere quod utile fiat.*

More boni Catholici Spiritus sancti gratiam invocatur dicens: gratia almi pneumatis, idest sancti Spiritus adsit, seu præfens sit huic Operi, & juvet me ad hoc Opus, & faciat complere Opus, quod fiat utile legentibus.

*Si pueri primo nequeant attendere plene,
Hic tamen attendat, qui doctoris vice fugens,
Atque legens pueris layca lingua referabit,
Et pueris etiam pars maxima plana patebit.*

Sed sæpius dixit pueros hunc librum lecturos; & pro illis eundem scribere, ideo tacito dicitur: si pueri novelli nequeant prima lectione attendere, seu hunc librum intelligere, attendat ille, qui est vice fungens doctoris, idest repetitor, vel magister lecturus. Atque perlegens hunc librum pueris referabit, idest declarabit eisdem lingua layca, idest vulgari: postea non erit magna difficultas in libro, quia etiam sicut magistro maxima pars libri patebit plana, idest manifesta, & clara erit pueris. Hoc dicit, ne timore difficultatis omittatur liber suus.

*Voces in primis, quas per casus variabis,
Ut levius potero, te declinare docebo.*

In ista parte incipit Auctor dare ordinem libro suo &c.

Alexandri de Villadei ætas designatur a Gerardo Joanne Vossio Art. Gram. l. 3. c. 29. ubi scribit, eum vixisse sub Friderico anno 1240. Ætas autem Maximiani, quem Scholis ejicere, ac tyronum manibus extrudere, sibi propositum fuisse, fatetur Alexander, ad Anastasii

Imperatoris tempus refertur ; isque ipse est , cui Viri docti tribuunt Elegias VI. sub Cornelii Galli nomine passim editas . Præclarum autem est elogium , quo Lilius Gyraldus, velut una fidelia duos parietes dealbans , ambos illos Grammaticos , Maximianum , & Alexandrum , exornavit , de Poet. Histor. Dial. 4. Maximianum *nugatorem*, & *nebulonem* appellans, *cujus & insignis Grammaticæ nugator Alexander nugas irrider.*

Annotationum libellum , quo Pylades noster Alexandri nugas confutandas suscepit , Jacobus Britannicus typis suis Brixie publicavit an. 1500. cum Epistola Nuncupatoria ejusdem Pyladis ad Heliam Capreolum, Virum illum excellentem, quem merito his verbis Pylades in ea Epistola compellat : *Sed cui præcipue Annotationes has nostras inscriberemus, quum nemo se offerret, tu unus, Helia generose, ac facundissime, præ cæteris omnibus dignus visus es, qui in humanitatis studiorum, ac philosophiæ campo ab usque adolescentia ferventibus rotis decucurrissi, metamque ipsam ambabus manibus comprehensam detines ; id quod & pleraque alia luculentissima a te primo edita Opera comprobarunt, & quod postremo in tua hac Lunatensi Prætura candidissima, tanquam a forensium causarum difficillimis laboribus in hortum deliciarum relaxandi animi causa secedens, De honesta voluptate, lucubraſti, elegantissimum id quidem, & nullis antiquorum concessurum. At de Helia Capreolo pluries redibit sermo. Integra nunc ea Epistola aſſerenda ex Editione illa Brixiana an. 1500.*

Pyla-

*Pylades Brixianus Helia Capreolo Oratori excellenti,
& Lunatenſi Pratori S. D.*

QUſitum eſt ex me non ſemel, ſed ex amicis quoque, & conſpiratoribus noſtris quæri quotidie a multis Græmaticæ Profeſſoribus audio, Helia Capreole, bonarum litterarum, & ingenuorum ſtudiorum cultor, & propagator, quid eſt, quod a me compoſitum, & aheneis litteris impreſſum fuerit Carmen Scholaſticum, de nominum Declinationibus, Generibus, atque Heterocliſi, tum de verborum præteritis, & ſupinis, ac de heroici, & elegiaci verſuum compoſitione, & ſyllabarum quantitate præcipiens; quum Alexandri Teutonici Volumen exſtaret de his, atque aliis diſſerens, jamdudum ab univerſo, ut ita dicam, mundo receptum, atque in omnibus ſcholis perlectum. Quibus ego quod reſponderem nihil habens, niſi quod veritas ipſa ſua-
debat, plerumque, ac ſæpius iterando reſpondi: ejuſmodi me laborem ſuſcepiffe, publicæ utilitatis cauſa, quum plurima in Alexandri Codice illo vulgatiffimo, ac celeberrimo vidiffem, minus quam utiliter, quam Latine, quam recte præcepta, & quæ a pueris delibata, quum poſtea adoleviſſent, dediscere, & tamquam portionem ſtomacho contrariam eructare, atque expuere oporteret. Et quamquam iſtorum oculis non parva interdum illius errata ſubjiciendo, idipſum apte comprobaverim, quum ea nullis fuerint ſcriptis commendata, ſoluto ſtatim colloquio, in auras veluti abierunt, parvamque, aut nullam apud eos fidem conſequuti ſumus. Quo factum eſt, ut non paucis rurſum litteratorum, & amicorum precibus coram, & abſentium epiſtolis ſollicitati, decreverimus omnibus tandem ſatiſfacere, & quæ nobis lectu, doctuque indigna in Alexandri Opere viſa ſunt, currenti calamo perſtringere; de iis tamen dumtaxat illius Voluminis partibus judicantes, in quibus & noſtrum obverſatur Opusculum. Sic enim fiet, ut & conſilium noſtrum, quo ejuſmodi provinciam ſcribendi deſumpſimus, fortassis non improbetur, & tantis moleſtiis aliquando cum amicis ſublevemur. Sed cui præcipue Annotationes has noſtras inſcriberemus, quum nemo ſe offerret, tu unus,
Helia

Helia generose, ac facundissime, præ cæteris omnibus dignus visus es, qui in humanitatis studiorum, ac Philosophiæ campo ab usque adolescentia ferventibus rotis decucurrissi, metamque ipsam ambabus manibus comprehensam detines; id quod & pleraque alia luculentissima a te prius edita Opera comprobarunt, & quod postremo in tua hac Lunatensi Præfectura candidissima, tanquam a forensium causarum difficillimis laboribus in hortulum deliciarum relaxandi animi causa secedens, De honesta voluptate, lucubrasti, elegantissimum id quidem, & nullis antiquorum concessurum. Eas igitur Annotationes nostras tuo, ut diximus, nomini nuncupatas, quæ cætera solitus es trutina, quum libraveris, quidquid ineptum offendes, obelo tuo acutissimo confodito. Tum reconcinnatas, ac sapientissimo, quo polles, iudicio deterfas, in tuam suscipito clientelam; neque enim te protectore in vulgus, vel infidum, vel insulsum prodire verebuntur.

Pyladi nostro adversus Alexandrum prælianti sese socios intulisse, junxisseque velut agmina quam plures, certo constat, inter quos mihi occurrit Jo. Despauterius Belga, Grammaticorum suæ ætatis princeps, ut vocatur a Vossio Art. Gram. lib. 3. c. 19. his verbis Præfationem in primam partem suæ Grammaticæ exorsus: *Post linguæ Latinæ a Gothis, aliisque Barbaris miserabiliter laniatæ, ac propemodum extinctæ, per neotericos instaurationem a Divino Numine præstitam, Alexandri Doctrinale doctissimo cuique visum est puerorum lectione indignum, utpote nimis tenebrosum, citra utilitatem prælongum, plerumque etiam barbarum, insufficiens, & falsum. Quo circa ut Alexander undique exularet, cœperunt plerique Grammaticam latinio rem, verio remque scribere. Eundem Despauterius in Præfat. ad Artem Verificatoriam ita sugillat: Multa possem in hunc modum illius sæculi anilia referre, quo natus est Alexander Gal-*
lus,

lus, ejus Opus Doctrinale inscribitur, circiter annum Domini millesimum ducentefimum, quo tempore barbaries toto mundo dominabatur usque ad tempora Francisci Petrarchæ. Et in Epistola quadam, quæ illico post Præfationem illam subsequitur, hæc habet: *Clamant indocti homines, rem me indignam fecisse, quod repudiato Alexandri Galli Doctrinali voluerim senem illum de ponte (ut ajunt) dejicere. Vociferantur, me esse novitatis fatuæ excogitatore, ut qui contra Ecclesiæ usum plurima perversissime doceam. Decani, Canonici, Officiales, Episcopi ita canunt, & legunt (inquiunt isti) ut Alexander præcepit, & audes profiteri te his doctiorem? Qui hæc obducto in me supercilio clamitant, indoctissimi sunt.*

Non uno autem loco Alexandri barbariem, potius quam hominis, sæculi vitio tribuendam Despauterius monuit, nam in Epistola Syntaxi præmissa disertis verbis fassus est, se de Alexandro id ipsum sentire, quod de Actio, & Pacuvio Quintilianus, illum videlicet rudem fuisse non sua culpa, sed temporum, quibus res literaria pene interierat. In æquo hoc de Alexandri barbarie judicio Despauterio, aliisque præverat Pylades noster, qui Annotationes suas hunc in modum exorditur: *Alexander de Villadei natione Teutonicus, & ut accepimus, vir alioquin bonus, & Christianæ religionis cultor, atque ut illis temporibus, quibus Latine literæ pene funditus perierant, pro illarum institutione studiosissimus, & accuratus, citra tamen Græcarum literarum cognitionem, nec parva apud me laude dignus, qui, quantum in se fuit, rem publicam juvare nixus est.*

Neque vero his tantum in Alexandrum Annotationi-

ni-

nibus Pylades ipse rem Grammaticam iuvit, sed novum insuper Opus contexuit, quod Grammaticarum Institutionum Regulam, & Carmen Scholasticum inscripsit, ut in illa ad Capreolum Epistola nos monuit; exstatque pluries impressum Brixiae, atque Venetiis. In tertia Editione, quam ad manus habeo, scilicet Brixiae an. 1498. per Jacobum Britannicum, Pylades Lectorem alloquens conqueritur, Brixianum primum impressorem vix dum in utero conceptum foetum, atque immaturum eduentem, nil nisi abortivum efficere potuisse; Venerum autem in ortu ipso, neque lotum, neque initiatum adhuc, primos vagitus edere incipientem, atque anonymum ad immaturam virilitatem tollere festinasse; at in ea tertia Editione provectiorem, & suo cum nomine cultiorem exire gratulatus, Criticorum latratus nauci faciendos declarat: *Dum tamen* (inquit) *haec & Ludovico Martinengo ingeniorum solertissimo censori, & Luca meo Tertio castigatissimae eloquentiae fonti celeberrimo, ac Joanni Taberio utriusque linguae parenti, tibiue, Britannice Joannes, Latinitatis decus, paucis dein bonarum literarum sectatoribus vel placuerint, vel sine Rhinocerotis naso fuerint perfecta.*

Ludovici Martinengi laudes fusius prosequitur Daniel Ceretus in Brixianae Urbis Panegyrico, easque ab his versibus orditur:

*Sed quibus auspiciis nunc te, Ludovice, canemus
Inter Martigenas gloria prima Viros?*

Eiusdem in literas, & literatos favor, ac munificentia ibidem in hunc modum celebratur:

*Prætereo quam larga tuae sint munera dextrae,
Quae tribuis doctis maxima saepe Viris.*

Inde

GRAMMATICA.

Inde fit, ut cunctis Mœcnas vatibus alter

Dicaris, nomen concelebrentque tuum.

Nil nisi te nostri gaudent meminisse Poetæ:

Nil nisi Martigenam condecorare domum.

Eum Panegyricum Ceretus ipsi Ludovico dedicavit, cui Lucas Tertius Epistolam præposuit, ceu alteram ad eundem Ludovicum nuncupationem, qua Patronum, ac Mæcenatem suum, studiosorumque omnium eundem appellat.

Versus quosdam, quibus Pylades Operis sui frontem, & calcem exornavit, placet recitare.

Ad generosum, magnificumque Veneti Nominis

Patritium Ludovicum Martigenam,

Pylades Brixianus.

En tibi, Martigenæ decus insuperabile gentis,

Aonii fautor, præsidiumque Chori,

Clara quod incipiant tua discere pignora carmen,

Quos male Teutonico non cupis ore loqui.

Hoc, licet exiguum, Pylades tibi muneris offert,

Cui nil, quod posset tradere, majus erat.

Miscuit ille tamen parvo sua corda libello,

Ferre parat Domino dum pretiosa magis.

Suscipe, & hunc rabidis a vulgi morsibus, oro,

Protege, Martigena vindice, tutus erit.

Pylades Joanni Britannico suo Sal. D.

Imbuere institui Pylades quo Nestora dulcem

Filiolum, teneris prorsus ab unguiculis;

Ne fera barbaries multos baccata per annos

Hunc quoque Teutonicum donet habere sopbos:

Ad te (quidquid id est) facunde Britannice, misto,

Quo non in toto est carior orbe mihi.

Ut tua, quæ semper communia pignora duxi,

Si placet, bis ipsi instituisse queas.

Præterea ad Scholarum usum breve Vocabularium, metricis legibus vinctum, Pylades composuit, quod.

P. II.

B

his

his versibus Scipioni Tertio Brixiano nuncupavit, & Brixie impressit Jacobus Britannicus an. 1498.

Ad Scipionem Tertium Patritium Brixianum Mercatorum

Consulem æquissimum Pylades.

Scipio certa mea spes, & tutela senectæ,

Quo Pylades salvo tristitia nulla timet:

Accipe non longo digesta vocabula tractu

Verborum, & paucis multa recepta modis.

Quæ modo lecta probes, non & discenda pigebit

Dulcibus hæc natis præposuisse tuis.

Ut quibus ingenium, probitasque paterna resulget

Mox & in his, Latium fulgeat eloquium.

Hæc tamen in partem tibi, cui debere fatemur

Maxima, de loculo paupere parva damus.

Tradere quum Superum nutu majora licebit,

Vitet in officium mens animosa suum.

At tu Brixiacæ Gentis justissime Consul,

Quo Mercatura est Judice lesa nihil.

Dux quoque, & assertor nostri sis, queso, libelli,

Si quid in hunc morsu livida turba paret.

II. Quamvis nullus dubitandi sit locus, Joannem Britannicum grato animo excepsisse Pyladis Grammaticam, quam ejus etiam liberis imbuendis Pylades opportunam censuerat, ut fidem fecit recitatum Epigramma, certum tamen est, & ipsum Britannicum ejusdem generis lucubrationem scripsisse ad institutionem Darii, Hippolyti, & Pomponii filiorum suorum, nam eas Britannici Regulas cum ea inscriptione Angelus, & Jacobus Britannici fratres Brixiani impresserunt an. 1493. Iisdem Epistola ad Marcum Civilem Brixianum præfigitur, qua vehementer dolet Britannicus quorundam hominum invidia, & iniquitate famam suam ita pessumdari, ut vel Commentaria a se edi-

edita in Persium, & in Achilleida Statii plagii nomine traducantur. Marcum Civilem in Brixia Panegyrico Ceretus hoc Disticho commendat:

*Singula facundi quis posset dicere Marci,
Civilem gaudet qui decorare domum?*

En ipsa Britannici Epistola:

Joannes Britannicus Brixianis Marco Civili Brixiano

salutem P. D.

ET si mihi exploratum erat, Marce Civilis, omnium fere Scriptorum iniquam esse conditionem, quod quanto excellentius quis in vulgum aliquid ederet, suaeque ipsius plurimis prodesset industria, tanto in se ardentiorum eorum concitaret invidiam, qui quum nihil egregium, nihil magnificum suo ipsi ingenio, quod obtusum a natura sortiti sunt, excogitare queant, alienis semper & virtutibus, & studiis obrectant: existimavi tamen instituti mei rationem nullo prorsus modo omittendam, quin per easdem orbitas industriae meae curriculum agerem, per quas quoad mihi per ocium licuit, hucusque nec sine laude bonorum egimus. Omne enim, quod mihi a cura, & re familiari, procurandoque cultu liberorum meorum datum est & ocium, & tempus ita studiis impertivi, ut (quod volebat Plato) non tam mihi ea soli esse fructuosa voluerim, quam ceteris aliis. Eum enim demum ego semper miris extollendum laudibus censui, qui pro ingenii sui captu Latinae linguae rationem juvare, & ad communem humani generis utilitatem augere studuerit. In quo, etsi multi & ante; & nostris temporibus egregiam navare operam, nec minorem apud bonos laudem assecuti sunt, quam eorum labores existere, malorum tamen, & improborum, qui non minus alienae felicitati, quam araneoli muscis insidiantur, morsus, & horrendos latratus vitare non potuerunt: tanta semper probos Scriptores comitatur invidia, & iniquitas. Quid enim scelestius iis iudices, qui non ex re, sed ex ulcerato, & malis venenis imbuto stomacho alienos labores aestimant? Iniquissimi omnino est animi, eorum velle industriam deprimere,

qui, etsi forte minus feliciter, quam optime tamen possunt, operam dant, ut publicitus bene consultum sit. Quibus quidem incommotis, quum plerosque Scriptorum, & nostris, & priscis temporibus agitato fuisse animadvertirem, putavi ego æquiori animo fortunam meam ferendam, si & aliquando mihi in hujusmodi studiis multa exstiterent adversa. Tam multi enim editione Commentariorum nostrorum cum in Persium, tum in Achilleida Papinii offensi sunt, ut nihil unquam mihi molestius fuerit, quam falsos eorum rumores audire, quos adeo impudenter distulerunt, ut quum nihil, aut parum haberent, quod in illis reprehenderent, neque (ut iniqui sunt) vellent probare, non dubitaverint nefarii luscii, omni devorato pudore, me furem appellare, & dictitare de meo nihil prorsus dedisse, ut quum ipsi neque ingenium ullum, neque ullum nominis splendorem unquam habuissent, maledicendo meum quoque, si possent, obscurarent. In quo uno malo id mihi jucundissimum fuit, quod isti dicaculi Timones, ut ignorantia, & noxæ suæ conficii, quum mihi occurrunt rigida, & obstipa cervice gradiuntur, nec eum intueri sustinent, quem impie homines nullo numero læserunt. Qua quidem in re bene mecum agitur, quod scelerum suorum pœnas amarissimas scelesti luscii, & nugones luunt, eorum enim præcordia novis lucubrationibus nostris exulcerantur; & ita exulcerantur, ut quum nos Regulas brevissimas ad puerorum eruditionem non minus diligenter, quam benigne conscriptas edidissemus, non potuerint vulnere suorum dolores dissimulare; coacti enim sunt, urgentibus invidiæ stimulis, clamare, in Regulis trecenta inesse errata, & ea in latibulis dictitare, quæ & pravam eorum in me voluntatem, & profundam ingenii sui ignorantiam detegerent. Nam quæ nos in Regulis non sine probatissimis rationibus correximus, ipsi densissimo ignorantia nubilo obvoluti errata putaverunt. Eorum me profecto inscitia miseret, pudetque: tanta enim eorum animos fatigat invidia, ut præcipientes oculis etiam apertis ferantur. Statui itaque, nonnulla, quæ isti malivoli vituperant, hic annotare, ut ipse, qui in his nostris studiis non minus Græca, quam Latina litteratura es eminentissimus, cognoscas, vitio ne, an virtuti dandum sit

sit quod ipsi perfidissime insectantur. Eos tamen non pluris (ut ajunt) atque simias facio. Audi igitur nonnulla eorum, quæ quum puerulis non sine maximo Latinæ linguæ dedecore traderentur, depravata correximus. Primo enim (auctoritate tamen veterum Grammaticorum) ita docebant. Propria nomina quatuor habere species &c.

In fine. Tam multa quidem in totis Regulis nostris paradosan, & sententiam eorum docuimus, qui hereditariam magis scientiam, quam aliquo suo studio partam docent, ut non minorem me putem hoc nostro studio utilitatem attulisse prima litterarum tentantibus rudimenta, quam qui graviora sectati sunt studia. Neque enim illud feliciter unquam consurget ædificium, cujus fundamenta bene jacta non fuerint. Confido igitur labores nostros æque omnibus iis fore gratos, & probabiles, qui veros Latinitatis fructus gustarunt, nulloque livoris stimulo premuntur. Sed quum in hac nostra florentissima Urbe multi existant, qui bonarum Artium studia apprime colant, optimeque de re litteraria sentiant, tu tamen mihi, Marce, solus visus es, cujus censuræ hoc qualecunque industriæ nostræ munus subjicerem. Ea enim es eruditione, eoque animi juxta, ingenii que candore, ut abs te de tota re simplex mihi, & apertum judicium sit expectandum. Opusculum igitur, te rogo, ea diligentia, qua cuncta consuevisti, consideres, & quid sentias, aliquando nos aut coram, aut litteris tuis certiores facias. Alia a nobis brevi expectabis, quæ nunc partim sub dolabra, partim sub runcina sunt. Vale, & me, quod facis, ama plurimum.

In fine autem voluminis hæc habentur:

Ad Lectorem.

Optime Lector, cui labores nostri haud ingrati sunt, unum hoc te scire volumus, nos in his puerorum institutionibus brevitatem maxime secutos esse, ne multa multis addendo, quod nostris temporibus plerique fecerunt, adolescentium magis defatigarem ingenia, quam adjuvarem. Neque enim ignoras, teneras puerorum mentes ad hæc rudimenta facilius compendioso, & recto, quam longo, & perplexo tramite perducere. In toto tamen Opere, si quid forte, aut minus illustre, aut minus tritum visum fuerit, optimi erit præ-

præceptoris id pueris clarum reddere. Satis est a nobis (ni fallimur) omnia non minore diligentia , quam fide esse præscripta. Illud etiam a te poscimus , ne simios quosdam caudatos audias , qui anxii , omnique invidiæ flagrantia æstuant nos persequuntur , aculeataque , si possunt , flagellant cauda . Quum enim quæ nos optime scripsimus , non intelligant , omnia invertunt , confundunt , sædant , & spurcas imitati muscas , lapidissimum culinæ nidorem relinquunt , purulenta ulcera sectantur . Si qua enim minus digna inesse putant , in illis pedem figunt , immorantur , invigilant , non abscedunt vel defessi . Si qua digna laude sunt , ut cæci , & lividi illa prætereunt , in illis connivent , in illis somnulosi sunt . Nihil denique omittunt , quod calumniis suis non persequantur . Ajunt enim , ut unum tibi ex trecentis erratis , quibus me apud miseros pueros convictum habent , aperiam , me negare comparativum posse referri ad unum sui generis . In quo (bone Deus) quam inique agant , attende , obsecro . Dixi enim ego , comparativum referri ad unum , neque addidi , sui , neque alieni generis , sed ad plura , non sui generis . Illæ autem ut nullius doctrinæ larvæ , me putaverunt dicere etiam de uno . Quis enim nescit , posse referri ad unum , & sui , & alieni generis ? ut , Marcus doctior est fratre ; & , Antonius condiscipulo suo . Sed simios cum cauda sua relinquamus . Tu autem , optime Lector , bene valebis , & Britannicum tuum amabis , qui de omnibus litterarum studiosis bene mereri gaudet .

III. Novum Grammaticarum Institutionum conditorem in Christophoro Barzizio Brixiana protulit literatura . De eo , ejusque Grammatica dictum a nobis est in superiore parte hujus Speciminis p. 106. Alium esse a Bergomate ejusdem nominis , Medicinæ in Patavino Gymnasio Professore , certos nos facit Helix Capreoli in Historia sua testimonium , Danielis quoque Cereti in Panegyrico , & ut reliqua omittam , ipsius Christophori libellus De fine Oratoris , Helix Capreolo nuncupa-

cupatus, de quo infra. Editionem Grammaticæ Barzizii, quam ex Annalibus Typographicis citata p. 106. allegavimus, ad manus nunc habemus cum hac scilicet nota: *Impressa Brixia per Bernardinum Papiensem, & Casarem Parmensem III. Non. Martias MCCCCLXXXVII. quo die & Brixiani Palatii fundamenta sunt posita.* Opus illud Christophorus nuncupavit Ludovico Martinengo, quem paulo ante laudatum a Pylade vidimus, eumque haud parcius commendat Christophorus, veræ nobilitatis, omnisque præstantiæ specimen appellans, insignem, atque magnificum Virum, quem non magis Majorum amplitudo, atque res gestæ, quam sua ipsius virtus, & animi præstantia illustrarent. In ea Epistola Christophorus materiæ, de qua disserit, humilitatem excusans, eam tamen esse affirmat, sine qua ad altioretem quamlibet disciplinarum aspirare non liceat; subditque, ingenti Scriptorum turba se minime deterrium fuisse a scribendo, sed invitatum porius ad scribendum, exemplo scilicet illorum, qui post superiorum temporum Grammaticos nova moliti rudimenta minime sunt veriti.

Epistola ipsa ita se habet:

*Præclaro, & generoso Viro Ludovico Martinengo Brixiano Patrio,
Christophorus Barzizius Salutem.*

SCio me communem Scriptorum sortem male audiendi non evasurum, qui de Grammaticis rudimentis, re quidem cum genere humili, tum eorum, qui de ea vel nostra scribere tempestate, numero, ut videtur, exposita adortus sim scribere; quando eo injustitiæ pridem deventum est, ut docti, atque modesti ab audaculis, indoctisque passim secentur. Cæterum istiusmodi blattarios, atque lucifugas, ut leves sunt, veræque eruditionis expertes, facile contempserim,

rim, qui quum nihil omnino de se, quod probandum sit, edere valeant, puerorum, & plebeculæ gratiolam consecretantes, pulpitarii vociferatores, veluti antesignani, aut delecti censores, quæ non consequuntur, scripta carpunt, atque vituperant; suam demum, eamque egregiam laudem ducentes, quum, ut sua verus Author laude fraudetur, effecerint. Viris autem doctis, iisdemque gravibus, ac bonis causam meam haud difficile me probaturum confido. Nam quod ad materiæ pertinet humilitatem, non inficiamur Grammatici muneris tantum esse, Latinam, hoc est litteratam orationem interpretari, & facere. Sed & illud pridem in confesso est, hujusmodi facultatem eam esse, sine qua ad altiorem quamlibet disciplinarum aspirare non liceat. Ingens vero Scriptorum turba non me certe magis a scribendo detertere, quam ad scribendum invitare debuit. Nam si post Varronem, Probum, Asperum, Caprum, Festum, Nonium, Donatum, Servium, Priscianum, aliosque superiorum temporum Grammaticos nemo scripsisset, citra temeritatem hoc non tentassem. Sed scripsere multi, scribuntque in dies. Exposita & nobis ista est alea. At quispiam dixerit. Quid tu? Doctius ne aliquid, atque utilius, quam quæ passim habentur, præsumis te allaturum? Istud alii viderint. Hoc tantum interim affirmaverim, stulte hoc me suscepisse negotii, nisi putassem has nostras institutiunculas, ullis, quæ ejusmodi sint, compendiis, deteriores non esse. Quod alioquin judicium tantisper rectum censebimus, si idem quum cæteris hominibus doctis, & qui rem vere expendant, steterit, tum tibi, cujus nomini Institutiones ipsas optimo consilio dedicavimus, Ludovice Martinenge, vir insignis, atque magnifice, quem non magis Majorum amplitudo, & res gestæ, quam tua ipsius virtus, & animi præstantia illustrat. Accipies itaque hoc, quicquid est, meæ erga te fidei, atque observantiæ monumentum. Quod sane si per se æstimetur, peregrinum est, vileque admodum; sin, & cum eo exhibentis alacritas, id medijsfidius, quod tibi etiam debeat esse gratissimum. Tamen & suavissimo Scipioni Mariæ tuo, quem tibi omnipotens Deus, Superique omnes fortunent, inque tuam, Majorumque tuorum virtutem, & gloriam immitant,

tant, erit suo tempore, spero, non inutile. Vale, veræ nobilitatis, omnisque præstantiæ specimen singulare.

IV. Joannes Franciscus Stoa, conterraneis suis, Pyladi, Britannico, & Barzizio socium se faciens, laurea corona, qua donatus fuit a Ludovico XII. Galliarum Rege, jam decorus accedit, & Grammaticale Opus nobis exhibet de Syllabarum quantitate, quod Epigraphias inscripsit. Hujus utilitatem commendant bini Brixiani Poetæ, quorum Epigrammata, primum quidem in fronte, aliud in calce Venetæ Editionis an. 1519. comparent, atque hujusmodi sunt.

Aurelii Clareti Brixiani

Epigramma.

*Culmina Parnasi quisquis conscendere montis,
Castalioque cupit tingere labra lacu:
Qualia vel Phæbus componere carmina, doctum
Hunc legat Auctorem, Delius alter erit.
Nam satur hic haustu largo Permessidos undæ,
Plenaque Apollineo numine corda gerens,
Syllaba quanta omnis, quid pes, quid littera, metrum,
Qua sit scandendus versus & arte docet.*

Jacobi Gadasci Brixiani

Hexastichon ad Lectorem.

*Perlege Quintiani, Lector, nova dogmata Vatis,
Que nec adhuc juvenes, nec didicere senes.
Increpat hic balbos, trepidantes dicere versus
Suscitat, & claudos hic docet ire pedes.
Lædere sed Vatem caveas, si lædere quis vult,
Suspensus laqueo Bubalus alter erit.*

At in Operis sui utilitate commendanda, aliisque ingenii sui fœtibus extollendis fines omnes excessisse videtur ipse Quintianus, quem propterea inter glorio-

P. II.

C

fos

fos Nebulones Gyraldus De Poet. nostr. temp. Dial. 2. reponere non dubitavit. Quintianum nostrum nebulas, potius quam lucem, Grammaticæ rei offudisse, haud ita facile assentimur, eundemque haud ægre ab arrogantia nota vindicabimus, si ejus vaniloquentiam, exultantiam quandam spiritus cum Jul. Cæsare Scaligero Poetic. lib. 6. appellemus. Antequam ipsum sua jactantem audiamus, cum eodem Scaligero animadvertimus, Quintianum in orationis asperitate adaman- da Beroaldos, ac Pium sequutum fuisse, quorum vitia auxit ingenii sui magnitudine. Philippo Beroaldo horridum eloquentiæ genus, quo rancidæ vetustatis vocabula, jam plane repudiata a sanis Scriptoribus, in usum Romanæ linguæ revocaret, placuisse, Paulus Jovius in Elogiis adnotavit; idque ipsum de Pio, cujus sermo, stylusque Oſcorum, & Aboriginum linguam referret; *factum autem est* (subdit Jovius) *ut ea obsole- ta, & ridendæ passim elocutionis verba, tanquam porten- ta, in Scenam transferint, confecta scilicet a lepidis ingeniis mirabili fabula (hæc enim impressa exstat) qua suo habitu, suoque idiomate, blaterantis Pii persona induci- tur, ab objurgante, reprehendenteque Prisciano meritis flagello pœnas, puerorum male discantium more, clunibus nudatis excipiens, quo ipso tempore, ut pariter narrat Jovius, ludis Capitolinis stupendo apparatu repræsen- tatis, Plauti Penulus per ingenuos, nobilesque Comæ- dos editus fuit, id expetente Leone Pontifice, quod tum frater Julianus a populo Romano civitate dona- retur.*

Quam magnifice de se senserit Quintianus noster, illico

illico innotescit ex Epistola, qua suas Epographias Antonio, & Jaffredo filiis Jaffredi Caroli Delphinatus, & Mediolanensium Præsidis dedicavit, rurestre opus eas appellans, quod *rurestri* (ait) *detentus lenocinio*, nam *ruri* eram, & ne sine linea prætermitteretur dies, laboriosum Opus tandem plurimis noctisurgiis, diu jejuniisve perfeci. Qua vero felicitate hujusmodi Opus, & alia etiam perfecit, in ejus Epistolæ sine his verbis decantat: *Feci, quod potui; potui, quod volui*. *Lividi emergunt, ut mihi detrabant, non facient tamen, quum meum non sis proterminatum nomen*. *Multa edidi, plura editurus, & plurima*. *Nonne plusquam carminum sex milia nostrorum edita?* *Nonne & diecula sola octingentos deducere versiculos, & mille, qui me experti sunt, noverunt?* *Quot Tragædiæ, quot Comædiæ, quot Satyræ a me natæ luctantur egredi?* *Quid Epigrammata, Monosyllaba, Disticha, in Valerium Maximum dubitationum volumina, de Mulieribus Opera, Panegyricos, Orationes, Fabulas, Epistolas, Odas, Ludovici Regis vitam, Miraculorum libros etrbnicorum, Endecasyllaba, Sylvas, & Heracleam, Bellumve Venetum, & Orphea, aliaque sexcenta enumerem?* *Nonne tertium, & vigesimum agens annum, Patris vestri munere publicus plausibiliter auctoratus sum Professor?* *Nonne ab invictissimo Galliarum Rege Ludovico corona decoratus sum laurea?* *an id factum sine honoris adminiculo, ut quod pauci in senectute, & senio assequuntur, ego in quintæ Olympiadis limbo Poeta fuerim laureatus?*

In Epographia autem tertia de mendoso quodam Auli Gellii loco disserens: *Quintiani* (inquit) *periculo*

legas, a vehendo rector. Hoc non viderunt, qui emendatum præferentes Gellium imprimi curaverunt; quos non nomino, ne malevolos irritem, putantes nepharium, & morte piandum, si juvenis Quintianus in aliquibus melior longævis appareat. Ab duræ cervices! An ignorant & doctiores multa scire, non tamen omnia? Et in Epographia quarta: Hos volui (inquit) edidisse significatus; nil atrocius, quam in re literaria labores exantlatos injuria temporum suppressi. Deos precor immortales, ut nunquam nostris cariota annorum series libellis noceat; quod si affecutus fuero, me olim vixisse testabitur posteritas.

Nimius essem, si singulos ex eo Quintiani Opere locos exscriberem, in quibus exultans, suisque laboribus magnopere gaudens conspicitur. At cur dictus fuerit Stoa, & unde illi Quintiani nomen, minime omittendum, eoque magis, quod hujusmodi excerpta certas nobis ingerunt de illius Vita, ac Scriptis notitias. De Stoa cognomento hæc habet Epogr. 2. c. 15. *Olim dum adolescens adhuc literis incumberem (absit jactantia) tanta mei apud omnes videbatur spes, ut in ore omnium illud frequens esset μουσῶν σόα, idest musarum porticus, & testudo, nam, quidquid conabar dicere versus erat; quod & nunc omnes testantur. Id nomen tantæ inter socios fuit assuetudinis, ut nunquam deciderit, neque decideret, dum spiritus hos reget artus. De Quintiani autem cognomento Epogr. 4. Dum olim (inquit) adolescens ipse in Musarum penario, & Camænalibus incumberem vigilis (ita dante omnium rerum opifice) cæteris antistare viderer, multi non spernendæ eruditionis juvenes synchro-*
ni

ni meam lubenti limam animo subibant, utpote quem suorum assertorem carminum dicerent, & ut alluderent ad illud Martialis dictum, me Quintianum adpellitarunt. Quod nomen servans augebo; & si primævos ejusdem nominis non excellere Opera nostra demonstrabunt, tamen illos me suum retinere nomen non pœnitebit. Dein veteribus illis Quintianis enumeratis, sermonem his verbis absolvit: Dii faxint, ut idoneum vivam ævum (nam & ipse sum philubios, idest vitæ cupidus) nec ego ipse inter sæculi oblitescam tenebras, quia tertio, & vigesimo ætatis anno publico legendi, & vigesimo quarto laurea donatus munere. Notandum hic obiter occurrit, haud recte ex hoc ipso textu a quopiam nuperrime in dubium revocatum fuisse, num Quintianum, Brixianæ ditionis oppidum, Stoæ nostri patria fuerit, quam potius fuisse censuit oppidum aliud ejusdem ditionis, nimirum Palatiolum, quod Joanni Britannico ortum dedisse perhibetur. Haud recte inquam, nam Quintianum se appellatum allusione facta ad Quintianum, quem suorum carminum assertorem scribit Martialis, dum asserit Stoa, id nequaquam refragatur communi de illius patriæ sententiæ, quam extra omnem dubitationis aleam constituit Joannis Planerii Quintiani auctoritas. Hic illustres Quintiani oppidi Viros recensens in Opusculo, quod brevem patriæ suæ descriptionem inscripsit, eorundem censum a Quintiano Stoa incipit in hunc modum: *Floret igitur bodie, atque in æternum florebit Joannes ille Franciscus Quintianus Stoa, Poeta laureatus, municeps, coetaneusque meus, Vir & doctrina, & vitæ integritate insignis, qui olim in florentissimo Ticinensi Gymnasio*

naſſo magna audientium admiratione literas humaniores publice profeſſus eſt, cujuſque laudes libentiſſime nunc percurrerem, niſi ejus volumina jam triginta & amplius ab hinc annis in lucem edita ſummam præſtantiſſimi illius Viri erudiſionem oſtenderent, ac perſpicuam omnibus facerent. Exſtat Epographiarum volumen maximum, nunc & auctum, & diligentius quam antea ab ipſo Auctore elaboratum. Exſtat & Cbriſti Servatoris noſtri Viſa, vario carminum genere expreſſa. Habet & alia propædium in lucem edenda; cujus eo libentiſſe mentionem facio, quod non minus de patria, quam de literis meritis ſit, & ſingulari etiam benevolentia, & charitate me ipſum ſemper proſecutus fuerit. Tam apertum, atque indubitatum Planerii teſtimonium minime exploratum habuit, qui de ortu Stoæ noſtri Quintiano oppido litem movit; dumque ille ipſe opinationis ſuæ aſſertorem fecit non alium, quam eundem Stoam, utpote qui cum Britannico, quin etiam cum Pylade commune municipium ſe fuiſſe ſortitum affirmaverit; nã ille municipiî vocem parum exploratam habuit, putans ad unum & idem oppidum, communicipes omnes complectens, neceſſario referendam, quum certo conſtet, latiore eadem ſignificatum ineſſe, ut nimirum municipes, quemadmodum cives, & conterranei, non tam idem oppidum, & eandem urbem, quam eandem regionem pro patria ſortiti intelligantur.

Eum ipſum Britannicum non municipem tantum, ſed præceptorem etiam ſuum dixit Quintianus in quadam ad Epographias præmonitione, quam integram inferius aſſeremus. Fauſtinum pariter Cinthium audivit,

divit, nam Epogr. 4. de eo ita loquitur: *Hoc etiam in Claudianum Janus Parrhasius adnotavit, sed antequam Commentarios ille suos edidisset, illud adnotasse me Faustinus Cinsbicus præceptor meus, tum Græcis, tum Latinis literis adprime eruditus, cognovit. Cognovit, inquam, utpote meorum studiorum stimulus, meum calcar, incitamentumque, cui debeo ac patri, utpote qui semper me in Palladia aluerit militia, & qui meum laudando mirabatur ingenium, quamvis tunc temporis decimum octavum non excesserim annum. Heu! Tempora labuntur, & nil profecerim. Cesset gemitus, & vitæ etiam superest spatium, quum nunc vix quintam egredior Olympiada.*

Qui omnem, ut apparet, se, & sua commendandi occasionem arripiebat Stoa, id ipsum præstitit Domitio fratri se comparans Epogr. 1. cap. 21. *Syzigiam tamen (inquit) inter pedum accidentia non poni Domitius Quintus Pbanix frater meus innuit in sua Metrobasi. Conferentur duorum fratrum signa, licet ipse vigesimum, & primum adhuc non tetigerit annum, & trutinabuntur doctiores, an illi, an mihi, qui nuper quintum, & vigesimum perfeci annum, sit assentiendum.* Joannes Planerius in libello, de quo supra, illico post Joannem Franciscum Stoam ejus fratris mentionem iniecit, quem tamen solo Cælii nomine designavit, eundem hujusce-modi exornans elogio, cui & patris elogium intexuit: *Est & frater ejus Cælius ingeniorum scrutator acerrimus, quem universa Brixiae Civitas arcubus triumphalibus, quos in honorem Cardinali Cornelio erexerat, præfecit, quosque ille ita variis, eruditisque inscriptionibus insignivit, & decoravit, ut miro quodam applausu ab omni-*

omnibus legerentur, atque approbarentur. Habet & ipse plurima volumina edenda. Hi duo filii patrem Joannem fortiti sunt, Virum per ea tempora doctum, & integerrimum (deperditæ enim erant tunc Romanæ literæ) a quo, tanquam a fonte, innumeri fere discipuli emanarunt. Is igitur per sexaginta & amplius annos Grammaticam, literasque Latinas professus, tantum laboribus, & vigilantia effecit, ut non solum filios, sed & innumeros fere erudierit, a quo etiam ego puer prima rei literariæ elementa didici: Vir certe omni laude, æternaque memoria dignus.

Quo majori animi, verborumque exultantia Quintianus Stoa suum ingenium, suaque Scripta celebravit, eo tristiori supercilio alios omnes a se dissidentes excepit, ac castigavit. Nemini prorsus, qui ea tempestate in Grammaticorum, seu Latinæ linguæ reparatorum censum veniret, Quintiani censuram pepercisse, ut primum quis oculos ad Epographiarum libri oras converterit, statim dignosceret; nam in iis eorundem nomina velut acervatim indicantur, & quidem non honoris causa, ut adjuncta illa demonstrant, fallitur, in errorem labitur, ballucinatur, male sentit, imperite scribit, nugatur, risum ciet, vaniloqua effutit, puerilia, & infantissima effatur, atque alia hujusce generis synonyma, quorum divitem omnino copiam sibi Quintianus comparaverat. Ex veteribus Grammaticis Priscianum cæteris frequentius suæ ferulæ subjecit; ex recentioribus vero Nebrissensem, Ascensium, Calepinum, Calderinum, Nigrum, Vallam tam Georgium, quam Siculum, Merulam, Pastranensem, Mancinellum, Nestorem,

storem, Ferrerum, Sipontinum, Omnibonum, Ga-
 guinum, Sulpicium, Tortelium, Junianum. Infensissi-
 me autem inleſtatur Phineum quendam, cui bellum
 mox in ipſa Epiftola Nuncupatoria indicit, nam ibi de
 calumniatoribus ſuis, quos Quintianomaltices vocat,
 conquerens, *quorum princeps ſcitote* (inquit) *Phinea,*
quocirca ſepiſſime nominatim in eum me invebi, non mi-
rabimini. Inſurgit, latrat, indignatur, aliquando latrans
inſonat, inſonans inſanit, inſaniens furit; ter mecum diſ-
putationis gratia congreſſum ita contrivi, ut nunc, licet
abſens, nomen formidet meum: formidantem in triviis,
ac viſtum queritantem permittamus. Vel ipſum Phinei
 nomen ad convicium traducit Quintianus Epogra-
 phiam quintam ita claudens: *Phinea leteris, quia hæc*
quinta noſtra ad umbilicum perducta ſit Epographia. Fi-
nis prope eſt, quo ad extremum trabaris ſupplicium.

Nec ipſi Stoæ conterranei, Pylades ſcilicet, Britan-
 nicus, & Barzizius, ejus virgam evaſerunt; non pu-
 riſſimi Latinitatis fontes, Barbarus, Politianus, atque
 Manutius; non denique ii ipſi, quos magni ſe face-
 re pluribus in locis proſitetur, atque honorificis verbis
 commemorat in ſuperius indicata præmonitione. Eam
 hic exhibebo, unde Quintiani ſtilum melius digno-
 ſcamus, hiſpidam, inquam, illam elocutionem, quam
 ipſe magnopere laudavit, quin æmulari contendit,
 ratus ſolos non admittere prophanos, ut ejus verba
 declarabunt; quam tamen ipſi parum probavit vel
 ejus amiſſimus Joannes Baptiſta Egnatius, cujus mihi
 occurrit Epiftola inter Planerii Epiftolas paulo ante ci-
 tatas, monitum hoc ad Quintianum noſtrum comple-

P. II.

D

ctens:

Etens: Illud vero interim præterire non possum, quod ab initio debueram, tuas mihi literas multo gratissimas existisse, quæ tamen aliquanto plus jucunditatis attulissent, si ingenii tui felicitatem ad meliora vertisses, hoc est, si te Ciceronis, aut ejus ætatis Scriptorum similiorem esse maluisses, quæ in re nec judicium tibi deesse, nec ingenium plane video, nisi fortasse (ut res humanæ sunt) tu tuo, ego meo gustui plus faveo. En Quintiani præmonitio.

Quod potius ad utilitatem, quam ad ostentationem hoc Opus sit compositum, & primo hic se Auctor excusat.

Conclamati defunctorum Manes, sacrosanctæ viventium Academix, litteratissimi, ac famigeratiores gymnasiarchæ, eruditionis plena juvenus, denudato capite, submissivè genibus, & admotis labro digitis supplex deprecor, ut erroribus, quos aliorum sparsim, fartim, agminatim, & jugiter enotavi, vestræ non offendantur aures, vel videndo non succrescat nausea. Non enim fuit mei institutum cum larvis luctari, aut in mortuos insurgere, aut eorum, qui ingenii sui tot reliquerunt monumenta nomen obfuscare, neque Synchronorum anthracino colore famam candicantem obtenebrare. Indignum namque censeo aliis oppressis se extollere, ad astra evehere. Me non cogit ostentatio, sed utilitas, non virulenta rabies, sed conferens sedulitas. An aliquibus hæc adulabitur opinio? Quintianum scilicet, qui doctos diligit, nulli detrahit, syncere vivit, has, ut livorem expuat, edidisse Epographias? Non certe: & qui norunt, confitebuntur, me nunquam alienos affectasse, aut labores lancinasse. Vita cassos, & fato sinamus fundos. Nam illi meis laudibus minime laudantur, neque vituperio nostro vituperantur. Coævus, sed longe majores natu, & auctoritate me correxisse quis succenseat? Quod Baptistæ Pio non hæream, id vitio non dandum esse persuadeo. Quem magis miror, quam Pium? Pium, inquam, meum extollo, quo typi meandros, & Autorum supero cyaneas. Hujus stylium non tantum laudo, sed & etiam æmulari contendo, quem

quem profani non admittunt. O duras cervices, ubi est eruditio, nisi in meo Pio? Hic me efformat, me fabricat. An ergo virosis incessam hunc aculeis? Quod Jani Parrhasii penitus non admittam sententias, vel ipse illaudatum non adscribet. Janum amo, velut litterarum examen, ac eloquentiæ vastissimum pelagus. Quod Joannem Britannicum arguam, nulli infandum dijudico, quem si odii causa confoderem, ac mucrone literario dissecarem, vel Persis adnudentibus grave plecterer, eo quod in ingratitudinis vitium incurrerem. Fuit enim præceptor meus, & municipalis est noster. Quod Aldum, utriusque Linguae reparatorem aliquando minus teneam, quis vituperet? Certe nullus, cum in eo omnium Autorum effulgeant manes. Franciscus Marantius, Feretus, Crucius, & Hispani illi, cæterive a me districti conqueri poterunt, quos veluti antesignanos semper habeo, quorum non tantum damnavi, sed assatim rejeci sententias. Boni igitur, Lector, consules, si in hos confurgam. Quid enim? Juvenis acyros, & vix litterarum rudimenta eruditus minervalibus nocuerit vexillariis? Et hoc unum scias indubitanter velim, me vigesimum annum, cum istud Opus effigiavi, mox in scriniis delituit, donec multis stimulantibus in publicum ediderim; quod nova aliquando interferam non dubites. Hoc namque fecit recens recognitio, ac nuper imposita extrema manus. Igitur, humanissime Lector, utilitati potius, quam ostentationi hosce qualescunque labores nostros adscribes.

Quam acriter in Sacerdotum etiam, & Concionatorum imperitiâ Quintianus exarserit, plura sunt loca, quæ demonstrent. In Epogr. 1. *In erroribus (inquit) Sacerdotes indoctos sæpius invenio obnoxios. Hui, quid mirum? Isti namque Sacerdotes (eruditos excipio) doctiorum obrundunt aures, quod quia verba nesciunt exprimere, ne dum bene eloqui, literas contemnunt, sacra fastidio habent. Horum quod est studium? lenociniis incumbere, crines coaptare, aleas pertrahere, Bacchanalibus*

bus indulgere. Hem si jure nostro sacris initiarentur, nunquam indoctos divinis mysteriis adscriberem: sunt suapte barbari. Et in Epogr. 4. Errant aliqui longantes Origenes, & præsertim isti idiotæ Concionatores, qui nihil effutiant præter barbariem. Prob supreme Juppiter, nonne sibilo multandi essent? Malunt enim hi barbaros habere duces, quam bonos sequi auctores. Ac non multo post: Hic in Sacerdotes, non possum, quin inuebar ineruditos. Legitur autem in funebri Evangelio, Tu videris, temporis futuri in subjunctivo, scilicet media brevi, hi namque media longa proferunt. Dii boni! ut diverticulum faciam, omnino excalescens cogit vebementia. Quid (bonos, ut multi sunt, excipio) quod ineruditi sunt? quid quod rudimenta fere percipiant? & vix legendo dictiones exprimant? quid quod cenis indulgeant? myropolia, constringas queritent? calamistro cincinnos coaptent? Demum in Epogr. 4. Ecce iterum, ecce ignari adsunt mihi sæpe vocandi, risum eliciunt Sacerdotes ineptissimi, literarum expertes, qui in Evangelio, Nolite timere, Jesum quaeritis, proferunt Nolite media brevi. Ita precor, ut dentes exerceant (bonos excipio) per medium rumpantur.

Quintianum inviso adeo dente omnes carpentem, nil mirum, aliorum & ipsum morsibus patuisse, iisque admodum vulnificis, ut Epographiæ quartæ Proœmium, quod assero, declarabit.

Jo. Francisci Quintiani Stoæ Poetæ laureati de Syllabarum quantitate Epographia quarta. Proœmium.

Cogitarum, humanissimi literarum cultores, ac Apollinææ Sectatores Academiæ, auspiciis nostris umbilicum adponere, & absque latratorum nihil pendenda rabie, ac sine lavernarum obrutis aculeis coronidem attingere. Sed præter opi-

opinionem nostram aliqui non defuerunt nugivenduli, qui stimulante livore, lancinantique cordolio exciti in tenebris exputant, me scilicet in hoc scribendi negotio insuadere, ut cæteris antistare videar, consuetum rati aliquos doctioribus reclamare, ut nomen adipiscantur famigeratius. Pro supremum nephas? Quid disseminant? Quid implanant? Quid leviora floccis dispergunt? Hoc exantlaverim, ut aliorum refutem sententias, & apud omnes sim plausibilior? Id non me (ut in Operis dixi vestibulo) impellit, non stimulat. Quis enim est tam insanus, & meracæ indigens anticyræ, qui doctis detrahendo, se doctum adpellitari persuadeat? Sciant velim hi alieni nominis turpatores, alienarum vigiliarum hamiotæ enotasse hoc nostrum fuisse institutum eruditiorum enotasse labeculas, non ut eorum candidum obfuscarem ingenium, sed ut eorum devio itinere in camænali penario veritatis excussor fierem, quod legentes proculdubio adseverabunt. Invidia, ut oblatrent, cogit. Parco: non eis parcunt tamen intercutanei, & m. dulcius circumfusi suspiritus. & intima tormenta, quæ cæteri potiuntur invidi, infurgant, gaudeo, dispereant, lætor. Nam ut ait ingeniosus Naso, *Summa petit livor*. Si essem diobolaris, ac sellularius juvenis, abessent invidi; sed quia (citra jactantiam) inter litterarum milites adnumeror, & feliciter audeam, non possunt quin spumosis detrahant singultibus. Taceant, precor, & quartam recto lumine rimentur. Epographiam, in qua quoad multijugam observationem, & ad multiplicem frugem, prioribus non tantum confrenda, sed & præponenda viderint adnotamenta & primo quot modis mediæ cognoscantur videamus syllabæ.

Antequam Quintianum hoc loco (nam alibi de eo recurrit sermo) dimittamus, Lectorem monemus, inter Epistolas Joannis Planerii superius allegati unam exstare, qua ille Paulo Manutio significat, Quintiani Storæ obitum ex squinanthiæ morbo contigisse an. 1557. nonis Octobris, quum ipse septuagesimum tertium ætatis suæ ageret. In eadem testatur Planerius, eam fuisse

se Quintiani nominis famam, ut ad hunc videndum, & cognoscendum ex ultimis Gallix finibus venerint olim Brixiam Viri doctissimi; atque his verbis Epistolam claudit: *Felicissima fuit illa ætas, in qua pater tuus Aldus, Quintianus Stoa, Egnatius, Bembus, Sabellicus, Politianus, Hermolaus Barbarus, Joannes Picus Mirandulanus una floruerunt.* Hæc Planerii verba incuriose legerunt, qui Pico Mirandulano Quintianum Stoam comparatum fuisse tradiderunt a Planerio, Egnatio, Aldo, Bembo, Sabellico, Politiano, & Barbaro, ut in Histor. Gymn. Patav. T. 2. l. 2. p. 206.

Contra Grammatica Joannis Tortellii Aretini Commentaria scripsisse Quintianum Stoam Annotationes, docemur ex c. 31. Epogr. 1. Opus illud Tortellius Nicolao V. Pontifici Maximo dedicaverat, in Vaticana Bibliotheca reponendum, non quidem (inquit) ut Institutionibus Grammaticis, Poetarumque historiunculis tua Beatitudo indigeat, qui ceteros in doctrinis omnibus etiam minutis ex summa ingenii, memoriaque felicitate præcellis, sed ut in tua illa Bibliotheca, quam omnium, quæ fuerunt, præstantissimam comparas, aliquo pacto collocare possis. Nam licet ex magnificentia animi tui, qui nonnisi clarissima in literis, ædificiisque, & rebus aggredieris, Viros utriusque lingue eruditissimos ex omnibus fere terris, veluti ad virtutis quoddam asyllum convocaveris, quos ut summi possint excolere ingenium, laudemque sibi parare, & aliquid conficere, quod posteritati prodesse possit, maximis præmiis affeceris, non tamen deterreborego aliquid pro mea parvitate tue Bibliothecæ offerre. Prosequitur Tortellius in ea Epistola munificentiam Ni-

Nicolai V. erga literas commendare; deinde ad Grammaticam facultatem commendandam accedit, & in calce Epistolæ testem adhibet Quintilianum, quod ea necessaria sit pueris, jucunda senibus, dulcis secreto- rum comes, & quæ vel sola plus habet operis, quam ostentationis.

V. Paulus Suardus inter Brixianos Grammaticos quî- tum modo occupet locum, principe quidem dignus ex Joannis Antonii Cathanei suffragio. Hoc mihi occurrit ad calcem Operum Marini Becichemi datum Ferrariæ anno 1504. atque hujusmodi est: *Naturæ ætatem nostram plurimum debere, nemo est qui neget, eruditissime Præceptor, quæ fulgentissimum Grammaticæ sydus Paulum produxit. Id ex nitidissimo Opere in lucem ediso perspicue est conspiciere, quod laudibus extollere superfluum esse censeo, quia ex se quale sit, satis superque patet.* Pauli Suardi Brixiani mentionem injicit, ut mox videbimus, in suo Mercurio Augustinus Saturnius, eum- que insignem Grammaticum appellat. Quoniam vero hujuscemodi Opus Pauli Suardi nancisci, nondum mihi contigit, ne omnino cursim, & breviter ejus nomen attigisse videar, exhibendam hoc loco puto partem quandam Epistolæ ab ipso datæ ad Petrum Federicum, & ex eo ipso volumine, unde Cathanei testimonium recitavimus, desumptæ; partem inquam, posteriorem scilicet, in qua, post celebratas in priore Becichemi laudes, argumentum tractat, haud profecto alienum a Grammaticæ facultatis Professore, alienum tamen, ut verum fatear, a doctiorum Grammaticorum sententia. Gratificatus fuisse videtur in eo argumeto

tra-

tractando Suardus Becichemo, cui, ut ex ejus in Plinii Prælectione constat, a Raphaele Regio datum vitio fuerat, quod Græcas literas ignoraret.

Ex Epistola Pauli Suardi ad Petrum Federici generosum;

Or magnificum Virum.

NULLUM enim hominum genus stultius, aut insolentius Græculis video, qui quum in legendis Erotematis, Æsopique Fabulis multum temporis consumpserint, se hominum primos existimant, & neminem citra Græcarum litterarum cognitionem doctum fieri posse garriunt, quoniam eruditionis Latinæ Græci auctores fuerunt. Ergo nec Græci sine Barbarorum institutionibus boni efficiebantur, quia omnis ferme doctrina ab his ad illos emanaverat. O insaniam Democriti risu dignam! Romani Græcis litteris olim operam dabant, ut res, non verba discerent, quoniam latinitas ita rerum, & disciplinarum inops erat, ut in doctos sine Græcis evadere non possent. Jamdiu autem ingeniis omnibusque disciplinis adeo est aucta, ut polyhistores, summique Viri sine Græcis effici possimus: quales facti sunt Pomponius Lætus, Christophorus Barzizius, Pamphilus Saxus, multique alii homines clarissimi. Quid M. Antonius Sabellicus, & Philippus Beroaldus Viri antiquos præclaris Operibus suis provocantes? ipsos, quæso, interrogent, eone fastigii per Græcam eruditionem venerunt? Nonne Diomedes, Priscianus, & alii Grammatici. Salustius, Livius, & alii Historici. Virgilius, Ovidius, & alii Poetæ. Cicero. Quintilianus. & alii Oratores, sive Rhetores. Seneca. Plinius, alique Auctores, undeque docti, quidquid boni Græcia habuit, ad nos transtulerunt, in meliusque redegerunt? Nemini sanæ mentis dubium. Hos si habuissent veteres Romani, nunquam ad Græcos confugissent, sed carebant iis, quos vel in stilo imitarentur. Utinam nunc tantum ingenio, atque studio consequeremur, quantum in omni dicendi genere habemus. Sed vide Ciceronis sententiam de Græcis, & Latinis, *meum judicium* (sic enim ait in principio Tusculanarum Quæstionum) *semper fuit, omnia nostros aut invenisse per se sapientius, quam Græc.*

Græcos, aut accepta ab illis fecisse meliora. Bona insuper fere omnia Græcorum Opera latina facta sunt, quorum multa apud illos desiderantur. Olim (ut uno concludam verbo) florere Barbari, subinde Græci, nunc Latini florent.

In calce Epistolæ legitur:

Hæc ad te scribere volui, magnifice Vir, quem novi Romanarum litterarum pariter, & bonorum litteratorum amicum, quemque scio non mediocriter gavisurum, quod præstantem, & rarissimum habeamus virum, qui juvenes bonis & litteris, & moribus instituturus est, ac civitati nostræ inclytis litterarum monumentis non parum decoris allaturus; id enim genus homines plurimo & usui, & honori sunt civitatibus. Vale Federicorum gentis antiquissimæ decus. Brixix tertio Kal. Jul. MDIII.

Inter Opuscula Bernardini Macii Bornati Brixiani duæ mihi ejus occurrunt Epistolæ ad Paulum Suardum datæ an. 1501. in quarum una se perlegisse scribit Macius Opusculum Pauli, quod quam sit novum, varium, emunctum, utile, ac jucundum, viderint docti, ait Macius, modo absit invidia. In alia vero hæc Macii sunt verba: *Prodis in medium ornatu scientiæ præditus, veluti equus robustus campum quatiens robusto pede, armis insignitus, assessore suo existente valido. Hujus propositi mens laudatur, sed tamen danda est opera, ut frons nostra toti populo conveniat, & in figura communi maneat, ut ne quid nimis.* Hujuscemodi monitum Macii ad Suardum aliquam suspicionem ingerit, quam Pauli Suardi nomen semel, & iterum in Volumine Operum Marini Becichemi atramento, ut mihi observare contigit, deletum adauget, Paulum scilicet in causa Religionis aliquid sensisse, quod cum communi Ecclesiæ sententia minime conveniret. Pravas quasdam

P. II.

E

opi-

opiniones ea tempestate Brixia apud aliquos invaluisse, fidem nobis facere videtur alia ipsius Bernardini ad Ludovicum Nassinum Epistola, seu brevis Tractatus de Animæ immortalitate, & apertius adhuc ejusdem ad Thomam Lambertum Epistola, cujus hujusmodi est initium: *Ubi domum perventum est, habita, ut scis, concertatione in tuo prædiali fundo amænissimo, confiso arbore multa, & perpetuæ frondis honore virente, apud Turricellam, ita dicitur, non potui non subridere ineptias amici tui, qui tam obstinate induruit in opinione evidenter falsa, quod essent plures Dii.*

VI. Post quinque usque adhuc recensitos Grammaticarum Institutionum conditores, quos una ætate Brixiana literatura progenuit, adeo hæc se minime sensit effectam, ut in extrema velut paritura fœtum emiserit, in quo vires suas potissimum experiretur Grammatica, quique inter præcipuos ejus Artis Scriptores poneretur, & a quo reliqui, qui ante scripserant, plus splendoris recepisse, quam illi tribuisse viderentur. Hujuscemodi elogiis Augustinum Saturnium Lazaroneum decoravit Joannes Pincius Poeta laureatus in Epistola, quam ejusdem Mercurio Majoti, seu Grammaticarum Institutionum libris decem editis Basileæ an. 1546. & Lugduni an. 1556. præposuit. Ea data est ad ipsum Saturnium anno 1531. hortaturque, ut Opus suum auspicato in lucem prodire permitteret, cui venienti occurrerent gratissimi adolescentes, illudque amplecterentur.

Buennum Vallis Camunicæ oppidum Saturnii nostri patria fuit, ut ipse testatur Mercur. l. 5. c. 16. his verbis: *Est autem Buennum dulce mihi natale solum, oppidulum*

dulum sane illustre Oreola in Valle, quam nunc vulgo Camonicam dicunt, supra lacum Sebinkum XIII. millibus passuum ad Orientem situm a flumine Ollio, quod oppidulum Civile præterfluit, fere plus, aut minus mille passuum distans, Vulcano sacrum.

Joannem Taberium Brixianum, de quo plura in prima hujus Speciminis parte, sibi institutorem contigisse fatetur Saturnius, & quantum illi debeat ad Operis calcem declarat in hunc modum: *Secundum Deum non parvam nobis docendis partem, felicitis memorie institutor meus, Joannes Taberius Rovatensis, sibi vindicat: Vir unus post homines natos, simul inter doctos longe optimus, simul inter bonos utriusque lingue longe doctissimus. Cujus optimis auspiciis annum ipsi circiter vigesimum jam agentes (nam tum rudes adhuc eramus) doctas literas primoribus labellis degustare capimus, ejusque felici ductu, studio nostro septem annis colophonem addidimus. Quem condentibus hæc nobis, ut erat in pensandis, æstimandisque omnibus scriptis emunctissimæ navis, ac prorsum Lydius (ut ajunt) lapis, quo tu Brixia caput Cenomanum, civitas per te inclytissima, luculentissimi fideris instar, jucundo splendore fulgebas, si superstitem habuissimus, divi boni, quanto consultior, Mercuri mi, quanto limatior in publicum prodisses. Quapropter apud hominem excellentissimum quum tam liberaliter instituti simus, sane quam mercedem Tibales ille Milesius a Mandrayto cælestia studia a se edocto, sibi perpetim reddi voluit, hanc nos propriam, ac perpetuam preceptorum nostro persolvemus, nempe quidquid est in hoc libello polioris doctrine, id univsum post Deum illi acceptum referentes.*

Hæc ipsa Saturnii verba non gratum tantum animi-
 mum erga præceptorem demonstrant, sed præterea ca-
 stigatæ prorsus, ac nitidæ Orationis genus, ab omni
 barbarie, & præsertim a rancidæ Latinitatis vocabulis,
 quibus utentem audivimus Quintianum Stoa, aspera-
 que ejusdem elocutione nimis quam distans: quo fit,
 ut, si jure ac merito a Grammaticis petimus, Latine
 loquendi facultatem, quam præceptionibus tradunt,
 scriptis suis comprobent, imitenturque Polycletum non
 ante celebrem illum statuas recte fingendi Canona in
 lucem protulisse visum, quam publice proposita statua,
 velut artis exemplo, suas ipse regulas egregie præstando
 confirmasset; nemo profecto erit, qui Saturnii nostri
 Mercurium evolvens inficias eat, eundem Artem, quam
 docuit, calluisse, quod clarius adhuc evincent quam
 plura ejus libri loca jam jam afferenda.

Inter Grammaticorum duces, quibuscum Saturnius
 luctatur, neminem certe frequentius ad pugnam pro-
 vocat, quam Laurentium Vallam Romanum, celeberrimum
 illum Latinæ linguæ reparatorem, atque illu-
 stratorem, qui nimirum, ut Pauli Jovii in ejus Elog.
 verbis utar, *a Gothicis temporibus usque ad patrum no-*
strorum memoriam præalto sepultos somno cives suos ad
nobilium literarum studium excitavit; indignatus enim
tandiu corrumpi sæculum leguleorum, & sophistarum im-
mani conspiratione, optimasque artes inculta sermonis bar-
barie defœdari, Elegantiarum libros edidit, traditis Roma-
næ elocutionis præceptis ex accurata veterum Scriptorum
observatione, quibus juventus æmulandi studio ad deter-
gendas corruptarum literarum sordes accenderetur. In-
 tum

tum a Saturnio cum Valla certamen graphice describens in citata Epistola Pincius, *ille*. (inquit) *obequitans latius pugnat, tu arctius concludis: ille multo acumine occurrit, tu & mucrone, & peritia, & pondere bellantem sustines. Quin vero diu disceptatum sit, pedem referat adversarius, necesse est, & se se dedat. Speciosissimum sane literarium spectaculum, & incruentum. Incruentum utique; asperum tamen, & ferox, ad cujus specimen excrispsimus ex Saturnii Mercurio, quæ sequuntur.*

Ut primum Laurentium obvium habet Saturnius, eundem erroris, hallucinationis, stultitiæ, stoliditatis illico accusat, scilicet libro primo. At libri tertii c. 18. probaturus, ratione nihil prohiberi, quominus dicas, *legere interest mei, tui, sui* Laurentium his verbis compellat:

Ex lib. 3 c. 18.

Ohe desine tandem Laurenti tam impotenter efferri. Nam quod pertinacissime tenes, *mei, tui, sui, nostri, & vestri* primitivorum genitivos usque passivam habere significationem, ac propterea non licere dici, *legere interest mei, tui, sui, nostri, & vestri*, quod ea verba genitivum tibi exigant non pathicum, sed activum, antecedens tuæ istius ratiocinationis non undecumque verum ostendam.

Dein pluribus exemplis in medium allatis, caput ita concludit:

Quibus exemplis si satis liquet, veteres illos totius veræ latinitatis auctores, super his primitivorum genitivis non usque adeo fuisse anxios, aut superstitiosos, ut non promiscue, indiscreteque utroque versum eis uterentur, equidem non video, quo minus recte, licet inusitate, dicam *legere interest mei, tui, nostri, & vestri*, sicut *ego indigeo tui, tu mei, ille nostri*. Quare pronomina hæc sint promiscua. Nec vereamur, quicquid Laurentius oblatrat, his active, & passive uti, ubi ubi opus fuerit.

Ca-

Capite vero 22. ejusdem libri falsam asserens Laurentii præceptionem, qui verbis *interest*, & *refert* personalibus nil aliud supponendum statuit, quam pronomina quædam in neutro genere, hæc habet:

Ex lib. 3. c. 22.

Hem si quis Latinam linguam probe sartam (ut ajunt) ac tectam esse velit, hanc Laurentio Vallensi tuendam, propugnandamque committat. Nihil enim hic ignorat, quod eam ad illustrandam, atque augendam facere possit. Dic mihi, ecquo Apolline doctus asseris, verba *interest*, & *refert* personalia nil aliud pro supposito solere sibi accipere, nisi pronomina quædam in neutro genere, qualia *id*, *quod*, *illud*, *hoc*, *istud*, & similia? Verum in te arguendo non pluribus immorabor, cum excellentissimi latinitatis auctores te statim convincant.

In libri quarti cap. 14. contendens *Fore* non minus præsentis, quam futuri temporis esse, ac latine dici *fore amaturum*, exclamat:

Ex lib. 4. c. 14.

O mentes Grammaticorum tenebricosas! Qui dum *Prisciano*, ac Laurentio sese misere nimis addicunt, eorumque præcepta non tanquam humana inventa, sed velut divina quædam oracula suspiciunt, malunt his *ipsis* auctoribus turpissime errare, quam eis abrenunciantes a veritate recte sentire.

Et in ejusdem libri c. 19. de verbis meditativis agens, Laurentium ita alloquitur:

Ex lib. 4. c. 19.

Utinam Laurenti, quod veteres bene, recteque tradiderunt, hæc tu non corrupisses. Etiamne asseris verba in *rio* non rite meditativa fuisse appellata? Altior est hic sensus, remotiorque, unde id nomen sibi vendicarunt, quam pro tua, ac *Prisciani* falsa opinione. Etenim *meditari* cum discesseris a triviali, & proculcato intellectu, *parare* etiam, ac *moliri* significat.

In

In libri autem quinti c. 12. agens de reciprocis *sui*, & *suus*, ac non perpetuo reciproca esse demonstrans, ita adversus Laurentium invehitur:

Ex lib. 5. c. 12.

Igitur quod Laurentius mendum esse suspicatur . . . delirare ille quidem convincitur, ut qui maxime. Cur enim probatissimis auctoribus *is* & *ipse*, pro *sui* & *suus* identidem utentibus, non his pro illis etiam vicissim uti liceat? Nimis tibi assumis, Laurenti, hoc quidem placet, illud autem displicet, nollem Ciceronem sic locutum. At hoc quid est, nisi summæ, & inculpatæ legi velle præscribere, & Lesbiam (ut ajunt) se se regulam fieri? Quo nihil arrogantius.

Agit Saturnius de Participiis in libro sexto, quorum utilitatem ita describit:

Ex lib. 6. c. 1.

Participia latinitati breviter conferunt, appositissimum providentis naturæ ad condecorandam orationem ministerium: non concisam illam quidem, ac mancā, cui obscuritas agnata, sed quæ multa complectatur verbis non ita multis, quæque pro rerum, ac sententiarum complexu apparent etiam pauca. Simulque genus dicendi faciunt in primis fufum, lene, æquabiliter incedens, non contortum, non intumescens, non corruptum. Ad hæc brevitati cognaram celeritatem. Quæ cum aliis rebus comparatur, tum vero participiis septimo in casu constitutis, vel maxime si plura consequantur. Postremo varietas præcipuum naturæ bonum, ubi opes, deliciasque suas ambitiosius ostentat, quam in participiis, ut oratio ipsa nusquam non his reflorescat, delectet, moveat?

Hæc, inquam, de Participiorum utilitate quum initio libri sexti dixisset Saturnius, plura de illorum etymologia, formatione, significationeque in sequentibus capitibus disserit; at c. 12. ad Laurentium accedens, hæc habet:

Ex

His ergo ita constitutis quæ natura, quæque ratio ipsa participiorum tulit, deinceps ex auctoritate, usuque procedum latinæ, quatuor tutissima quasi asyla, mihi studiosos, quo perfugiant, quoties germanus ipsorum usus minime succurrerit, docendum est. Ac primum non mihi amplius vereantur participiis in *ans*, vel *ens* de præterito perfecto, ubi ubi opus fuerit, arbitrato suo usitari. In quo simul etiam apparet nostratium Grammaticorum socordia, qui dum Prisciani sapientiam, Laurentii acumen attoniti suspiciunt, nihil præterea querendum putant. Perinde quasi aut huic arti colophonem ipsi imposuerint, aut ignorari necesse sit quicquid illi non tradiderint. O stupida pectora! Neque tamen clam me est, Laurentium nonnihil ante me de hoc præcepisse, sed ita ut per caliginem intuitus locum videatur. Quæ propter fontem veritatis jam latius ipsi aperiamus. Quod dum facimus, neminem, obsecro, pigeat, universa, quæ subscripsimus, exempla percurrere.

Translationem de Gerundiis aggreditur Saturnius libro septimo, cujus hujuscemodi est initium:

Ex lib. 7. c. 1.

Rem controversam aggredior, & plenam dissensionis, verum Superis bene faventibus per nos tandem aliquando dijudicandam. Neque enim nos hi sumus, quorum vagetur animus errore, quique certi nihil habeamus, quod sequamur. Illuxit, illuxit tandem nobis veritas hæc toties petita, toties pugnata. Scripsere, scio, plerique alii de Gerundiis, Viri illi quidem acuti, ac docti; verum ita ut aliorum potius opiniones, quam sepositi, atque abditæ aliquid deprompsisse videantur. Quanquam ne veteres illi quidem, quibus antiquitas nil habuit doctius, nihil exactius, tales extiterent, ut viam industriæ posteris præcluserint. Super hæc in disputando, auctore M. T. Cicerone, non tam quid Majores senserint, observandum, quam rationis momenta querenda sunt. Ut in agro colonus, in uxore vir sterilitatem odit, sic infæcundam animam odit illi complicita, & associata mens divina.

Hoc

Hoc posito Proœmio illico Saturnius Gerundia quem in modum ex usu auctorum construantur, commonstrat, captraque inde occasione ab erroris suspitione purgat phrales nonnullas a Latino Psalmorum interprete usurpatas, eas tamen vetustati, ac religioni relinquendas affirmans:

Ex lib. 7. c. 2.

Nec est, hic mihi quod quisquam objiciat. At hoc dicendi genus nimis quam insolens est. Perinde quasi nunc hoc nos susceperimus negotii, ut quid sequendum sit, ac vitandum hic statuamus, ac non potius involutam, additamque vim gerundii, naturamque perscrutemur. Aliud est enim, cum quid usus exigit, perquiritur, aliud, cum disputando veritas ipsa veluti limatur: id quod nunc agimus. Nam gerundia quem in modum ex usu auctorum construantur, mox paulo capitulatim commonstrabimus. Nunc illud multo magis obiter non dissimulandum nobis, Divum Hieronymum tantum illum Doctorem non sine exemplo dixisse: *In convertendo Dominus captivitatem Sion*, quod est, convertente Domino. Quo pariter & illustrissimus Auctor maxima erroris suspitione perpurgatur, & Laurentius indepreccabilis temeritatis convictus apparet. An fuit credibile, eruditissimum juxta, ac diligentissimum Scriptorem, tantæ, ac tam multijugæ lectionis Virum, tale quid, Græca fallente figura, ut ille oblatrat, primum omnium Marte suo confabricasse? Quid cum idem ipse alibi dicit? *In conveniendo populos in unum*, & *In deficiendo spiritum ex me*, & *In accipiendo ipsum solum gloriam*, quod est convenientibus populis, deficiente spiritu, ipso accipiente. An dubitandum, ne non hujus quoque locutionis exemplum ocularissimus Doctor apud quemquam approbatum Latinitatis architectum usquam observaverit? Quamquam ego (ut verum fatear) hoc posterius dicendi genus, ut nimis insolens, religioni simul, & vetustati relinquendum cenfeo. Nihil est enim bonarum litterarum candidatis proponendum ad imitandum, quod præclaro aliqujus receptissimi auctoris exemplo statuminari non possit.

P. II.

F

Re-

Redit ad Vallam Saturnius in cap. 13. ubi postquam adnotasset Gerundiorum cum casu ablativo constructionem, apud Hagiographos quidem, & etiam apud eruditissimum Erasmus usitatam, rarissimis tamen veterum auctorum exemplis fulciri, monuissetque superioris ætatis Auctores, tanquam bene, beateque vivendi magistros, non dicendi, retineri oportere, hæc de Valla:

Ex lib. 7. c. 13.

Sed turpissimus error, quo & ipse alias, & plerique alii juxta mecum asseribamus, minime recte, latineque dici, *venio ab audiendo*, cujus quidem erroris auctor omnium primus fuit Laurentius, sua illa vaniloquentia quem non ilaqueans? Haud amplius dissimulandum.

Ex lib. 7. c. 14.

Volo demum, Laurenti, mihi dicas, idque superpondium erit ad prædicta, cur &c. Euge Laurenti, dignus es tu quidem, qui alter Camillus omnino dicare. Quippe qui, ut ille nomen Romanum collapsum restituit, tu latinam perditam recepisti.

Post Gerundia progreditur Saturnius libro octavo ad Supina de quibus ita præfatur:

Ex lib. 8. c. 1.

Litem superiori syntagmate disceptavimus plenam perplexitatis, plenam discordiarum. Nunc Supina nobis aggreganda, negotium sane plurimi tum sudoris, tum consilii; ambagum autem non minus differta, quam latebrosæ difficultatis. Argumentum alioqui dignum, in quo veteres etiam illi nervos suos intenderent. Verum fit nescio quo fato, ut non omnia sciamus omnes. Tradidere porro principes illi pleraque digna scitu, digna observatu, sed non pauciora posteris investiganda, atque dijudicanda reliquere. Etenim in omni artium genere cum plurimum actum fuerit, semper tamen omnis posteritas habet, quod agat. Excedit enim, multumque supereminet humanæ captum cogitationis, rerum

rum infinita multitudo. Fuere, scio, veteres illi viri quidem eruditissimi, homines tamen, quippe quibus non tota veritas sese infuderit. Itaque omnes ut fallere potuerunt, & falli, ita in rebus dubiis nemo eorum opinionibus perinde sese addicat, ut facultas libere dissentendi non usque potior existat. Leganturque omnes sed cum delectu. Neque enim vis naturæ in nobis effœta est, ut ipsi nihil ex nobis parere possimus, sentiamusque bonum esse, quod rerum multitudine, ac magnitudine vincimur. Nemo ad cognitionem veritatis magis accedit, quam qui intelligit, ubi multum profecerit, semper tamen sibi superesse, quod quærat. Quapropter cunctis adnitendum; pallendum, sua cuique vis faciunda, ut novo semper aliquo fœtu artem Grammaticam adaugeat, atque illustret.

Hæc præfatus Saturnius, mox Priscianum, & Vallam de Supinis inter se digladiantes inducit, altero ea esse nomina contendente, altero verba. Non esse nomina, postquam adversus Priscianum probavit in cap. 2. sententiam Vallæ æque exhibat in cap. 3. hæc habens:

Ex lib. 8. c. 3.

Prisciano autem longe diversa tenet Laurentius, ut qui non jam nomina, sed verba esse contendat. Deceptus, credo, auctoritate Quintiliani, qui libro 1. Institut. *dictu* & *factu* verba dixit participalia. Quo prudentius nobis agendum, ne dum Laurentium redarguimus, in præstantissimum Auctorem quicquam obloquamur. Verum demonstrandæ hujus veritatis initium altius repetendum: Ecquid pertimescis, Laurenti, ecquid tergiversaris? Nam si verba sunt, cum modis, & temporibus significant, necesse est. Non significant autem cum modis, & temporibus, non sunt igitur supina verba. Ut non licet hominem esse, nisi idem existat rationalis, & mortalis, sic nullo modo fieri potest, ut supinum sit verbum, nisi idem cum modis, & temporibus adsignificet. Quapropter liquidissimum jam sit, supina non esse verba.

F 2

Ad

Ad pugnam cum Laurentio revertitur cap. 7. nec hostem prius deserit, quam librum illum absolvat. Eo cap. 7. probaturus aliis etiam verbis Supina in *um*, quam ad locum significantibus nonnunquam accedere, sibi rem esse cum Laurentio his verbis declarat:

Ex lib. 8. c. 7.

Quoniam vero Grammatici nunquam sincerius præcipiunt, quam cum ad amussim auctoritatis, ususque omnia in primis dirigunt, exiguntque: sane intelligendum supina in *um* contra Laurentii pertinacissimam opinionem, vel aliis verbis, quam ad locum significantibus, de auctoritate summorum Scriptorum conjuncta nonnunquam inveniri.

Supina in *um* per quam raro passivam habere significationem evincit cap. 8. De activa autem scita admodum, & pereleganti differens cap. 9. Prisciani, & Laurentii auctoritatem his verbis convellit:

Ex l. 8. c. 9.

Heu supina nostræ tempestatis Grammaticorum ingenia: Ecquis, ecquis relictis a tergo Prisciani, relictis Laurentii bonis inventis, in anteriora nitens, novi aliquid e tenebris eruit: cum prope innumera sint, quæ observata optimis auctoribus, ignorata superioribus Grammaticis, prohi pudor, mortua sepultaque jacent? Nam ut cætera prætermittam, quid *eo* dicendi genere pulchrius, quid elegantius, quo maxima illa latinitatis lumina usi sunt, *perditum eo* pro *perdo*, *ereptum eo* pro *eripio*, *ornatum eo* pro *orno*? In quibus verbum *eo* non jam ullum motum localem ostendit, verum deposita ejus motus significatione unum cum supino factum est verbum, idem omnino significans, quod ipsum, unde supinum deductum est verbum. Et tamen oscitabundi ocio obmarcescimus, dum assecutos arbitramur, ipsique nobis pulchri videmur, dum nihil supra Priscianum, nihil supra Laurentium sapere audemus. Quin asseramus ipsi jam exempla, quibus tam scita, tamque latina, ac perurbana dicendi figura inclarescat.

Hic-

Hieronymum, & cæteros Hagiographos vindicat cap. 10. demonstrans, recte, latineque dici, *Vado legere*, ac similia.

Ex lib. 8. c. 10.

Discissum etiam, dilaceratumque video passim Hieronymum a quibusdam Grammaticis. At quibus tandem? Nempe qui homini eruditissimo, ac sapientissimo matellam porrigere ne digni quidem forent. Disciunt autem, quod infinita verbis motum ad locum significantibus nonnumquam apposuerit. Id autem barbare, ac insolenter nimis factum videri, ut cum dicit, *Non veni solvere legem, sed adimplere, & vado immolari*. Fuisse autem omnino utendum vel supino, vel gerundio. O rabidi canes, o venenosissimæ aspidēs! Quid quod Poetæ omnes ad unum eo dicendi genere ubique scætant? Sint igitur barbari tot luculentissimi latinitatis Auctores. Qui cum infinita verbis motum ad locum significantibus copulare minime sunt veriti, aut ipsi barbare, nimisque insolenter fecisse accusandi, aut certe in eo dicendi genere Hieronymus, ac cæteri Hagiographi recte, latineque fuisse locuti sunt dicendi.

De Supinis in *u* agere aggressus cap. 11. quam parum Prisciano, & Laurentio fidendum ostendit:

Ex lib. 8. c. 11.

Sequitur altera illa forma, heu quam perplexibilis, quam laciniosa. Pauci, imo vero nulli (ut ego arbitror) adhuc ejus naturam explicarunt. Nam quid ego referam quid princeps Grammaticorum Priscianus, princeps autem? de his scripserit, cum nusquam aridus magis, nusquam insanior apparuerit? Unus superest, magnæ spes altera Romæ, Laurentius. Sed hic quoque e portu egrediens statim impegit. Quanquam non iverim inficias, elegantiora quædam, quam Priscianum tradidisse. Verum dum omnibus passivitate[m] quandam subesse contendit, & ea quidem vult nominibus quibusdam adjectivis esse tantum applicabilia, inque eo totus hæret, non animadvertit vir alioqui acutissimus, sed ipse sibi nimium fidens, maximam quidem eorum partem, ac rationem a se fuisse prætermisissam.

Adver-

Adversus generalem Laurentii de Supinorum passivitate sententiam pugnat etiam cap. 12. Saturnius, & post nova exempla in medium allata, ita subdit:

Ex lib. 8. c. 12.

Ad hunc modum Laurentius si præcepisset, & Academica illa dubitandi modestia, potius quam Stoica asserendi arrogantia uti voluisset, multo sibi, ac rebus suis consultius prospexisset. Verum dum artem ubique, tanquam Lesbia regula, ipse sibi accommodat, nec suo sese modulo, ac pede metitur; quid non? Itaque reliquum quicquid est hujus disputationis adversus Laurentium conscribatur. Faximque intelligat, Saturnium esse natum, qui ejus intolerabilem proterviam retundat.

Subsequitur illico caput 13. cujus initium:

Ex lib. 8. c. 13.

Redargutione Laurentius primum dignus, quod supina pro verbalibus accipi, vel idem significare nullo modo posse contendit; ut cum Prisciano dicit, *Accipitur venatu pro venatione*, sicut *miserabile visu pro miseratione*. In quo Laurentius, quia nimis pertinaciter hæret, haud paucis ineptire ostendendus. Proh divum, atque hominum fidem Jam ne igitur sentis, Laurenti (sic enim tecum agam, ac si in vivis ageres) jam ne sentis, his te exemplis jugulatum?

De Supinorum passivitate agit & cap. 14. & cap. 15. recte autem, latineque dici *Venio lectu* probat cap. 16.

Ex lib. 8. c. 16.

Verum qui semel a veritate deflexit, hunc oportet bene delirum esse. Itaque eadem illa phrenesi Laurentius pernegat, supina in *u* verbis motum de loco significantibus ullo modo recte conjungi. O caput tota dignum Anticyra! Quousque tandem furor iste tuus bonos omnes eludet? Usque adeone male sensisti de vetustissimis illis, ut suo e capite genus id dicendi effinxerint, cum illustrissimos latinis Auctores ejus locutionis subscriptores habeant? Itaque superior illa supinorum utendi ratio est perelegans, latina, atque exosculanda: quia tamen non admodum tri-

ta

ta est, ea studiosis omnibus, vel parcius utendum censuerim.

Supina in *u* aliis etiam verbis, quam de loco significantibus, passim conjuncta reperiri, docere suscipiens cap. 17. ita incipit: *I nunc Laurenti, & præclaram illam præceptionem tuam jacta*. Desinit vero:

Ex lib. 8. c. 17.

Quare his tam certis, tamque præclaris exemplis jam desinant insanire Grammatici: Laurentioque tantum tribuant, quantum viro sane docto, quique multa, non qui omnia sciverit. Pars optima sapientiæ est, non opinari te scire, quod nescias. Nunquam errat, qui se nescire non ignorat. Ubi nimium ipsi nobis tribuimus, & solos Attica mella manare putamus, plerumque dum argutiores, ac sapientiores videri volumus, fallente nos veritate, stultiores apparemus.

Tractionem omnem de Supinis in *u* concludit Saturnius cap. 18.

Ex lib. 8. c. 18.

Hactenus de supinis in *u* sic disputavimus, perinde quasi nihil cunctati simus, quin ea sint vera supina, confutatis etiam, quæ nobis contraria esse viderentur. Nunc intuitus mentis altius figendus, ac veritas ipsa pressius consideranda. Pleraque sunt enim, fallente forma, quæ si procul, & oscitanter aspicias, probes, eadem si propius, ac fixius intueare, statim reprobes. Quare quicquid antea de supinis in *u* disputatum est, equidem bene multum suspicor ea esse nomina.

Quumque sibi objecisset Quintiliani auctoritatem, ad eam ita reponit:

Itaque his tot, ac tantis rationibus cum supina in *u* nomina asserere, transversim traheremur, ecce tibi gravissimus auctor Fabius Quintilianus obstitit, statuens ea esse verba participalia. Candide Lector, hic jam opinor vides, quam scopuloso, ac difficili in loco versemur. Quippe hinc validis

dis rationibus impulsus, unum sentire: hinc receptissima Quintiliani auctoritate repulsi, diversum tenere cogimur. Sed veritatem libere effari liceat. Quintiliano ego tantum tribuo, quantum excellentissimo, ac sapientissimo cuique, humana fide a quoquam tribui licitum est. Sapientia, ingenio, gravitate, eloquentia nulli Latinorum posthabeo. Ejus vestigia quotidie exosculor, ac modo non adoro. Sed omnem veritatem libere effari liceat. Homo fuit. Eo potuit falli, & fallere. Nec parum interest, utrum quis Auctoris, vel Grammatici fungatur officio. Illius majestas, ac dignitas sacrosancta est: hujus sententia, assertioque per se incerta. Quare Quintiliano auctoritas, quatenus auctor est, sacrosancta esto. At vero dum Grammatici fungitur officio, non ei plus quam cæteris Grammaticis (quod tanti Scriptoris bona venia dictum volo) credendum est. Quanta quantæ auctoritate quis mihi Grammaticus polleat, non ejus opinionem ego adhærescendum statuo, nisi quatenus vel ratione, vel exemplis, quæ præcipit, comprobaverit. Postremo in re tam ardua ratione malo, quam auctoritate superari. . . . Suum nihilominus cuique jus relinquentes, de his, ut animus tulerit, & sentiendi, & judicandi, nos, quod nostrum erat, sententiam ingenue diximus. Quam recte, judicent docti, ac probi viri.

In libro nono de gradibus Comparationis differens Saturnius, haud magis quam in antecedentibus parit Laurentio, nam contra ipsum invehitur cap. 9. his verbis:

Ex lib. 9. c. 9.

Minuenda in primis illorum opinio, qui ad plures ejusdem minime comparativis utendum contendunt. Quorum quidem argumenta hic ego apposuissem, nisi partim ipsa sibi repugnarent, partimque talia forent, quæ silentio honestius, quam ulla confutatione redarguerentur. Nam quid ego tempus conteram refellendis Laurentii rationibus, cum manifesto sint falsæ? Quia tamen plerique eo insanix processerunt, ut illius dicta perinde habeant, ut Apollinis oracula, haud prætermittendum; quin aheneis (ut ajunt) inexpugnabilibusque exemplis saltem retunderemus.

Acer-

Acerbius adhuc Laurentius carpitur capite 13. cujus hujusmodi est initium :

Ex lib. 9. c. 13.

Nullum est autem erratum in Latina lingua paullo insignius, cujus Laurentius non auctor fere existat; ita dum certas quasi ad leges Latinam linguam redigit, non oppressam vindicat, sed potius in teterrimam servitutem contrudit.

In capitibus autem subsequentibus, ubi Saturnius agit de Superlativis, ita superlative Laurentium exagitat, ut nullus progressioni locus amplius ab eo fiat reliquus; eo enim ulque procedit, ut Laurentium non omnium bipedum modo, verum etiam quadrupedum petulantissimum appellet. Itaque hujus loci esse videtur, ut nos quoque metas hic figamus Saturnii cum Laurentio concertationibus, quarum asperitatem his verbis ad calcem Operis excusat Saturnius:

Ex lib. 10. c. 10.

Studiosos omnes hic pariter exoratos cupiam, ut ne mihi vitio vertant, neve iniquiore animo ferant, sicubi confutandis erroribus paulo mordaciores visi sumus. Nam veritatem quis non satis amat, qui falsitatem non plurimum odit? Et quamquam efficacissime refellit, quisquis errorem optime reteggit, veritas tamen ipsa, nescio quo modo, altius mentibus hominum infigitur, ubi increpitando, quam ubi simpliciter ostendendo, persuadetur.

Quod Saturnii nostri Mercurius præceptionibus suis non aliud toto Opere, quam veritatem statuerit, atque persuaserit, facile quivis dignoscer, quem non pigeat, Opus illud a fronte ad calcem perlegere, ac præcipue capita illa introspicere, & excutere, ex quibus literarii illius certaminis præludia repræsentavimus. Ea autem in medium larga manu proferentes, id utique nos consecu-

P. II.

G

tos

tos fuisse speramus, ut Lector æquus valeat statim judicare, num ea invidia, qua Grammaticarum Institutionum artifices invenimus laborasse, in Augustinum Saturnium pariter cadat, a quo nimirum ad criticam eruditionem multa quidem sint acute, ac subtiliter excogitata, ad locutionis vero Latinæ usum propemodum nihil; an vero illustre illud, ingenuum, ac perspicuum Latini sermonis ita in ejus Opere eluceat, ut de eo jure, ac merito dici possit, Polycleti instar, suas ipsum regulas egregie præstando confirmasse. Plenam illam, ac teretem compositionem verborum, colorem, & habitum illum, in quibus præcipuam Latinæ linguæ laudem collocandam esse, monemur, ut nihil claudicet, nihil diffuat, nihil fluctuet, sed tota permixta, & temperata numeris, æqualiter, constanterque feratur oratio, hæc, inquam, omnia in Mercurio nostro (aut ego fallor) nemo desideret. Non defuit, qui Vallæ Elegantias inelegantes appellaverit; at eas, num satis eleganter Saturnius confutaverit, si quis ex animo in dubium vocaret, nã ille nimis austeras elegantiae leges præscriberet. Saturni in Grammatica Arte præstantiam non inicitæ tantum adversus Vallam contentiones commendant, sed aliæ etiam, ex quibus pariter paucula quædam specimina placet hic subnectere; indeque magis magisque innotescet, quam excellat, effulgeat, triumphet Latinæ elocutionis vis, atque nitor in ejus Mercurio.

An Latine dici possit, *mibi opus est banc rem* ad examen revocans cap. 25. lib. 1. de duorum Grammaticorum rixa, quæ Mantuæ contigerat, hæc habet:

Ex

Ex lib. 1. c. 25.

Divi boni ut plerumque sunt infani isti nostri Grammatici, genus hominum suapte natura nimis rixosum. Mihi adeo duos, cum essem Mantuæ, haud incelebres Grammaticos (nominibus parco) inter se concertasse, Latine ne diceretur, *Mibi opus est banc rem*. Quorum alter sola ratione nitens cum negaret, alter vero Prisciani, Diomedisque opinione fultus, contra instaret: post plurima, ac turpissima convicia, quibus mutuo sese lancinaverunt (sic enim nostræ tempestatis disputant Grammatici) parum absuit, quin a verbis ad colaphos, maximo omnium risu, devenerint, quæstione nimirum relicta insoluta, atque inexplicata. Nos postea attentissime revolutis auctoribus, invenimus, recte, Latineque dici.

Quid sit adverbialiter poni, & quomodo nomina adverbialiter posita non fiant adverbia, explicans cap. 12. lib. 2. Donatum, suæque factionis Grammaticos his increpat verbis:

Ex lib. 2. c. 12.

Non patiar amplius te, Donate, bonis, studiosisque imponere. Nam quæ (malum) impudentia ista est, ut ipse turpissimi erroris convincendus, alios bene sentientes imprudentiæ condemnes? Sunt (inquit) adverbia loci, quæ imprudentes putant nomina: in loco, ut *sum Romæ*: de loco, ut *Romæ venio*: ad locum, ut *Romam pergo*. Euge: verum in *Romæ*, *Roma*, *Romam* unde adverbia censes? Natura; nihil minus. Nam quis compos mentis hoc effutiat? Igitur officio, vel functione aliqua. Quo quid aliud nobis accipiendum, quam quod nomina plerumque ita funguntur officio adverbii localis, ut verbum iis perinde, atque ipsis adverbiiis adstringatur ad significationem loci? Etenim istuc tandem est propriè adverbialiter poni, vel fungi vice adverbii, vel esse instar adverbii, quod idem est, nempe cum nomina determinant verbum ad significationem loci; id quod est proprium adverbii localis. Num nam igitur nomina isto modo sunt adverbia? At hoc tam falsum est, quam quod falsissimum. Vides, Donate, quam petulanter te gesseris, quam-

quamque absurda, minimeque sibi consentientia tradiderint omnes tuæ factionis Grammatici? Errore igitur tuo isto, atque adeo cunctorum tecum idem sentientium, ad hunc modum confutato, studiosi, priusquam de nominibus adverbialiter positis præcipiamus, quadruplicem hanc veritatem in pectus altrè demittant, firmissimeque teneant. Primum &c.

De impersonalibus agit libro tertio, & quam venuste usurpentur, quam agre explicentur, mox docet his verbis:

Ex lib. 3. c. x.

Et bonam latinitatis partem impersonalia sibi vendicant. Quæ summa cum diligentia ni per nos teterrimis e tenebris, ac situ inveteratæ, ac deploratæ illius ignorantæ, tandem aliquando in lucem redimantur, haud causa est, quin de literis pessime dici meritis velim. Quid enim verba hæc non modo suscipiam, & exosculer, & amplectar, quando sine his splendor ille divinus latinitatis haud consistere potest? Neque tamen clam me est, quantum sudoris, vel potius quantum sanguinis mihi fundendum sit in his explicandis. Quando & natura longe sunt intellectu difficillima, & hostes quam plurimos habeam tum acerrimos, tum infestissimos. Et alioquin incredibilis quædam expectatio mihi gravis adversaria jam sit constituta. Aggrediar igitur, & quam citissime potero, tantum negotii absolvam.

Id, inquam, in limine libri tertii prælocutus, statim ad explicandam impersonalium naturam accedit, eaque impersonalia esse affirmat cap. 3. quoties verba supposito careant recto, adversus opinionem Pauli Suardi, superius a nobis memorati, quem Grammaticum alioquin insignem appellat, nec non Antonii Nebrissenis, quem Latinæ linguæ ea ipsa tempestate in Hispania reparatæ Aristarchum, Varronem, Camillum plures appellarunt:

Ex

Ex lib. 3. c. 3.

Neque enim audiendi Sophistæ quidam, quorum opinioni & Paulus Suardus Brixiotes, Grammaticus alioqui insignis accessit, & Antonius Nebrissenſis summa pertinacia contententes, infinita illa verbis supposita esse nomina, vel quia nihil subjiatur verbis, quod idem non sit nomen, vel quia idem significant, quod sua ipsorum nomina. Proptereaque fieri; quibus verbis infinita supponantur, ea omnino esse personalia. Quorum quidem pestifera, atque importuna pervicacia, quoniam longe, lateque serpit, & multorum suafu inextricabilibus erroribus involvuntur, haud ultra nobis fuit propellendum, quin statim eorum falsam opinionem diminueremus. Principio Grammatica, utpote mansuetioribus Musis nuncupata, non est disputando (ut dicitur) ad vivum refecanda; neque adeo ad eam subtilitatis regulam revocanda, ad quam hispida, atque horrida Dialectica solet, sed crassiore Minerva (ut ajunt) explicanda est. Præterea Dialecticus, & Grammaticus, juxta Musicorum proverbium *ὁ δὲ διὰ πᾶσιν*, inter se materia, propositoque distantes, nonne uterque pro suis principiis profitetur? Grammatica igitur cum auctoritate, usuque potissimum constet, atque adeo significandi qualitates in primis consideret, inque eo versetur, ut in campo sibi subjecto, nihil est, quod scrupulosam ad illam Dialectices curam, suo quodam jure duas Orationis partes, nempe nomen, & verbum, tantum agnoscentis, exigatur. Quamquam isti (cur enim vel ipsi non modice a nobis ratiocinemur?) qui mihi obtinebunt, ut quod natura abnegaverit, id ulla ratione vel numeris, vel personis insignitum reddant? Nam si eo ipso quod supponantur, nomina fierent, esset fortasse quod eis assentiremur. Verum cum nominis partes supponendo ita gerant, ut verbi tamen ipsius infiniti rigorem nihil omnino relaxent, quid est, quod frustra laboremus in extorquendis hujusmodi vel numeris, vel personis?

Durius adhuc Saturnius Priscianum refellit cap. 11: eandem impersonalium prosequens tractationem:

E*

Ex lib. 3. c. 11.

More tuo facis, Prisciane. Nihil enim fere probas alicubi, quod idem alibi non improbes. Quæ inconstantia palam facit, te, quid dicas, non satis intelligere. Nam quod multis in locis affirmas, idque adjunctis vel exemplis, vel glossulis, impersonalia passivæ terminationis e verbis neutris significationem habere activam, istuc quidem recte, ac probe. Verum cum alibi tanquam tui oblitus, hujusmodi in verbis nominativum nescio quem posse subintelligi, obsecro, unde isthæc in te superstitio? Nec satis habes, quod ipse te levitatis infamas, nisi etiam Apollonium, ac Theophilum præceptorem tuum una tecum traducas.

Prisciani partes adversus Augustinum Saturnium tueretur Minerva Sanctiana cap. 3. lib. 1. at quam immerito ibidem Saturnii sententia exhibetur, æqui Lectoris judicium esto, qui pariter decerneret, num Minerva illa, quæ eo loco Mercurium morder, alibi, & quidem haud raro, Mercurii scrinia suffuretur. Item cum Baptista Pio, quod spectat ad impersonalium naturam, Saturnio negotium est cap. 12.

Ex lib. 3. c. 12.

Baptista Pius e Bononia vir est plane maximi ingenii, & reconditarum, ac veterum litterarum in primis doctus. Homo tamen. Hic porro carmen Lucretianum exponens, secundo, ni fallor, commentario, ad hunc modum præcipit. *Ut per figuram dicimus, læditur manum, frangitur pedem, sic dicere licet, legitur librum, amatur Deum.* Id quod ubi ego offendi, equidem admiratione totus obstupui, majoremque hominis diligentiam, animique pensionem eo in loco desideravi. ... Nec mihi Guarinum utraque lingua peritissimum, persuadere possum tale quid dixisse. Sed enim plerique Grammatici, quibus ut nihil cervicosius, ita nihil temerarium magis, nihil non corruptum eunt. Ita fit, ut quæ hominum levissimorum propria sunt vitia, ea optimis, ac doctissimis Viris impingantur,

Quan-

Quanti Saturnius fecerit Guarinum Veronensem, ex hoc loco apparet. An autem Guarinum seniore, vel Baptistam ejus filium designaverit, incertum est, quum uterque Grammaticales Institutiones conscripserit. Tractatus Guarini de ordine docendi, ac studendi ad Mafsejum Gambaram Brixianum adolescentem, non dubitanter, ut aliqui faciunt, sed omnino certe, ad filium est referendus. Veterem enim, quam ad manus habeo, Editionem absque anni nota Baptistæ Guarini nomen Tractatus fronti præpositum exornat, & præterea in eo ipse Baptista parentis sui diserte meminit semel, iterumque, primo quidem, dum Græcæ discitentibus regulas illas commendat, *quas (inquit) parentis nostri præceptor Manuel Chrysoloras summatim collegit, vel quas parens ipse noster compendii amantissimus ex illis contraxit.* Ad calcem vero libelli hæc habet: *Hic est enim & docendi ordo, & studendi præcepta, quibus non minus doctissimus, quam optimus parens meus, & præcipiendi jure avus tuus discipulos instituebat, quæ vel hac una ratione optima esse putabis, quod ex ejus ludo, velut ex equo Trojano, meri literarum principes prodierunt.* Saturnio dicenti, *Nec mihi Guarinum utraque lingua peritissimum persuadere possum tale quid dixisse,* consonat Politiani illud, *Verum quando tu* (ita ipse ad Baptistam Guarinum) *omnium ætatis nostræ professorum celeberrimus, aliter sentis, nihil jam credo mihi.*

E diverticulo viam repetens, coronidis loco excribam verba Saturnii ex libri quinti cap. 18. & 19. quibus rationem recte, & latine designandi natale solum edocemur, ac primum nullum esse discrimen inter

Co-

Corinthium, & Corinthiensem, Brixianum, & Brixiensem, ac alia hujusmodi, idque adversus Ambrosium Calepinum:

Ex lib. 3. c. 18.

Lernæa cum hydra mihi res est. Nam quo plura errorum capita obtrunco, hoc longe plura mihi obtruncanda suppullulant. Sunt, inter quos vel primus auctor erroris (nisi fallor) Ambrosius Calepinus, qui obstinatissime tenent, non unum esse Corinthios, & Corinthienfes, nimirum ut Corinthius sit, qui ex Corintho natus, ibidem habet; Corinthienfis vero, qui aliunde natus, Corinthi versatur. Parique ratione affirmant, alios esse Brixianos, alios Brixienfes, alios Hispanos, alios Hispanienfes. Circumspicienti autem mihi, unde ista tam supersticiosa vocum distinctio in mentem venerit, locus Ciceronis ad M. Cœlium statim occurrit, ita scribentis, *Itaque ego hunc Hispaniensem casum expecto*. Ubi luculentissimus auctor intelligit bellum civile gestum a Cæsare adversus Petrejum, & Afranium apud Ilerdam; suspicatique sunt, bellum illud Hispanienfe nuncupasse, quod a Romanis, non ab Hispanis in Hispania sit gestum. Sed enim isti ipsi Ciceronem de eodem bello in Hispania gesto alibi scribentem si diligentius observassent; utique reperissent, illud idem bellum ab eo vel Hispanum appellatum fuisse. . . . Observanti præterea mihi magna vis exemplorum undique adfuit, quibus isti turpissimi erroris convincantur. . . . De adductis igitur exemplis luce clarius constet, quicquid isti Aristarchi somniantes effutiunt, inter Corinthium, & Corinthiensem, & id genus, quæcumque memorari possunt, nomina nihil omnino discriminis esse.

Illico autem, scilicet cap. 19. probat *Romanus, Arbeniensis*, & id genus patria nomina tam eos, qui in urbe, quam qui ruri nascuntur, significare; nunquam autem dicendum *de Roma, de Brixia*, sed *a Roma, a Brixia*.

Ex

Ex lib. 5. c. 19.

Irrepsit etiam, invaluitque depravata in primis & corrupta dicendi ratio, ut cum natale solum cujuscumque significare volumus, non patrio nomine, ut probata dicendi ratio postulat, utamur, Plato Atheniensis, Camillus Romanus, sed insolenter, ac sordide loquentes dicimus, de Athenis, de Roma. Quæ barbaries cum apud omnes fere viget, tum vero apud nullos magis, quam quorum interfuisset, omnium fore tum eruditiores, tum sapientiores. Erroremque suum tutantur, quod Atheniensis, Romanus, & id genus patria nomina, non aliquem in urbe, sed in agro progenitum adsignificant. Exemplumque citant Apulejana ex Apologia: *Quanto modestius Mantuanus Poeta*. Constat enim Virgilium non in urbe Mantua, sed in vico Ande natum esse, ob id vel Andinum Poetam a Silio Italico appellatum. Propterea tollendam ad ambiguitatem necessario dici, de Athenis, de Roma. Deum immortalem, quæ portenta agrestes isti, ac pessime literati deblaterant... Quod si supersticiosos istos hæc cura circumstat, ut repudiatis nominibus patriis, ablativis potius uti velint, perinde quasi eo dicendi genere natale solum vel expressius, vel illustrius relaturi sint, utantur sane per me licet, sed quemadmodum excellentissimi Latinitatis Auctores consueverunt... Atque his omnibus exemplis jam persuasum sit, primum nomina patria æque eos, qui in urbe, quam qui ruri nascuntur, significare. Dein nil prorsus interesse, utrum quis dicat, *Sum Romanus, an a Roma: Sum Brixianus, an ex Brixia*. Ablativis tamen, ubi patriorum inclinatio duriuscula contigerit, potius utendum cenfeo. Sunt enim pleraque usque adeo prolata difficultia, ut primitivis satius uti sit, quam derivativis.

Nemo mihi, ut spero, succensabit, si adeo multa ex Mercurio Saturnii exscripserim loca; sed contra in his miram Latini sermonis suavitatem, ac Tullianæ propemodum orationis succum, una mecum degustans, illi potius succensabit, qui non quidem exercendi styli gratia, sed serio affirmaret, Saturnium artem Latine

P.II.

H

loquen-

loquendi, quam tradidit, ne mediocriter quidem caluisse. Ea ipsa loca satis erunt ad Brixiani Præceptoris famam ab hac labe vindicandam; aliorum partes sint, Grammaticas Philosophicas, Minervas, Aristarchos, Thesauros, qui omnes pari cum Mercuriis nota fœdantur, purgate. Aldum Manutium, Jovianum Pontanum, Thomam Linacrum, Desiderium Erasmus, tanquam recte, & Latine loquendi Magistros, in primis commendat Saturnius, num & hi quoque ad locutionis Latinæ usum propemodum nihil scripserunt? Suo itaque minime fraudetur honore Saturnius, fateamurque, non ultimam Brixiani soli laudem esse, ortum duxisse e Buenno Vallis Camonica oppidulo Virum illum, *in quo*, ut locutum diximus Janum Pyrrhum Pincium, *virtutes suas potissimum experiretur Grammatica.*

Si cujus autem stomacho fastidium moveat, quod Saturnius nulli Latinorum, quemadmodum affirmantem illum audivimus, sapientia, ingenio, gravitate, eloquentia Quintilianum posthabeat, ejusque vestigia quotidie exosculerur, ac modo non adoret, eundem ad Joannis Antonii Campani, Teramenfis Episcopi, Epistolam præfixam Quintiliani, quam ipse curavir, Editioni remittimus. Qualis, quantusque fuerit in poliori literatura Campanus, nemini ignotum. Suum autem de Quintiliano judicium his incipit verbis, *desse eloquentiæ quicquid a Quintiliano non discas, & ibi artem desinere dicendi, ubi ultimum ejus fuit præceptum.* At Ciceronis majestatem, & dignitatem sacrosantam nec Saturnius, nec Campanus in dubium propterea revocarunt.

VII.

VII. Calphurnius, cujus solertiæ, & eximiæ eruditioni plurimum debet, ut in superiori parte hujus Operis vidimus, Latinorum Poetarum enarratio, & castigatio, Grammaticæ etiam Arti illustrandæ opportunam præstitit opem, quin popularibus suis usque modo recensitis ad eam Artem bene, recteque constituendam ducatum præbuisse censendus est. Siquidem quum Nicolaus Perottus Latinæ linguæ rudimenta *utili compendio* (ut Jovius scribit in Elog.) *ad normam digesta, ob idque facile pueris perdiscenda* publicasset, eisdem Calphurnius, ut in Brixianis Scholis usurparentur, Epistolam præfixit, qua nulla posthac excusatione dignos pronuntiavit, *qui Alexandri barbari carmen ineptum, quod a vera, & prisca illa Grammatica prorsus alienum, ceterasque hujuscemodi ineptias legere pergent.* Occurrit mihi ea Epistola in Editione anni 1475. per Gabrielem Petri de Tarvisio, atque hujusmodi est:

*Calphurnius Brixienfis Antonio Moreto Brixienfi
amicorum optimo Salut. plur.*

Quæ ad altioris disciplinæ cognitionem pertinere videntur, a viris nostræ ætatis diligenter, & excitata, & emendata sunt, quum superioribus annis litteræ bonæ penitus obrutæ essent, & in tenebris (ut sic dicam) minime intellectæ jacerent. At quum adhuc quædam insulsa rudimenta, & opuscula doctrinæ crassioris, quibus pueri falso erudirentur exstarent, Viri doctissimi non defuerunt, qui huic quoque rei remedium salubre, Grammaticos priscos imitati, afferre voluerunt. Quare perfectio Grammaticæ libello, qui e Nicolao Perotto Pontifice Syontino, viro eloquentissimo, commode, & breviter ad puerorum eruditionem nuper editus, volui brevî epistola, quemadmodum petieras, quid de hoc sentirem, tibi declarare; ut hunc tu, qui es juvenis doctissimus, & omnia emendata excolis, im-

prefforibus tuis quamprimum traderes, & imprimendum diligenter, ut omnia consuevisti, curares. Is enim libellus hujus generis est, ut non modo iis, qui circa prima elementa adhuc immorantur, sed ad altiora quoque tendentibus prodesse possit. Et ut paucis, quod sentio, absolvam, & grammaticæ, & latine loqui docet. Nec video, qua excusatione digni posthac accipiantur, qui Alexandri barbari carmen ineptum, quod a vera, & prisca illa Grammatica prorsus alienum, cæterasque hujuscemodi ineptias legere pergent. Quod si qui hos amabunt, pauci erunt, & ex turba Academicorum docta explodi se sentient. Vale.

Laurentii etiam Vallæ in linguam Latinam Elegantias aliquid debere industriæ Calphurnii nostri, testatur Epigramma, quod ad calcem Editionis Venetæ anni 1492. affertur, quumque nullo intervallo subjiciatur his Laurentii verbis: *Ego Nicolaum Quintum cum propter alia summum hominem judico, tum vero propter id, quod non tantum cultor est sapientiæ, sed plurimos cultores efficit, baud injuria comparandus choro Musarum, si quæ unquam Musæ exstiterunt, quæ & sapere ipsæ omnia, & nobis ad capeffendam omnem sapientiam, auctores esse creduntur. Ab hoc igitur, Joannes, cujus tu intimus es, ut ad nos revertar, oraculum posces, numquid hic liber tibi dedicatus editione sit dignus; iis, inquam, verbis quum illico Calphurnii Epigramma subjiciatur, Editor in animo forte habuit, dum Laurentius de suo Opere Nicolai V. ab Joanne Tortellio oraculum expectaret, quid de eo senserit doctissimus Calphurnius, interim aperire.*

Calphurnius Antonio Pasqualino de Sancto Germano Campaniæ
S.

*Restituit quondam Patriæ vexilla Camillus,
Et raptas Gallis solus ademit opes.*

Ret.

*Restulit eloquium nostro Laurentius ævo,
 Et Capitoline contulit arcis opem.
 Barbara cuncta jacent, sunt hoc & vindice pulsi
 Quicunque a Gotbis signa relicta colunt.
 Quod tibi debebit semper studiosa Juventus,
 Campani, Antoni, gloria magna soli.
 Namque tua impensa totum vulgatur in orbem
 Vallensis, notus quam fuit ante magis.*

Præter laudatam Perotti Rudimentorum Editionem ad manus pariter habeo aliam *providentia Scalabrini de Agnellis de Tusculano Lacus Benaci MCCCCLXXX. die X. Maji* evulgatam, quod argumento est non in Urbe tantum Brixia, sed in ditione ejus universa pro rei Grammaticæ commodis adversus Alexandri barbari ineptias fuisse laboratum.

VIII. Ea Benaci regio, cultorum ingeniorum pro loci amœnitate procreatrix, nos monet, ut aliquid de Parthenii Benacensis in rem Grammaticam studio hic loci dicamus. Ediderat Neapoli anni 1475. Junianus Majus Parthenopæus de priscorum Verborum Proprietate Volumen Ferdinando Regi nuncupatum, quem laudibus exornat, quod ampla munificentia, ut omnium disciplinarum usus Neapoli plurimus esset, publicum instituisset stipendium, eique gratulatur, quod recens imprimendi ratio a Germanis inventa, ea in urbe fuisset excepta, consilio Blasii Monachi Romani, Viri sacris literis instituti, ac sanctis moribus probati, necnon opera Mathiæ Moravi, Viri summo ingenio, summaque elegantia in ejus artis genere præditi. Opus illud summo labore ex plurimis Codicibus veterum Grammaticorum, ac recentiorum etiam, Laurentii præsertim

tim Vallæ, & Joannis Tortellii depromptum, quum multis maculis inquinaretur, ejus recognitionem suscepit Parthenius noster, quem Benacensem a patria dictum, & alium ab Antonio Parthenio Veronensi, pluribus monumentis edocemur, inter quæ locus dandus, ut modo judico, Cornelii Vitellii ad Parthenium Benacensem Epistolæ allegatæ in priore hujus Operis parte pag. 69. Ipsum in Gymnasio Romano publico stipendium Rhetoricen docuisse affirmat Helias Capreolus Hist. lib. 12. Quid in ea recognitione Parthenius præstiterit, ejus Epistola, ex Editione Tarvisina an. 1480. per Bartholomæum Confalonierium Brixientem impressorem, recitanda declarabit.

Bartholomæus Parthenius Gir. Francisco Throno Ludovici F.

Patritio Veneto integerrimo S.

ARthemo Philosophorum sui temporis diligentissimus, quippe qui Aristotelis epistolas absque ordine errantes in corpus unum apte, commodeque redegit, ut Demetrius Phalereus in libro de Elocutione meminit, non minus tanta laboris inquisitione, quam Aristotelis posteris consummata editione profuit. Nam quid mortalibus ingenio, doctrinæ auxilii Philosophus summus epistolis asserre valuisset, ni alterius labor illas ad tempora nostra pervenire posse curasset? Minimum profecto. Quod & de Tyrone Ciceronis liberto, qui naturæ bonitate ad centesimum usque annum pervenisse fertur, dici potest; nam fortassis ad nos non integræ pervenissent mellifluæ Ciceronis epistolæ, ut pleraque tanti viri monumenta, ni Tyronis sedulitas, tum Ciceronis immortalitate, tum posterorum utilitate, pectinatim tam apte conjunxisset. Quibus omnibus fit, ut litterarum bonarum docti pariter, & studiosi hujusmodi Viris plurimum se debere jure fateantur. Verum iisdem litterarum studiis faventes non minus Juniano debere arbitramur, qui & ipse tempestate nostra, qua bonarum Artium studia, barbarie

barie omni penitus explosa, culmen attingere videntur, infinita plurimis ex codicibus summo labore inquisita, quæ neque per indicem ordinis litterarum digesta erant, ad communem legentium utilitatem adeo breviter, apteque disposuit, ut quæque ab lectoribus desiderari possint, tanquam adamussim, sint inventu facilima. Noster vero secundum hujus Operis labor non mediocriter profuit; nam præterquamquod multa addidimus, quæ impressorum culpa, ut puto, in latinum omissa erant, innumerabilibus etiam fere dictionibus Græcas adjunximus derivationes: quandoquidem hisce in codicibus, qui tam Neapoli, quam alibi impressi fuerant, ubique Græcæ dictiones deessent, sine quibus quo ad orthographiam, & ad veram vocabulorum significationem pertinet, legentium animi proculdubio hesitare potuissent, quoniam litteræ nostræ inde fluxere, ut Fabius meminit. Nostram igitur hanc recognitionem, Franciscæ Throne, Vir integerrime, tibi dicavimus, quæ judicium tuum acre, ac diligens, quo tam in Reipublicæ tuæ negotiis, quam in litterarum studiis uteris, experiatur, ut animo illo tuo ingenuo, quid de ea senseris coram exprimas. Vale.

Ad eundem Franciscum Thronum, Ludovici filium suam in Thucydidem, quem Laurentius Valla in Latinum sermonem converterat, recognitionem transmissit idem Bartholomæus Benacensis, de qua suo loco.

IX. In hac, quam prosequimur, tractatione ut locum aliquem sibi vindicaret Jovita Rapicius Brixianus, efficit libellus de puerili Institutione ad Rectores, & Decuriones Bergomates, ab eo conscriptus, postquam in ea civitate annos prope XV. publico stipendio conductus, literarium ludum rexisset. Ex eo libello manu exarato Proœmium illico refero.

Magnif. Reſtoribus, & Decurionibus Bergom. Jovita Rapicius S.D.

M Arcum illum Catonem gravissimum Senatorem, & Imperatorem optimum dicere solitum legimus, existi-
mare

mare se eum plus Reip. profuturum, qui disciplinam militarem litterarum monumentis mandasset, quam qui fortissime pugnasset, propterea quod unius ætatis sunt, quæ fortiter fecerunt; quæ vero pro utilitate Reip. scribuntur, ea prope æterna esse consueverunt. Itaque postea de re militari adeo diligenter scripsit, ut ejus scripta, atque instituta post multa sæcula, non solum Romanæ Reip. sed omnibus nationibus, quæ latine intelligerent, plurimum profuerint. Ego vero & mea in vos observantia, & vestris in me beneficiis excitatus, diu, multumque cogitavi, quonam pacto si qua me vel ratio, vel fortuna a vobis avocasset, aliquid non ingrati animi monumentum relinquerem, quo vobis & absens prodessem: id tandem (si parva magnis licet conferre) Catonis exemplo mihi videor invenisse. Nam annos prope jam XV. a vobis publice conductus, qua fide debui, docere sum conatus, & quantum vires meæ ferebant, pugnavi adversus inveteratum in urbe vestra errorem, quo tum sua, tum vestra culpa præceptores majore turba onerantur, quam sustinere nequeant: ideoque fit, ut discendarum litterarum prætextu liberi vestri magnam adolescentiæ partem frustra conterant, cum ad eos mittuntur, qui nec docere illos possunt, nec continere, quia numero opprimuntur. Hanc ergo ingeniorum perniciem dum tollere adnitor, adjutores sæpius conduxī, ut distributum in multos onus commodius ferri posset: & in ea qualibet re quantum profecerim, malo eorum, qui a me discere non neglexerunt, voce prædicari, quam mea. Jure tamen affirmarim, id tantum esse, ut me non admodum aut laboris, aut impendii pœniteat. Verum adeo difficile prava in melius mutantur, ut nisi præcipua quædam cura vestra, & auctoritas publica intercesserint, omnia in pejus ruitura intelligam. Itaque quæ ad institutionem puerilem utilia existimavi, tum ex Fabio Quintiliano, & aliis nonnullis collecta, tum a magistris meis olim mihi tradita, & a me longo jam experimento explorata, ac comperta, brevi libello sum complexus, & ejus scholæ, quam urbi vestræ maxime necessariam arbitror, imaginem quamdam effinxi, ut si non displicuisset, vel jam nunc, vel certe alio aliquo tempore eam institueretis; quod si feceritis, nihil

nihil dubito fore, quin liberi vestri, & majore temporis compendio, & minori pecuniarum impendio, eas artes, quibus ætas puerilis ad humanitatem informari solet, non sine summa totius civitatis voluptate posthac discant. Id autem ut primo quoque tempore faciatis, liberorum vestrorum ingenia ad honestas omnes disciplinas naturæ beneficio aptissima, vos non hortari tantum, sed compellere mihi videntur.

In exiguo hoc Rapicii nostri libello, ut Lector sibi persuadeat, valde utilia ad puerilem Institutionem contineri, afferam præterea pro Specimine integrum caput, quod inscribitur:

De Officio Specialium Magistrorum.

IS vero, cujus fidei, ac curæ commissi erunt triginta pueri, eos primo statim mane, tum ex Poetis, tum ex Oratoribus, qui pro tempore enarrabuntur, quantum eorum ferre memoria potuerit, tantum recitare compellat; sic enim & memoriam exercebunt, & assuescent optimis, semperque habebunt intra se, quod imitentur, atque abundabunt copia verborum optimorum, compositioneque, ac figuris jam non quæsitis, sed sponte, & ex reposito velut thesauro se offerentibus. Inter audiendum autem emendet, si qua vitia sunt oris, exigatque acriter, ut expressa sint verba, nec in faucibus audiri, nec extremas syllabas interciderere patiatur. Observandumque erit, ut gestus ad vocem, vultus ad gestum accommodetur, ut recta sit facies dicentis, ne labra distorqueantur, nihil denique faciat puer, quod non deceat. Et jam tum discat, quomodo narrandum, qua auctoritate suadendum, qua voce excitetur indignatio, quo flexu miseria moveatur. Denique eodem tempore vocem, memoriam, ac pronunciationem exerceat: quod ubi fecerit, prælegat, ita ut non tamen enarret ea, quæ mox in auditorio erunt audienda. Deinde omnes cum suis quemque libris in auditorium inducat, & summa intentione audire compellat, & cum illis ipse quoque diligenter audiat. Statimque ab auditione in cellam suos quisque revocet, atque ibi etiam clarius, & (ut ajunt) crassiore Minerva, quæ audita erunt, omnibus

P. II.

I

sum.

summo silentio audientibus repetat. Postea autem e singulis decuriis singulos eligat, qui ipsi quoque aliis silentibus eadem illa dictata summa cura reddant. Mox vero distributo, atque ideo leviori labore singuli singula, dummodo incerti semper sint, ac non prius, quod reddere eos oporteat, intelligant, quam illis imperatum fuerit, ut hæc ipsa incertitudo eos semper suspensos habeat, coganturque nihil omnino non intelligere, quum nihil sit, quod non quasi forte quadam contingere illis queat; nihil hoc pacto ex audiendi, & studendi diligentia discentibus peribit, & multum superflui laboris magistro adimetur. Atque hæc quidem prandium præcedent. Statim autem a prandio, quam diligentissime poterit, nomina, ac pronomina, verbaque, & participia omnia, quæ in versibus mane enarratis fuerint, a discipulis declinanda curabit. In his vero partibus, quæ declinationem non recipiunt, significationes, differentias, atque accidentia a discentibus exiget, distributo pro portione vocum in omnes labore, pedum quoque proprietates eodem modo reddi sibi postulat, quas jam inde a prima ætate notissimas fieri pueris erit utilissimum, tum propter poemata, tum propter oratoriam compositionem. Inter hæc ipsa autem Orthographiam quoque docebit, in iis maxime dictionibus, in quibus, facile labi posse scribentem animadvertit; nec quicquam omnino contemnet, quod prodesse discentibus existimaverit, neque vero ambitiosa festinatione a posterioribus incipiat, & dum ostentare discipulos circa speciosa mavult, compendio ipso moretur. Dignoscere ergo nomina a verbis, & utraque optime declinare doceat, nec vero contentus sit ea, quæ analogæ erunt, tradidisse, sed omnia plane, quæ in nominibus heteroclita, in verbis anomala, atque defectiva dicuntur, summa cura ostendat, tum in nominibus quæ propria, quæq; appellativa, quæ per se subsistant, quæ subsistentibus adiciantur, quæ antecedentia, quæ relativa sint, quo nexu adiectiva substantivis, relativa antecedentibus, recti casus verbis jungi soleant; nec prius quemque provehat, quam hæc in promptu habuerit. Atque hic primus ordo sit. Secundus eorum, cum quibus casibus activa, & passiva verba jungenda sint, jam discere inci-

incipient. Tertium vero neutra communia, deponentia, atque impersonalia constituent, quibus eorum, quæ frequentativa, quæ meditativa, quæque inchoativa appellantur, formationes, atque inclinationes adiciendæ erunt, ne quorum constructionem discant, eorum originem, ac figuratorem ignorent. Quartus participiorum constructioni discendæ destinatur. Quintus distributivis nominibus, & adverbis tum temporalibus, tum localibus, quorum pleraque inde descendunt, diligentius inspiciendis, ac plane percipiendis incumbent. Sextus patronymicorum, possessivorum, ac diminutivorum, participialiumque, & verbalium, atque adverbialium nominum, & eorum, quæ specialiter denominativa dicimus, formationes discat. Septimus comparativa, ac superlativa. Octavus relativa, ac metaplasmos. Supremus schemata lexeos, ac tropos; qui ordines, etsi nimis multi fortasse videri possunt, mirum tamen est, quanto facilius ita literæ tradantur, quantumque animi hic ad superiores subinde ordines progressus discantibus adiciat, dum partem itineris, quam emensi sunt, læti respiciunt, & minus, minusque in dies laboris superesse sibi lætantur: neque nimia, ac confusa operis mole deterrentur, sed divisum in partes omnes majore fiducia suscipiunt, & minori labore perferunt. Videat ergo, ne quid præpostere doceat, ordinemque tum in omnibus rebus, tum in hac maxime utilem esse existimet, nec ullum in superiores ordines vocet, nisi quem in inferioribus, quantum necesse est, didicisse perspexerit. Ubi vero hunc quasi orbem expleverint, tum demum epistolas familiares tenere, & imitari elegantiam veterum incipiant, neque tamen statim dimittantur, sed adhuc in officio contineantur, & quæ didicerunt, iterare, & alia docere compellantur, ut discant pariter, ac doceant. Ut vero in ordines, quos superius attigimus, redacti, habeant semper aliquid, quod agant, diligenter excogitata, ac sua manu scripta themata, singula singulis ordinibus accommodata, statim a prandio exhibebit; dabit autem operam, ne aut inania sint, aut sensu inepto, aut sermone insulso, sed aut historiam memorabilem, aut sententiam moribus utilem, aut fabulam, aut apologum, aut figuram aliquam,

etropumque, aut exquisitas difficultates contineant, quæ ut facilius, ac commodius præstare possit, quicquid illi temporis a docendi labore superfuerit, id totum bonis authoribus evolvendis impendet, atque inde quasi quosdam flores sibi deliget, quos postea ad discendum utile oblectamentum promat. Ea themata postquam omnes scripserint, & in Latinam linguam traduxerint, diligenter inspecta emendabit, & dictorum, ac scriptorum rationem minutim, ac subtiliter exiget, distributo in omnes respondendi onere, quod ubi per singulos ordines expleverit, mutuis discipulorum inter se interrogationibus, quod temporis superfuerit, concedat; atque ubi jam singuli quaternos (ut hodie vulgus loquitur) interrogaverint, & rursus ipsi a quaternis interrogati fuerint, in auditorium omnes deducat, ac post auditionem tandem dimittat. Ipse etiam interdum declamando sui periculum, si videbitur, faciat, aut prælegendo, & interpretando in publico auditorio, & nova discendi irritamenta pueris suggerat.

Ad rem Grammaticam etiam facit ejusdem Rapii Epistola, qua Brixianæ Juventutis Præceptoris, scilicet Jacobi Petrecini Castionatis in Terentiani Mauri libellum, de Literis, Syllabis, Pedibus, ac Metris eruditos Commentarios probat, eamque ex Veneta Editione anni 1533. mox recito.

Jovita Rapius Jacobo Petrecino suo S. D.

LEgi, ut petieras, Commentarios tuos in Terentianum eruditos sane illos, & planos bonæ frugis. Proinde, ut debui, ex animo gavissus sum, te, qui jam pridem Brixianam Juventutem docendo, eruditionem tuam tantæ illi Civitati comprobaras, postquam in Patriam, & amœnissimos istos musarum secessus rediisti, jam etiam scribendo, rem latinam juvare, & orio isto, quod tua tibi virtus, atque industria peperit, ita frui, ut prodesse mortalibus non desinas. Itaque velim, optime speres. Nam quod ait Flaccus, *aut virtutis nomen inane est, aut decus, & laudem recte petit experiens vir*, Magnum tibi ad gloriam aditum fama patefecit,

cit, quæ non contenta Cenomani agri finibus, nomen tuum latissime circumferre cæpit, atque eos etiam, quos nunquam vidisti, tibi amicos reddidit. Ego certe, qui hætenus tuum erga me animum dilexeram, jam num tuam istam in re literaria sedulitatem ita amo, ut tibi de me summam cum fiducia possis omnia polliceri. Vale. Ven. VIII. Kal. Decembris M. D. XXXIII.

Ad Jacobum hunc Petrecinum Joannes Planerius Epistolam scribit, qua obsecrat, ut Annotationes illæ in Terentianum ad se transmittantur; cujus voto satisfaciens Jacobus, ac proinde Annotationes illas transmittens, petit ipse, ut hospitio, licet infulsæ, apud Planerium suscipiantur, ut saltem, quod propria vi non merentur, id honoris ab aliis, sub umbra Planerii sedentes, adipiscantur.

X. Quo jure in Grammaticorum syllabo reponendus veniat Joannes Taberius Rovatensis, nemo a nobis requireret, qui de eximia ejus in Græcis, Latinisque literis præstantia, & singulari prorsus sedulitate in Brixiana pube erudienda, in superiori parte hujus Speciminis dicta animo recolat; memineritque præsertim, Augustinum Saturnium paulo ante memoratum, Joanni Institutori suo, Viro (ut ait) post homines natos simul inter doctos longe optimo, simul inter bonos utriusque linguæ in primis doctissimo, acceptum retulisse post Deum, quicquid in suo Mercurio politioris esset doctrinæ. Attamen quod Taberii nulla exstet Grammatica lucubratio, posteriorem hunc locum ejusdem mentioni reservavimus, quem honorificum imprimis efficiet Aldi Manutii, quod pariter huic loco reservavimus, testimonium. Magnum illud literarum numen, Manutius, Taberium

no-

nostrum dignum reputavit, cui Stephanum, qui de Urbibus scripsit, dicaret, hisce verbis Epistolam exorsus: *Quantum voluptatis cœperim, Taberi, cum in ista Urbe populosissima, nobilissimaque Brixia, plurimos summo studio incumbere literis Græcis, te Magistro, accepi, non facile dixerim; atque hisce eam claudens: Eum librum tibi dicamus, Taberi suavissime, munerique mittimus, ut cum sanctissimis moribus, optimisque literis in ista Urbe dignissima, opulentissimaque Brixia, juventutem instituas, cognoscas, te propterea a nobis amari plurimum, sitque hic liber apud te μνημόσυον amoris summi erga te mei perpetuum.* Mirari in eadem Epistola Manutius se scribit, quum jam ea tempestate tot annos omnia arderent armis & Christianorum, & Infidelium, homines tamen sic incensos ad literarum studia esse, incendique in dies magis, ut invitis bellis, & inter arma literæ, quæ tot sæcula obrutæ jacuere, emergant; jamque non in Italia solum, sed etiam in Germania, Gallia, Pannonia, Britannia, Hispania, & ubique fere, ubi Romana lingua legitur, non modo ab adolescentibus, juvenibusque, sed a senibus quoque summa aviditate studeatur literis Græcis. Id, inquam, miratur, & studiosis omnibus gratulatur Manutius; at quanto magis Brixie gratulandum, quod in tanto literatorum hominum proventu, ejus urbis studia, ac Brixiani Magistri præstantiam, ipse Manutius ea nuncupatione cæteris omnibus quodammodo prætulisse sit visus?

XI. Nil mirum igitur, si Græcis etiam literis Brixie adeo efflorescentibus Græca ipsa Grammatica haud parum lucis a Brixiana Literatura accepit. Methodum
lin-

linguæ Græcæ libris quatuor comprehendit Cornelius Donzellinus Brixianus, qui Cosimi Ducis filiis Francisco, & Joanni Principibus Mediceis in tenella ætate constitutis Opus suum dedicavit, dum interea de Dialectis, atque de Syntaxi libros elaboraret, solidiores præterea, ac lautiores cibos pollicitus, ipsisque Principibus magis dignos, ubi per eorum ætatis, atque animi robur licuerit. Donzellini Methodum exhibent mihi Basileenses Joannis Oporini typi an. 1551. cum Epistola Nuncupatoria, quæ hujusmodi est.

Illustris. Principibus Francisco, & Joanni, Cosmi Medices,

Reip. Florentinorum Ducis, FF. Cornelius Donzellinus S.P.D.

CUM ad vos officii gratia aliquando adire, Principes excellentissimi, decrevissem, ejus mihi præcepti venit in mentem, quo Dominus populum suum rite instituens, neminem suo conspectu dignum existimat, quin secum donarii quippiam illuc attulerit; neque id itidem ab eodem temere factum arbitratus, cum passim judices, ac magistratus augusto, ac sanctissimo illo deorum nomine dignatur: Statui demum non ante V. E. invisere, quam munusculum aliquod, non copiarum, sed animi erga vos mei certissimum argumentum, ac monumentum perpetuum præmissem. Id quod mihi nunc sæliciter sane cecidit, nam cum jam sexennium, Methodum quandam Græcicæ linguæ, ejus dumtaxat quam communem nominant, inchoassem, eam nunc denuo in manus sumptam, intra paucos dies, quos huic operi, gravioribus studiis paulisper sepositis, dicaram, recognovi, ac politiore quadam arte perfeci. In qua elaboranda, unum id mihi consilium fuit, non noctuas Athenas, ut ajunt (quippe qui eruditissimis præceptoribus assidue operam detis, quibus nihil sit nostris hisce puerilibus nœniis opus) neque honestos, ac impendio utiles aliorum labores e manibus juventutis excutere, sed illos potius, quantum per me fieri potuit, exornare, excolere, atque omnibus numeris absolutos, in communem *ἡμῶν φιλαλήθειαν* commoditatem, atque

atque utilitatem invulgare. In quibus ego cum multa alia desiderabam, tum illud præcipue, ut in tyrunculis instituendis, & brevitatæ simul & artis rationem habuissent. Nam cum in his non pauca supersint, in illis contra multa etiã desint, in aliis certum præceptionum ordinem, in aliis tradendi facilem quandam rationem, atque in dicendo perspicuitatem requiras, sit ut hisce tot, tantisque in docendo incommodis, adolescentium animi aut non mediocriter retardentur, aut ab hujus tam necessariæ linguæ rudimentis prorsus averſi, ditissimis Græcarum copiarum thesauris indigne fraudentur. Quibus ego uti consulerem, atque eos in suscepto labore, atque studio retinerem, dedi operam, ut juxta eam methodi rationem, quam Aristoteles ille unus, atque idem optimus informandæ methodi artifex, in posteribus illis suis Resolutoriis tradidit, artem hanc brevissimis, ac planissimis præceptis, hoc est, ἀμαθέστερον, ἀλλὰ σαφέστερον expedirem, atque conficerem. Quod an præstiterim, aliorum esto judicium. Certe sum id totis nervis conatus. Quod si minus ex sententia successerit, uti sane fieri potest (quis enim non alicubi labatur, atque erret?) ingenium, ac prudentiam mihi, non juvandi voluntatem, neque studium defuisse, ingenue confitebor. Porro cuinam potissimum, hoc quicquid est operis, consecrarem, cum diu mecum id, multumque cogitasset, in eam tandem sententiam adductus, atque adeo raptus sum, ut nullos præ vobis hocce munusculo dignos existimarim. Nam sive illustres Majorum imagines, sive Patris amplitudinem, atque gloriam, sive ingenia, ac studia vestra intueor, quibus id, præterquam unis vobis, dicari fas sit, hercle non video. Nam quis Laurentiis, quis Cosmis, quis Petris illis vestris aut sapientior, aut justior, aut omni denique disciplinarum, ac virtutum genere ornatior? Quis vero Augustus, aut Mæcenas sit cum illis vel studio, ac benevolentia in eruditos, vel liberalitate, ulla ex parte comparandus? Nanque ut illis Virgilios, Horatios, Ovidios (fateor) debemus: ita his (dicam enim quod sentio) longe uberiores, feliciores, atque adeo se-
veriores illam doctissimorum virorum, hoc est Oratorum, Historiographorum, Dialecticorum, Mathematicorum,

ac

ac Philosophorum segetem (Politianos inquam, Landinos, Aretinos, Crinitos, Marsilios, atque alios innumerabiles) ferimus acceptam, ut quod de Isocratis schola Cicero, id nos de singulari illorum, atque inimitabili benignitate jure optimo dicere possimus : ex ea plures in omnibus nobilissimarum artium studiis consummatissimos, quam ex equo Trojanano armatos, prodiisse. Jam vero quid de Cosmo, illustrissimo Duce, ac Patre vestro dicam? Qui honestissimis Majorum suorum vestigiis ingressus, tam celebre sibi, atque gloriosum nomen comparavit, ut quem seu pietate, seu iustitia, seu fide, seu prudentia, seu magnificentia munerum, ac liberalitate naturæ, cum eo conferre possimus, neminem habeamus. Dispeream, si vana loquor. Cum de illo cogito, cogito autem quam sæpissime, vel unus mihi videtur (ne decem hic Nestoras cum Agamemnone somniem) Christianam Rempubicam afflictiis hisce, ac prope desperatis temporibus misere oppressam, in veterem illam, atque incorruptam disciplinam, libertatem, atque dignitatem feliciter aliquando vindicaturus. Tanta in juvenili adhuc pectore elucet vel sanctimonia, vel severitas, vel gravitas, atque constantia, ut unus religioni refarciendæ, corrigendis moribus, restituendæ disciplinæ, virtutibus ceu postliminio in orbem revocandis, atque omnibus nobilissimarum doctrinarum studiis, quæ jam pene intermortua erant, ab inferis excitandis (quæ is accersitis undiquaque excellentissimis ingeniis, atque doctissimis professoribus, amplissimisque præmiis propositis, summa benignitate, ac munificentia fovet, alit, atque incredibiliter provehit) natus esse videatur : quarum artium splendore non Italiam modo, sed jam exteras quoque regiones omnes mirifice illustrat. Verum ne me aut Soli lumen addere, aut vane assentari existimetis (a quo ego vitio semper natura, nunc vero etiam ratione, atque consilio tam abhorreo, quam qui maxime) nihil hic amplius dicam. Vos tantum hortari non desinam, ne vobis ipsis desitis, & quas divinitus vel animi, vel ingenii, vel aviri, ac paterni splendoris dotes consecuti estis, eas ad pietatis, honestatisque, ac bonarum literarum studium (uti facitis) sedulo conferatis, quo & vobis, ac splendidis Majorum ve-

P. II.

K

stro.

strorum nominibus honori, & Florentinæ Reipublicæ utilitati, & universæ Christianæ Ecclesiæ emolumento, ac saluti esse possitis. Accipite igitur, Principes amplissimi, id quaecunque meæ in vos observantiæ pignus, atque eo tantisper fruamini, dum nostros de Dialectis, atque item de Syntaxi libellos, quos in manibus habemus, vobis, ceu summam totius hujusce Methodi perfectionem, elaboramus. Nam quod hoc, ceu lacte, vos nunc alendos suscepimus, id ætatu læ huic vestræ, ac teneris etiamnum annis dedimus: solidiores deinceps, ac lautiores vobis cibos, atque nobilissimis, & honoratissimis Principibus cum ad cognoscendum, tum ad agendum magis appositos, ubi per ætatis, atque animi robur licuerit, ministraturi. Nam vobis, atque uni demum illustrissimæ familiæ vestræ Medicæ, omnes semel ingenio nostri fructus, quamlibet tenues, edere, atque religiose dedicare constitui. Dominus Jesus Christus vestram istam vere divinam, ac regiam indolem, solida pietate, ac sanctimonia in dies imbuat, atque excolat, ac suo spiritu ab omnibus vulgi inquinamenti purissimam servet: quo in Patris vestri, velut unici exempli, instituta ac mores formati, eos vos orbi præstetis Duces, ac Principes, quos nostra hæc tempora & desiderant, & sibi jure optimo pollicentur. Valete Principes clarissimi, meque vobis deditissimum (qua estis humanitate) agnoscite, atque diligite.

Grammaticos Græcos, qui nascentibus literis flourerunt, postquam recensuisset Vossius de Arte Gram. l. 1. c. 4. subdit, ex Latinis, qui Græcam Grammaticam condiderunt, Urbanum Bellunensem primum fuisse, qui aliquo loco haberi mereatur, ejusque exemplum multos postea secutos, ex quibus doctrinæ, & industriæ laudem maxime meruerint Angelus Caninius, & Fridericus Sylburgius. Locum inter eosdem Cornelio quoque Brixiano assignandum, vel illud demonstrat, quod dignus sit habitus, qui ea tempestate Mediceorum Principum studiis, ut Urbano quoque Bellunensi contigerat,

rat, præflet; quodque ejus Methodum, Joannes Oporinus, Typographus, haud minus ab eruditione, & frugiferarum lucubrationum delectu, quam a typorum specie laudatissimus, Basileæ evulgandam suscepit anno, ut superius adnotavi, 1551. quo tamen in Annalibus Typographicis Opus illud minime comparet.

XII. Nobis Grammaticarum Institutionum recensionem finem jam imponentibus Benacenses typi occasionem præbent aliquid dicendi de Aldi Manutii Grammatica, nam eam non multo ante in lucem editam studiose occupavit, atque evulgavit an. 1519. Tusculani in ædibus suis Alexander de Paganinis. Apposuit Aldus Præfationem optimis utique refertissimam monitis, quibus non tyrones tantum, sed & ipsi nostræ tempestatis Magistri, urinam proficerent; hique præsertim caverent, ne illos memoriæ commendare cogerent lucubrationes suas vel carmine, vel prosa oratione, etiam de arte, compositas, quas scilicet quum summo labore pueri edidicerunt, paucis diebus dediscunt, eoque præterea desperationis tum materiæ, tum styli difficultate, veniunt, ut & scholas, & literas fugiant, & studia, quæ amare nondum possunt, maxime oderint; dum contra præstaret, illos eo tempore facilius, meliusve vel Ciceronis aliquid, vel Virgilii, aliorumve illustrium Auctorum ediscere. Hæc omnia se puerum expertum fuisse tradit Manutius, dum scilicet, præceptore cogente, Alexandri carmen de Arte Grammatica memoriæ mandaret. At non aliud in ea Manutii Præfatione salubrius monitum, quam illud, quo discantium puerorum mentes Christiana in primis

pietate imbuendas præcipit, *Itaque* (inquit) *enitendum pro viribus, ut et sanctos mores, et bonas literas simul edoceantur adolescentuli, quando alterum sine altero facere nullo modo licet. At si in altero peccandum foret, potior mihi ratio vivendi honeste, quam vel optime discendi videretur. Malo enim, eos nullas scire literas ornatos moribus, quam omnia scire male moratos, malisque simillimos esse demonibus, qui etsi multa sciunt (nam id ideo illis inditum est a Græcis nomen) sunt tamen quam pessimi. Quantum præceptorum virtus, vitiumve prosit, aut noceat parvulorum moribus, ostendit exemplo Leonidis prædagogi, qui Alexandrum vitiis imbuir, quæ robustum quoque, ac maximum Regem ab illa institutione puerili sunt profecuta.*

Benacensem Typographiam, Aldinx, ut infra docēbimus, propemodum æmulam, Annales Typographici referunt ad annum 1523. quo Ciceronem de Offic. Amicit. Senect. Paradox. cum Comment. diversorum editum Tusculani apud Benacum commemorant. Itaque eorum Annalium conditori minime comperta fuit, non solum Editio illa, quam supra allegavimus, Rudimentorum Perotti anni 1480. opera impressoris Benacensis evulgata, sed etiam aliæ hæc an. 1519. Institutionum Manutii. Quum enim eo ipso anno 1519. laudetur in iisdem Annalibus Florentina earum Institutionum Editio, facile colligi potest, & Benacensem eosdem memoraturos, si exploratam habuissent. Institutiones Manutii iterum excusas fuisse Tusculani ab eodem Paganino an. 1532. declarat Editio, quam pariter ad manus habeo.

O R A -

ET in Oratoria Arte excolenda magnam sibi laudem Brixiana ingenia vindicarunt . Fervebat ea tempestate , cujus literariam historiam nostra hæc lucubratio prosequitur , inter Rhetores concertatio de Oratoris Fine , pugnantibus aliis pro sententia Ciceronis , aliis vero eidem Quintiliani sententiam præferentibus ; eoque contentionis ardor evasit , ut Venetiis in Divi Stephani æde in frequentissimo Patritiorum , Senatorum , doctorumque Virorum consensu fuerit ea de re disputatum a Marino Becichemo adversus Raphaelem Regium præsentem , & audientem . Actionis hujus celebritas describitur a Paride Stephânio in Epistola ad Hieronymum Bononium , quam ipse Marinus Prælectioni suæ in Plinium inseruit . Ibi Stephanus postquam narrasset , funebrem laudationem in Joannem Baptistam Scytham a Marino , quum eam provinciam tam Sabellicus , quam Regius detrectassent , viginti horarum spatio fuisse compositam , & in Templo Divæ Mariæ Formosæ ab hora vigesima prima usque ad tenebras recitatam , eique universam Civitatem plausisse , ac præsertim , *summæ auctoritatis , & probitatis , divinique judicii Viros , Bernardum Bembum , & Marcum Dandulum Jureconsultos , & Equites , Equestris quoque ordinis Viros Georgium Hemum , et Andream Trivisanum , Antoniumque Justinianum , et Petrum Pascaleum Patritiorum Principes , aliosque Senatores amplissimos ; quos recensere infinitum esset , ex junioribus Angelum Gabrielem , et Petrum Bembum Patritios utraque lingua eruditissimos , Causi-*

fidicos, et Juris, et Humanitatis, ut vulgo appellantur Professores, inter quos Brognolum, Sabellicum, Regium, et Amasæum; id inquam quum narrasset Stephanus, Actionem, quæ ad propositum nostrum modo spectat, his verbis describit: Quid plura? tota Civitas in laudem, et admirationem peregrini, ignotique Oratoris conversa est; confirmataque in ea opinione non multis post diebus, tum in Gymnasio sæpius, tum in Æde Divi Stephani celebri illa concione, quam contra Regii præsentis, et audientis disceptationes fulminavit, ad quam audiendam concursus fuit omnium, quotquot in Urbe sunt literati, & literatorum amatores. Interfuerunt præterea his omnibus Nicolaus Michael Divi Marci Procurator, Eminentissimi Equites Zacharias Contarenius, & Franciscus Maurocenus, Jureconsultus Marinus Georgius, omnis Pbilosophiæ decus, Lucæ Quirinus, atque Tbronius, et Franciscus Bragadinus, eloquentissimi Senatores. Prætereo Constantinum Priolum, venerabilem senem illum, qui in media concione clamavit, quum Marinum ex pulpito descendentem amplexus esset, Beatus venter, qui te portavit, Dominicum Contarenum, Laurentium Priolum, et plerosque literatorum fautores. Prætermitto Capellos, Contarenos, Navigerios, Barbaros, Foscaros, & reliquos assiduos Patritii generis auditores; quique interfuerunt etiam (vulgo Secretarios, & Ducales Notarios appellant) Viri graves, Gaspar Vidua, Georgius Niger, Marcus Beatianus, Bernardinus Ambrosius, Franciscus Tajapetra, item Franciscus Benedictus, Joannes Rosa, & alii ejusdem ordinis non ineruditi juvenes. Eam de Fine Oratoris Dissertationem pro suggestu recitatam Marinū Petro Paschalico trans-

transmisisse reperio cum Epistola, cujus initium est: *In maximis R. P. occupationibus, et altissimis studiorum tuorum laboribus concionem nostram videre cupis, limatissimoque judicio tuo perpendere, ut audiendo probasti, quibus argumentis Raphaelem Regium præsentem, et audientem in Divi Stephani Æde confutaverim.*

Hæc de celebri illa controversia a nobis sunt prælibata, ut Lector statim dignoscat, Brixianam literaturam, quo doctius, & solidius in ea dirimenda laboravit, ut mox videbimus, eo insignius meritam fuisse de Oratoria Facultate, cujus scilicet maxime interest, ne de ejus scopo disputantes, a scopo longius aberremus. At priusquam de Christophoro Barzizio, cui laus illa debetur, sermonem instituam, Lectorem insuper monitum facio, tot, tantosque nactam admiratores Venetiis Dalmatæ hominis doctrinam, atque eloquentiam, magnumque postea Brixianæ Academiæ ornamentum habitam, haud parem existimationem in Patavina demum Cathedra obtinuisse. Fidem hujus rei mihi facit Epistola a Petro Bembo data anno 1525. ad Joannem Baptistam Rhamnusium, qua ob denegatum Joanni Hispano, doctissimo Professori, ducentorum Florenorum augmentum, impendentem hujus e Patavino Gymnasio discessum vehementer conquestus, remque ejus Gymnasii, Marino Georgio Moderatore, in deterius quotidie prolabi, postea dolet solum Becichemum (quem Becichum vocat) Rhetoricen ibi, magna ludi infrequentia, profiteri; quum anno proxime elapso eodem Gymnasio Romulus Amatus, quo nullus inter Italos in ea arte excellentior, valedixisset. Eam Bembo

Epi-

Epistolam ignoravit nuperus Scriptor Hist. Gymn. Patav. dum Tomo 1. pag. 311. confidenter affirmat, Amasæum Græcam linguam Patavii usque ad annum 1526. docuisse. Ignoravit præterea aliam ipsius Petri Bembi Epistolam ad Romulum ipsum Amasæum datam anno 1526. qua Becichemo jam mortuo eundem ad Patavinam Cathedram revocat, Bononiensi ex cœli bonitate, ex Gymnasii amplitudine, ex rerum tranquillitate, ex stipendii summa, ex tituli honorificentia, ex amicorum copia, & fide, utique præferendam. Utraque Bembi Epistola cuique satis obvia in volumine Epistolarum ejusdem. Quod ibidem subdit nuperus ille Scriptor de Amasæo, *Quid egerit, ubi moras traxeris post annum illum 1526. ipso, aliisque tacentibus ignoramus*, ostendit, æque ipsi ignotas fuisse alias Bembi Epistolas, quibus de Bononiensi Amasæi domicilio edocemur, multoque magis mutuas illas Jo. Baptistæ Egnatii ad Romulum Amasæum, & hujus ad illum, quæ inter Epistolas Claror. Viror. leguntur anno 1530. datæ. Invitatus ab Egnatio Amasæus, ut Venetis Scribis, bonarum artium ut nec ignaris, sic plane sitientibus, prælegendi munus susciperet, his verbis rescribit: *Erat in extrema pagina tua de Thilesiana conditione, in quo tuam de me benemerendi pristinam curam agnovi; mea tamen causa, in hoc genere quod labores, nihil est. Bononiensium me Senatus ornavit, atque honestavit accumulatissime, & se quidvis potius, quam me a se divelli, passurum præsert.* Ei ego abhinc annum fere tertium in quinquennium operam locavi meam. Cæpio S.C. annua certissima H.S. XII. sive malis aureos coronatos CCC. & est cum auditoribus
mibi

mibi negotium per temporum intervalla boris singulis, non plusquam nonagies toto anno. Quæ quoniam mibi conditio turbulentissimis temporibus in officio mansit, non dubito, quin jam tranquillis, & pacatis firmior, ac prolixior etiam futura sit, cum præsertim ad eam tuendam, atque etiam augendam, neque optimorum civium voluntas, neque summorum hominum studia, nec Clementia Pont. Max. ac, si quid ad rem attinet, Cæsaris etiam ipsius Imperatoris gratia defutura videatur. Amasæum hunc (ut hoc etiam notem) quemadmodum & Petrum Beinbum, Paridis Stephani Epistola illis accenseret, qui priori Becichemi Actioni in Æde Divæ Mariæ Formosæ interfuerunt.

I. Christophorus itaque Barzizius Brixianus, quum Matthæum Collatium Siculum, & Bonifacium Bembum Brixianum immoderatus disceptare de Orationis Fine conspiceret, ac Ciceronem, Quintilianumque, duo præcipua eloquentiæ, optimarumque artium lumina, maximeque sibi inter se convenientia, committere, ac veluti capitali dissidentes odio alterum in alterius exitium falsis criminibus armare, atque impellere, hortante Helia Capreolo libellum composuit, a Presbytero Baptista de Farsengo Brixie impressum anno 1492. qua ex Editione Proæmium illico recitabo.

Christophori Barzizii de Fine Oratoris pro Ciceronis, & Quintiliani assertione ad Heliam Capreolum Brixianum patritium.

Proæmium.

FEcerim ne tibi satis, Helia suavissime, in eo, quod a me de Fine Oratoris agebas, te libenter scire velle, tute videbis. Ego hoc tantum tibi vere possum affirmare, me quum tua causa, quem ego non possum hoc maxime non & ama-

P. II.

L

re,

re, & colere, quod unus mihi videre, & liberalibus hujusmodi disciplinis, ac studiis, quibus humana vita excolitur, egregie deditus, & doctorum hominum imprimis studiosus, hoc quodcunque est negotii, & libenter, & haud negligenter suscepisse, tum quod ea res est, quæ meo judicio scitu non minus utilis sit, quam jucunda. Nam quemadmodum, qui ad aliquam artium aspirant, si sibi persuaferint. eos, qui ipsius artis principes habentur, non satis sibi inter se convenire, sed varia, atque diversa sentire, atque præcipere, & odiosum est, & maxime adversum, quum unum probare, alterum damnare, unum sequi, alterum vitare oporteat, sitque persæpe hujusmodi electio, atque judicium fallax, atque difficile; ita contra intelligere præstantes in quavis disciplina viros sibi ipsis consentientes, atque constantes, id vero & gratum est, & discentibus percommodum. Quamobrem non possum eorum propositum non maxime reprehendere, atque damnare, qui quum nonnulla, & ut sibi videbantur, non mediocri essent eruditionis opinione, existimarunt, se non satis multa scire, cæteris visum iri; nisi ea excogitarent, aut comminiscerentur, quibus claros auctores, optimeque de se meritos ignorantia, vel improbitatis falso apud vulgus reos facerent. Quum ii interim tantum ab omni reprehensione abessent, quanto illi argutuli, & impudentes calumniatores veræ eruditionis, omnisque modestiæ magis inopes fuere. Prætereo in præsentia cæteros (sunt enim in omni scientiarum genere non pauci) de duobus tantum, iisque recentioribus, quam fieri poterit, modestissime dicam, Matthæo Collatio Siculo, & Bonifacio Bembo, qui se Brixianum asserit: viris quidem (quod ego haud inficior) non utique indoctis, sed & satis ingeniosis, verum quos immoderatus inveniendi studium (quod fere evenit) parum modestos, ac circumspectos ostendit. Hi namque (ut nosti) de dicendi facultate, quam Rhetoricen appellamus, disceptantes, quum de Oratoris Fine, ut eorum scripta multis exemplis edita demonstrant, dissentiunt, suamque cupidius positionem uterque astruit, eo indignitatis processere, ut Ciceronem, Quintilianumque, duo præcipua eloquentiæ, optimarumque artium lumina, maximeque sibi inter se convenientia, committerent,

ac

ac veluti capitali dissidentes odio, alterum in alterius exitium falsis criminibus armarent, atque impellerent. Quod quidem quum non solum imperitis, sed & plane doctis nonnullam tantis indignam auctoribus opinionem non sine aliqua ad eloquentiam aspirantium hæsitacione posset ingenerare, adortus sum te hortante ostendere duos illos eloquentiæ principes, M. inquam Ciceronem, & Fabium Quintilianum, quum in cæteris rhetoricis præceptionibus sibi convenire; tum de Fine Oratoris nihil, aut quam minimum discrepare, simulque ostendere, quæ contra illi Matthæus, & Bonifacius commenti sunt, ea omnino vana & falsa esse. Quod quidem meo iudicio, ita & perfeci, & assecutus sum, ut aliter posthac aliquid asserere, aut prorsus sentire, nefas existimem. Opus sane eo rectius, atque honestius, quo doctissimos, & præclaros viros insectari, ac lacerare turpius est, atque indignius. Est autem trisecta nostra hæc omnis lucubratio. Primo enim ea ponimus, quæ circa propositam de Fine Oratoris quæstionem censuimus asserenda. His subjungimus, quæ contra a Matthæo, & Bembo disputantur. Postremo, quæ contra nostras positiones esse videbantur, argumenta certis rationibus refutantes, verum, perspicuumq; relinquimus in rhetoricis institutionibus Quintilianum a Cicerone nusquam dissentire. Accipies itaque, amice optime Helia Capreole, opusculum a me tibi proximis noctibus lucubratum, quo sive expectationi tuæ satisfecimus, sive minus, tibi utcumque morem gessisse, gaudemus.

Susceptam exorditur Barzizius tractationem ab eximiiis laudibus, quibus Quintilianus in lib. 10. suarum Institutionum Ciceronem exornavit, qui scilicet vim Demosthenis, copiam Platonis, jucunditatem Isocratis effinxerit, qui non pluvias aquas colligens, sed vivo gurgite exundans, dono quodam providentiæ genitus fuerit, in quo totas vires suas experiretur eloquentia, qui ipsa illa, quæ extorquet, impetrare enim credas, & quanti transversum vi sua iudicem ferat, tamen ille non rapi

videatur, sed sequi, qui non immerito ab hominibus ætatis suæ regnare in judiciis dictus est, apud posteros vero id est consecutus, ut Cicero jam non hominis nomen, sed eloquentiæ habeatur, omnibusque demum spectandus sit, veluti exemplum, unde ille se profecisse sciat, cui Cicero valde placebit. Hisce laudibus recitatis, Barzizius noster in hunc modum ratiocinatur: *Potuit hic suum de Cicerone judicium, quantique illum faceret, expressius nobis ostendere? Potuit divini illius ingenii vim, ubertatem, suavitatem, magis suspicere, atque exrollere? Et tamen, si Diis placet, audebunt aliqui, Quintilianum Ciceroni opponere, inque iis ipsis Oratoris Institutionibus, quibus illum & regem, & Deum facit, diversa illi, atque contraria sentientem, ac præcipientem asserere?*

In capitibus subsequenribus plura habet satis solida de Rhetorica in genere, de materia Rhetoricæ, de civili quæstione, quid sit, de Oratore, quid sit, & qualis esse debeat, & quodnam suum officium; proprius autem ad argumentum accedens cap. 10. controversiam ita definit.

De Fine Oratoris lib. 1. cap. 10.

Finis, ut Philosophis placet, est cujus gratia secundum rationem agens agit omnia, vel finis est, quo ubi perventum est, omnis agentis intentio, operaque quiescit, vel finis est ultimum agentis actum terminans, vel ultra quem in suo genere non est progressus. Sunt vero finium genera duo, unum, quod generale, vel commune, alterum, quod particulare appellant. Et generalis quidem, sive communis finis est, quo omnia, aut pleraque referuntur, ut cum dicimus, Deum omnium rerum finem esse, idest omnia creata esse, ut omnipotentis Dei virtutem, sapientiam, & bonitatem testentur.

Ita

Ita & quum dicimus inferioris Mundi finem hominem esse; hoc est, quæ in inferiore hoc Mundo sunt hominis gratia universa esse. Et humanarum disciplinarum finem esse hominem ad felicitatem disponere; hoc est doctrinas omnes idcirco excogitatas, atque inductas esse, ut homo ad capefendam felicitatem, ad quam per naturam perductus est, magis disponatur, atque exerceatur. Particularis autem finis est, quo particulares res terminantur. Et hic item in duplici est differentia. Est enim qui liber sit & absolutus, nullique omnino eventui subjacens, sed suum semper consequens officium, uti eorum, quæ in sola intelligentia consistunt; ut Theologiæ finem dicimus Deum, quantum humanitus fieri potest, cognoscere, & Astronomiæ itidem finem eorum, quæ certam, necessariamque suæ productionis ex astris causam habent, intelligentiam. Est & finis, qui ab eventu pendeat, ut eorum, in quibus intelligentia cum exteriori actu connectitur, ut medicinæ, rei militaris, mercaturæ; in quo genere & Rhetoricam, hoc est hanc facultatem Oratoriam jure comprehendimus. Et in hujusmodi rebus necesse est, duplicem finem statuere, unum quidem ex artificis intentione, & quem agens quidem semper sibi proponit, sed eum consequi non in sua solius, sed & in fortunæ non minus sit potestate, ut tamen si medicinæ finis agentem movens sit sanitas, & rei militaris victoria, non semper tamen aut illa sanat, aut hæc vincit. Ita & mercatura, quamvis propter parandas divitias, & facultas Oratoria, ut auditoribus persuadeat, exerceatur, non tamen aut mercator ex negotiatione semper ditatur, aut orator ex apposita dictione semper persuadet. Quamobrem necesse est, & alterum quemdam interiorem finem in hujusmodi artibus statuere, eumque certum, & quo artium quælibet suum semper artificem suis præceptis, atque observationibus perducatur. Et hic quidem finis artificis officium complet, & neque ab eo separari potest, nec ultra illud usquam pertendere. Atque ita & medicinæ finem dicemus non sanitatem, quo licet intendatur, non semper pervenit, sed, qui perpetuo suus in illius est potestate, apposite ad sanandum mederi. Et militis non victoriam, quæ semper dubia & incerta est; sed quod ex sua arte

te præstare potest, scienter equos, arma, cæteraque, quibus bella geruntur, tractare. Quibus quidem rebus ita sese habentibus, jam facillimum fuerit cuivis non obtuso, aut vcordi omnino perspicere, Ciceronem, & Quintilianum, duos de Romana eloquentia optime omnium meritos, sed illum ejus auctorem, atque parentem, hunc fidissimum assertorem, atque interpretem, quum nusquam in cæteris, tum de Oratoris Fine minime inter dissentire, aut diversa præcipere; sed optime, sapientissimeque utrumque de dicendi arte sensisse, & præcepisse. Etenim quum Cicero Rhetorices Finem persuadere dictione esse statuit, id quidem spectavit, cujus gratia, & ars ipsa inventa esse, & Orator, nisi omnino vanus, & sui ostentator, ad dicendum accedit; sed quod tamen (ut diximus) præstare, in sola non sit Oratoris potestate. Quintilianus autem Oratoris Finem statuens bene, hoc est appositè ad persuadendum dicere, id elegit, sumpsitque, quod quum unius Rhetorices esset, tum per eam artifex ejus, vel fortuna adversante, semper posset præstare. Quum alioquin persuadere dictione ultimum esse Finem, & quo Orator (ut dictum est) ad agendum moveatur, & alias sæpe & in secundo, & in ultimo Institutionum libro non inficietur. Tendit enim inquit ad victoriam, quam dicit, sed quum bene dixit, etiam si non vincat, id, quod arte continetur, effecit. Nam hoc alias, inquit, nemo dubitabit, omnem Oratorem id agere, ut Judici, quæ proposita fuerint, vera, & honesta videantur. Et hæc de Oratoris Fine, deque omnibus, quæ in præsentī disputatione pro nostro instituto duximus asserenda, differuisse suffecerit. Reliquum fuerit, quæ contra Matthæus Siculus, & Bonifacius Bembus diversis studiis commenti sunt, videre, atque refellere.

Antequam Matthæi, & Bonifacii commenta refellere incipiat Christophorus, de eorum ingenio, eruditione, & scriptis, judicium profert in libri secundi Proœmio.

Proœmium.

Non est facile, Helia Capreole, hoc disputationis genus, sed haud scio an longe sit difficillimum, ubi contrariæ una de re rationes pariter sunt refutandæ. Quum vix fieri pos.

posse videatur , uti unam partem impugnes, quin alteram tueare . Verum duo maxime hac in re mihi non mediocri sunt adjumento , quod nec summa in adversariis est eruditio, nec ea, quæ est, illi pro ardentiore, concitatioreque partium studio magis usi (quod post patebit) quam abusi sunt . Etenim , ut quod de utriusque ingenio, & eruditione, quantum ex illorum, quæ sum confutaturus, scriptis consequi licuit, sentiam, paucis explicem, sic mihi statui. Illos quidem haudquaquam malos esse; sed neq; ingenio plane obtuso, aut inertī. Nam & in litterarum studiis, idest in simplicissimo, innocentissimoque vitæ genere versantur, & nonnulla iidem suis in contentionibus non inficete utique, aut indocte excogitarunt, atque induxerunt. Verum eodem pene ambitionis genere laboravere . Nam (ut omittam, quod alter Quintilianum , alter Ciceronem præsumpserit taxare) & Matthæus una ejus disputationis, quam arbitrato suo concinnasset, non contentus editione , & alteram per dialogum adjecit, in qua nihil aliud omnino quæsit, aut voluit, nisi uti sibi ipsi de sua, quam egregiam, summamque videri voluit, eruditione blandiretur ; & Bonifacius citra omnem sane modestiam se Ciceroni, inque arte dicendi opposuit. Quod vero ad doctrinam pertinet , Matthæus sane in sermone satis purus, ac tersus, & qui comicam nonnihil oleat orationem, visus est ; sed & qui præterea ex altioribus disciplinis nonnihil primoribus (ut ajunt) labris libarit. Hujus namque rei illud nobis indicium fecit. Quod quum ille qualiter persuasio fiat argutius, expressiusque se putat ostensurum ; inter animæ potentias, & sensum, qui nonnisi animalis, & compositi est , annumeravit. In dialectica autem & quæ ad disputationem pertineant, quid valeat, ex illius argumentis passim ostendemus. Atqui voluit tamen in eo non perspicax tantum, sed circumspēctus insuper, ac diligens videri. Si tamen solertia, aut diligentia est, quæ non lædant, sollicitius arcere; quæ maxime insent, urgeantque, aut non perpendere , aut negligentius cavere . Quæ enim minimum contra se faciunt, loca accuratius excludit, quibus obsidetur , ac premitur, in iis hallucinatur . At Bonifacius in cæteris utcumque, sed magno tamen cum intervallo Matthæum consequitur, sed eo quidem aut auden-

tior,

tior, aut callidior, quod non solum quæ potest, sed etiam quæ non potest præstare, pollicetur, ostentatque, minatur multa, sed procul, terret, illudit, insultat. Jacit & tela quandoque sed irrita, atque incerta, & quæ non magis in hostem cadant, quam in se, suosque reflectantur. Sed de his hæcenus. Jam jam enim ipsorum scripta, & contentiones ita esse plane demonstrabunt.

Matthæi, & Bonifacii commentis confutatis, libello, seu toti Tractatui finem imponit Barzizius hæc Conclusionem.

Conclusio.

HÆc sunt, Vir optime, atque humanissime Helia Capreole, quæ de Fine Oratoris pro Ciceronis, & Quintiliani assertione statuimus differenda. In quibus si quid præter propositum negotium acerbius fortasse, aut minus modeste in adversarios nonnullis videor dixisse, illud certe velim ita accipi, itaque expendi, ut iis persuasum sit, me ab omni acerbitate, atque intemperantia quam maxime abesse; nihilque me in iis, quorum scripta pro officio, & communi ad eloquentiam aspirantium utilitate refutavi, præter ignorantiam & præcipitem, atque intolerandam audaciam taxasse. Quod si ii alioquin eo se offensos autumant, ubi quæ scripsi, sic ubi poterunt, refellerint, pari in me licentia utuntur. Tu quam felicissime, atque longissime, vale. Brixiae XV. Kal. Octobris MCCCCLXXX.

Subsequitur postea Bartholomæi Capreoli, Helix filii, Epigramma, quod hujusmodi est:

Bartholomæi Capreoli Helix F.

Inter utrumque caput Latii discordia nuper

Orta erat, ingentis causa futura mali.

Pro Fabio tulit arma ferox in prælia Bembus,

At Siculus magno pro Cicerone fuit.

Jam vario assensu furor hic agitare tumultus

Cæperat, & Rbetor sine carere suo.

Corrigis hoc pietatis honos, & pacis alumne,

Barzizi, excellens arbiter eloquii,

Docto.

*Doſtorum lites, rabioſaque jurgia tollis,
Et certum finem, materiamque doces.
Non tantum ſtudioſa cohors, ſed ſædere juncti
Tullius, & Fabius te quoque Rhetor amant.*

Hanc ipſam quæſtionem de Oratoris Fine attingit Gerardus Joannes Voſſius Oratoriarum Inſtitutionum lib. 1. c. 1. at ibi nulla (quod mirum) de Cicerone facta mentione, Quintilianum ab Ariſtotele tantum diſſentientem inducit; dum vero aſſerit, tam alte quorundam animos Quintiliani opinionem imbibiſſe, ut neque Suadam iis aliud perſuaſuram putet; putarem ipſe, neminem futurum, qui Barzizii lucubratione perlecta, ei calculum ſuum non adjiciat, & utriusque opinionis conciliatorem non exolculetur. Hujus Tractatus ab Auctore ſibi inſcripti meminit Helias Capreolus his verbis Hiſtor. lib. 12. *Chriſtophorus Barzizius municeps noſter literatiſſimus argutum de Fine Oratoris Opusculum mihi adſcripſit.* Qui itaque Opusculi illius auctorem faciunt Chriſtophorum Barzizium Bergomatem, & Medicæ Artis in Patavino Gymnaſio Profeſſorem, proſecto falluntur.

Bonifacii Bembi pariter meminit eodem libro Capreolus, nam ait: *Bonifacius quoque Bembus & ipſe civis, Latinis, Græciſque literis erudiſſimus, in Ticinenſi Gymnaſio a Sfortianis primo, demum ab Innocentio Pontifice Maximo Romam publicus Rhetor conducitur.* Exſtat ad Bonifacium Bembum Lauræ Ceretæ Brixianæ Epistoſa, quæ tertia eſt inter evulgas a Jacobo Philippo Tomaſino, Lauræ inquam illius, quam his verbis idem Capreolus celebravit eo libro 12. Hiſtor. *Sed ea literarum do-*

P. II.

M

Etrina

Etrina floruit tunc civitas ipsa, ut non modo Viri, quorum Opera plurima, atque doctissima in Gymnasiis leguntur, sed etiam Laura Cerete civis nostra non parvum elegantissimarum scripserit Epistolarum volumen, eo certe inter Virorum Opera dignius, quo multos una ipsa mulier etiam dignissimos excesserit Viros, ut antiquarum feminarum decus, & presentium ornamentum ab eruditissimis Viris merito sit appellata.

Matthæi autem Collacii, cognomento Siculi, Calabræ urbis Neocastri civis, Opusculum ipsum, in quo hujuscemodi quæstionem tractat, carpitque magnos Rhetores Victorinum, & Quintilianum, ad manus habeo. Illud Dominico Mauroceno nuncupavit, & eundem his verbis collaudat in Præfatione: *Amo te multum, & diu, Vir sapientissime Dominice Maurocene; sed si unde motus amarim, amemve quæris? Audi. Non ex largis tuis opibus, nec amplo genere. Hæc etsi multitudinis opinionis maxima, tamen ea nihil ego quæro, sequor, & admirror. Sunt enim fortuna, & infirma, redduntque plerumque homines inertes, & a virtute alienos. Sed amo te duplici tua virtute, morali, & intellectuâli, quibus & domi, & foris apud omnes clares. Hinc vera tibi nobilitas, hinc vera, & justa laus, in his nulla domine fortune potestas. Quænam autem scribendi sibi fuerit occasio, mox refert: Ecce autem Antonius Adinolfus Siculus, Vir integerrimus, et laudum tuarum præco, id insperato mihi obtulit. Nam paucis ante diebus mihi in Rivo alto casu factus obvius, inquit: Modo, Matthæe, cum Viro gravissimo, Dominico Mauroceno, sumus in re literaria versati. Post multa, credo, quo me pertentaret, ut sit, dixit,*

xit, se quædam habere dubia, nec hæcenus comperisse, qui ea sibi solveret. Colacius inde occasionem sumpsit libelli conscribendi.

II. Multo operosius, quam propositum Oratori Finem, servandum in Oratione numerum statuere. Quid præstiterit in hoc argumento Rapicius noster, superius memoratus, mox dicemus; sed prius, ut tanti Viri fortuna innotescat, consulendæ sunt binæ ejus Epistolæ ad Magistratus, Civesque Brixianos, quæ inter selectas illas Claror. Viror. leguntur anno 1538. Venetiis datæ. In priore, ad Brixianam Civitatem, in cujus agro tum Majores sui, tenues quidem, sed innocentes Viri, suarum sibi fortunarum sedem delegerant ante annos ducentos, & amplius, tum ipse quoque natus erat, & bonis artibus institutus, admitti petit his verbis: *Itaque etsi per omne tempus, quo jam inde ab extrema adolescentia patrio solo absui, nullas peregrinationis sordes, nullam obscuritatem passus sum, benigna quadam hominum de me opinione semper honestatus, & publica ab honestissimis civitatibus mercede conductus, a Vicetinis etiam, cum nihil tale peterem, aut expectarem, civitate donatus, ac non ita multo post ab illustrissimo Decemvirali Consilio Venetias accitus, urbis tamen vestræ mihi desiderium adeo non excidit, ut in dies, atque horas magis, magisque crescat. Nam, ut olim juvenis amantitatem locorum, & agri ubertatem admirabar, ita nunc in senium vergens, vel potius jam plane senex, urbem ipsam mirabiliter expeto, & ab ea tanquam a carissima parente in gremium, in quo & dum vivum, & post obitum perpetuo conquiescam, recipi desidero. In altera vero, voti compos effectus, gratias agit in hunc modum:*

dum: *Exstat enim, atque eminet, & haret animo beneficii vestri magnitudo, nec mecum modo, sed cum posteris etiam meis vivet. Mibi enim prastitistis, ut post diuturnam peregrinationem multo jam latiore animo ad vos tandem non hospes, sed civis reverti queam. Illis autem viam aperuistis, qua facilius per honestas artes in claram lucem prodire audeant: quod genus beneficii, etsi in alios quoque plurimos contulistis, mibi tamen multis modis majus, quod in me collatum est, videtur. Nam cum nec a majoribus meis fortiter adita pro vobis pericula ostentare, nec census magnitudine, & publicorum munerum participatione civitatem levare possem; vos pro iis omnibus, quibus alii favorem promerentur, innocentiam meam, et mediocrem in bonarum literarum studiis doctrinam, atque industriam ita amplexi estis, ut nec professionis meae, nec peculii tenuitas, nec Clarensum iniqua obtrectatio, et pertinax contentio vos deterrere potuerit, quominus, quod me vehementer optare intelligebatis, libenter concederetis.*

Bergomatibus Scholis Rapicius praefuisse, jam vidimus superius. Quid autem sit, quod in priore ex modo laudatis Epistolis se Venetias a Decemvirali Consilio accitum scribit, apertum nobis facit ipsius Rapicii Sermo de praestantia earum Artium, quae ad recte loquendi, subtiliter disputandi, & bene dicendi rationem pertinent, impressus anno 1544. Venetiis, & Venetae Reip. Scribis inscriptus, quos in Praefatione Rapicius ita alloquitur: *Cum viderem vos, quorum studiis ab illustrissimo Decemvirali Consilio essem datus adjutor, qualiacunque scripta nostra libenter legere, reluctandum diutius tam honorifico in me desiderio vestro non putavi; sed ut omnibus*

bus legendi copia fieri commodius posset, quicquid id est, quod tantopere petebatis, in gratiam vestram imprimendum curavi. Vos, quod vestro suasu factum est, defendetis, et in pulcherrimas istas artes ita incumbetis, ut facto hinc gradu, ad ea, quæ altiora sunt, brevi possitis pervenire, et sanctissimæ huic Reip. quæ vos quasi dulcissimos liberos mater indulgens alit, et honestis disciplinis instituendos curat, virtutem, fidem, atque operam vestram ita probetis, ut quicumque vobis honores deferuntur, non tam blanda quædam ad honeste vivendum invitamenta, quam justa virtutum, ac laborum vestrorum premia esse, omnes merito fateantur. Eo itaque munere apud Venetos Scribas ex Decemviralis Consilii auctoritate functus fuerat Rapicius, quod Baptistam Egnatium Romulo Amasæ obtulisse jam vidimus, quodque rescribens ei Romulus Thilesianam conditionem vocavit, quoniam Antonio Thilesio, qui munus idem obibat, suaque in Calabriam profectio dimisisse videbatur, successor quæreretur. De eo discessu plures exstant Thilesii ipsius Epistolæ in libello Epistolar. Claror. Viror. ad Benedictum Rhambertum, & una ad Andreæ Franciscum Scribarum Principem, seu Magnum Reip. Cancellarium.

Opus suum Rapicius Cardinali Reginaldo Polo dedicavit. Epistolam, seu Præfationem, qua tractati ab eo argumenti ratio describitur, antequam recitem, Lectorem commoneo, ab Joanne Gerardo Vossio Orat. Instit. l. 4. c. 4. magnopere commendari Rapicii laborem, ibique ad declarandam argumenti illius utilitatem affirmari, eum operæ pretium facturum, qui in-

con-

conditam alicujus Orationem in quadrum redigat, ac numerum, quomodo proditur Lazarus Bonamicus, Philelphi Orationem eruditam illam quidem, præclarisque sententiis refertam, sed nulla juncturæ elegantia, ac numeri plane expertem, ita variasse verborum ordine immutato, numeroque addito, ut ab alio quovis, quam a Philelpho scripta videretur. Venetiis in Ædibus Pauli Manutii, Aldi filii, anno 1554. editi sunt Rapicii de Oratorio numero libri, iisque hæc præfigitur Epistola, seu Præfatio.

Ad Reginaldum Polum, Cardinalem Amplissimum, in libros quinque de numero Oratorio, Jovis Rapicii Præfatio.

Vetus querela, ac fortasse non injusta est, omnia vel quodam mundi senio, vel occulta fati violentia in pejus semper ruere, atque in dies retro ferri: hanc enim esse naturæ legem, ut paulatim fortia infirmantur, & magna minuantur, orta occidant, & aucta senescant: sic metallorum venas lapsu temporis exhaustas: sic largos olim fontes vix jam tenui humore distillare: sic poma, sic degenerare fruges, plantas denique ipsas fieri senectutis ariditate deformes. Utinamque in his modo, quæ ad corpus attinent, perniciofa ista lues constitisset; ac non in ea quoque, quibus aluntur animi, multo sævius impetum fecisset. Nam, ut omittam, quam multa usui hominum utilia ab antiquis tum diligenter exquisita, tum feliciter inventa, sibi sublata esse vita conqueratur, possim, si velim, ostendere, nullam esse earum artium. quæ circulum doctrinæ constituunt, quæ ab eo fastigio, in quo veterum beneficio fuerat constituta, lapsu miserabili non deciderit, debilemque se, ac mancā esse ingemiscat. Sed non libet mala nostra querelis nihil proficientibus augere. Longe enim præstat gaudere, quod jam dudum non Romani modo, & Itali, sed Hispani, Germani, Galli, & Britanni illi toto orbe divisi, hanc tantam bonarum artium ruinam certatim fulcire contendunt, ac eam paulatim jam perduxerunt, ut non modo ad eloquentiam,

tiam, sed ad omnium prorsus bonarum artium scientiam latior, ac minus impedita via patere videatur. Quod ego cum non sine iusto gaudio, & admiratione considerarem, mei nescio quo pacto memet pœnitebat. Dolebam enim, quod totam propemodum ætatem ita consumpsissem, ut nihil de posteritate cogitans, in solo eorum profectu, qui a me discere voluissent, mei periculum fecissem, nec unquam, si quid ingenii, & eruditionis in me esset, aliter quam alios docendo, probare tentassem. Itaque mutato in melius (nisi me spes fallit) proposito, qui sæculi nostri hominibus prodesse nunquam destitissem, cœpi velle posteris etiam prodesse, si possem. Quod effecturum me putavi, si ex iis, quæ scripseram, *Διδασκαλικόν* aliquid, atque id non inutile publicassem. Cum vero mecum ipse cogitarem, quid tandem e multis, quæ jacebant contempta, deligerem, venit in mentem veteris illius sententiæ, qua monemur, ut in ea, quam novimus, arte tempus conteramus: statimque animum converti ad libros quosdam de oratorio numero, seu rhythmo, quos amicorum suasu inchoatos, propemodum postea abjeceram; non inutiles quidem illos ratus, sed veritus, ne male feriat homines prius negligenter, quam intellexissent; & inspecto tantum titulo consilium meum statim reprehenderent, & clamarent, me post tot Græcos, & Latinos auctores, & illos quidem gravissimos, in re toties agitata, toties scripta, nihil aliud posse, quam, quod legibus vetamur, actum agere. Hac ego re, quam objici posse mihi intelligebam, nihil deterritus, sed magis, magisque incitatus, quoscunque vel antiquorum, vel recentiorum tractatus ea de re potui invenire, diligenter legi: ut quosdam ex iis artis rhythmicæ peritos negare non ausim, ita illud, nihil reluctante conscientia, affirmaverim, omnes prorsus perverso nescio quo fastu ductos conjurasse, ne rudes, & imperitos docerent; propterea credo. quod. quæ de syllabis demetien-
dis, quæ de pedum inter se cognatione, amicitia, & inimicitia, atque ordine, deque sublationis, ac positionis, quæ in illis fit, diversitate a metricis, ac rhythmicis dicuntur, & ejusdem prope notæ non pauca. quæ rudibus, & discendi cupidis ad hujus rei cognitionem necessaria sunt, humiliora cre-

credebant, quam ut Philosophos, & Viros graves de iis loqui deceret. Cicero certe, ut ab eo incipiamus, qui hanc artis rhetoricæ partem multo diligentius, quam quisquam eorum, qui hodie leguntur, elaboravit, cum L. Crassum, Virum consularem, de his rebus disputantem introduxisset, parum fore decorum iudicavit, si tanti Viri personam ad humilia ista præcepta demisisset. Proinde illum ita loquentem finxit, ut ab iis modo, qui rem ex parte magna tenerent, posset intelligi. Sed ne in Oratore quidem, in quo ipse loquitur, id satis honeste se posse facere est arbitratus. Verebatur enim, ut ipse scribit, futuros esse aliquos, qui non censerent, ejus Viri esse, de cujus tanta Senatus judicia fecisset comprobante populo, quanta de nullo, ad hæc, quæ Grammatici potius, aut Sophistæ essent, se dimittere. Itaque, ut in eo loco, qui de tropis, ea, quæ speciose dici poterant, diligenter ornavit, sic, cum tractandum esset de numero, si quid in ea re fuit ornatus, & eloquentiæ capax, id haud cunctanter expolivit; ea vero, quæ magnificentius fiunt, quam docentur, universa contempsit. Quod ipsum multo etiam manifestius in utrisque schematibus fecit; quæ licet videret esse plurima, & iis ipse unus omnium felicissime uteretur, ac sciret Demosthenis eloquentiam idcirco maxime laudabilem esse existimatam, quod ab eo nullus ferre locus sine quadam conformatione sententiæ dicitur: tamen, quia vidit rem non posse explicari simul, & ornari, totum eum locum devitans, sine ullis definitionibus, sine exemplis, vix bene singula singulis appellationibus indicans, prætervolavit. Quod factum suum cum intelligeret latere non posse, Crassum finxit dicentem, admonitum se a Sole jam præcipitante properasse. In Oratore porro, cum eadem ipsa celeritate locum pertransisset, causatus est ejus rei doctrinam esse vulgarem, ratus ea de causa facilius veniam sibi debere concedi. Aristotelis brevitatem vel personæ philosophicæ gravitas, vel numerus, ac magnitudo rerum, quas conscripsit, excusat. Reliquis veteribus ut ignoscamus, illud fortasse suadeat, quod horum principia a Grammatico ita esse tradita putabant, ut accedenti ad rhetorem, non tam institutione integra, quam levi admonitione opus esse vide.

videretur. Juniores vero, & nostri sæculi homines tantum absunt a culpa, ut non modo digni venia, sed etiam laude sint. Nam plerique eorum, cum aliud agerent, & auctores, in quibus rhythmus mentio facta est, interpretarentur, in commentarios suos multa contulerunt, quibus nonnihil labor hic noster adjuvatur. Sed in eo quoque nos eorum doctrina delectat; quod rhythmus hujus cognitionem scriptoribus utilem sentiunt; sed hanc rhetoricæ disciplinæ partem vel interiisse, vel certe obscuram esse conqueruntur. Quæ ratio nos movit, ut, cum alii pro se quisque rem litterariam, qua parte possent, juvare tentarent, idque multis, ac magnis in rebus jam præstitissent, nos quoque, quoniam majora non possumus, experiremur, an hac in parte, ab aliis neglecta, ab aliis, quasi percipi nullo pacto queant, deposita, ac desperata, ab aliis quasi minus excogitata, a multis desiderata, a paucis intellecta, aliquid opis asserre possimus. Atque id majore fiducia aggredimur, quod nunquam in magnis ita fuimus occupati, ut minora neglegeremus, neque unquam sumus ita speciosa sectati, ut non utilia præferremus. Ad hæc, nullus me successus, aut favor unquam ita potuit inflare, ut artem pueret proloqui, quam factitem. Quamobrem nihil invidiosum mihi sumo, si multa, quæ, quamvis utilia, ac prope necessaria, cæteri contemnunt, collegisse me dico, & ea in communem eorum, qui nesciunt, usum proferre non erubescio. Quicquid igitur ad rhythmus oratorii, quem Aristoteles ex pedum ordine nasci arbitratur, cognitionem pertinere sumus arbitrati, quanta potuimus cura undique conquisivimus, & quæ non solum apud Musicos, Philosophos, Rhetores, Sophistas, ac Grammaticos, sed vel a doctis hominibus audiui, vel ipse excogitavi, id totum in libros quatuor contuli, atque ita digessi, ut in primo libro a numeri, ac rhythmus diffinitione orsus, non solum versus, ac metra, sed omnia prorsus alia, rhythmorum genera ab oratorio rhythmo sejunxerim, &, quibus tandem hic pedibus constitui possit, exprefferim. ac mox, qui rhythmus sint a veteribus improbat, & in oratione numerosa, quæ vitari vitia, oporteat. In secundotentavimus ostendere, quo modo a Poetis Oratores, metrum resu-

P. II.

N

gien-

gientes, numerum potuerint mutuari. Tum adjecimus, qui meliores, ac frequentiores existimentur; quo modo veteres, & quatenus a Cicerone reprehensi; qui, quibus locis pedes sint aptiores; ac denique quoniam demum pacto numerosæ orationis laudem consequamur. In tertio, de commate, tum quid sit, quantumque commata poeticæ ab oratoriis distent, & quæ sit eorum mensura. Tum de eo a pari ratione disputavimus, quid esset, quantumque ab oratorio colo differret; ultimo loco, de genere illius antiquæ orationis, quam *ειρμήλει* Aristoteles vocat, nos perpetuam, ac jugem, vel, ut recentiores, pendentem nominamus. In ultimo libro de periodo, quid sit, & quot illius species; tum de oratione, quæ est in periodis constituta, quam versam nos, Græci *κατεσραμμένη* nuncupant: ut, quoniam principio, ac fine commatum, membrorum, atque ante omnia periodorum rhythmus spectari solet, Orator, hac nostra observatione diligenter inspecta, aptius intelligeret, ubi deberet numerum servare; & multo facilius sententias omnes posset verbis apte comprehendere. Atque hos quatuor libros cum jam absolvisssem, ab amicissimis admonitus putavi faciendum, ut etiam quintum attexerem. Quo in libro satis, ut opinor, accurate scripta sunt a me, quæ recentiorum quorundam de oratorio numero inanes opiniones resellant. Nec vero mihi fraudi futurum putavi, quod hujus sive artis, sive facultatis eam partem tractandam susceperim, quæ multis quæstionibus obscura, non queat satis explicari, nisi illius, ut ita loquar, radices stirpesque spectandas exhibuerim. Quod quanquam sine injucunda quadam tractatione fieri non posse intelligebam, & delicati lectoris fastidia pertimescebam, tamen mihi tentandum putavi; quia sine iis, sicut neque in arboribus, ita neque in magnis artibus ad fructus, & ad ea, quæ sunt aspectu jucunda, pervenitur. Et animi multo liberalioris semper judicavi, potius, quæ utilia, quam quæ speciosa sunt, in commune conferre. Quanquam vero rebus cæteroqui difficilibus, & obscuris non parum, ut arbitror, lucis intuli: tantum tamen mihi non arrogo, ut ejus rei, in qua tot præclara ingenia diu laborarunt, plenam omni ex parte disciplinam tradidisse me prædicem. Verum, ut hoc profiteri
non

non audeo, ita illud spero, atque confido, nostris laboribus, ac vigiliis ad harum rerum cognitionem jam nunc viam adeo apertam esse, atque munitam, ut homines ingeniosi, & abundantes otio, facile, si quid inventis nostris deesse viderint, ipsi possint addere; si quid contra superesseprehenderint, refecare; si quid erratum noverint, in melius mutare; nos certe diligentia vel amicorum consiliis, vel etiam invidorum iusta reprehensione hæc emendare, & in gratiam studiosæ juventutis meliora reddere, nunquam pigebit. Lectores interrim obtestamur, ut hæc, qualiacunque sint, boni consulant; & si scriptionis eruditionem desiderant, animum saltem juvandæ rei literariæ cupidum diligant; ac meminerint, honestos conatus, etiam cum male cesserint, jure laudari. Quicquid autem laboris, quicquid est operis, id, Reginalde Pole, Vir amplissime, cum ea paraphrasi, quam in aliquot David psalmos fecimus, nomini tuo dicamus; non tam quidem aut regia ista nobilitate gentis tuæ, aut sacerdotii dignitate, & istius, in quo constitutus es, loci amplitudine invitati, quam morum, & vitæ tuæ integritate compulsi. Quamvis enim vel generis claritas, per tot ætates ad te usque deducta, vel ecclesiasticæ majestatis, & senatorii ordinis amplitudo neminem non ad observantiam tui nominis invitet: apud me tamen tantum potest animi tui candor, & celsitudo, ut reliqua omnia mihi tua ornamenta his longe inferiora videantur. Quem enim in admirationem tui non rapiat vera illa virtutum omnium parens religio, ac pietas? a qua nullæ te desipientis tyranni minæ, nulla tua incommoda, nulla tuorum vel damna, vel mala poterunt avellere: cujus servandæ, atque augendæ gratia, a summo Pontifice legatus inter hostiles insidias bonam Europæ partem peragrasti; nec odiis solum, sed etiam telis impiorum caput innocens constanter objecisti, te satis magnum, satis tutum arbitraturs, si Deo placere meruisses. Comitantur hanc multæ, magnæque virtutes, quas equidem libenter aliquo verborum honore prosequerer, nisi mihi considerandum intelligerem, non tam quid illis debeatur, quam quid nimia ista tua modestia pati possit. Rara illa, & prope tua unius virtus sileii non potest, quod ab omni ambitione tam procul abes, ut,

quæ alii prima putant, ea tu regia quadam animi sublimitate ita despexeris, ut ne delatum quidem virtutibus, ac meritis in Christianam Remp. tuis summum Pontificatum accipere sustineris; multis dubium reliqueris, major ne sit laus tua, quod supremum istius dignitatis gradum merueris, an quod recusaris; mihi vero dubium non sit, quin multo admirabiliorem te recusando, quam merendo præbueris. Nam merendo, alios labore, atque assiduitate vel viceras, vel æquaras: recusando, & illos, & quod difficillimum est, te ipsum superasti. Itaque apud eos, qui aliquid sapiunt, tanto major semper es fururus. quanto hoc, quam illud, majus existimari oportet. Hinc, quod semper expetisti, feliciter es consecutus, ut nulli non grata sit humanitas tua: quæ optimo cuique ad amicitiam tuam fores aperit, qua me quoque quasi aliquem e tuis ita complecteris, ut vel hoc uno nomine tibi me plurimum debere sentiam. Verum, quando neque ego tibi quicquam, præter grati animi signa, præstare possum, neque aliud a me tua ista sublimis videtur postulare fortuna, erunt hi maxime libri, quos de numero oratorio composuimus, quamdiu legentur, si modo legentur, meæ in te observantiæ monumentum: quos tu, si bene mores tuos novi, vel ob hoc unum amanter fovebis, quod non inanis gloriæ, non quæstus alicujus gratia, sed solo de bonis ingeniis bene merendi studio videbis esse conscriptos.

Itaque Rapičius, ut ad Polum scribit, non plures, quam quatuor de Oratorio numero libros conscribere, in animo habuerat; at quum eos absolvisset, amicorum admonitu quintum adtexuit, quo recentiorum quorundam de eo argumento inanes opiniones refelleret, quique propterea exigit, ut eidem aliquantulum immoremur. In ejus exordio, cum quibus sibi res sit, statim declarat, videlicet cum Philippo Melanchtone, Gherardo Bucoldiano, & Jacobo Ludovico Strebæo: quorum duo priores in iis Commentariis, quos de Arte Rhe-

Rhetorica superioribus annis ediderant, affirmare aufuerant, hoc totum quidquid est, quod de Oratorio numero a veteribus dicitur, vel quasi nec doceri, nec disci possit, prorsus omittendum, vel quasi per se obvium, & facile, contemnendum; Strebæus vero, si quid hae de re post antiquos Rhetores tradi poruit, id totum, diversis in locis, diligenter tractasse prædicaretur. Moxque Melanctoni occurrens, qui quum multa de arte dicendi, ac præsertim de elocutione, dixisset, *stultum (subdit) de numeris præcipere, cum sonus Latine linguae hoc tempore non sit natus*, hac in re non leviter falli hominem ingeniosum, reponit Rapius; nam neque omnes corrupto sono pronunciant, & præterea nullo unquam tempore defuere, qui nativum tum Græcæ, tum Latinæ linguæ sonum corrumpere, semperque aliter Romani, atque Itali, aliter Græci, aliter Germani, & Galli, atque Hispani linguam, ac spiritum, & vocis sonum sunt moderati, imo vero Apulum a Lucano, Siculum a Calabro, Campanum ab Hetrusco, Romanum ab omnibus facile discernas. Attica Theophrastum, sono vocis ducta, Atticum non esse intellexit; Q. Valerium Soranum, hominem suo sæculo literatissimum, a Romanis, quanquam imperitis, vocis sono, & lenitate victum fuisse, L. Crassus affirmavit; scriptumque Cicero reliquit, non defuisse illis temporibus, qui ineptâ pronunciatione se palam ridendos exhiberent. Nec tamen ea res eloquentissimum Tullium deterruit, quominus de numeris tam multa, quam alius nemo, præciperet, & ipse numerose diceret, ac scriberet.

Rhyth-

Rhythmus enim Oratorius non ex quibufvis fonis nascitur, sed ex iis, quos reddunt tum longæ, tum breviss syllabæ, ita politæ, ut versum quidem nullum faciant, rhythmum tamen reddant quemdam delectabilem, & qui ad versuum prope suavitatem accedat; quæ syllabarum quantitas, quemadmodum & earum sonus, & spiritus, cujuscemodi erant apud antiquissimos, hodie etiam manent. Subdit deinde Rapičius in hunc modum:

Ex lib. 5. p. 49. t. 1. 1.

Cum igitur pedibus, ac syllabarum quantitate, & tono, & quasi cantu constet hic numerus; nec syllabarum quantitas, nec tonus, nec spiritus ab antiquorum consuetudine quicquam variaverit: quid obstat quo minus numerum hunc conficere, & de eo præcepta veterum more tradere possimus, ac debeamus? Quis enim ignorat, ubicunque omnes fuerint alicujus rei partes, quanquam disjectæ, ibi tamen, si in unum adduxeris, totum posse constitui? constitui autem solere, & debere, quam fieri potest aptissime; nisi quis aut tam hebeti, aut tam præpostero sit ingenio, ut, cum parata, ex politaque ante oculos, atque inter manus extent membra omnia, e quibus vel Phidæ Minerva, vel Polycleti Hercules possit confici, disjecta illa malit jacere, quam in aptum ordinem redigi, atque in signa orbe toto celebranda consurgere. Quis porro, cum ædes struere desideret, nec quadrati lapidis, lignorumque, & laterum, ac reliquæ materiæ desit copia, struet quidem opus, sed adeo negligenter, ut nihil curet, cum quo lapide, lignove, aut latere, quem lapidem, lignum, aut laterem conjungat? nec consideret, quo modo copulari possint, & qua sui parte stabiliorem, firmioremque queant exhibere structuram? nec saltem abscindat, removeatque, si quid obstat, nec addat, si quid deest, ut tota structura firmior fiat, tum etiam aspectu ipso pulchrior; sed omnia incondita, utcunque sors tulerit, coacervet, ac sibi non tam domum, quam ruinam paret? Huic similes sunt qui-

quicumque contemptis his, quæ traduntur de numero, præceptis, mente circumscriptas sententias incondita potius, atque indistincta oratione jactari lætantur; quam, quæ delegerint, verba ita dimittere, ut suo quodque loco respondeat; nec, cum possint, curent, ut periodi, colaque, & commata omnia & prima, & media ad finem spectent, & alia, atque alia terminatione claudantur.

Si cui vero defuetudo ipsa hujus rhythmî, & diuturna apud multos rei hujus ignorantia, desperatorem ingerere posse videatur, in exemplum affert Rapicius adversus hoc offendiculum, Pontani Uraniam, & Hortos Hesperidum, Fracastorii Siphilliden, & Sinceri de Virginis partu libros, & pauca Andreæ Navagerii, pauca item Cottæ poemata; qui nimirum cum poematum recte scribendorum ratio diu latuisset, & malos versificatores Latini plurimos, Poetam nullum haberent, quasi de Cælo demissi sunt, ut Artem poeticam sopitam, ac jam prope extinctam suscitarent.

Dimisso Melanchtone pugnam init Rapicius cum Bucoldiano, quam inchoat his verbis:

Ex eodem libro p. 50. 1.

Sed quoniam nihilo minus periculosum studiosis hominibus offendiculum objicit audacia, quam desperatio: quemadmodum hæcenus Melanchtoni desperare nos jubenti, respondimus, sic jam Bucoldiano quoque, ad inconsultam temeritatem vocanti, jam respondeamus; quod nobis eo diligentius faciendum censeo, quo plures illum erroris sui subscriptores habiturum esse suspicor. His enim temporibus, ut in reliqua vita, ita in studiis honestarum disciplinarum plus videas confidentiæ, & audaciæ, quam laboris & industriæ. Et nemo ferme est, qui non malit videri doctus, quam discere. Hic igitur in secundo eorum librorum, quos de Oratoria inventionem, atque amplificationem conscripsit, adversus Ciceronem, & Quintilianum, de dictionis Oratoriæ numero dispu-

disputantes, quædam adeo inconsulte, atque imprudenter effudit, ut quivis vel mediocriter eruditus, contemnenda potius intelligat, quam refellenda: cum eos, quos tam audacter incescit, adeo negligenter legerit, ut, quæ ab illis scripta sunt, vix mediocriter intellexisse videatur.

Primo loco Bucoldiani audaciam deridet Rapicius, qui velut aliquod e Delphico tripode oraculum promere se existimans, & quidem vix nuper agnitus contra multos jam longe doctissimos, & multorum sæculorum judicii comprobatos, totum illud, quod de Oratione numerosa reddenda idoneis, & melioribus pedibus, ac numeris docuerunt cum Aristoteles, & antiqui Rhetores omnes, ipse Bucoldianus inane, ac nulla præceptione dignum decernat, censeatque solam verborum juncturam, & figurarum concinnitatem ad Orationis ornatum satis esse. Deinde omissis auctoritatibus, ratione ipsa demonstrat Rapicius, pedum cognitionem, curamque Oratori maxime esse necessariam, & post multa,

Ex eodem libro p. 52. r.

Nam, quod ajunt, commata, & cola qualescunque periodos, atque in iis etiam rhythmos, in omni locutione deprehendi, dicere illi quidem non nihil viderentur, si possent homines iis modo, quæ suapte natura oriuntur rudia, atque inchoata, esse contenti: sed cum omnes aliquid, atque adeo etiam plus multo, quam deceat, voluptati tribuendum putemus, nec voluptas aurium nisi exquisito artificio compareretur, non video, cur quisquam nos in orationis suavitate contemnenda tam severos, & agrestes esse desideret, vel potius imperet, ut audiendi sensu, nescio quo pacto, privare contendat: cum præsertim in iis, quæ ad sensus pertinent, homines tanto studio delectationes aucupentur, ut longe maxima vitæ pars huic uni rei deserviat. Nam, ut indecoras relatu voluptates omittam, quam multa in cultu corporis, quam multa in apparatu domestico, in publicis, in privatis,

in

in sacris, & profanis ædificiis ad voluptatem sunt excogitata. Qui colorum flos, quæ varietas, quæ umbræ, quæ in picturis lumina, quot porro unguentorum, quot odoramentorum genera exquisita? Jam vero in cibis, ac portionibus nulla non gulæ irritamenta tentamus, neque unquam desinimus, aut in usum defueta revocare, aut nova subiode invenire. Sed quid ego in his moror? quasi non in illis ipsis, quæ ad aures pertinent, id palam spectari, ac prope manu tangi queat. Quis enim non videat, non modo in comessationibus, & conviviis, sed in ipsis etiam deorum immortalium templis, & sacris solemnibus hodie ita cani, ut longe majorem temporis partem occupent delicatæ nescio quæ flexiones, & nimis minutatim concisæ, ac falsæ voculæ, quam cantus stabilis, castus, ac severus. In metris vero, ac versibus tot genera, vel primigenia, & simplicia, vel declinata, & composita sunt, ut vix ullo certo, ac præfixo numero liceat comprehendere. In rhythmis poeticis, vel apud Latinos olim, vel apud Hetruscos hodie, vel apud omnes potius gentes, ac nationes tanta varietas, tanta concinnæ cura conclusionis, tanta cupido prolectandæ voluptatis incessit, ut nulla linguæ barbaries potuerit homines impedire, quo minus similiter vel cadentia, vel desinentia certis locis disponerent, & concinnitatem summo labore aucuparentur, ac sententiarum gravitatem, quam vel in primis sectari oportebat, non raro negligerent, ut aures delicatas frequens concinnitas jucunde feriret.

Qui autem laborem deligendorum pedum, & quod sequitur, numerum penitus negligere nos jubent, ne a rebus, ut ajunt, cognoscendis avocemur, eos Rapi-
cius refellit; nam nec Cicero, nec Aristoteles, nec alii Rhetores eos secuti, voluerunt Oratorem studio numeri, ac distinctionis res negligentèr considerare, quum is, qui rectè sit institutus, vel saltem discendi cupidus, possit hæc, quæ ad numeros pertinent, nullo fere nec gtorio in promptu habere, atque in his, vel nunquam,

P. II.

O

vel

vel rarissime labi. Si qui vero sint, qui promittant fore, ut dempta ista syllabarum, ac pedum cura, numeri in Oratione non desiderentur, primum vereri se ait Rapicius, ne parum præstent, quod temere promittunt; deinde si maxime præstent, se non amare subdola ista promissa, quæ cupidos eloquentiæ ad Ciceronis contemptum invitant, & ab ejus imitatione divellunt, quem scimus adeo hujus rei fuisse studiosum, ut de pedibus, & rhythmo solutæ Orationis vix quicquam apud Latinos pluribus locis mentionem fecerit. Tandem Melanchtonem, & Bucoldianum una simul taxans Rapicius, studiosos eloquentiæ homines monet, ut missos facientes novos istos artifices, nec animum despondeant, nec nimis audeant,

Ex eodem libro p. 54. t.

Quando licet, ac maxime expedit, hac in re, ut in reliqua vita, medium quiddam ita servemus, ut audaciæ simul, & inertiae crimen evitemus, atque hanc elocutionis partem excolamus; ut, si non possumus, quo maxime optamus, pervenire, quodam tenus certe prodeamus; & quando honestus est error magnos duces sequentibus, sequamur potius, quamvis infirmo gradu, Isocratem, & Demosthenem, M. Tullium, & L. Crassum, quam aut cum iis, qui per ætatem vel non possunt, vel nolunt discere, desperemus; aut cum iis, qui sibi multo plus sumunt, quam maximis Oratoribus deferunt, quæ studiose discenda sunt, temere negligamus. Sed contra semper animo fixum, atque immotum maneat, quod apud M. Tullium Crassus inquit, numerosæ orationis vim esse magis necessariam, quam difficilem; nihilque esse tam tenerum, neque tam flexibile, neque quod tam facile sequatur, quocunque ducas, quam orationem: ex hac versus, ex eadem dispares numeros confici; ex hac etiam solutam variis modis, multorumque generum compositionem. Proinde nihil nos deterreat ratio ista pedum, sed facilitas potius

tius invitet; qua fit, ut verba de medio sumpta, quasi mol-
lissimam ceram ad nostrum arbitrium formare, ac fingere
possimus, & modico labore consequi, ut, quo tot alii per-
venire, nos quoque, via non fallente, veniamus; itaque stul-
tum est, aut ingenio diffidere, aut aleæ semper incertæ sa-
mam committere. Illinc enim humilis, & abjectæ formidi-
nis, hinc damnosæ, ac fallacis audaciæ nota metuenda est.

Restabat Strebæus Rhemensis, cum quò Rapicius
congrederetur, seu potius cui se compararet; nam illius
de Oratoria elocutione libri tam copiose, tam inge-
niosè, communi iudicio, susceptum argumentum ex-
planare censentur, ut cæteris nullam super eo disse-
rendi materiam reliquisse ipse videatur. Quid in eo
Opere præstiterit Strebæus, exponens Rapicius, que-
ritur ipsum, postquam tam multa de rhetorica ver-
borum electione disseruerat, & longa, atque acri ora-
tione in Latini sermonis contemptores investus fuerat,
cum vix tandem ad locum, in quo de collocandis ver-
bis, de natura syllabarum, de coagmentatione vocum,
de concinnitate clausularum, de figuris, quas rhyth-
mus plerumque comitatur, dicendum erat, pervenisset,
eos quodammodo fuerit imitatus, qui dispendioso iti-
nere fatigati, susceptum semel onus prius abjiciunt,
quam, quo intenderant, pervenerint. Deinde librum il-
lum aureis, & prorsus cedro dignis his verbis concludit:

Ex eodem libro p. 56.

Hanc nos artis partem, quod erat longe difficillima, no-
strisque temporibus tum neglecta, tum non satis intellecta,
tractandam suscepimus: non ut cum veteribus, quos rhyth-
micæ rationis fuisse peritos nemo ambigit, contenderemus,
sed ut, quæ illi tanquam suo sæculo nota partim neglexe-
runt, partim nimis breviter attigerunt, colligeremus, copio-
seque tractata studiosis hominibus ita traderemus, ut, quod

hactenus alii desperaverant, alii neglexerant, id tandem non imitatione sola, quæ plerumque fallit, sed certa ratione perceptum, cum libuisset, usurpare non timerent. Tam diligenter enim, quid sit numerus, & quanta numerorum varietas, & quo modo hic Oratorius ab aliis differat, ex antiquorum, & juniorum sententiis expressimus, ut eum etiam rudes facile possint intelligere. Ita porro, quæ numerorum vitia sint vitanda, ita, quæ virtutes sint expetendæ, tum dilucide, tum breviter expressimus; ut nemo aut in illa incurere, nisi videns, ac volens, aut has non consequi, nisi prorsus hebes, aut negligens, non possit. Quin etiam de pedum natura, & exquisita quadam eorum differentia, de commatibus, de colis, de periodis ea diligentissime collegimus, quæ ab ingeniosis maxime desiderari putabamus, & quæ numerose dicendi cupidos, & non ignavos homines possent vel ab audaci quorundam temeritate revocare, vel ab aliorum turpi desperatione vindicare: si quidem & opus esse rhythmica pedum ratione percepissent; & non magno labore, quicquid hoc est, disci posse intelligerent; quod an præstiterimus, homines bene docti viderint. Nos illud modo constanter affirmamus, nec voluntatem nobis defuisse, nec curam; neque enim timuimus, posse quenquam jure nobis vitio vertere, si post doctissimos Viros, quorum alii de tota bene dicendi ratione scripserunt, alii de partibus elocutionis commentarios reliquerunt, nos in hac, quæ ad Oratorium numerum spectat, artis parte tantum operæ poneremus, quantum & ad desperationem tollendam, & ad temeritatem reprimendam, & ad studia discentium juvanda satis esse videretur. Nam si, post doctissimos Nigidii Figuli de re litteraria commentarios, Messalla, vir foro magis aptus, quam scholis, tum de littera S bene magnum volumen scribere, tum singulis litteris singulos libellos reddere, non est veritus; si Joannes Pontanus memoria nostra post tot aliorum scripta duos de unica non littera, sed aspirandi nota libros scripsisse laudatur; si denique etiam nostri sæculi homines non sunt veriti, his de rebus scribere, quas ab antiquis ornate, copioseque videbant esse tractatas: cur me quisquam vel contemnat, vel reprehendat, quod de Oratorio numero
non

non timuerim post eos scribere, qui hac ipsa de re futuris Oratoribus necessaria, sed multis quæstionum difficultatibus impedita, vel nimis breviter, & obscure, vel adeo prophanter & contempnim scripserunt, ut doctis potius ostendere scientiam suam, quam nescientes docere voluisse videantur: cum præsertim per tot, & tam difficiles quæstiones ita stylum temperarim, ut nec jejuna brevitatis discensium vota frustrari, nec obscuritas affectata legisantis cursum posset impedire; nec ulla rerum aut humilitas, aut difficultas tanta potuit offerri, quam vel contempserim, vel reformidarim. Nam cum maximum quiddam, præclarumque sit eloquentia, quis non videat, rationem numeri, qua res tanta vehementer juvari potest, non ut parvum quiddam oportere contemni, sed ut magnum, rarumque quibusvis laboribus debere comparari? Quamobrem fore confido, ut æquus totius rei æstimator huic labori nostro non contemptum, non odium, sed aliquam potius gratiam deberi judicet. Invidiam vero his temporibus habere hæc materia prope nullam potest; tum quod tenuis, & exilis judicatur; tum quod multorum calumniis est obnoxia. Nam qui ab ineunte ætate neque pedum, neque syllabarum rationes, ac momenta didicerunt, si nunc vel se posse discere desperant, vel tanti non putant, ut eum laborem suscipiant; quamobrem prave pudentes nescire malunt, quam discere: &, ne soli nescire videantur, alios quoque ad hujus rei contemptum impudenter hortantur: ut, si nemo discat, quod ipsi, cum per ætatem possent, discere neglexerunt, aliis vel superiores, vel pares judicentur. Sed me perpetuo bene de litteris merendi studio flagrantem, nec inquisitionis longæ tædia, nec humilitas ulla materiæ, nec inexplicabiles in re tenui quæstiones, nec ullæ calumniarum voces deterrefere unquam potuerunt, quo minus iter semel cœptum constanter tenerem, & nostrum hoc perpetuum de litteris bene merendi studium utile discensibus futurum considerem. Quapropter tantum abest, ut suscepti laboris, & intentæ hanc in rem sedulitatis me pœniteat, ut jamnùm paratus sim libenter & hæc, & si quid aliud scripsero, vel mea diligentia, vel amicorum monitu, vel æmulatorum reprehensione, si modo justa fuerit,

emen-

emendare. Quamobrem, Rhamnusi amicissime, velim, desinas ea mihi timere, quæ me non timere perspicis; amicorum enim monitus nunquam non libenter admisi: reprehensiones inimicorum mihi re ipsa fuisse semper utiles comperi. Nam quæ iustæ fuerunt, ut vel erroris, vel delicti mei me pœniteret, præstiterunt: quæ vero minus iustæ, hoc plus attulerunt, ut jam non delicta modo, sed, quicquid poterat esse suspectum, diligenter caverem, & utraque ratione melior fieri subinde tentarem.

Qualis, quantusque fuerit in Oratoria Arte Rapicius, hæc, quæ ex quinto ejus libro deprompsimus, loca sat palam evincunt. Paulus Rhamnusius, cui ille inscribitur, Rapicius institutorem sortitus fuerat, & propterea ibidem Rapicius sibi gratulatur: uberes fructus, quos ex ea educatione percepit: *Quid dicam* (ita Paulum affatur) *quod ad veterum poetarum majestatem sic jam tuum carmen accedit, ut tamen solutæ orationis laude nibilo minus excellas. Quod, ut alia nunc tua scripta præteream, vel duæ illæ funebres laudationes satis probarent: quarum altera Tryphonem Gabrielem, virum bonum, ac nobilem, & bene doctum, quasi quendam nostri temporis Socratem apud populum apertissimis laudibus extulisti: altera vero Andreæ Franciscum, magnum Reipublicæ Cancellarium, summæ probitatis virum, apud Senatum tanto faciundæ orationis ornatu, tanta vultus, vocis, ac gestus moderatione laudasti, ut neque vera ulla laus ei detracta, neque falsa afficta esse videretur. Ex iis vero fructibus vel præcipuum, ac jucundissimum ducit Rapicius, quod Paulus, & avo, & patruo magno, & patre suo dignum se probaret. Paulum avum Rapicius commendat ex juris, & legum prudentia, qua*
ne-

nemini erat secundus, ex consilio, & judicio, quo tota quidem Italia, sed in florentissima patria sua vel in primis erat illustris; Hieronymum vero magnum patrum ex discendi desiderio, quo factum dicit, ut quum jam & Philosophus gravis, & eximius esset Poeta, Græcique, & Latini sermonis peritissimus, contemptis omnibus patrii soli commodis, in intimam se Syriam, ubi etiam fato functus est, se abdiderit, & aliquot annorum jugi labore literas Arabicas ita didicerit, ut Avicennam elegantissime transtulerit in nostrum sermonem, idemque erga optimum quenque linguæ illius Scriptorem facturum fuerit, si paulo diutius vixisset; demum Joannem Baptistam patrem ex longo rerum publicarum usu, cognitioneque, ac totos annos quinquaginta probata multis, magnisque rebus integritate, & continentia, singularique in omnibus fide, ac propterea principibus in Rep. Viris ira carum, ut eum non quasi ministrum aliquem diligant, sed jam quasi collegam complectantur.

Exstat Pauli Manutii Epistola, scilicet Epistolar. ejus L. 3. qua Joanni Baptistæ Rhamnusio, Decemvirum Consilii a secretis electo, magistratum illum, veluti fructum tot peregrinationum in Galliam, ad Helvetios, Romam, etiam ad hostes armis infectos, Reip. causa susceptorum, necnon consiliorum, quæ ab ipso fluxerunt, ad augendam, quantum in eo fuit, patriæ dignitatem, gratulatur. Ad Paulum vero Rhamnusium Joannis Baptistæ filium Paulus Manutius editos suis in ædibus Cæsaris Commentarios misit, & in Præfatione, Rapi-
cium quodammodo imitatus, tam ipsius Pauli, quam
avi,

avi, pattui magni, & patris laudes profecurus est; inter cæteras vero causas, quibus se adductum scribit Manutius, ut eos Commentarios Rhamnusio commendaret, affert provinciam Decemvirali decreto eidem demandatam, Veneti illius memorabilis belli, quod Henrico Dandulo Duce adversus Byzantios gestum est, Latina oratione explicandi.

Ad Joannem Baptistam Rhamnusium quamplures Petri Bembi Epistolæ datæ repetiuntur, nam inter Italicas Liber tertius Volum. 2. præter duas priores, & tres postremas, reliquæ omnes Jo. Baptistæ Rhamnusio inscribuntur. Inter Latinas vero ipsius Bembi, quæ postrema est libri sexti, ad ipsum Jovitam Rapticium visitur data, qua magnas ei gratias agit, quod Horatium Caroli Fanensis filium instituendum suscepit, & una curaret, ut ab iis doctoribus, quos Rhamnusius Pauli filii sui gratia conductos domi habebat, Græcas literas, & Mathematicas disciplinas Horatius perciperet.

Tandem inter Epistolas Claror. Viror. una adest Reginaldi Poli Cardinalis ad Paulum Rhamnusium, qua gratum animum erga Jovitam nostrum ob libros de Oratorio numero sibi nuncupatos, quorum Proœmium acceperat, his verbis Polus declarat: *Quod vero ad Jovitam attinet, quem ex illo proœmio tam honorifice de me sensisse video, ut laudes eas, quas mihi tribuit, minime possum agnoscere, ita hæc amoris ejus erga me significatio grata sane, ut debuit, mihi & jucunda fuit. Cui quod viro studii, ac benevolentiae debui, neque mortuo jam præstare possum, id in ipsius liberos, atque in te, qui ab eo institutus es, & in filii loco habitus, libentissime conferam.*

feram. Vale, & honestissimum virum, patrem tuum, meis verbis saluta. Bruxellis, V. Kal. Junii MDLIII.

De Jovitæ Rapicii Paraphrasi in Psalmos, cujus ipse mentionem fecit in Epistola ad Polum, dicemus, ubi ad Poetica devenitum erit. Ad Oratoria autem spectat ejusdem Oratio duplex, prior ad inclytum Venetiarum Senatum pro Bergomatibus, altera in funere Pauli Zanchi Bergomatis Jurisconsulti habita. Utramque exhibet libellus Venetiis editus an. 1561. & ex utraque breviter more nostro dabimus excerpta. De belli Cameraensis exitu, cujus causa prior illa habita est Oratio gratulatoria, hæc Rapicii sunt verba:

Exarserat, nescio quo fato, Christianorum Principum miserabilis ira adversus sanctissimam istam Rempublicam vestram, hoc est adversus salutis suæ propugnatores, adversus eos, qui pro Christiana Republica, nulla non incommoda tot jam sæculis sustinuerunt, qui nullos non impetus tam ipsis pectoribus, quam vallo, ac mœnibus excepere, qui tot incendia cum reliquæ Europæ, tum maxime Italiæ impendentia, & vi opum, & singulari quadam, ac prudenti diligentia restinxere; atque ita exarserat vesanus iste furor, ut sopiri posse nullo pacto videretur, nisi prius atrita, ac profligata vestra ista tam salubri, tam necessaria Christianis omnibus potentia; tantisque opibus, tanto apparatu, tanto consensu, tam pertinaci odio, bellum erat conflatum, ut mirum multis videatur, vos tantum animo potuisse præsumere, ut contra totius prope Europæ Principes staretis, sola causa superiores. Vos certe Deus, vos præsens illius ad resistendum hortata est majestas, ut nihil timeretis, meminissetisque, eam esse causam vestram, ut vexari quidem, & affligi possetis, vinci non possetis. Bene, sane bene, quod divini oraculi fidem res ipsa comprobavit; namque aliquot præliis victi, bello tamen ipso Veneti victores fuistis. Et nos mirabili quadam Dei Opt. Max. providentiâ hæc evenisse arbitramur, ut scilicet gloria vestra latius dif-

P. II.

P

fun-

funderetur, discerentque Barbaræ nationes, eam esse Veneri Senatus prudentiam, eam auctoritatem, eas vires, eas opes, quæ vos non minus bello invictos, quam pace claros reddant. Quis quæso non videat, vel hoc uno bello omnes omnium Regum, & populorum victorias, & gloriam longissimo intervallo præcessisse? Quæ enim unquam Respublica tot, tamque intestinos hostes tam diu sustinuit, ac superavit? Nam ut Athenienses, Thebanos, Lacedæmones (quos quidam vobis temere comparare audent) omittamus, Romani illi toto terrarum orbe celebres, bello Punico secundo graviter adeo vexati sunt, ut de summa rerum prope actum sit, & propius periculo fuerint, qui vicere. Fluxit Romano sanguine purpureus Trebia, cruentis fluctibus Trasimenus intumuit, ut Cannæ infelicitis exercitus excidio funestatæ, sola Romanæ cladis magnitudine memorabiles. Et tamen cum unico, atque externo hoste res gerebatur. Vos uno tempore Germaniam, Galliam, Britannos, Hispanos, & (quod pudet referre) Italiam ipsam simul pertulistis. Quodque omnem pene fidem excedit, eos, a quibus oppugnabamini, defendere nunquam destitistis. Certabant illi, ut vos sedibus vestris ejicerent, vos interim injuriam repellere contenti, & quoquo modo fieri posset, vestra tueri, immensissimum Maumetanæ superstitionis Principem, sub defensionis vestræ prætextu Christianorum jugulis inhiantem, incomparabili prudentia a focis, & aris, atque ab ipsorum hostium vestrorum pernicie arcebatis; neque ulla tanta in ferri vobis injuria potuit, ut privatæ utilitatis gratia, aliqua ex parte Christianæ Reipublice tutelam abjiceretis. Itaque non defuit vobis Christus Deus Optimus, cujus consilio pariter, & exemplo, his, qui vel per summum scelus, vel certe miserabilem errorem, in imperium vestrum conspiraverant, prodesse perseveratis; namque illo aspirante tanta sociarum civitatum fides, ut non conspirantium modo impetus retulerit, & fatorum vim quandam evaserit, sed famæ quoque, ac gloriæ non modicum proventum fecerit.

Ex altera autem Rapicii Oratione locum illum exci-

scribemus, quo Pauli Zanchi obitus describitur, Christianus utique, ac maxime pius, ac proinde admodum aptus ad testandam non Oratoris tantum eloquentiam, sed & dissimilem prorsus in Religionis re Pauli Zanchi mentem a perfido transfuga Hieronymo Zanchò:

Pervenerat jam ad annum vitæ quadragesimum octavum, cum, ut erat pius, memor suscepti olim voti, Deiparæ Virginis templum in Laureto positum visere instituit: & cum id votum liberaliter solvisset, non longo illinc itinere Romanam venit, atque ibi aliquot diebus moratus, Petrum filium, quem secum adduxerat, apud Augustinum Triulcium Romanæ Ecclesiæ Cardinalem reliquit: ipse per Hetruriam in patriam reversus anni tempestate frigida, nivali, & ventoso die, Apenini transitu, dum propter ascendendi, & descendendi periculum, relicto equo, pedibus iter facere compellitur, labore insueto, & lassitudine confectus in febrim incidit; illam quidem adeo tenuem, ut Bononienfes medicos, quorum fidei se commiserat, falleret, affirmarentque, nihil esse in morbo periculi. Verum is, ubi cæca illa ægritudine se paulatim tabescere, remedia, quæ adhiberentur, nihil prodesse, intelligit, convocatos ad se medicos orat, ut de summa valetudinis intrepide respondeant: ostendit magni sua interesse, primo quoque tempore intelligere, quid de se judicent; si quid spei sit, nullis impendiis parcant; si desperent, velle se alacriter in Domino quiescere. Cum illi nihilo secius sperare hominem juberent, ipse vel conjecturis quibusdam, vel (quod magis credo) interna aliqua inspiratione admonitus, vitæ finem instare intelligeret, sacerdotem acciri jubet, occultorum exhomologesim quanta fieri potest diligentia conficit; cum sacrificio interfuisset, non sine maximis piæ mentis indiciis Christianæ religionis viatico se instruxit. Tum vero lætiori jam vultu visentes cœpit admittere, & saluantium dexterarum arctius stringere: salutabant autem eum nobilissimi aliquot scholastici, & ex magna illa civitate optimus quisque, ac doctissimus, quibus ille non tantum notus, sed & charissimus erat. Ubi multos conve-

nisse, atque altare jam tristes videt, leni, ac docto sermone hortatur: uti ne sui gratia ullo mœrore se macerent; bono, atque hilari animo sint, sibi nihil mali contigisse, instare suum unicuique diem, nec quandiu, sed quomodo unusquisque vixerit, referre: quam mortem homines appellant, non tam mortem esse, quam transitum ad aliud vitæ genus: neque tam formidabilem, quam expectandam: tum e sacram litterarum testimoniis addit, parata esse his, qui bene vixerint, præmia: sperare, sibi quoque beneficio Jesu Christi, quem semper religiose coluisset, ad vitam, atque ad gloriam patere aditum: quod ad res domesticas attineret, non defuturos liberis, qui eas administrarent. Dimisso eo cœtu, non ita multo post, vocat ad se Cæsarium Zanchum religiosum virum, & e suis, qui ibi erant, notissimum, & charissimum quemque, qui testamento interessent. Filios hæredes instituit: hæreditatis administrationem viris quibusdam optimis, matrique, & uxori committit. Liberos agnatis, atque amicis omnibus commendat. Tum ad Julianum patruelem meum conversus: Scribe, inquit, ad Jovitam nostrum, & Pauli morientis nomine Pamphilum, ac Julium illi commenda, ut qua fide, ac diligentia Marsilium, ac Petrum olim instituit, eadem hos quoque educet. Mox Petrum Brixianum, Juris Pontificii studiosum, arcto sibi affinitatis vinculo vinctum, ad quem diverterat, arctissime complexus: Ego, inquit, puer a patre destitutus, a parentibus tuis, Petre charissime, pene educatus sum, & quidquid eram, eorum consilio, opera, atque opibus debuisse me, ingenue profiteor. Et nunc ita res tulit, ut cujus vitæ initia apud parentes tuos egi, ejus apud te finem mihi videam imminere, simulque de tua, & fratrum tuorum benevolentia securus mihi polliceor, fore, ut quod ego a majoribus vestris accepi, id vos liberis meis exhibere non gravemini. Cui cum ille omnia liberaliter esset pollicitus, tum quasi rebus omnibus jam compositis securus, atque hilari: Ungite me, inquit, sacro oleo, ut vegetior proficiscar, quo me revocat, qui huc me miserat; mox sacerdoti de ritu religionis ungenti, quidquid a ministro responderi solet, respondebat. Ipse cum jam unctus esset, voce tum demum defecta, manus, oculosque in cœlum ten-

tendens, aliquandiu in precantium gestu, & magnum aliquid petentium perstitit, ut illum, quamquam vocis ministerio destitutum, animo tamen adhuc cum Deo loqui, omnes intelligerent. Tandem vero quasi impetrasset, quod petebat, manibus in pectus remissis, supremum spiritum ad eo leniter emisit, ut obdormisse omnibus videretur. Hic illi vitæ exitus fuit, ut qui claro loco natus honeste vixerat, honestissimo fine vitam clauderet; & qui honestarum disciplinarum toto ævo studiosissimus fuerat, in ea urbe, quæ præcipua studiorum mater existimatur, inter studiosorum hominum complexus ad vitæ metas perveniret.

Quatuor illos Pauli Zanchi filios superius jam laudaverat Rapicius, & Petrum in primis ob Poemata, quæ composuerat, Venetæ, & Romanæ Urbis judicio comprobata. Petrus hic Canonicorum Regularium S. Augustini Sodalitio adscriptus, Basilii nomen accepit, quod præferunt Poematum ejus libri octo Basileæ per Joannem Oporinum impressi an. 1555. In eorum fronte legitur ad ipsum Basilium Petri Bembi Epistola, quæ carminum præstantiam primum extollit, deinde subdit: *Sed etiam gratulor, quod ad Poeticæ studia (quæ quidem, postea quam Poemata tua sub Perreii nomine edidisti, nunquam attigisti) atque ad Musas delicatiores illas tuas, tanquam postliminio rediens, leto ab illis vultu susceptus fueris, nihilque tibi, tam diu spreto abs te fuisse, succensuerint.* Exstat item inter Latinas Bembi Epistolas, una ad Joannem Chrysostomum, scilicet Pamphilum, Basilii fratrem, & Sodalem, in qua mentio est de quodam joco in Rhamnusium, quem habuisse omnes partes urbanissimi, festivissimi que salis, viguisseque non intermissum complures dies, Bembus testatur.

Orationem aliam Rapicii nostri de Andreæ Gritt

Vene-

Venetorum Principis laudibus, & egregiis in patriam, ac Christianam Remp. meritis evulgarunt Veneti typi an. 1533. Andreæ Francisco, magno Reip. Veneræ Cancellario, ab Auctore dicatam. In ea Principis ipsius laudes cum Brixianæ urbis commendatione his verbis conjunguntur:

Jam vero cui non illa animi excelsi magnitudo semper erit admirabilis? quod cum Patres decrevisset, Brixiam dedere se cupientem, in fidem esse recipiendam, atque eo cum paucis equitibus proficisci Andream statim juberent, ille, etsi periculi magnitudinem videbat, quod & urbs ipsa valido præsidio tenebatur, & firmissimus hostium exercitus in propinquo erat, ea tamen, quæ Patribus honesta, atque utilia visa sunt, non sine evidenti suo periculo obeunda suscepit, & rem quidem adco strenue gessit. urbe, mira virtute, ingenio, ac celeritate, statim recepta, ut hoc illius prudentiæ, ac fortitudini adscribendum, dubitare nemo debeat; quæ vero mox secuta sunt, divino potius consilio tribuenda videantur; id, credo, agentibus diis, ut amicissimæ civitatis fidem jam inde a proavorum nostrorum temporibus cognitam, & tolerata pro Veneta Rep. miserabili fame, & longa obsidione testatam, nostra quoque ætate horribilis illa captivitas, & effusus late sanguis ita sanciret, ut omnis ventura posteritas intelligeret, Brixianos pro Veneto Imperio non solum famis, atque obsidionis mala sustinere, verum etiam, ubi usus veniat, fortiter mori posse.

De Andrea in captivitatem abducto, & de reintegrato post illam ab Andrea Reip. imperio, hæc illico subiungit Rapičius:

Ac ne illa quidem in re cœlestis providentia vel parum salubris fuit, vel occulta; quod ille in intimas Gallias ad Ludovicum Regem ductus est, ut esset, qui tam atrox, tamque formidolosum bellum aliquando componeret, & irati Regis animos ad pacem flecteret. Tantum enim potuit apud magnanimum illum, & bellicosum virum ea opinio, quam
ex

ex rerum gestarum magnitudine de Andrea conceperat, ut quam in hoste virtutem timuerat, eam ne in captivo quidem mirari desisteret, ac propositis honoribus, & præmiis in partes suas trahere hominem laboraret. Quod cum non impetrasset, ac jam perpetuæ servitutis, & durissimi carceris ærumnas captivo minaretur, ne sic quidem tantus ille Rex, & victor, & dominus, quod voluerat, est consecutus, cum vir fortissimus subinde responderet, libertatem quidem, atque usum lucis adimi sibi posse, Patriæ caritatem extorqueri non posse, ac contra ipsum Regem admoneret, ut hominem se esse meminisset, neque inter illos successus oblivisceretur, quod esset anceps eventus, & fortuna bellorum. Penetravit animum generosum, ac plane regium, fortis, & boni viri tempestiva oratio, atque efficax illa eloquentia, & generosa fortitudo, adeo & Regi grata, & Reip. opportuna contigit, ut is, ubi captivitatis mala paulo ante pertulerat, ibi jam Patrum decreto legati honore, non sine magna Regis voluptate, fungeretur, & honestissimæ illius societatis incundæ interpret esset, quæ una tandem hostiles injurias repressit, & imminentium malorum tempus procul avertit.

Demum comparatio, quam Rapičius instituit Andree Grii cum fortissimis Romæ, & Græciæ Ducibus, miram Rhetoris nostri eloquentiam demonstrat:

Quid cum sua illum Patria jam tandem recepto imperio læta exceperit? quæ admiratio? quæ voces omnium fuere? quibus ille adeo non est elatus, ut ultro etiam offenderetur, ac laudem illam, & gloriam totam ad Senatum redire desideraret, & quasi bonus athleta, peractis fortiter omnibus certaminibus, non tam se, quam patriam corona, & palma insignem esse vellet. Quamobrem laudet jam, ut libet, cives suos sacunda Attica; jactet Sparte bellicosa; tollat in cælum Roma Martia, dum hic unus optimo cuique eorum conferri mereatur. Quamvis enim illis imperiî magnitudo tum plurium, tum majorum rerum gerendarum occasionem præstiterit, ubi tamen omnia diligenter excusseris, facile videas, alios, dum incautius pugnant, vel se se non
tam

tam fortes, quam audaces indicasse, vel in ipso ætatis flore sublatos, nihil præter luctum, ac lacrymas suis reliquisse; alios rebus præclare gestis tantum sibi apud suos invidiæ, atque odii peperisse, ut quarum civitatum aut fundamenta jecerant, aut mores composuerant, aut felicitatem auxerant, in his incolumes esse non possent. Testis Scyros exule Thesco minor insula; testis Capræ palus Romuli sanguine infecta; testis Attricus, atque Argivus carcer, hic Philopœmenis, ille Milriadis morte infamis; testis denique Linternum, & Ardea, hæc Camilli exilio, illud Aphricani sepulchro nobile. Multi porro armis clari, in toga viluere: multi rursus domesticis laudibus insignes, bello inutiles se præstiterunt. Hujus autem virtus in tanta magnitudine, & diversitate bellorum ita semper effulsit, ut non minorem ex adversis, quam ex secundis rebus gloriam retulerit: tanta semper foris, tanta domi auctoritas, ut omnes & præsentem cõlerent, & absentem desiderarent. Proinde si cui forte libeat hunc Fabio illi Maximo conferre, multis rebus parem, multis superiorem facile intelliget. Ille Annibalem mora fregit, hic Maximilianum: ille temerarios Minutii ausus, quoad licuit, repressit, hic fidos quidem, sed Reip. noxios Liviani impetus, retardavit: ille periclitanti equitum Magistro opem tulit, hic clades aliena temeritate acceptas, sua prudentia, & virtute, lenivit: ille Statilium ad hostes transfugere tentantem retinuit, hic Gallorum duces a fuga retraxit, hic Ludovicum corundem Regem ad Reip. societatem revocavit. Gloriosum sibi Fabius existimavit, quod Tarentum Salinatoris culpa amissum, recepisset; at quanto major hujus gloria? qui Veronam, qui Brixiam tum majores Tarento, tum munitiores recipiendo servavit; qui Patavium non modo recepit, sed receptum toties ab hostili impetu, insidiisque defendit.

III. Funebris Orationi, cujuscemodi a Rapicio habitam vidimus, ad artis normam componendæ, haud parum studii Brixianos Rhetores contulisse, discimus ex binis libellis, quibus quamplures hujusce generis Sermones

conf-

cosque partim ex sua, partim ex aliorum doctorum Virorum officina depromptos, in unum collegerunt Gregorius, & Benedictus Britannicus, Brixiani, ambo Ordinis Prædicatorum, ambo fratres Joannis a nobis frequenter etiam in prima parte hujus Operis memorati. Eos vero cum laude memorat Jacobus Echard inter Scriptores Ordin. Prædic. Tom. 1. pag. 893. & 894. at nec unum ab alio, nec collectionem a collectione valuit distinguere, quum libellos illos ad manus minime haberet. Judicium, quod de Benedicto profert, nimirum eum in Scripturæ, & Sanctorum Patrum, sed & Philosophorum, & Poetarum lectione versatum esse, acceptum fert celebri Antonio Massoulié Magistri Ordinis socio, qui data Romæ ad Jacobum Echard Epistola testatus fuerat, se vidisse Benedicti Britannici librum typis editum, sed absque loco, anno, & nomine Typographi. Utrumque volumen in manibus mihi est, unde certiores ipse notitias suppeditem. Benedicti illud ad calcem has profert notas, *Impressum Brixie ad honorem, & gratiam Altissimi Domini nostri Jesu Christi per Ludovicum, Vincentium, Benedictum, & Antonium fratres Britannicos die 24. Decemb. 1507.* & in fronte Epistolas binas, quas affero:

F. Benedictus Britannicus B. F. Damiano Britannico B. nepoti

S. P.

DIu, multumque mecum consideranti, Nepos suavissime, quum peragrata jam quadriennio magna ex parte Italia, dum (ut par est) Antistitibus nostris obtemperans sum, in patriam remigrarem, quidnam potissimum deferrem, quod animum tuum oblectare posset, te enim neque aurum, neque argentum a me expectare, probe sciebam, quippe qui

P. II.

Q

omni-

omnibus, quæ fortunæ dicuntur, bonis penitus abjectis, cultui tantum divino vacares; illud sane libuit ad te deferendum, quo gratius nihil tibi, aut jucundius fore existimabam. Ego, dum hoc temporis spatio a vobis absum supra tres, & quinquaginta fanebres diversis in locis habui orationes ad amicorum necessariorum ægra pectora. Quas plane orationumculas, & præcipue, quæ aliqua ex parte dignæ visæ sunt, ad te detulimus, tibi que dicavimus, ut eas, quum otium tibi fuerit inspicias, inspiciendoque observes, an in iis aliquid insit, quod tibi imitandum fuerit. Hoc unum scies, si hac in re ingenium desiderandum fuit, studium, industriamque non defuisse. Confido, te ex his laboribus nostris, quod te plurimum delectet, habiturum. Illud a te peto, ut cum eas percurreris, me certiore facias, quid de his sentias; tuum enim omnibus in rebus plurimi facio iudicium. Es enim ex eo patre natus Joanne Britannico, ut de te bene semper existimandum sit, cum bona ex arbore boni fœtus haberi soleant. Duo autem restant, quæ mihi a te, aliisque laborum nostrorum lectoribus, quibus hæc placuerint, petenda sunt, alterum, ut, si quando hæc nostra imitari volueritis, actione vestra ornetis, semper id remisscentes Demosthenis, præcipuum Oratoris munus esse pronunciationem, sine qua omnis jacet, veluti clumbis, præclarissima quæque oratio. Alterum, ut me ab obrectatorum maledicentia, morsibusque pieatissime tueamini, qui tenebricosum, hebes, & aridum prorsus a natura nacti ingenium, optimum quemque lancinant; licet hos Zolos Democriti more excelso semper animo flocci fecerim. Apposite enim, & scite aiebat, eodem loco sibi esse imperitorum voces, quo ventre redditos crepitus. Quid, inquit, mea refert, sursum isti, an deorsum sonent? Has itaque veluti testes amoris mei erga te summi, post gravia tua studia, postque tuas musices armonias, qua in re tanquam alter Arion, & Orpheus factus es, velim evolvas; confidens, te tui pertæsum laboris nequicquam fore. Vale, hoc tempore Juvenum decus.

F. Bene.

F. Benedictus Britannicus Brixienfis F. Nicolao Belammo

Soncinenfi. S.

FRequenti, ac fere quotidiano rogatu ab me flagitasti, lepide, & amantissime Nicolae, ederem in vulgum funericios Sermones, quos cum una alias ageremus, acceperam. En jam vel cum fœnore tibi nunc exhibeo; summa namque, & singularis mea in te pietas pati non potuit, quominus hac in re morem tibi gererem; quippe qui esses & tuo amore, & assiduo de me præconio, & ingenuo quodam naturæ, morumque simulacro, inter reliquos amantissimus. Et quo cumulatius candidum tuum mulcere animum posses, adjeci eas Ciceronis moraliores sententias, quas cognovi quotidiano in sermone esse cuique & ornameto, & usui. Id modo unum animadvertas, velim, me in sermonum structura, lingua prope vulgari ex industria usum; nam patrium potius attendi eloquium, quam latinum. Quod ea sane egi ratione, ut a quovis, vel primis vix litterarum rudimentis imbuto, facile, ac commode haberi possent. Nostras igitur has nugas, quam otiosius, quandoque invise diligentius, memori tuo semper gerens sub pectore Benedictum Britannicum tibi, tuisque esse ubique gentium deditissimum. Vale.

In hac Benedicti collectione Sermones quinquaginta tres continentur, post quos sequitur Epistola ipsius Benedicti ad Timotheum Acerbum Veronensem, ubi dolet obitum fratris sui Thomæ Oratoris ea tempestate clarissimi, & hujus Thomæ subsequitur illico Oratio in funere Comitum Pandulphi Seratici, & alia in funere Matthæi Tuscani Bononiæ Prætoris.

Longe copiosior, ac luculentior Gregorii Britannici libellus; nam & excellentissimorum Virorum, ut titulus præfert, Sermones funebres ornatissimos completitur, & nuptiales etiam quamplures. Impressus est Venetiis per Petrum Bergomensem an. 1505. & Paulo

Zane Brixiae Episcopo nuncupatus, quem in primis laudat ex maxima librorum cujuscumque doctrinae suppellectile, qua nihil pretiosius possideret.

En Gregorii Epistola:

Ad Reverendissimum in Christo Patrem, & D. D. Paulum Zane humanarum ovium Pastorem, & divino afflatu Episcopum Brixianum benemeritum, Frater Gregorius Britannicus

sacri Ordinis Prædicatorum professor S. P. D.

ET si nulla unquam, Reverendissime Antistes, nec consuetudo, nec familiaritas mihi tecum intercessit, tum quia dispar dignitatis conditio ab tuo omnium desideratissimo me consortio semovit, tum quia quo tempore tu te ad studiorum matrem Patavium disciplinarum gratia contulisti, ipsi mihi agrum Picenum, aliaque pleraque loca longinqua colere contigit; incredibili tamen te semper prosequutus sum amore. Nec immerito quidem. Tam multa enim de prudentia, humanitate, & virtute tua ubique prædabantur, ut ad te amandum mirabiliter sim accensus, putaverimque nihil mihi gloriosius, honorificentiusve comparatum iri posse, quam benevolentiam, & amicitiam tuam promereri. Nam, quod omnino singulari, & præcipua laude dignum est, in ea te omnis doctrinae arce positum esse intellexi, ut quum te omnes, ob tuam amplissimam probitatem, mirum in modum venerentur, hac una te non solum civibus tuis; sed externis præcipue sis admirationi, hincque mirificus quidam undique amoris, & observantiae conciliatus sit tibi cumulus. Nec injuria quidem. Quis enim eum patrem non amet, ac colat, in quo ea adsint, quæ Plato sapiens, & summus philosophus optimo Præsidi vindicanda censuit? Ea enim es integritate, & justitia, eaque prudentia, & animi moderatione stipatus, ut universa civitas tua Brixiana, se ipsam quotidie ductu tuo felicem appellet, mirabilique benevolentia observet, ac colat. Nihil enim, Reverendissime Antistes, agis, quod non tecum ante diu, multumque sis meditatus. Quicquid enim consideras, quicquid dicis, quicquid agis, miram semper præsefert veritatem, & sapien-

sapientiam. Nihil namque a te fictum, nihil simulatum, nihil denique ineptum proficiscitur. Illuc denique omnes animi tui cogitationes tendere conspicuum est, ut oves tuæ, quarum curam geris, recto calle ducantur, eamque videnti rationem teneant, quæ non minus probabilis sit, quam salubris. Eas enim ad pabula virtutis, ut optimum decet pastorem, non minus studiose, quam amanter, & ducis, & erigis. Qua quidem una re nihil in summo Præsule potest esse excellentius. Innocentiam autem, & abstinentiam quantopere in te ipso tucaris, qui ignoret, est nemo. Quæ omnia quum in te esse, universi & sciant, & prædicent, factum est, ut incredibili quadam benevolentia, atque insigni amore ego quoque te prosequar, eoque magis, quia præter cætera ornamenta ea es doctrina, atque eloquentia, quæ mirabiles de se possit amores concitare. Habes ea omnia, quæ Pontifici optimo, & sapientissimo convenient. Quum igitur omnium virtutum cumulo sis circumscriptus, nihil sane restat quare non omnibus sis admirationi. Illud certe affirmare possum, quod ad laudem tuam pertineat, tantam tibi cuiuscunque doctrinæ librorum esse suppellectilem comparatam, in qua omnis tua ætas conquiescat, ut isto tuo Pontificatu, nihil pretiosius possideas. Sed quum ad eam ornandam quotidie studium tuum conseras, putavi, pro mea in te singulari observantia, quodcunque ingeniolo nostro superioribus temporibus esset elucubratum, id omne esse conferendum. Itaque quum forte nonnulla Epithalamia, quæ mihi, quum inter sæculares agerem, ab Joannis Britannici disciplina exciderant, aliasque Orationes in defunctos haberem, quas in Religione conscripseram, multique a me flagitarent, ut in lucem omnia ederem, putavi tam honestæ petitioni nullo modo refragandum. Fieri enim posse existimabam, ut iis, qui in his studiis minus sunt exercitati, aliqua ex parte possent prodesse. Cæterum quum animadverterem, fieri non posse, quin virtus semper invidiæ sit obnoxia, nec obrectatorum facile morsus vitari licere, putavi aliquem mihi, tanquam Patronum, & defensorem parandum, cujus præsidio, & auctoritate omnia mihi in tuto posita essent. Tu igitur, Reverendissime Antistes, solus inter amplissimos hujusce Civita-

vitatis nostræ Viros occurristi, cui cum ob singularem humanitatem tuam, tum ob egregiam morum probitatem, Opusculum meum dicandum censui. Munus igitur nostrum accipies ea animi benignitate, qua a nobis mittitur. Itaque a te petimus, ut aliquando, quum per occupationes liceat, totum, quicquid est, legas. Confido enim fore, ut quod per te comprobatum fuerit, latrantium morsus minime formidet. Vale, Reverendissime Episcopo, & fratrem Gregorium Britannicum amplitudinis tuæ studiosissimum ama plurimum. Vale iterum. Ex Æde Divi Floriani quartodecimo Kalendas Aprilis 1495.

Ædes Divi Floriani, ubi data est ea Epistola, ea tempestate Cœnobium erat Fratrum Ordinis Prædicatorum; eoque ipso tempore pariter in Cœnobio Brixienfi illius Ordinis scripsisse Thomam de Vio sua in libros Analyticorum posteriorum Aristotelis Commentaria, comperimus, nam ad eorum calcem testatur ipsemet, se Opus illud consummasse in Conventu Brixienfi, Anno Christianæ salutis millesimo quadringentesimo nonagesimo sexto, die sacratissimæ Nativitatis Domini.

Paulum Zane Episcopum Brixensem magnopere probasse Gregorii Britannici diligentiam, constat ex literis mox recitandis, in quibus præterea Joannis Britannici, sub cujus disciplina Gregorius, inter Sæculares (ut ipse loquitur) adhuc agens, Sermones illos elaboraverat, satis honorifica injicitur mentio ob Persium, & Statium jam ab eo illustratos, & ob Commentaria, quæ in diem expectabantur, in Juvenalem, & Ovidium.

Paulus Zane Episc. Brixie Fratri Gregorio Britannico S. P. D.

PERLECTIS suavissimis litteris tuis, dilecte F. Gregori, quas ad me nudius tertius dedisti, adeo sum mirifice delectatus, ut haud unquam in legendis epistolis potuerim edepol affici gaudio majore. Nam quanto me prosequaris animo, quan-

quanta me tua amplectaris integerrima humanitate, quanta me demum afficias benignitate, tum tuis de me amplissimis laudibus, tum tuo munere non vulgari elegantissime significasti. Nihil enim antea verebar, quin me, meumque honorem multifaceres; verum modo nedum non possum dubitare, sed ne extimescere quidem, quum non apud te tanti sit omnis laus, omnis gloria, & decus, & ornamentum, atque omnis amplitudo mea, ut mage divelli a voluntate tua difficilius crediderim, quam ab meo iudicio laudum incrementa existimari. Proinde quum nonnunquam Phalaridem legerim in nullos quicquam præterisse, qui de se bene essent promeriti, quin & gloriose, & ex tempore studiorum, musarumque sese amatorem profiteretur, maxime vero in eo actu, quo Stesichorum poetam sui inimicissimum, pro reverentia Musarum non solum non enecavit, non cæsum dedit, non extorrem fecit, sed multis etiam muneribus donavit, præteraque liberalitatem præsetulit semper, atque alias: eo autem præcipue, quum non ab quocunque munera voluit accipere, sed quia a se minus acciperent, sæpe conquestus est. Ab eo mihi summæ magnificentiæ, & singularis humanitatis exemplum præstari intellexi, ut plenissimas tibi pro merito tuo, immortalesque agerem gratias, atque habere, qui me dignum feceris tanti donatione laboris. Opus mihi quidem peculiare est, & gratum, & perjucundum. Suavissimum autem erit, ac magis oblectabile, mi dilecte frater Gregori, si operam navaveris, ut accuratissime, diligentissime, atque examussim imprimatur; ne impressorum neglectu, ac imperitia, quod sæpe evenire solet. verborum stilus præposteretur, sententiarum ordo depravetur, Operisve dignitas labefactetur. Ego autem Opificem summum obtestor, atque supplex exoro, ut quod officium boni viri suadet, omnes, qui litterarum studio oblectantur, quos alta facinorum fastigia demulcent, quos etiam disciplinarum, virtutumque suavitates oblectant, hoc Opusculum perjucundum tanti pendant, æstiment, honorent, ac suis in Bibliothecis conscribant, ut quum in manibus nihil hoc habeant præstantius, hoc vel supremo haud deferere laborent, quod excellentissimorum sese Virorum frugalitatibus compararint, illustri-

lustribusque, ac laudatissimis mortalibus contulerint. Tu igitur, frater Gregori, cura ut quam primum impressoribus hoc immortale Opus commendetur, ne incuria unius mortuorum utilitas impediatur, & testimonium amplexandæ virtutis multitudine modicum, sed æterna commendatione dignum diutius occultent. Quantum autem debeat huic domui Britannicæ ista mortalitas, quæ tum Joannis fratris tui interpretationibus tam in Persium poetam quam difficilimum, quam in Statii Achilleidos satis illustrata est, egrègiaque in dies expectat commentaria in Juvenalem, Ovidiumque Metamorphoseos, tum reliquorum fratrum ornamentis, qui se se student cæteris præstare suis venustissimis moribus animantibus, meis sermonibus difficile panderem. Sed si in illis ipsis connumerandis orationem protraxero, quæ mea excedunt dicendi facultatem, vereor, ne lectoribus meis tædium iniiciam. Ad te vero postremo recurro mihi omnium mortalium amicissimum, qui quum me satis ornaveris, studuerisque amplissimis laudibus insignire, præstantissimis titulis decorare, summisque tuis conatibus extollere, ego antem minus meruerim, gratias quantas possum & ago, & habeo; nec puto, modo fata sinant, inter viventes tui unquam posse oblivisci. Tu interea vale, & me, ut cœpisti, observa, jubar lucidissimum domus Britannicæ. Ex Episcopatu nostro Brixiano duodecimo Kal Aprilis 1495.

Ut autem ex eo Gregorii libello brevia aliqua excerpta more nostro proferamus, omiſſis Orationibus, quas Collector vulgares appellat, inter literales occurrit primo loco funebris Sermo in Carolum Malatestam, Pisauri Dominum, habitus ad Pandulphum ejus fratrem, in quo Caroli gesta, magna ex parte ad Brixianæ urbis historiam spectantia, his verbis describuntur.

AGe dum libeat Caroli fratris vitam, resque cum domi, tum etiam militiæ gestas, brevi recensere, atque ab ineunte ejus ætate ordiri. Adolescentem audio, sub patruo suo Pandulpho Fanensium rege, duceque armipotentissimo primum militasse; secundumque diutius apud Brixiam urbem

beim in Gallia citeriore & claram, & præpotentem, rebus bellicis exercitatum per id temporis, cum maxime ad repellendum Ducem Mediolanensium Veneti nitebantur. In eo bello Caroli junioris virtus, nec dum etiam pubescentis, præter omnes enituit. Itaque quum non adolescentis, sed fortissimi cujusque, dexterrimique ductoris operam abunde navasset, a patruo multis, ac multis pretiosissimis muneribus donatus, atque honestatus est; donec tandem victus Pandulphus amissa Brixia Fanum rediens, otio sese, & rebus urbanis jam tum senex immerfit. Carolus ad Malatestam genitorem revertitur. In altera vero juventutis suæ militia, Carolus quantum laudis, ac gloriæ adeptus fuerit apud Philippum Mariam Mediolanensium Ducem, tyrannorum omnium nostri temporis maximum, atque fortunatissimum in eo bello, quod adversus Venetos gerebatur, id ego nequam silentio prætermittendum censui. Ad quod cum a genitore Malatesta missus esset, paulo post quam in castra venit, universo exercitui, qui permaximus erat, præfectus est, atque omnium imperator declaratus. Quo tempore & Nicolaus ille Picininus, cæterorum, sine ulla controversia, nostri temporis Dux in re militari præstantissimus, & Franciscus Sfortia Vicecomes, hic ipse Piceni moderator, & cæteri permulti clari, fortissimique ductores in eadem militia versabantur. Neque per id quidem ætatis non pedites, non tyrones, non velites, non rorarii, non centuriones, non tumultuarii quidam milites, non commilitones, sed plurimarum, atque fortissimarum legionum duces aderant. Apud hos omnes ars ejus semper, consilium, scientia, virtus, atque animi magnitudo, mirandum in modum comprobata. Is autem splendor, ac decus nemini adhuc ex principibus urbium contigit, nisi Carolo Juniori, qui Malatestam familiam tam claro titulo decoravit. Tertiam autem ejus militiam, & recentem, & ultimam, quæ sibi adversus quosdam, illosque perpaucos urbis vestræ proditores fuit, non nisi invitus reminiscor. In eo enim bello tetro, atque scelestissimo, quod superioribus annis ad evellendam funditus Malatestarum Pisarensum stirpem Eugenius Pontifex Maximus gessit, cum vos a sedibus propriis, urbe vestra

P. II.

R

ro

ro pellere minitatur, tu quidem optimis auspiciis fretus ad pulchrum, ac nobile municipium Gradariam vobis in omni re dubia semper fidum contendisti, Galeatius Urbinum, ad Forum Sempronii Carolus sese recepit. Ibi nequaquam in otio per socordiam tempora terere, aut metu percussus cedere, neque somno, deliciisque torpescere passus est. Qui potius juventutem illam suapte natura bellorum avidam primum ad muniendam urbem excitat, commeatus undique comportari jubet, Arcem firmat, excubias accurate locis quibuscumque disponit, suos iter muniendum docet adversus nefarios quosdam, teterrimosque proditores, bellum fore pro Patria, pro libertate, pro conjugibus, pro liberis (nam plures ex hac urbe secum aufugerant) itemque pro parentibus, aris, sociis, templis, denique pro bonorum omnium salute pugnandum. His igitur summa cum celeritate, studioque dispositis, tempus idoneum nactus juventute Semproniana, cohortibusque perpauca comitantibus in agrum Pisauensem erumpit. Castella quædam partim in deditionem accipit, partim expugnat, partim obsidet. Sed mox Carolus a Joanne Vitellio Picentum propratore (bonorum omnium jugulator erat) vi repellitur, ad arcesque Sempronianas detruditur. Nihilominus ad urbem Pisaurum crebas excursiones parat, ipseque nonnunquam primus in agmen descendens, agros depopulabatur, hostes intra mœnia repellebat, urbique, & proditoribus supplicia, cædes, incendia minitabatur. Utrunque pugnatur acerrime, pellitur, ceditur, vincitur, oppugnatur. Res erat in summo discrimine. Quid plura? Libenter ista præterimus, arte, prudentia, calliditate, industria, cura, vigiliis, opere, labore, sudore Caroli paucis post temporibus & urbis, & Vitellii propratoris vires attritæ sunt: ita ut populus inedia periens, atque egestate coarctatus, auctoribus proditiōis trucidatis, Carolum ipsum cum ingenti omnium plausu, lætitiæque in sedes proprias revocavit. Hæc, hæc fuit illa felix militia, in quam fortiter pro communi salute pugnabat Carolus noctes, ac dies, omnem aeris intemperiem, ventorum etiam asperitates, æstus, frigora, nives, imbres, famem, sitim, vigilias, omnesque exilii casus, & rei militaris difficul-

cultates tolerando ; nimirum ægrotationis illius suæ causas, imo vero mortis exhaust, egregios illos, præstantissimosque Romanos imitatus, Horatium Coclitem dico ; Scevolum, Curtium, ac Decios. qui ipsi forti animo pro Republica sua mortem obierunt. Hac igitur triplici militia exercitatus Carolus, vita excessit cum summo rerum bene gestarum splendore, ac gloria.

De Brixia a Pandulfo Malatesta post Francisci Carriensis dominatum occupata, ac postea amissa, deque ea ipsa a Philippo Duce Mediolani recepta, & demum huic a Venetis erepta, plura habent Capreolus, & alii hujus temporis Historici, inter quos B. Platina Histor. Mantuan. lib. 5. causas aperit, cur bello illi Brixienfi Philippus Dux Malatestam Pisauriensem præficiendum censuerit, nimirum quo cæteri Duces humiliori loco nati, inter quos certe magna erat de principatu contentio, huic, insigni familia orto, parere, facilius animum inducerent ; cum ut Mantuanum Principem, cui Paula, Caroli soror, nupserat, a Venetis alienaret. Narrat idem Historicus, in eo bello ab eo Mantuæ Principe Carolum captum fuisse, & incolumem ob affinitatem dimissum. Rhetor autem noster, cujus Sermonem referimus, ex consueto in panegyricis Orationibus artificio, & nullum habet de eo Caroli infortunio verbum, & Carolum affirmat, Picinino, Sfortiæ, cæterisque clarissimis Ducibus, qui ad Brixiam eo tempore pro Philippo militabant, ex militaris artis præstantia dignum fuisse, qui anteponeretur. De bello Eugenii Papæ in Picenos, qua postrema militia Carolus excessit e vita, nec non de Joanne Vitellio Corniculano, cujus vires Carolus attrivit, plura pariter apud eosdem Historicos.

Orationem illam in Carolum Malatestam alia mox subsequitur in Constantiam Pisarensem Dominam ad Alexandrum Sfortiam ejus conjugem, quam non a felici tantum principatus administratione collaudat, sed etiam ab eximia divinarum, humanarumque literarum peritia, adeo ut & quotidianas disputationes haberet, & Orationes, & Epistolas componeret, multosque versus tum dispares, tum heroicos suavissimos, atque elegantissimos scriberet ad ipsum Alexandrum. Hunc ab ipsa Constantia Pisarenfibus datum fuisse Principem, dum Rhetor noster affirmat, id ita accipiendum est, ut Historicis illis minime refragetur, quorum auctoritate constat, Galeatium Malatestam Pisauri, ac Forosempronii Dominum, jam ætate gravem, & liberis carentem maribus, Pisaurum Francisco Sfortiæ vendidisse viginti aureum nummum millibus in pretium acceptis, ea quidem lege, ut ejus Urbis imperium Alexandro traderetur, cui nuper nupserat Constantia Galeatii ipsius neptis, nata ex filia Elisabeth Gentilis Camerti uxore.

Præcipuas Constantiæ laudes his verbis Orator noster prosequitur:

Annus decimus nonus circumagitur, cum senior ille Malatesta noster, Urbis non dicam hujus, sed Italiæ potius universæ parens quidem, ac moderator, mortem obiit; quo ipso regnante, ut scitis, ætas nimirum fuisse aurea, & Saturnus apud nos alter imperium gessisse visus est. Post cuius mortem (o fortuna nobis invida!) malis paucorum consiliis, omnis de improvviso bene regnandi, ac serviendi modus periit, quibus etiam auctoribus, hujuscemodi segetes, quæ jam quatuor annos proximos in agris natæ sunt nostris, mesuimus. Deinde Carolus junior, cujus & consilio, & virtu-

te

te regnum nobis, aut potius respublica quædam optima restituta erat, mox adversa correptus valetudine, quam beligerando contraxerat, naturæ concessit. Non multo post ejus frater Pandulfus Archiepiscopus Patrianus, præstanti fane ingenio, atque incomparabili sapientia rex, vita etiam excessit. Quibus extinctis, bellum hoc finitimum, quod pene civile, atque intestinum appellare possumus, cum hoste acerrimo coortum, & urbem, & castella circumadjacentia, & agros, opes denique nostras omnes ita disturbavit, solvit, attrivit, ut quamvis jam quasi defessi essemus, nosmetipsos tamen integros, atque recentes adversanti fortunæ objectaremus. Aderat enim, aderat Constantia illa nostra imperatrix prudentissima, mulierum omnium nostri temporis decus revera, stipes constans regni hujus, & solidissimum patriæ suæ firmamentum. Aderat, atque adest una secum domi tum denique militiæ dux intrepidus, herosque præstantissimus Alexander Sfortia, quem illa regem nobis Pisauriensibus, & fama, & virtute, & sapientia sua plusquam humana conquisiverat, advocaverat, introduxerat, pepererat, ante oculos coram locaverat. Quibus ita imperitantibus cives primi, atque infimi agricolæ, uxores, liberi, templa, domus, denique fortunæ omnes nostræ beatissimæ fore censebantur. Quibus iterum superstitionibus bella hæc sævissima jam magna ex parte sublata esse videbantur, proximeque dici poterant extinguenda. Jam fere omnis inundatio, procella, fremitus, ardor bellicus, increpuerat, & quodammodo præ lætitia mœnia ipsa universa respirabant, cum subito, nescio qua Deorum inclementia, ex terris, ex hoc littore Adriatico, ex patria, ex urbe hac pulcherrima, ex ædibus, ex templis, ex foro, ex concione, ex affatu omnium mutuo, ex manibus, ab oculis, ex visceribus erepta est nobis Constantia Italiæ splendor, mulierumque sine ulla dubitatione princeps, ac regina, domus suæ jam labentis firmamentum, clypeus adversus omnem fortunæ impetum, noster campus, navis, portus, propugnaculum, arx, tutissimumque perfugium. Quis enim, vivente illa, motus, aut seditio pullulare, aut si pullulasset, quodammodo adolescere, aut si adolevisset, quibus tamen incommodis obesse ci-

vibus

vibus potuisset, cum videremus vim quamdam illius menti, spiritumque divinitus infusum ad omnia maxima de se præstanda? Quam enim mulierem mihi dabit, tum natura duce, tum studio, atque industria tam facilem ad bene dicendum, quæ sive præmonita, sive de improvviso loqueretur, sive poeticis, sive oratoriis, sive philosophicis, sive humanis, seu tandem divinis de rebus quæreretur, non ipsa didicisse, quæ diceret, sed composuisse potius videbatur? Quotidie inerat manibus Seneca, Cicero, Livius, Salustius, ac Divus in primis Hieronymus, Aurelius Augustinus, Gregorius, Ambrosius, atque Lactantius, cæterique, qui de Latina lingua latius tractarunt, versabantur. Quantum vero prosa, tum præcipue metro esset admiranda, id quidem non conjectura, seu quotidianis disputationibus assequi licebit, sed epistolis, orationibusque permultis, ac denique versibus, tum disparibus, tum heroicis, ad regem suum Alexandrum summo artificio, cultu, suavitate, nitore, atque elegantia scriptis, proci apparer. Quam sane provinciam, decusque unice sibi met ætate nostra vendicaverat, in qua ne dicam fœminas prope nullas, sed neque etiam viros satis multos videmus, qui literis, nisi maxime utilibus (ut ajunt) indulgeant, ac si quid præstare invenientur, odio sunt omnibus; denique si quis datur honos, is quidem jejunos, ac tenuissimos dari consuevit. At vero, quanquam hæc litterarum cognitio (in mulieribus vix apparens) permagnum sibi ut venti tulit, sic denique mortuæ decus allatura est; alia tamen, atque alia sunt longe magis admiranda, quæ sibi longiorem quamdam perpetuitatem asserunt. Fides quidem illa est, & charitas in maritum Alexandrum singularis, quæ veluti gemma quædam splendidissima, flosque unus omnium speciosissimus relucet in uxore, in quo certe neque Andromachæ in suum Hectorem cedebat Constantia, non Penelope in Ulißem, non Laudomiæ in Prothesilaum, non Panthiæ in Fusum, non Arthemisæ in Mitridatem, neque Casandæ in Cyrum, non denique, ut in Italiam redeamus, Juliæ in Pompejum, aut Portiæ in Brutum, perpetuis uxoris rei luminibus, impar, aut ulla ex parte inferior unquam visa est. Quo fit, Alexander præclarissime, ut quoties illius præ-

præsentiam, effigiem, mores lautissimos, pudicitiam, humanitatem, atque ipsam revera Constantiam, virtutesque ingentes ad memoriam revocaveris, nesciam ipse, quis Poeta, quis Orator, quis te demum Philosophus ab alto quodam gemitu, planctuque continere possit, aut sciat; ac non potius tecum ingemiscat, inclamitet, torqueatur, expalleat, maceretur, menses, dies, noctes, horasque diffundendis lacrymis impartiat. Jam vero quanta foret in omnes, etiam infimos, facilitate, ac misericordia, quod munus sicuti maximum dicitur in Principe, ita etiam hac tempestate rarum esse consuevit, tota civitas Pifaurensis testabitur; in qua nemo est, qui unquam, nisi gaudens, beneque ab illa persuasus discesserit. Neque enim Titi optimi Romanorum Imperatoris, quamdiu vixit, institutum nescire videbatur, qui sæpe apud suos dicere consueverat, regem bonum decere, nunquam eos, quibus imperat, auditos abs se male contentos dimittere. Isque cum forte fortuna interdiu audiendis civibus abstinuisset, in se tandem respiciens, amicis diem perditum esse querebatur. Itaque moriens, antequam ex hac vita nec dum quadragenarius emigraret, dixisse illud fertur, nihil unquam sese, cujus poenitentiam merito subire posset, præter unum effecisse, quod tamen inde non prodidit. Hac igitur via degens Constantia, quam sibi ab teneris mater Elisabeth Camerinorum Regina summo ingenio, ac sapientia mulier, atque gubernandi laudibus præter omnes ætatis nostræ præstantissima &c.

Tertius, inter literales illos, Sermo auctorem suum præfert, scilicet Thomam Acerbum Veronensem, habitusque fuit ad Brixianos in funere Joannis Britannici, Equitis aurati. Satis erit primas ejus lineas afferre:

Sumam igitur tantam dicendi provinciam in tanta clarissimorum Virorum frequentia, quamvis sit mihi exiguum ingenium, ac ferme ad dicendum præ temporis angustia imparatum. Hæsterna solum die ad hæc dicenda invitatus fui, & monitus; vestra tamen, Viri Brixiani, fretus humanitate primum de præclara familia, deinde de moribus, de virtutibus, de divinis Britannici gestis dicturus accedo. Si fami.

familiæ , qua Britannicus noster est natus , si nobilitatem , quæ jam prope in vetustatem radices agit , si gentis titulos , & armis , & litteris claros recensere voluero , non servabo animi mei institutum , & fortassis tracta in longum oratio , & importuna vobis erit , & molesta . Taceo igitur viros ex familia insignes , Joannem , Angelum , Jacobumque supra ducentos sexaginta annos a Federico Imperatore Comites creatos ; recensebo solum superiorem Britannicum , posterosque brevi ordine , virum corporis viribus , ingenio , consilio , belli gerendi peritia clarissimum . Hic namque (uti literarum monumentis proditum est) post multas , & quidem prudenter , strenue , gloriose administratas pugnas pro rebus vestris , Viri Brixiani , pro vobis civibus suis , pro hujus Reip. nostræ salute , & incolumitate annos octo & viginti natus , mortem oppetiit eo bello , quod ferme postremum hæc civitas gessit . O Juvenem dignum profecto illo clamore , & laudibus Demosthenis , quibus in Arthemiso , in Marathone , & in Salamine defunctos pro patria commendavit ! Hic Britannicus ab illo inclyto viro N. est genitus , qui pro suis bene meritis , atque egregia ab illustrissimo Domino N. aurata militia donatus fuit ; cujus cæteras laudes omitto , quia me urget tempus , & dicendi locus , ut descendam ad Antonium dignissimum Virum , tot clarissimorum adolescentium parentem , quos inter vos pullatos sedere intueor , quos & honorandi , & consolandi causa in tam frequenti Senatu convenistis , de quo idcirco prius habenda est mentio , quia prius ex humanis rebus , quam genitor per immaturam mortem sublatus est . Sane Joannes Britannicus , facillimisque , atque summe ingenuis moribus natus &c.

Alterius Britannici , Antonii scilicet Doctoris , ac Philosophi præstantissimi , laudes prosequitur subsequens Sermo quartus a Fr. Gregorio Britannico compositus . Præfatur Gregorius , munus illud Antonii ornandi vindicare sibi debuisse doctissimum Joannem Britannicum , utpote magna dicendi copia , & exercitationis vi præditum , nili charissimi velut patris , ac suavissimi

mi

mi præceptoris morte lacrymæ id illum facere vetuissent. Quæ spectant ad Antonii professionem ad Concilium Constantiense, præstitamque in eo Joanni Pontifici operam, nec non ad Legationem ad Principes, a quibus pro obfesso Byzantio magnam pecuniæ summam collegit, ac demum ad eximiam ejusdem doctrinam, ab Oratore nostro ita describuntur:

Quum Summus Pontifex Constantiam ire constituisset, nonnullosque summæ auctoritatis Viros, & sapientiæ, atque erga hanc nostram Religionem insigni quadam pietate affectos sibi delegisset, Antonium primo habere constituit, qui in hanc laudatissimam rem, necessariumque negotium, ita omnem curam, studium, diligentiamque contulit, ut neque vim ullam, neque insidias, neque metus perspicere, nec senectutis suæ incommoda, aut labores existimare videretur. Quocirca hujus tamdiu agitatz, divisæ, laceratzque Religionis nostræ divino prope affectu permotus, Pontificibus Maximis, qui ipsius gravitatem, prudentiam, ac vitam tanquam cæleste oraculum venerabantur, Concilii sententias, quantum in se fuit, suscipiendas fore, suadere conatus est. Et, ut cæterorum bonorum judiciis adhæreret, omnem itineris longitudinem, frigora, hyemes, viarum asperitates, atque mortem, si opus esset, perferre instituit. Quæ cum, ut cogitarat, perfecta fuissent, inveteratos Græcorum errores ad Romanam Religionem sua opera, ac diligentia deduxit. Quo quidem officio omni laude, atque honore dignissimo quid majus fieri, aut divinius excogitari poterat? Quam coronam, quas statuas huic viro, cui nullus honos, nisi debitus, nulla gratia, nisi dignissima reddi poterat, homines, si in vita diutius fuisset, statuissent? Ipsæ medius fidius non solum urbes, sed ipsi propediçam agri, colles, etsi non pares, maximos certe honores Antonio decrevisent. Sed cum præter suam opinionem, atque omnium bonorum judicium communem omnium libertatem defectam videret, & ad unius voluntatem redacta omnia, tandemque Pontificem suum ad fugam redactum, assiduus febribus obfessus est, paucosque post

P. II.

S

dies

dies dolore magis urgente, tandem excessit e vita, immo si diligenter attendere, ac vere judicare volueramus, ad eam accessit vitam, ad quam majores nostri suos illustres Viros ascendisse arbitrabantur &c.

Quanta fide, quanta integritate rationis pecuniam ex Europa exactam, quam totam pene lustravit, quum ex Byzantii obsidione legatus ad ipsius Principes missus esset, Imperatori suo designavit! Qui Principes cum belli necessitate adducti, tum maxime dignitate, sapientia, & auctoritate nominis moti, magnam auri partem contulerunt. Qua in legatione Antonii Britannici sapientiam, atque fidem admirati, maximis sæpe præmiis, eum ipsum apud se habere, conati sunt, ut suis in rebus gerendis, consiliisque capiundis tanti Viri prudentia, dulcissimaque hominis familiaritate uterentur &c.

O fors hominum ignara, instabilisque fortuna! quam repente ea congratulatio, cupiditas, ac voluptas, quas tui jucundi reditus expectatio paulo ante tuis omnibus afferebat, ad lacrymas conciderunt! quæ nos invitant ad luctus, nostrosque mærores duplicant; & in primis charissimi necessarii tui Viri ornatissimi, atque illa tua nobilissima familia dignissimi Joannis Britannici lacrymæ movent, quæ certe me plurimum ad dicendum impediunt. Cui quid infelicius accidere, aut acerbius inferri poterat, minime scio. Hic est, qui generis tui dignitatem, studia, honores, cæteraque patriciæ familiæ tuæ ornamenta lacerata, peneque extincta, non modo clara sobole, sed optimarum artium disciplina, quas abs te olim didicerat, favente Deo, reficiet. Sed omitamus nunc de Joanne dicere, cujus humanitas, scientia incredibilis, virtus, ac sapientia alios sibi locos vindicare poterunt; & ad id nostra redeat Oratio, quod superius dicendum erat, cum Antonii studium, & industriam commemorarem, cujus ingenium ego ipse, qui nihil de eo majus, aut mirabilius iis, quæ antea audieram, afferri posse credebam, sæpius, ac vehementer admiratus sum. Nam cum jam grandis esset, nullius præceptoris auxilio nostras perdidit litteras; sibi oneri visum est, cum tot annis Philosophiæ studiis vacasset, ad puerilia litterarum elementa reverti, unde commodam atque

atque otium aspernari, somnum, ac voluptates omnes rejicere, totumque id temporis, quod ad res suas familiares obeundas, & ad ipsam corporis requiem dari oportebat, omne in hanc nostram scientiam perdiscendam contulit, in qua paulo post tantum profecit, ut doctissimis, litteratisque Viris nostris eum æquare Latini minime dubitaverint. Quod haud nostrarum solum illustrandarum causa, quas clarissimis Philosophis, eloquentissimis Oratoribus, summisque bonarum Artium Doctoribus refertas audierat; verum ad suam & propagandam, & conservandam scientiam fecisse videtur. Nam Græcos oculis vestrum adhuc ita patere video, ut nunc vere credere incipiat, Græcos homines omnium quondam scientiarum, omnium inventores, præceptores, magistros fuisse, quum Antonii vestri vitam perspicitis, qui omnibus in rebus ita irreprehensus vixit, ut bene, beateque vivendi cunctis se speculum exhibuerit &c.

Ille ipse Joannes Britannicus, quem veruerunt lacrymæ, ne funebrem Orationem in Antonium Britannicum haberet, eo pietatis officio functus fuisse compertur in obitu Nicolai Duodo, magni Brixie Præfecti, Orationem habens, quæ jam jam memoratam, in nostro libello subsequitur. Exordium hujusmodi est:

Cupienti mihi, magnifice Prætor, vosque amplissimi Patres Brixiani, acerbissimum, luctuosissimumque mœrorem, quem ex obitu Nicolai Duodo, hujusce nostræ urbis Præfecti optimi concepistis, aliqua ex parte levare, duo quidem occurrunt, quæ nobis sane non molesta esse non possunt: alterum, quod ea me non esse eruditione intelligo, qui eam possim vobis afferre consolationem, qua unumquemque vestrum maxime egere cognosco; alterum, quod videam, mihi tam parvum temporis spatium ad cogitandum esse datum, ut & expectationi vestræ, & voluntati meæ haudquaquam satisfacere possim. Tam multa enim præclara erant, tamque magnifica, egregia laude extollenda, quæ de hominis vita pariter, & moribus dicenda erant, ut incredibili dolore non affici non queam, eo me dicendi campo coarctari, ut effusus

habenis, ut vos fortasse & cupiebatis, & ego volebam, vagari non liceat. Accedit præterea hoc, quod tanta animi perturbatione consterner, ut ego non minus in tanto luctu consolandus sim, quam vos, quos consolaturus accedo. Itaque, magnifice Prætor, vosque ornatissimi Patres Brixiani, faciam, ut potero, operamque dabo, ut quibus in hac mea animi molestia, remediis utor, his etiam vos, si aptioribus non licuerit, uti mecum una possitis. In tanti, talisque Viri obitu ingentem esse nostram jacturam non negabo. Is enim nobis morte sublatus est, quo & majorum gloria, & sua ipsius virtute alium neminem, neque excellentiorem, neque innocentiorum nostra fortasse novit ætas. Si itaque ea, quæ ad familiæ suæ splendorem pertineant, intueri voluerimus, & perspicere, ea esse ortum familia intelligemus, cujus, atque ipsius plurima beneficia in Remp. Venetam tum conservandam, tum etiam augendam exsistere. Ex tribus enim fratribus, Thoma, Arsenio, Leone, quos & præclaros Viros, veluti tria Reipublicæ sustentacula peperit domus Duoda, patrem habuit Arsenium Virum illum, quem ætas sua omni honore honestatum vidit; Senatorii enim Ordinis cum esset, totius Senatus consensu Constantinopolis Rector, & Magistratus, Bajulus quem vocant, creatus est; quem quidem Magistratum ea animi integritate rexisse fertur, & moderatus, ut in Patriam reversus, Venetiarum illico Consiliarius sit designatus. Qua in dignitate quam scite, quamque sincere se gesserit, illud indicio est, quod sequenti anno Decemvirosum caput, quod ajunt, creatus est. Quæ dignitas quam severa, quamque omnibus formidolosa sit, & terribilis, nemo est vestrum, qui non cognoscat. Omitto autem, quod ætate juniore Triremium Præfectus fuerit, quibus Jonium, Egeum, & omnia denique maria ab hostibus, & Pyratarum incursione tueretur. Quæ omnium dignitatum genera, velut hæreditaria, reliqui duo Fratres Thomas, & Leo sunt assecuti. Thomam enim scimus classis maritimæ Imperatorem fuisse, ex qua re tantum laudis, & gloriæ reportavit, ut & terrestris exercitus Gubernator, Senatus decreto, constitutus, cujus vigiliis, consilio, & animi prudentia hostes sæpe fusi, fugatique sunt, Leonem Patrum

alte-

alterum, etsi ego taceam, cuncta nostra civitas novit Præ-
torem suum. Quem Magistratum quanta victoria, & ani-
mi innocentia administraverit, cum unusquisque vestrum
intelligat, non est necessarium commemorare.

Sequitur Oratio in funere Caroli Zeni, quæ auctoris
nomen non præfert, at eum certo constat, esse Leo-
nardum Justinianum; nam ea ipsa hujuscemodi no-
mine insignita legitur in fronte voluminis, Orationes,
& Epistolas tam Bernardi, quam Leonardi Justiniani
complectentis, iisdemque typis editi, quibus Veneta Hi-
storia ipsius Bernardi, scilicet Venetiis an. 1492. per
Bernardinum Benalium evulgata, ac proinde cum eo
ipso Historiæ volumine plerumque in unum compacti.
Eam ipsam ex manuscripto Codice Patavino desumptam
Mediolanenses Socii Palatini publicarunt in T. XIX.
Script. Rer. Italic. una cum Caroli Zeni Vita ab Jaco-
bo Episcopo Patavino ejus nepote conscripta. Hanc
Georgium Alexandrinum laudasse in Præfatione Plau-
tinæ suæ Editionis ipsi Jacobo Zeno nuncupatæ, jam
vidimus de ea Plauti Editione agentes in primæ hujus
Speciminis partis exordio. Funebrem autem illam O-
rationem in laudato volumine reperiri tam Socii Pala-
tini, quam docti illi Viri, quibus illius exemplum ac-
ceptum referunt iidem Socii, oportet ignorasse. Certe
in Præfatione ad illam Caroli Zeni Vitam si minime
dissimulandum visum fuit, Orationem illam funebrem
jam editam fuisse a Clatissimis Benedictinis Martene,
& Durand Tom. 3. Collect. Veter. Script. pag. 743. nec
dissimulandum videbatur, quoties volumen illud Præ-
fationis auctori compertum fuisset, eam ipsam existare
in eo pariter; satis quidem raro, at maxime digno do-
ctorum

ctorum Virorum notitia, nam insignes prorsus sunt Justiniani utriusque, patris scilicet, & filii, quæ in eo continentur, Orationes, & Epistolæ. Collector noster funebrem illam Orationem magni faciens, ut æquum erat, eam in suo libello repræsentavit, cum aliquibus ramentis laciniis, quas curiosis in eo libello legendas relinquimus, contenti hic adnotare in una ex illis de præclara Caroli Zeni doctrina hæc legi: *Qualis in rerum divinarum cognitione fuerit, quam Metaphysicem Græci appellant, Vir gravissimus, sacrarumque literarum princeps maximus, Joannes Fabrianus testis est, qui cum Carolo quatuor, & viginti quæstiones solvendas posuisset, nullo per id temporis studio præcedente, nullis tunc perlektis Codicibus, divina quasi sententia, ac gravitate discussit, nec absque maxima peritissimorum hominum astantium admiratione, ac laude. Eloquentiam vero ejus admirari magis, quam laudare cogor, Viri doctissimi, cujus dicendi, ac scribendi vim, ex his, quæ apud nos scripta exstant, percipimus, & in ea maxime utriusque Romæ laudatione, quam literis Græcis editam Imperatori misit.*

Hæc, inquam, de Zeni doctrina in Britannici libello, quæ in aliis ejus Orationis exemplaribus desiderantur. At tam in eo libello, quam in illis exemplaribus, in postrema Orationis parte mentio sit Antonii Massani, divinarum artium eruditissimi, & Guarini Græcæ, ac Latine linguæ peritissimi, quos studiose, & humane complexus fuisse dicitur Carolus Zenus. In Caroli vero Vita non horum aliquis, sed Gabriel Spoletanus, Emmanuel Chrysolora, Petrus Vergerius, Petrusque Thomasius memorantur, quorum alloquiis, & familiari consortio Ca-

rolus sit usus, postquam jam senex, totum literis se dedit.

Unum addimus in Vitis a Marino Sanuto Italice scriptis Ducum Venetorum, & e manuscripto Codice Estensi primum editis Script. Rer. Italic. Tom. XXII. funebrem illam Orationem Bernardo Justiniano filio, non Leonardo patri, falso tribui ejus Tomi pag. 921. In obitu quidem Francisci Foscari Ducis Orationem habuit Bernardus filius, quæ & ipsa exstat in laudato illo volumine, exstantque ibidem ipsius Bernardi Epistolæ nonnullæ ad Jacobum Zenum, quarum una fidem facit inter Carolum Zenum, & Leonardum Justinianum veterem intercessisse necessitudinem, quam in juniores utriusque familiæ hereditario jure transfusam, castissime ab ipsis servari, & posteris etiam immortalī jure commendari oportere, scribit Bernardus.

Haëtenus de funebribus Orationibus in eo libello contentis; quin nec adeo diu immorari iisdem placuisset, nisi & Britannicos nostros valde ob eam Collectionem laudassent Massoulié, & Echard, & nisi Brixiana ea Collectio, eruditis parum, aut nihil comperita, historicas quasdam notitias haud contemnendas, ut allegata excerpta monstrarunt, suppeditaret. De nuptialibus, quæ ibidem subsequuntur, id tantum moneo, primam ex ipsis Joannem Britannicum, alteram vero Christophorum Barziziam, auctores præferre, reliquas ab ipso Britannico, ut credere par est, compositas fuisse.

Rhetoricum in componenda Oratione nuptiali artificium exposuit (Paulaniam tamen pro Halicarnaseo laudans) Becichemus Cent. Epist. Quæst. cap. 95. ad Marinum Georgium, cui se maxime obstrictum fatetur

tetur, quod ipse, aliique cives sui, & amici, ejus præsidio in albo Patavinorum Professorum descripti, omnes eundem suum experiantur Mecænatem. Præclarissimum alium ipsius Becichemi Mecænatem, de quo etiam aliqua diximus in priore hujus Speciminis parte, exhibet caput, quod in ea Centuria illico subsequitur, Hieronymum nimirum Donatum. Quare dum Petrus Bembus non adeo bene de Becichemo sensisse videtur ex Epistola, quam superius allegavimus, in mentem venit, Scholæ Becichemi infrequentiam, de qua in ea Epistola Bembus conqueritur, non exiguæ Professoris illius doctrinæ, sed ingravescenti ætati (nam paucis mensibus post Bembi Epistolam illam Becichemus jam senex decessit) æquius esse adscribendam. Munus ab Hieronymo Donato sibi impositum, filium ejus instituendi, his verbis extollit Becichemus: *Profecto nec præsentēs, nec posteri audebunt me & modestissimum, & eruditissimum diffiteri; qui Hieronymi Donati judicio delectus, ejus filiolum instituerim, veram patris imaginem, illius, inquam, quem suspicit Apollo, colunt musæ, venerantur gratiæ; qui in omni literarum genere, quibus (ut Philosophi utar lingua) animus sit divinissimus, unus omnium excellit, & in eloquentiæ studiis ita regnat, ut, perinde atque verus Rex, parem, aut superiorem agnoscat neminem. Pluribus adhuc in ea Epistola Becichemus se effundit in laudes Donati. Curam autem suam in ejus filio educando his verbis pollicetur: Puer tuus ad me, quum placuerit, veniat. Parentem animi hic inveniet; quoad potero, & licebit, a latere meo nunquam discedet, ut non modo dicendi, sed & bene vivendi magistrum me*
ba.

babeat, nec minus exemplo auctus, quam doctrina imbutus, prudens efficiatur, & doctus. Una cum pignoribus meis stabit, leget, ambulabit, discet, comedet, bibet, dormiet, laxabit animum, recreabitur, me præfente hæc, & omnia, ut caveat intemperantiam. Brixia Professore rem agebat Becichemus, dum eam Epistolam scripsit, ut patet ex postremis his verbis: *Vale, spes mea, Patrone mi, vale, salveque a Prætoris nostro Andrea Lauretano, qui te diligit, utque signantius loquar, valde amat, & a te mutuo amari dignus est, Vir integerrimus, & qui se in hac administrationis mole ita gerit, ut nulla domus tanto consilio, tantaque disciplina gubernetur, aut tam modesta, & quieta sit, quam Urbs hæc, & Brixiana tota regio.*

Quæ de ingravescente Becichemi ætate superius conjectabam, Becichemus ipse confirmat in Epistola ad Franciscum Donatum Prætoris Patavinum duplici ipsius Becichemi Orationi præmissa, gratulatoriæ scilicet nomine Patavinæ Academiæ ad Venetorum Principem Andream Gritum, & funebri in Joannem Petrum Stellam, magnum Venetiarum Cancellarium; in ea enim Epistola data an. 1523. de ætate sua ad otium deflexa, & quietis avida, & insuper de quorundam adversus se maledicentia hæc habet ad ipsum Donatum: *Nam ecce tibi Joannis Petri Stellæ mors, res acerba, literis Senatus nunciatur, quibus & mandatur, uti me publico nomine horteris, ad ejus laudes in funere celebrandas, Venetias evolem. Qui quamvis sim constitutus in ætate ad otium deflexa, & quietis avida, parere tamen cum periculo, & vitæ, & existimationis malui, quam elationis, aut contumaciæ calumniam subire, quum præ-*

P. II.

T

ser-

sertim ab scelestissimis invidorum agminibus obsideamur, & insiet bellum a maledicis, idque periculosum propter corrupta ætatis nostræ judicia. Accessi, Deoque Opt. Max. adjutore, aleam feliciter jeci in tumultuaria illa, ne dicam extemporali, concione, quam priori adjunctam actioni, ad te Mecænatem nostrum, & præcipuum doctorum omnium patronum dedimus die illo insigni, quo Vir rarissimus, Nicolaus Aurelius noster, Marci illius filius, res jucunda, in Stellæ demortui locum majoribus Comitibus meritissimo successit.

IV. Quamvis quamplures, præter superius recensitas, nobis se offerant, funebres, nuptiales, gratulatoriæ, pænegyricæ, & aliæ ad demonstrativum genus pertinentes Orationes, a Brixianis Rhetoribus concinnatæ; ne tamen in præsentî tractatione plus æquo longiores simus, eas omnes omittentes, ad Joannem Marium Martium accedimus, cui ut locus debeat inter Brixianos Oratoriæ Facultatis Professores, faciunt Adnotationum, & Opinionum ejus in varios Auctores Latinos, Græcosque libri, quos ad manus habemus. Floruit Martius noster in Alexandrina Starielensi Academia circiter medietatem Sæc. XVI. & plures vitæ suæ annos inter Hieronymi Gallarati Episcopi illius Urbis familiares se transegitte, testatur ipsemet in Laudatione funebri in eundem, quam Hieronymo Confalonerio Abbati nuncupavit; & in Epistola Nuncupatoria suarum Adnotationum ad Cæsarem Gambatam Episcopum Pertonensem diserte affirmat, se Alexandriam Hieronymi Gallarati accersitu demigrasse, non quod (inquit) felicissimam patriam nostram mihi justissimis, & publicis,

Et privatis de causis carissimam Stasielensibus postponerem, sed vel invitabat genius loci, ubi antea fuisset, Et quem semper amavi, vel rationes meae visae sunt ita postulare. In ea Epistola laudes Cæsaris Gambaræ sibi solitum fuisse narrare, scribit Matius, communem civem Nicolaum Siccum, Virum clarissimum, quo cum summa sibi fuerat, & jucunda familiaritas ex communibus studiis suscepta. De hoc Nicolao paulo infra dicendum erit, scilicet inter Poetas.

Adnotationum illarum caput secundum, in quo Matius noster probare contendit libros Rhetoricorum ad Herennium non esse Cornificii, causam præbuit celebri controversiæ inter ipsum, & Antonium Riccobonum. Hic quum nihil certius existimaret, quam Rhetorica ad Herennium non Ciceronis esse, sed Cornificii, suam a Matio dissensionem literis consignavit, adversum quam protulit Matius brevem Defensionem, Octaviano Giliino, Patritio Alexandrino, discipulo suo dicatam, cui hæc scribit in Epistola:

*Joannes Marius Matius perinlustri J. U. C. Octaviano Giliino
Patritio Alexandrino S. P. D.*

Agitur circiter vix annus, perinlustri, & excellens Giliine, cum editus est Ticini liber Adnotationum mearum, in quarum secundo capite rationibus adlatis demonstrabamus, eos, qui ex Fabio Quintiliano conarentur probare, auctorem Rhetoricorum ad Herennium Cornificium esse, ejusdem Fabii testimoniis ad mutandam sententiam jure compelli posse. Cumque orta aliis de rebus controversia inter Carolum Sigonium, & Antonium Riccobonum viderem, in suis scriptis probationes illas meas ab Riccobono homine docto tentari, non (ut mihi certo persuadeo) ullo laudendi mei studio, sed quod rationes causæ, cui inservit,

sic postulare iudicet, neminem putavi fore, qui factum meum sit damnaturus, si ego quoque causam semel susceptam, & quam probem, atque opinionem pristinam defendam ea moderatione, quam a natura acceptam moribus alui studiose per totam ætatem semper, & colui. Et sane si alterum tueri gloriosum est, sibi adesse cuiquam vitio dabitur? Dimentem istam hostibus. Nec mea scripta de me ita male merita sunt, ut fœtus meos habere caros non debeam. Mihi igitur hic adfui, negotium proprium, non alienum acturus. Quamquam si a Carolo Sigonio stem, agam causam amicis, simi hominis: quem & vivum meritissimo, atque mutuo dilexi, & mortuum memoria colam sempiterna. Committere etiam negligendo non debui, ut hæc inveterata de Cornificio opinio mihi noceat. Quod certe contingeret, si tacitus rem transirem; homines enim paulo remissiore cura Riccoboni scripta legentes, nullo contradicente, rationes ibi apud eum lectas probarent, silentiumque nostrum in conscientiam ducerent, & bona causa deserta, existimaretur mala. Respondeo igitur, & ad ea, quæ sunt in Adnotatione mea pridem edita, quæ hic quoque describitur, addo nonnullas alias rationes, in quibus si pro pristina opinione propugno, oppugnare quemquam videri non debeo: tamen dum ad iumenta mea confirmo, necessitas causæ coegit, infirmare aliena.

Hanc eandem quæstionem discusserat Bartholomæus Theanius Brixienfis, ut scribit Joannes Planerius ejus conterraneus in Patriæ suæ Descriptione superius allegata, affirmatque præterea, illum Brixie inter Rhetoricæ, Poeticæque artis Professores primum locum id temporis sibi vindicasse. In Epistola vero ad ipsum Theanium data an. 1558. Planerius certiorum eum reddens moræ, quam superiore anno fecerat Viennæ, Austriæ Metropolis, suorumque alloquiorum cum Viennensis Gymnasii Professoribus, hæc subdit ad Epistolæ calcem:

tes

tes & ipsi, ut suo te nomine salutarem, & quæ de Rhetorica ad Herennium scripsisti, ad edendum excitarem; nam de illa tam apud veteres, quam neotericos, magna est controversia, Ciceronis ne sit, vel Cornificii, an alterius. Scio enim, te multis rationibus probasse, Ciceronem illam scripsisse, cujus opinionis fuit & D. Hieronymus, fuit & Becichemus neotericus, quamvis Calius noster, & Sabellicus suis in Epistolis aliter senserint. Brixianorum Professorum, Matii scilicet, & Theanii, qui opinionem non amplectetur, si tanquam fatuam etiam reprobarer, sciat ipse, doctissimos Averanum, & Gibertum ambiguos nuperrime hæsisse in ea controversia. In Centuria Epistolica Becichemi a Planerio memorati exstant ejus Caltigationes in libros ad Herennium a cap. 31. ad eap. 38. ad Franciscum Bragadenum, & Dominicum Contarenum Brixie Prætores, quorum unus (ait Becich. in cap. 31.) omnium doctrinarum peritia cedit nemini, aliter ita disciplinas omnes, ita doctores amplexatur, ut nemini priorum Regum, quorum munificentia Musis, & Apollini admirationi fuit, postponendus sit.

V. Observationes Marii Nizolii Brixellensis in M. T. Ciceronem, ad Oratoriam utrique disciplinam spectantes, Brixiana sibi vindicat literatura, non ea quidem de causa, quod Marius ille in Veneta anni 1576. earum Observationum Editione inscribatur *Brixienfis*, quod perperam positum non diffitemur, sed ob Brixianum solum, in quo primum lucem aspexerunt, scilicet apud Pratum Albuini an. 1535. idque insignibus prorsus auspiciis Brixianis, nimirum Jo. Francisci Gambaræ, & Matthæi Advocati. Hic pecuniam omnem in

ilitiis

illius. Operis editionem liberalissime suppeditavit; ille per tredecim jam annos Nizolium hospitio acceperat, hujusque literas, & studia omnibus rebus fovere, & excitare nunquam destiterat. Eximiam non ipsius Joannis Francisci tantum, sed totius domus Gambaræ munificentiam celebrat Nizolius in Nuncupatoria ad illum Epistola, & præterea religionem, pietatem, morum suavitatem, cæterasque virtutes, at has omnes cum aliis principibus Viris communes eidem affirmans, ipsi Joanni Francisco tanquam proprium tribuit scientiæ, ac sapientiæ studium; quippe qui & doctissimos quosque utriusque linguæ Scriptores frequenter legeret, & Ciceronis lectione quam maxime delectaretur, quin & ejus dicendi genus sane quam feliciter adumbraret. Patent hæc omnia ex ea Epistola Nuncupatoria, quam jam jam recitabo, postquam scilicet Lectorem monue- ro, in Annalibus Typographicis mentionem nullam fieri conspicuæ hujus Editionis.

Marius Nizolius Brixellensis Joanni Francisco Gambaræ:

S. D. P.

IN omni munere largiendo, & omnino in omni officio tri- buendo, cum multa alia consideranda arbitror, Joannes Franciscus Gambaræ, tum in primis duo, primum, ut ei largiamur, cui plurimam gratiam debeamus, deinde ei, qui eo munere quam dignissimus esse videatur. Sic enim & offi- cii ipsius ratio postulat, & ita traditum est ab iis, qui hac de re præcepta nobis reliquerunt. Quamobrem: cum absol- vissem has Observationes meas in M. Tullium Ciceronem, ac de eis, ut mos est, dicandis mecum cogitarem, tu mihi primus omnium statim occurristi, qui hoc muneris, quale id cunque esset, tibi quasi suo jure vindicares. Nam quan- quam possim multos commemorare, quibus plurimum de- beo, & in iis præcipue clarissimum, & amplissimum Virum,
cun-

eundemque Juris civilis longe peritissimum, Matthæum Advocatum, & ejus filium Camillum adolescentem, omni corporis, animique virtute ornatissimum, qui me antea multis sibi, & magnis de causis maxime obligatum, nunc etiam obligarunt magis, cum in editionem hujus Operis omnem pecuniam mihi liberalissime suppeditarunt: tamen & ipsi, qua sunt modestia, & cæteri omnes facile patientur, ut me tibi, plusquam sibi, devinctum esse confitear. Tu enim primum hospitio me accepisti, quo jam tertium, & decimum annum honestissime utor, tu tenuitatem meam liberalitate tua semper sustentasti, tu litteras, & studia mea nunquam fovere, & excitare destitisti, tu me omnibus rebus assidue, pro ut facultates tuæ tulerunt, & auxisti, & ornasti. Quid multa? nisi tu fuisses, ego plane nihil essem: quare non solum mea omnia, sed me ipsum prorsus tibi me debere fateor. Neque vero, cum me tibi tam devinctum esse intelligam, tu non hoc munere quam dignissimus mihi videris, quem cum multis aliis nominibus jure laudandum, atque ab omnibus suspiciendum arbitror, tum vero maxime hac de causa, quod miro quodam litterarum, atque omnium bonarum artium studio incensus es, & cum non solum Latine, sed etiam Græce luculenter scias, atramen in dies singulos & plura discere, & doctior evadere conaris. Nam eximia liberalitas, & magnificentia, qua non modo tu, sed tota domus Gambara in primis commendatur, prætereaque religio, pietas, morum suavitas, cæteræque virtutes ita in te entent, ut cum multis aliis principibus Viris, & paribus tuis tibi sint communes, at vero tantum scientiæ, ac sapientiæ studium omnino cum paucissimis. Non enim, ut Neoptolemus ille Ennianus, paucis tibi philosophandum putas, sed ut Cato ille sapiens dicitur etiam in Curia, dum Senatus cogeretur, lectitare solitus, & hanc ob causam Helluo librorum appellatus: sic tu, cum per familiares occupationes licet, nunquam intermittis studia doctrinæ, & cum doctissimos quoque utriusque linguæ Scriptores frequenter legas, tamen unius Ciceronis lectione potissimum delectaris, & ejus dicendi genus sane quam feliciter adumbras. Quamobrem has Observationes ex omnibus Ciceronis Operibus col-

collectas, & ad eloquentiam adipiscendam, ut nos arbitramur, maxime utiles, ac necessarias tibi, & Ciceronis, & eloquentiæ studiosissimo, potissimum convenire sumus arbitrati; & eo magis, quod eas ab hinc annos novem (ut scis) tua cohortatione, & impulsu quasi coacti elaborandas suscepimus, tum deinceps reliquis annis opibus, & liberalitate tua sustentati maximis laboribus, vigiliisque jam tandem ad exitum perduximus. Ad extremum vero etiam jussu tuo curavimus, ut ad Pratum Albuini, atque in ædibus tuis imprimerentur (utendum enim est verbo novo in re nova) atque ita ad communem studiosorum omnium usum in lucem ederentur. Quibus omnibus de causis has ipsas jure optimo tibi dicamus, & nomini tuo consecramus, teque earum constituimus tanquam patronum, & tutorem, ut id ipsum etiam in nominis tui præsidio a malevolentissimis invidorum obtreccionibus tutum appareat. Nam sunt plurimi hoc tempore, qui non solum nobis, laboribusque nostris, sed etiam ipsi (si Diis placet) Ciceroni graviter obtreccant, editis nescio quibus Ciceronianis, & Ciceronibus relegatis. Quibus omnibus equidem hic respondere, & eorum ridicula objecta refutare decreveram, sed aliis occupationibus districtus, rem hanc in aliud tempus differre coactus sum. Quare dum nos hoc faciamus, tuæ interim partes sunt, ut & obtreccatoribus istis fortiter resistas, & nos, Ciceronemque simul defendas, ac tuearis: quamquam Cicero ipse per se ita defensus est, ut nullis cujusque maledictis tanti Viri auctoritas diminui possit. In quo ego observando si & tibi, & cæteris, qui tantopere genus hoc lucubrationis cupere videbantur, satisfaci, gaudeo, vehementerque lætor; sin minus, graviter doleo, & me minus potuisse, quam voluerim, & te non tantum affecutum esse, quantum speraveris. Quam autem hoc totum, quantum idcunque est, quod præstitimus, ad eloquentiam comparandam & utile, & necessarium sit, non mihi hic arbitror pluribus explicandum; nemo enim est, nisi plane rudis, & imperitus, quin sciat ad bene Latine loquendum, scribendumque quantum habeat virium, ac momenti non solum verborum vere Latinorum, sed etiam rerum, ac sententiarum copiosissima, atque elegantissima supellex, qua-

qualem nos ex M. Tullio Cicerone, hoc est ex ipso eloquentiæ parente & tibi, & cæteris bene dicendi studiosis in hisce Observationibus suppeditasse arbitramur. Quare jam fidenti animo perge, incumbere in istud studium, in quoes, & ad eloquentiæ principatum toto animo, ut facis, atque omni studio contende. Vale.

Ciceronis obtrectatores, de quibus Nizolius, utique ea tempestate non deerant, unde magnæ inter eruditos ortæ sunt turbæ, ut Erasmi, Aleandri, Scaligeri, & Doleti Scripta testantur; eæque adeo exarserunt, ut Erasmus ad Franciscum Molinum ita scribere non dubitaverit: *Exorta est nova Secta Ciceronianorum, quæ non minus incruduit, quam Lutheranorum, vetus quidem, sed per Longolium innovata*. Peculiares adversarios habuit ipse Thesaurus Ciceronianus Nizolii, inter quos Henricus Stephanus in suo Pseudo-Cicerone, & in Nizoliodidascalo, eundem reprehendens, quod inemendatis Ciceronis Editionibus usus, multa Cicerone indigna in suo Thesauro receperit. Equidem Nizolius ipse adeo non existimavit, se supremam manum Thesauro suo adjecisse, ut contra post primam illam Editionem accuratius Ciceronis volumina legens, Opus suum valde locupletaverit pluribus additamentis, ex quibus una cum aliis a doctissimorum Virorum studio suppeditatis locupletiores postea Editionem procuravit Venetiis an. 1596. Michael Nizolius ipsius Marii nepos, dedicavitque Duci Octavio Farnesio, cui maxime devinctos Nizolios profitetur, patrum quidem, quod ab eo Parmam evocatus fuerit ad munus juventutis publicis literarum studiis excolendæ, nepotem vero, quod præturam Castri Popilii in agro Parmensi munificen-

P. II. V tis-

tissime sibi delatam recepisset. Paulus Manutius, se magni fecisse Nizolii Thesaurum, binis ad eum Epistolis testatur. Ejusdem cum laude meminit Planerius in literis ad Theanum, fatetur tamen Nizolium, hominem sibi amicissimum, minime in eo Opere assecutum fuisse, quod voluit; *Aulica* (inquit) *consuetudines, continuæque inter ipsum, & Majoragium Insubrem rixæ, & altercationes distraxere hominem a politioribus, candidioribusque studiis.* Rixati sunt inter se Majoragius, & Nizolius potissimum de vera philosophandi ratione, &, quod spectat ad Thesaurum, Nizolio plagii crimen intendit, contentionis utique æstu abreptus, Majoragius, perinde ac si Christophori Longolii Opus pro suo ediderit.

VI. Ciceroniano Nizolii Thesauro non abs re erit, Thesaurum Nicolai Perotti Archiepiscopi Sipontini, ad parandam verborum copiam conflatum, hoc loco adjungere. Inscribitur liber hic Cornucopia, seu Latinæ linguæ Commentarii; idque jure optimo, in iis enim Perottus, ut scribit Ludovicus Odaxius Patavinus in Epistola Nuncupatoria ad Guidum Urbini Ducem, quamvis Valerium Martialem interpretandum desumpserit, universam Grammatices rationem varie, concinne, luculenterque complectitur; quod ipsum monuerat Pyrrhus Perotti nepos in Epistola ad Federicum Urbini Ducem post illam Odaxii in quibusdam Cornucopiæ Editionibus præmissa, librum hunc optimarum in omni genere rerum, ac reconditarum Thesaurum appellans, unde propterea Rhetores quoque haurire possent, quæ pertinent ad proprietatem, & elegantiam linguæ Latinæ.

Quid

Quid autem Brixianis debeat Perotti Cornucopia, declarant carmina. quædam. illius Operis. fronti præfixa: in Veneta Editione an. 1490. per Baptistam de Tortis. In iis tam Marcellus Philoxenus, quam L. Ponticus Tarvisanus, & Daniel Cajetanus, Antonii Moreti Brixiani in eo Opere primum expoliendo, dein evulgando diligentiam maxime celebrant; quemadmodum & M. Antonius Sabellicus data ad ipsum Moretum Epistola, quæ ad calcem ejusdem Editionis affertur, ubi sibi traditum. tertia noctis hora, quum cœnare cœpisset, Cornucopiæ volumen, illud mox arripuisse, &, quantum celeri transcurso licuit, observasse se scribens, *industriam tuam (inquit) & diligentiam jam antea Venetæ Academiæ, imo universæ Civitati facile perspectam facile recognovi. Habebunt igitur tibi gratias quicumque posthac in ipsam lectionem incident, quod eam per te tam emendatam habebunt, quam ille ipse, qui scripsit, in publicum exire voluisset. Scriberem ad te plura, nisi domestici, qui jam dudum loti suspirare non desinunt, me brevitatîs admonerent.*

Dicendum. hic esset de fraude, qua Moretus noster Venetæ illius Editionis auctor taxatur, ut qui ad ejusdem calcem inferens Commentariolum. Nicolai Perotti in C. Plinii Secundi Historiarum Proœmium, Epistolam ipsius Perotti Francisco. Guarnerio in aliis Editionibus passim inscriptam, sibi in Veneta illa Editione inscripserit. Insignis utique. fraus: at quæ ad Moretum damnandum. allegata. reperio, cum potius absolvunt, nam curata a Moreto Editio tam Cornucopiæ, quam Commentarioli, reliquas omnes. usque:

modo compertas, ætate præcedit; fraudis autem genus illud, ut diserte affirmat, qui Moretum redarguit, posteriorum Editionum auctores quandoque admisisse comperiuntur, quum scilicet per illud nefas Editiones suas tanquam omnium principes venditare satagerent. Nos causam hanc adversus Moretum alibi discutiemus, agentes nimirum de Helix Capreoli Historia, eaque occasione de Epistola ejusdem Capreoli ad Franciscum Arigoneum, qua Vir Clarissimus demonstrat ex ipsius Perotti, quin Blondi Forolivienfis, & Hermolai Barbari, præter veteres plures, consensu cum ipso Plinio, Plinium patria fuisse Novocomensem.

Ambrosium Calepinum ex Perotti Cornucopia in suum Vocabularium multa derivasse, in dubium vocari non debet. Benacensis Editio ejus Vocabularii an. 1522. inter Scripta, quibus Calepinus profecit, Cornucopiam adnumerat. Ad eam Editionem quæ præfatur Alexander Paganinus, quum maxime faciant ad nostræ illius Typographiæ, quæ Aldinam æmulabatur, commendationem, hic recitabo, quo fiet, ut quemadmodum superior de re Grammatica tractatio, ita & præfens de re Oratoria ex Benacensium typorum mentione Colophonem accipiat.

Alexander Paganinus bonarum Artium studiosis S. P. D.

ORaverunt me superioribus diebus nonnulli, ut ea volumina, quæ humaniorum disciplinarum titulo comprehenduntur, cum suis Commentariis castigatis, curarem imprimenda, eam rem studiosis omnibus gratissimam fore pollicentes. Ego vero, quia amor meus in scientiarum cupidos semper exstitit ardentissimus, cum justis amicorum postulationibus gerere morem decreverim, statui omnibus ingenii mei,

mei, atque operum viribus niti, ne ignaviter dicar suscepam peregrisse provinciam. Quod me assecuturum facile spero, si Aldum Manutium, admirabili virum sagacitate ad omnia, quæ huic officio pertinent, indaganda, & diligentia subsequar, & sedulitate imitabor. Is enim sua vigilantia utriusque linguæ tum dissipatos codices, tum depravatos in pristinam integritatem, candoremque restituit. Quare non immerito ab omnibus nostræ ætatis literarum studiosis, earundem illustrator, ne dicam parens, est appellandus. Inter cætera vero, quæ in doctrinæ cupidos Vir ingeniosissimus, ac reipublicæ literariæ amantissimus, contulit beneficia, hoc non ultimis adnumeraverim, quod plurimas dictiones, quæ a plerisque perperam proferebantur, ita accentibus, notisque insignivit, ut vel rudis quilibet, quomodo enuntiari debeat, facile possit cognoscere &c. Sunt permultæ aliæ dictiones, quæ hujusmodi notas admittant, quarum pene infinitus est numerus, quem qui scire velit, Lybici velit æquoris idem discere, quam multæ zephiro turbent arenæ. Hæc vero non probavimus modo singula, verum etiam vigilanter statuimus observare. Quocirca nullis impensis decrevimus, ut Aldi, quoad ejus fieri possit, insistamus vestigiis. Ab hoc autem primo Auctore sum auspicatus, quia omnium corruptissimum esse conspexeram. Misertum sane fuit, Opus novitiis adeo necessarium, tam multis ubique erroribus conspersum circumferri. Quem si vobis non displicuisse comperero, commodis omnibus vestris, ac desideriis pro virili parte non defuturus, accingar ad reliquos, summum præmium meis laboribus repensum judicaturus, si meam vobis operam profuisse cognovero. Valet.

Dum industriam suam a Vocabulario Calepini se auspicari scribit Alexander Paganinus an. 1522. Grammaticam Manutii triennio ante a se editam, fortasse tanquam exiguæ molis libellum, minime ob oculos habuit.

REI Poeticæ tractationem nobis aggredientibus piget obvios illico a quibusdam obtrudi tam Liliū Gregorium Gyraldum in Dialogo 2. de Poet. nost. temp. ita scribentem: *Brixia multos habet eruditos, sed non & Poetas, ut ejus filia Verona ... Versificatores etiam potius, quam Poetas fovet ipsa Brixia; nec non M. Antonium Muretum, sat celebre dicterium, nigro quovis theta ignominiosius, Brixiani Vatis volumini præfigentem. Haud propterea diffido, alios de Brixianis Poetis æquius judicatuos, postquam compererint eos, qua tempestate floruerunt, ea ipsa a doctis Viris laudes, ac plausus retulisse. In hoc autem argumento versantes, industria nostra illud absque dubio consequemur, ut si cui non ab omni labe Brixianorum Poetarum existimatio satis vindicata videatur, nemo tamen sit, qui ex iis, quæ a nobis afferentur, literariam eorum temporum Historiam, quæ ad nostrum institutum magnopere pertinet, haud parum illustrari diffiteatur.*

I. Vatum nostrorum agmen ducat Joān. Franciscus. Quinzianus Stoa, quippe qui laurea Corona ornatus incedit, canensque Saphicum illud metrum, quod ex tempore, dum eam acciperet, se dixisse perhibet ipsemet in parvo libello, quem Artem brevem inscripsit, hos scilicet versus:

*Rideant Nymphae, cantus, Venusque,
Flammiger vultus bilaret Cupido:
Nostra Rex Gallus Ludovicus ornat
Tempora lauro.*

qui-

quique præterea manibus præfert, ostentatque Regium Diploma, quod hujusmodi est:

*Ludovicus Dei Gratia Francorum Rex, & Mediolani Dux,
&c.*

AD perpetuam rei memoriam. Quoniam sicut ex anima, & corpore constamus, sic duplex quærendæ gloriæ via sit patens, & aperta mortalibus, quarum altera mentis, corporis altera viribus præcipue peragenda est: utriusque rei Omnipotens in Regno nostro, & universali Dominio gratiam constituit ab æterno, ex quo quidem innumera- biles tam ingenii dotibus, quam bellicis artibus memo- randos hoc idem Regnum nostrum, totumque Dominium pro- genuit, alibi genitos erudit, & illustravit. Inter multa nimirum, quæ animi viribus geruntur, & impræsentiarum corporis actibus tentamus, florentissimum, atque omni laude dignissimum in Dominio nostro Historiarum, & maxi- me Poetarum studium efflorescit: quorum industria, & labor tam sibi ipsis, quam aliis præclaris Viris. sublimibus- que, & memoria dignis operibus, carminibus suis tribuunt immortalitatem. Et sane sicut Poetarum, Historicorumve copia multis inelytam, & diuturnam, perpetuamque præ- bet memoriam: sic eorum defectu, labentibus annis, multis æternitate nominis non indignis fama oblivione involuta de- mitur, ac eripitur. Hinc est quod propter gloriam, quam (ut diximus) sibi, & aliis olim quærebant. pro præmio quodam, & studiorum proprio ornamento laurea Corona quondam donari cœpere. Tanti enim honoris illos Urbs olim censuit, ut unum, atque idem Lauridecus indicaret Cæsaribus: at- que Poetis, & quidem Cæsares, Ducesque victores post bel- lorum discrimina, Poetas pariter post studiorum labores lauro insignibat. Ideo circumspectantes inter subditos no- stros quam plures, & dignos existare Poetas, inter quos non solum fama, & nomine accepimus Joannem Franciscum Quintianum Stoam egregium Poetam excellere; verum etiam approbatione, relatione, certificatione Reverendi eruditis- simique, ac bene dilecti nostri D. Jacobi Euraldi Episco- pi; prætereaque rerum experientia ob plurima poemata mul-

multivago stilo composita, quæ jam sub omnium litteratorum judicio edidisse, videre est, & maxime per novissimum heroicum Opus de Bello Veneto per nos Deo favente confecto; alique innumerabilia ejus poemata certo demonstrant. Quum igitur semper litterarum cultores dilexerimus, virtutesque animum exhilarent nostrum, animadvertentes insuper divinam litterarum eminentiam laurea Corona, omniumque laude dignissimam, ac fidem erga nos, atque devotionem, nec non & benemerita prædicti Quintiani, & cum a nobis per eundem, aliosque nostri benedictos reverenter petitum fuerit, Quintianum nostrum laurea coronari, verumque Poetam constitui; Nos igitur hujusmodi honestæ petitioni annuere volentes, Coronam lauream manibus nostris ejus capiti apposuimus, præsentibusque etiam imprimi iussimus: Dantes eidem tam in dicta Arte poetica, atque historiis, & in omnibus ad easdem spectantibus auctoritatem componendi, legendi, disputandi, auspicandi, & interpretandi veterum, & Neotericorum volumina, ut libet, atque suos libros omnibus sæculis, auxiliante Deo, mansuros, ac poemata componendi, liberam tenore præsentium potestatem; nec non ubi, & quotiens sibi placuerit, possit hujusmodi, atque alios actus poeticos quoscunque laureatus seu myrto, vel hedera, si id genus elegerit coronatus, & in actu, atque habitu quolibet poetico privatim, & publice solemniter exercere. Ad hæc scripta per eum hætenus, velut per Virum in talibus expertum, ac verum Poetam, illis in scriptis approbamus. Reliqua vero, quæ scripturus erit imposterum, atque etiam ab eodem jam promulgata, & in lucem edita fuerunt, simili modo approbanda censemus, decernentes iisdem privilegiis, honoribus, immunitatibus, & insignibus perfrui debere, & iis omnibus, quibus ubique terrarum uti possunt. aut posse soliti sunt liberalium, & honestarum artium professores, eoque magis, quia eminentiæ suæ raritas uberioribus eum favoribus, & ampliori benevolentia dignum facit. Insuper eundem Quintianum Stoam propter ingenii sui dotes, ac propter indubitatam devotionem, qua Nos, Statumque nostrum afficit, ut communis omnium fama, & actus, ejusque verba testantur, publicis acclamationibus collaudari omni-

omnibus etiam privilegiis, quibus Poetæ laureati per antea usi sunt, & fuere, uti, & gaudere jussimus; mandantes omnibus Judicibus, & Justiciariis tam Regni nostri, & Ducatus Mediolani, cæterarumque Terrarum, & Dominiorum nostrorum citra montes, quam ultra, quatenus præfatum Quintianum præfatis insigniis, lauro, & privilegiis uti, & gaudere faciant, & permittant. Datum in Castro nostro Mediolanensi, die decima quarta mensis Julii, Anno Domini millesimo quingentesimo nono, & Regni nostri duodecimo.

Asperi proflus, & hispidi stili amatorem fuisse Quintianum nostrum, sectatoremque in eo Jo. Baptistæ Pii, & Philippi Beroaldi, quorum vitia, ut ait Jul. Cæsar Scaliger, ingenii sui magnitudine superavit, diximus suis locis. Ex eodem Scaligero modo addimus, asperitatem illam in prosa oratione pedes castigasse: *Itaque* (ait ipse Poetic. l. 6.) *in Poemate videtur cura, ac iudicium, quod est in soluta dictione exultantia quædam spiritus: sic enim de illo liber loqui.*

Quamplures, eosque admodum liberales laudatores ea tempestate nactus est Quintianus; at nemo liberalior, & effusior Joanne Lugduneo Acrolucio, qui volumini Operum ipsius Quintiani a se recognito, & magnificis proflus typis Lutetiæ Parisiorum an. 1514. impresso, cujus exemplar in charta pergamena ad manus habeo, hoc Epigramma præfixit:

*Joannis Lugdunei Acrolucii in Quintianicum Pantheon,
Carmen.*

Multiplices animæ vigeant quum corpore in ano,

Res nova, nec primis cognita temporibus.

Hic Christum generans est alter Horatius; illum

Dum perimit, tragico est non minor Euripide.

Dumque reviventem canit, est Maro; Papiniusque,

Dum Christum æthereos scribit adisse laret.

P. II.

X

In-

*Induit Archilochum lacrymoso fretus jambo,
Dum canit horribili tempora iudicii.*

*Ergo agite, o Juvenes, legite inclita carmina; sunt hic
Quinque Poetarum pleïra, querela, tubæ.*

Quintianus autem ipse, licet, ut alibi vidimus, haud parvus sui laudator, Christianis Poematibus, quæ Editio illa complectitur, prologum apposuit valde distantem a projecta ostentatione. Priores versus hi sunt:

*Lector, Apollineas solitus tractare papyros,
Ausoniumque audire Sopbos, rectoque Maronem
Judicio in trutina suspendere, & alta coturno
Ducta Sophocleo perpendere carmina, & omnem
Auctorum facili ingenio pernoscere mentem,
Pone supercilium, & tetrici mucronis acumen,
Si præsens spectabis Opus, mea musa cadentem
Sub tenui infirmam ostendit testudine frontem.
Turpis in aspectu est, mox consternata recessum
Continet ignavum, misere sibi conscia palmæ:
Tristius unde meum studium est, quum ignara per aures
Discupiat volitare hominum, supraque profundum
Tollere se titubans audacibus æthera pennis.*

Complectitur volumen illud Theoandrogenesin, Theoandrothanaton, Theoanastasin, Theoanabasin, Theocrisin. Joannes Oporinus Basileensis, de cujus eruditione dictum est supra, inter Poemata sacra præstantium Poetarum an. 1542. a se edita, locum merito se assignare posse censuit Quintiani de Passione Domini Tragœdiæ. Eam Tragœdiam minime contemnendam esse scribit laudato loco Jul. Cæsar Scaliger: *Ut est argumentum (inquit) maxime difficile, quod venusta componas oratione, ita sunt optimi versus: quasi in materia volenti quaesita, non oblata detrectanti.*

In

In Ovidianis Quintiani Periochis, scilicet in Distichis ad fabulas Ovidii Nasonis a Quintiano compositis, nil aliud deesse præter judicium, ibidem affirmatur a Scaligero. Ea Disticha impressa Papiæ an. 1506. Joanni Francisco Bruno Nolano Episcopo Quintianus nuncupavit. Eadem se languenti, & triviali stylo scripsisse, faterur ipse in Epistola ad Bernardinum Blancum Coniolum Brixianum, quod tyrunculus ea scripserit unius mensis spatio. Blancus contra rescribit, magnam se in Opusculo illo admirari ubertatem, argutiam, concinnitatem. Affertur in Papiensi Editione utraque ea Epistola post Disticha, & alia insuper Joannis Archinti Mediolanensis ad eundem Brunum Nolanum Antistitem, qua ei dicatum a Quintiano fulgentissimum illud Distichorum Enchiridion gratulatur.

Poematum Quintiani exactum catalogum texere, nequaquam operæ pretium duco, multoque minus Præfationes iis appolitas recitare, ne salebrosam ejus orationem nimis quam indignantes Lectores, erga ipsos quoque versus, quos optimos Scaliger prædicavit, male animentur. Joannes Planerius in Epistola ad Bartholomæum Theanium & de iis salebris, ut alibi etiam, conqueritur, & libros, qui Quintiano superstitite lucem non viderant, petit a Theanio ipso recognosci, & emendari: *Suscipe (inquit) mi Theani, has Quintiani nostri vigilias, & labores; & si quid corrigendum erit, tuo arbitratu corrige, emenda: nam hoc officii, & laboris, & Quintiani manes, & municipes omnes tui a te exposcunt, & efflagitant. Ego, quod ad me attinet, dabo operam, ut omnia ejus volumina Brixie tuo*

favore, & auxilio, vel Venetiis fratris mei, & amicorum suffragiis imprimantur, & edantur. Aliquot Quintiani volumina, quæ Planerius repererat in quodam scripto, nondum edita, sed tineis corrota, cujuscemodi erant & alia ab ipso ad Theanium antea transmissa, in eadem Epistola ita recensentur: Mirandorum volumen maximum, Opus varium, & eruditum; Panegyricus in laudem Francisci Galliarum Regis, heroicis carminibus conscriptus; Quintus Curtius, imperfectus antea, nunc per Quintianum restitutus, & absolutus; Solinus, olim liber parvus, nunc per eundem magnus, longisque Commentariis ab ipso interpretatus; Linologie liber unus, in libros sex distinctus. Meminit ibidem Planerius & aliorum librorum, in quibus Quintiani ingenium, & eruditionem miram cognovisse se scribit: Nam (inquit) in Monosyllabis Ansonium superavit; in Epographiis vero Grammaticos omnes longo intervallo post se reliquit; in Encomio Urbis Venetiarum tam poetice, & luculenter evagatur, tam graphice ejus Urbis situm describit, ut nihil amplius in eo libro desiderari possit. Quæ de Quinto Curtio per Quintianum restituto, & absoluto prodit Planerius, testimonium exhibent de eo Quintiani Opere, duobus aliis ab Joanne Freinshemio, vulgati Supplementi auctore, allatis multo luculentius, atque ita indubitatum, ut ea res non amplius a doctis Viris in controversiam vocari possit. Encomium Urbis Venetiarum sua cura Venetiis editum Planerius Alphonso Martinengo Comiti Villæ Claræ dicavit, affirmans in Epistola ad ipsum, Venetæ Civitatis Poetas, & Oratores mirum in modum ejus libri lectione delectatos fuisse,

fuisse, quum alii copiam dicendi, & venustatem, alii artificium, & eruditionem mirarentur. Quintiani Opera quædam memorat Planerius in Epistola ad Vincetium Patinam, & alibi.

Ad calcem voluminis impressi Parisiis, de quo supra, affertur Quintiani in Deiparam Panegyricus, cui *Parthenoclea*, scilicet de Virginis gloria, titulum fecit, eumque Annæ primum Galliarum Reginæ, deinde ea mortua, Jacobo Evraldo Eduensium Antistiti dicavit. Præfatio Orationi illi adjuncta, portentosissimum obscuritatis opus, Lector minime succenseat, si hic ob insolentiam rei, cui typorum Parisiensium amplitudo pretium conciliat, locum inveniet.

Jo. Francisci Quintiani Stœ in suam Parthenocleam

Orphnologia.

TU quicumque es vel cadmæi inventi bullatus hêrmes, vel pythagoreo silentio adstrictus miles, seu civis milesii picatus æmulus, seu artis oleniæ daphneus magnes? qui limatis cerebrigenæ consecratis artubus ob situm horoscopus ægyptiam arborem repræsentasti, exin animato gallicanæ pœnæ vexillo cœlestis jani a pejurio conditionem induisti, mox & fidei sacrarium evicta omnium victrice aperuisti, nec non duplici testudine conclusum membrum aquilino ascensu defatigasti. Exinde falso humore niloticam justitiæ notam extremæ artuationis molortho persudisti, tuis tibicinibus id reddito, quod quum ex argonautis sunt argonautæ pisculus remora casis præstat ligneis. Te etenim sigalionem indice simulans, & misericordiæ incurvato solio deprecor, uti eo coluro Parthenopææ laudes in tuo tibi primogenito vitali membro conditas intuearis, quo & præcedentia conspexeris: non hic amplius musæa Lachesis se se exeret, nec phœbæ me compriment catharactæ; sed soluto & Parnassii vinculis exempto rem agam aulace. Non aberunt dictiones crassis mydis psyches famulæ verba diobolari.

latibus tipulis hannonis punici, sententiæ barbaricis marfiis hieroglyphici apices, rerum nomina sciopodibus arietina oracula, ac demum observationes narthecophoris angeronæ; sed Russis Helenæ, Rhemniis prothymæ, Serviis martis vincula, porphyrionibus eunuchus.terentiana. Accede, Lector, æoli simplicis lenitudinem complexus, lydio quæruulo consternatus, dorio bellicoso incitatus, phrygio religioso detentus, alio vario correptus floream hanc radicitus exprimas rosidemiam; nec mireris me satius Milonis voluisse esse hospitem, quam tyronis patronum, nam & pastophori sacerdotis multis placuit mysterium. Ingredere igitur, & cana mente perlege, quæ si penitus callum non habebunt: tamen inter attragenas phrygias, samiosque pavones, & censores adnumerabunt. Sed jam omissis nebulosis clariora aggrediamur convivium.

Parisienses typos non tantum Quintiani in Mariam Virginem Panegyricum, ejusque Christiana Dramata superius laudata, sed & plura alia ejusdem Opera evulgasse reperio, inter quæ ad manus habeo Poema de laudibus Parisiorum Urbis, cui titulus *Cleopolis*, nec non aliud de Orpheo. Utrumque recensuit, ediditque an. 1514. Joannes Salmonius Maternus, præmissaque ad Hieronymum Marlium Patrium Parisiensem Epistola Quintianum his verbis extollit: *O felix nobis, & vere beatum Vatis exilium! si modo exilium dicendum sit, quod bellico tumultu pressus, & militari perulancia, Gallias nostras una cum discipulis, & amicis, quo liberius omnem musis operam impenderet, & tranquillo literarum otio frueretur, secesserit.* Quintiani in Gallias secessum Tullii exilio in Græciam comparat Salmonius, qui scilicet *factionibus* (inquit) *civium tumultuosus pulsus, Philosophiam Græcorum Romano vestiens amiculo, tantopere latinitatem ditavit, adauxitque, ut ipsius exilium*

lium non injuria aureum, ac gemmeum dici mereatur. Tandem Quintiani Cleopolim perenniozem affirmans ipsis Parisinæ Urbis magnificentiis, quæ scilicet in fortunæ manu sunt sitæ, de eo Poemate hoc Distichum apponit:

Vivet, & æterni merito referentur honores,

Dum bifida lenis Sequana curret aqua.

Gallos Storæ nostri visendi causâ Brixiam, & Quintianum accessisse, superius diximus teste Planerio in Epistolis. At neque apud Planerium, neque apud veterem alium Scriptorem reperio testatum, fuisse Stoam Parisiensis Universitatis Rectorem, ac Francisci I. Præceptorem, quare hujus rei fides tota penes ejus contraneos.

II. Faustus Sabæus, de quo modo dicere aggredior, Clarii, Brixianorum municipio, natus, jactat augustos & ipse, quemadmodum Quintianus Stoa, in Galliis Mœcnates, Reges nimirum Franciscum, & Henricum hujus filium, quibus & carminum suorum libros, & Arnobii adversus gentes Disputationes a se primum editas nuncupavit, & præterea jactat nil minus, quam septem Romanos Pontifices, penes quos Vaticanæ Bibliothecæ Custodis officio functus est, quique pro ea amplificanda, codicibus scilicet comparandis, impositam sibi ad extremas usque Septemtrionis plagas legationem obivit. Hæc Lector dum accipis, ægre tibi persuadebis, Faustum nostrum, tot patrociniis, tot laboribus insignem, nil frequentius cecinisse, quam inopiam suam, atque esuritionem, hanc quæ eum adegisse, ut poetica prorsus libertate vel ipsos Mœcnates suos facietis quidem, sed acerbis querimoniis obrunderet.

Fau.

Faufti Sabæi Epigrammatum libros quinque ediderunt Romæ an. 1556. Valerius, & Aloyfius Dorici fratres Brixienfes. Liber primus de Diis hanc præfert nuncupationem.

: *Ad Henricum Regem Gallie.*

*Princeps optime temporum tuorum,
Immo ut verius, altiusque dicam,
Præstantiffime Dux, & Imperator,
Noſtri & gloria, & orbis univerſi:
Quem fortuna ſoror, parensque virtus
Uſque ad ſydera debebunt merentem.
Hos noſtros Proceres, Deos, Deasque,
Quos jam concinimus, tibi & dicamus,
Henrice, accipias manu benigna.
Iſtos & lege, fronte ſed ſerena.
Admirabere, forſitanque dices,
Cur tot Numina, nomina atque Regum
Excellentia, Principum, & Sopborum
Noſtro nomine publicas ſub ipſo?
Quod ſis ille vocatus Orbe ab omni,
Divum Numina cui favent, parantque
Claves ex Oriente, purpuramque,
Ut ſis unicus Orbis Imperator.*

Eidem Henrico Regi reliquos etiam Epigrammatum libros Sabæus dicatos voluit, cauſamque huiusce facti reddit in ſecundo Epigrammate libri ſecundi.

Ad eundem.

*Dividere hæc poteram noſtri monimenta laboris,
Et dare diverſis munera Principibus.
Qui mihi pro merito potuiſſent tradere honores,
Aut aurum, aut veſtes, vel pretioſa magis.
Sed qui uſque ad cineres ulli ſe ſacrat, ob illum
Maxima lucra putat, grandia damna pati.*

Liber tertius inſcribitur de Amicis. Quartus de Amori-

moribus, cui hoc præfigit Sabæus Epigramma.

Ad Henricum Regem Galliæ.

*Pone sacros paulum cultus, rigidumque Catonem,
Præsidium, o Phœbi, Pieridumque decus:
Ecce tibi occurrunt, tenerique jocantur Amores,
Nuda Cytberiacis mater & orta vadis.
Ad sua, Rex Regum, te invitant orgia læti,
Jamdudum quæ non displicuere tibi.
Solve graves curas, dulces succendimus ignes
Hos, quibus arserunt secla hominum, atque Deum.
Et Mars depositis felicior extitit armis,
Nudus & in vinclis invidiosus erat.*

Quintus Miscellanea complectitur, clauditurque Epigrammate ad pium Lectorem, quem sibi propitium Sabæus exorat, namque, ait ipse,

*Errare est hominis, verum indulgere Deorum,
Solutus enim mendis, qui tacet, ille caret.*

In singulis iis libris Sabæus Henricum, & Franciscum frequenter decantat, seque iis commendat. Quid ab utroque promeritus fuerit, satis aperte hendecasyllabis hifce declarat pag. 533.

Ad Henricum Regem Galliæ.

*Commendo tibi Rex meos labores,
Quos pro patre tuo libens subivi,
Et libentius obtuli, & sacravi.
Dices, qui fuerint tui labores?
Et quid nam dederim tuo parenti?
Regi magnanimo, atque glorioso,
Regi munifico, atque liberali,
Regi denique liberalitatis,
Qui donare solebat oppida, urbes
Exposcentibus, indigentibusque.
Miror, quod tibi denegarit unquam
Quicquam promerito, atque postulanti.*

P. II.

Y

Certe

*Certe nil dedit: ego dedi, & dicavi,
 Illum unum Arnobium, & duos libellos,
 Et me tergeminum suum Poetam,
 Suum mancipium, suum hortulanum.
 Sacra ob lilia, quæ rigo, excoloque,
 Quis nam alter potuit dedisse majus?
 Quisve alter potuit minus referre?*

Inter Epigrammata, quæ Francisco Regi inscribit, valde argutum, quod legitur pag. 474. de imagine ipsius Regis.

De Imagine Francisci Regis Galliæ.

*Quam spectatores ignari cernitis, icon
 Spiritu, & artifice nobilitata manu,
 Illius est, qui cuncta suo moderamine regna
 Allicit, & gentes ingenio, atque manu.
 Quod taceat, non est mirum, indignatur imago,
 Et pictam largat non habuisse manus.*

Alio Epigrammate pag. 465. invecus in illos, qui Franciscum ipsum fidei non servatæ accusabant, post Romam ab excidio, & flammis ereptam, supremumque Sacerdotem, & alios verendos Patres carcere liberatos, eidem hanc clausulam apponit:

*Si turpe est istud, sanctum est, ferroque, fameque
 Excruclasse homines, & violasse Deos.*

At Epigrammata ad Romanos Pontifices ea sunt, quibus ita frequenter de sua egestate conqueritur Sabæus, ut ad illos scribens, chorda eadem semper oberrare videatur. Aliqua ex illis hic excribam, postquam Lectorem monuero, Sabæum patriam suam notam facere pluribus locis, inter quæ in Epigrammate ad Brennum pag. 372 quod ita incipit:

*Brenne resurgentiæ patriæ pars incluta nostræ,
 A quo magnificum Brixia nomen habet.*

Quin

Quin in Epigrammate p. 404. quod incipit, *Quid red-
dam, o Clarium?* fidem facit, se Brixiano illi insigni,
& vere claro municipio natales, studia, & mores de-
bere.

Primus ex septem illis Romanis Pontificibus, quibus
in Vaticanæ Bibliothecæ custodia servitium impendisse
diximus Sabzum, Leo X. a quo præterea ad redimen-
dos e tenebris libros, Musasque in Latium reducendas
missum se fuisse ad Reges Aquilonis non uno in loco
testatur, quemque immatura morte sibi raptum con-
queritur. Tria ad eum Pontificem Epigrammata ex-
stant pag. 402.

Ad Leonem X. Pont. Max.

*Languet, & esurio, spes in te est tota salutis,
Quum mihi sis Pastor, maximus & Medicus.
Pascere oportet oves, & ab illis pellere morbos,
Et facies Medico, & digna Leone Leo.*

Ad eundem.

*Premia pro meritis, & munera, maxime Princeps,
Quum tribuas, casus quid meruere mei?
Ipse tuli pro te discrimina, damna, labores,
Et varios casus barbarie in media.
Carcere ut eriperem, & vinculis, & funere libros,
Qui te conspicerent, & patriam reduces.
Eripui; ante pedes acclamavere jacentes,
Vive, Leo, cujus vivimus auspiciis.
Ergo mihi quid erit? pro te nam cuncta reliqui,
Memet, cognatos, & studia, & patriam.
Das cuncta, & cunctis, uni mihi dextera avara est,
Me miserum, plus est aere, & ore juvas.
Ipse ego, promerui, spero, peto; quattuor ista
Alcida clavam detraberent manibus.
Magna dedi minimus, majus, Leo maxime, reddas,
Vel quia das cunctis, vel quia promerui.*

Y 2

Ad

*Ad eundem.**Quum dedisset Julium Oratorem de Cosmographia.**Tot tibi quum dederim nostri monumenta laboris,**Largus adhuc nequeo parcere muneribus.**Multa dedi, nunc plura fero tibi, scilicet orbis**Oppida cum populis, æquora cum fluviis.*

Cosmographiam Julii Oratoris eam ipsam esse, quæ sub nomine Æthici Istri, & Antonini Augusti sæpius edita fuit, quæque in quibusdam codicibus Antonio Augustulo, vel Augustali tributa reperitur, in aliis vero Julio Honorio Oratori, sub cujus nomine liber hujuscemodi a Cassiodoro lib. de Divin. Lection. cap. 25. laudatur, res est apud Eruditos satis comperta.

Ad Adrianum Pontificem, qui Leonem X. excepit, unicum Sabæi tetrastichon mihi occurrit scilicet p.741. cujus argumentum Vina Cretica ad ipsum Adrianum missa. Ab Adriano vexatum Sabæum, & in carcerem etiam detrusum, quo fundamento, seu quo teste affirmetur, prorsus ignoro. Equidem Sabæum, qui adeo liberas, & crebras de sua inopia, & sorte mala querimonias effundit, si infortunium hoc præterea passus fuisset, vix credi posset, nec illud deslendi, nec Adriani memoriam vellicandi, locum ullum nancisci valuisse.

Successit Adriano Clemens VII. eique se, suamque sortem Sabæus commendavit his hendecasyllabis p.430.

*Ad Clementem VII. Pont. Max.**Commendo tibi me, meamque sortem,**Et dispendia, quæ tuli, & labores,**Romanæ ob studium eruditionis,**Jussu Principis inclyti Leonis,**Largi, magnanimi, undecunque docti,**Per tot oppida, regna, nationes,**Mul.*

Multo tempore, sumptibus meisque.
 Incassum hæcenus, hæcenus tot orbis
 Disiunctissima regna, barbarosque
 Mores, & populos truces, ferosque
 Lustrarim, peragraverim, sine ullo
 Unquam munere, & absque præmio ullo,
 Ecquis crederet, & quis hoc putaret?
 Et tamen vacua manu recessi
 Post longas ego postulationes,
 Post longam miser esuritionem,
 Quamvis vincere liberalitatem
 Dando fit solitus Leo, o Leo mi.
 Immaturior æstimatione,
 Hinc te proripis orbe derelicto,
 Ut longis lacrymis meos ocellos
 Damnares simul, & simul nocares.
 O mors invida, pessima & sorores!
 Ter mors pessima, & invida sorores!
 Hoc me perdidit, abstulit, peremit.

Bibliothecæ Vaticanæ tristissimas voces ad Clemen-
 tem VII. post Urbis direptionem effert his Elegis
 pag. 846.

Quæ verba posset dicere Bibliotheca Vaticana ad Clementem VII.

Pont. Max. post direptam urbem.

Ne timeas, quamvis veniam vultu ipsa timenda,
 Pauperie & gravior, turpior atque fame.
 Thesiphone horridior, Tityo mutilatior, alga
 Vilior, atque olido sulphure pallidior.
 Quid monstrum miraris? adhuc miraris, & usque,
 Non ego sum aspectu digna, sed auxilio.
 Ne me forte putes Stygiis venisse tenebris,
 Aut a Cimeriis, Antipodumque solo.
 Non externa ego sum, nec barbara, dicere nomen
 Erubeo, & quo plus me petis, erubeo.
 Sed postquam ipsa meo infandissima crimine non sum,
 Illa ego Pontificum Bibliotheca vocor.

Non

Non dicam illa tua, hoc ne te te exulceret, hoc ne
 Ora verecundis sint tua tincta rosas.
 Dicere non possum, quod sim tua, visere quam non
 Hactenus ipse velis, Septime, nec pateris.
 Hinc gemo, & illacrymor, quod sim tibi vilior alga,
 Sordidior curno, Thesiphone horridior.
 Hac ratione tuum petiit ipsa coacta tribunal,
 Quamvis erubeam tam misera, & lacera.
 Ne me ne extrudas, oculos ne averte, nec aures,
 Se præstare pium Principis officium est.
 Ad te Pastorem tanti gregis illa recurro
 Una ovis, ad te illum Pontificem, & Medicum.
 Quæ distenta habui spumanti jam ubera lacte,
 Nec deerat cunctis lac mihi temporibus.
 Quo innumeros pavi illa agnos, multumque premebant
 Cascon inde alii, post alii, atque alii.
 Pastores, servique etiam, tunc una vocabar,
 Cedere cui possent & Latia, & Danaæ.
 Atque alie pecudes, nec non & ovilia cuncta,
 Et per me est celebrii Tityrus, & Lycidas.
 Per me formosæ Galatea, Amaryllis habentur,
 Pastoresque alii, Nymphae alie, atque alie.
 His ego præbebam milesia vellera, lunam
 Quis potuit captam pellicere Endymion?
 Nunc misera, infelix, nec lac, nec lana, nec agni
 Sunt mihi; vix Gallus hic strepit, aut Corydon.
 Ubra nunc palmis frustra exsiccata premuntur,
 Me nudam nuda hæc vix tegit ossa cutis.
 Ossibus ossa hærent vix, vulnera, & ulcera cribrum
 Me fecere; mihi quod superest misera,
 Corrofit scabies, formicarum ut magis antrum
 Heu videar, me me ut noscere vix valeam.
 Semianimis, moribunda, pudens te postulo, Clemens,
 Te precor, o Pastor, te medicumque peto.
 Pastor ovem miseratus, opem, mitissime Clemens,
 Porge machaoniam (concido) porge manum.
 Depereo, succurre, potes, debesque, quid inde
 Si affectam, Clemens, me mihi restituis?

Pa-

*Pastores tibi constituent solemnibus aris
 Sacra, tuamque manum, & nomen ad astra ferent.
 Gloria major erit, quam si deviceris Indos,
 Hi sunt, qui laudem dantque, adimuntque viris.
 Quod si chara tibi curæ est Florentia, sique
 Est extructa tua Bibliotheca manu.
 Ne tibi sordefcat mundi Regina, Tonantis
 Æmula, quæ implevit æthera Caesaribus.
 Et quæ Pontifices tot misit ad astra beatos
 Roma, hominum, ac Superum, Pontificumque thronus.
 Plura ego dixissem, cor & vox desit, imago hæc
 Tam miseranda tibi, quæ taceo, referat.*

A Paulo III. Clementis successore sua sibi adaugeri stipendia magnopere cupiens Sabæus, Epigramma habet ad Echo pag. 543. in quo dua hæc Disticha habentur inter alia :

*Nostra ne adaugeri exposcam stipendia Paulum?
 Paulum. Num lætus, dic, dabit illa? Dabit.
 Ergo ego, tuque audax Dominum Dea adibimus? Imus.
 Di faxint, compos sum, præcor, aris. Eris.*

Paulum laudat, quod Censores in Urbem evocaverit ad gregis vitia emendanda p. 748. & p. 844. confert Paulum Pontificem cum Paulo Apostolo hoc Epigrammate :

*Ad Paulum III. Pont. Max.
 Diſta mihi numeris ad te Converso Pauli,
 Paule, orbis columen, prodigiosa venis.
 Convenit ista dies tibi jam celebrata quotannis,
 At athleta magis, rhetor & alta tonans.
 Nomine namque esſis, patria, virtute, labore,
 Officio, & gemini religionis pares.
 Differtis, quod Paulus inops, tu dives abundans,
 Ut pascas pastor jure teneris oves.
 Dissolvi optabat Paulus, tu vivere, quod sis,
 Utilis ad pacem Regibus, & populis.*

Quam-

Quinque Epigrammata in Pauli Urnam titulo diu destitutam, quanti Sabæus faceret egregias hujus Pontificis, quem aliquando tamen sugillavit, virtutes, ostendunt, nam ea omnia in eundem fere sensum recidunt, qui hujusmodi est in secundo Epigrammate pag. 573.

Ad Hospitem, quum diu fuisset urna sine titulo.

*Quod rudis, & muta est urna hæc, miraberis, hospes,
Multorum lacrymis quam maduisse vides.*

*Non opus huic cultu est, plecto nec nomine, nam pax
Italiæ, & virtus ornat, & hanc loquitur.*

Postremum ex illis quinque ira se habet pag. 574.

Ad eundem.

Si nescis tumultus quid contegat iste, viator,

Lucretius hic & tota dicat in Urbe dolor.

Si nequeunt lucreti lucretus, dolor atque dolore

Præ nimio in casu labra aperire truci,

Saltem pax Latii referat, vulgentque sepulchrum

Instauratæ Urbis mœnia, templa, viæ.

Delato ad Julium III. post Pauli mortem Pontificatu, ad eundem familiarem sibi nœniam iteratis vicibus detulit Sabæus, preces nimirum, & querimonias, quas tamen gratiarum actionibus aliquando alternavit. Subsequens Epigramma legitur pag. 513.

Ad Julium III. Pont. Max.

In te speravi, fac ne confundar in ævum,

Julii, & egestatis pondere me exonera.

Porge aurem, accelera, meque eripe ab hoste sequaci,

Libera ab ærumnis, retibus, insidiis.

Esto & apud te met Dominum mihi, maxime Julii,

Consugique domus, præsidiumque meum.

Tuque meæ vires, portus, spes una, salusque,

Dulce tuum ob nomen, numen & esto meum.

Inque tuas commendo manus, Julii optime princeps,

Spiritus, & hos canos, plectra, lyram, calamum.

Ad

Ad eundem. pag. 515.

Sub tot Pontificum senui, nam quinque fuerunt
 Servitio, irrepsit nix capiti ecce meo.
 Semper inops, & nunc misero mendicior Iro,
 Inque dies pejor fit mea conditio.
 Sperabam sub, te Juli, discere, bonorem
 Sortiri, & canis excutere ipse nivem
 Pro spe despero, pro & bonore inbonorus, & æger
 Vivo ego, si vita est frigore membra mori.
 Nam mihi ligna negas inopique, senique
 Non dicam vati, sed mage vaticulo.
 Ante focum studeo, comedo, bibo, carmina pango,
 Lucem, animamque negas, si mihi ligna neget.

Ad eundem. pag. 516.

Donasti, unde meam possum traducere vitam,
 Laßula, & ægra, & inops, quæ reparanda fuit:
 Et quod debebant alii longo ordine nobis
 Pontifices, solvis, maxime Pontificum.
 Quid tibi retribuam, Juli, nisi carmina, & odas,
 Hæc sunt principibus gloria, splendor, bonos.
 Aurea dona duces dent, Reges gemmea, utrique
 Nec majora istis, nec meliora dabunt.

Ad eundem. pag. 780.

Ut te conspicerem tuas petivi
 Valvas, optime Juli, pulso, & insto
 Admitti, ut venerer, tuosque adorem
 Vultus, osculer & pedes beatos.
 Custodes aditum negant, repellunt,
 Quod non sit mihi abolla nuptialis.
 Dico sum Domini e domo, & Poeta
 Notus Pontifici, negant, repellunt.
 Si nostro e numero fores, loquuntur,
 Esses veste nitente purpurismo,
 Esses sericea toga togatus,
 Et non simplici veste militari,
 In vili sagulo, velut viator.

P. II.

Z

Tunc

*Tunc respondeo, Julius negavit
 Vestem sericeam, atque purpurissimum,
 Quamvis sim suus, & suus Poeta.
 Tunc illi, merito tibi negavit,
 Quum tu sis rudis, & malus Poeta;
 Noster ecce Tripbon, nitet, renidet
 Olofericas, & beatus ostro,
 Quod Rhetor bonus, & bonus Poeta est.
 Tunc ego tacitus pudore tinctus,
 Confususque recedo, murmuroque
 In tuas (fateor) manus avaras
 Mecum, verum aliis usque liberales.
 Qui, quod sim lacer, & brevis lacerna,
 Non sum de numero beatiore,
 Hinc dicor rudis, & malus Poeta.*

Marcellum II. post obitum Julii Pontificatu paucis tantummodo diebus positum, Sabæus extinctum multis versibus decantavit, idque etiam præstiterat, antequam ille Pontificatum iniret. Plura etiam sunt Epigrammata, quæ Poetas a Marcello Cervino Cardinali, humanioribus literis excoltissimo, in unum collectos, ac evulgatos gratulantur. Unum & alterum, quæ extant pag. 560. ex his recitabo:

*In laudem Marcelli Cervini Card.
 Unde novi, & suaves Permeſſo e ſumme cygni.
 Ad Tybrim veniunt? Najades urbis amant.
 Quid recinunt? prædulce melos, variumque, novumque,
 Quo nec Pympliades cultius ore canunt.
 Quis nam jucundis cauſa ut concentibus iſte,
 Tuſcus olor, Tuſcæ nobilitentur aquæ.
 Phœbeas audite & aves, audite canoras,
 Mirifice oblectant dulciter, atque juvant.
 Pro eodem.
 Vivite ſecuri vates, & ludite paſſim
 Exrupti tenebris, carcere, & interitu.*

Et

*Et canite Hetruscum Alciden, qui eduxit ab orco,
 Vosque urbi addixit, pavit, & excoluit.
 Nil refert, si non aequatis carmine factum,
 Virtuti ingenuæ est promeruisse satis.*

Suam autem egestatem Marcello exponit Sabæus his hendecasyllabis pag. 548.

Ad Marcellum Cervinum Card.

*Quæris, quid faciat Sabæus ille
 Infelix, miserabilis, senexque,
 Tam, Marcelle, tibi sacratus uni,
 Quam Musis, & Apollini, & Minervæ.
 Hoc istud facit, & nihil nisi istud,
 Suspirat, gemit, atque lacrymatur,
 Incusat genium suum, suamque
 Sortem, tempora, Principes, Deosque.
 Quod sub Pontificum jugo tot annis
 Egentissimus Irus, Irus, inquam,
 Vixit, vivere si potest vocari hoc.
 Inter divitias egenus, inter
 Tam magnos minimus cliens patronos,
 Inter tot procuresque purpuratos
 Pullatus senuit, lacer, jacensque.
 Hoc, Marcelle, potes pati Poetam,
 Quamvis sit malus, est senex, tuusque,
 Sic sic stare, jacere, conquerique?*

Adfunt tandem aliquot Epigrammata ad Paulum III. Marcelli successorem, qui septem Pontificum, penes quos officium gessisse constat Sabæum Vaticanæ Bibliothecæ Custodis, seriem concludit. Marcelli, & Pauli elogium Epigramma subsequens complectitur pag. 586.

Ad Paulum III. Pont. Max.

*Quem vivum toto Marcellum pectore amasti,
 Illius ossa & amas, optime Patre pater.*

L 2

Vir.

*Virtutem cecini, & mores, luxique sepultum,
 Et raptum injusto funere tam celeri.
 Gentibus, & populis gratum, tum Regibus, & Div,
 Orbem quod dignus qui moderetur erat.
 Ni successisses sancto sanctissimus illi,
 Doctior & docto, pervigil & vigili.
 Et mage magnificus splendens generosior illo,
 Ense, vel igne volens pro pietate mori.
 Turbidus iret adhuc lacrymis Tiberinus amaris,
 Rura, & ovile, & adhuc lacrymarentur oves.*

Quid autem Bibliotheca Vaticana sperare posset a Paulo, Sabæus hoc declarat tetrasticho, pag. 591.

Ad Paulum III. Pont. Max.

*Sit tuus adventus, Pater optime maxime, felix,
 Plaudat & aspectu Bibliotheca tuo.
 Quid non sperandum sancto sub Principe, sub quo
 Justitia, & virtus militat, & pietas?*

Post Romanos Pontifices, & Francorum Reges, de quibus dictum est usque modo, non alios Sabæus no-
 liter studiosius excoluit, quam Gallos Cardinales; in-
 ter quos ea tempestate quum eminent Joannes Bella-
 jus, & Carolus Lotharingus, genere, & literis conspi-
 cui, in horum præsertim clientelam Sabæus se dedit.
 Bellajum commendat Jovius in Elogiis, scilicet ad cal-
 cem, ubi de obtinendis viventium doctorum Virorum
 imaginibus sollicitus, eosque recensens, quorum ope
 munus illud alienæ benignitatis expectaret, hæc ha-
 bet de ipso: *Aspirabit utique nobili voto luculenter Joan-
 nes Bellajus, præclaro vetustæ familiæ, ac insita virtu-
 tis nomine Parisiorum Antistes, & bis merita purpura
 Senator amplissimus. Quid enim amico veteri, crudita
 præsertim, ideoque minimi sumptus munera cupienti non*
tri-

tribuet? *Qui perenni studio Græcis, atque Latinis Musis
sacra facit, qui ingenia fovet, productaque in regiam
eruditi Principis liberalitate, protinus exornanda in luce
constituit.*

Epigramma, quo de Bellaii ab Urbe discessu Sabæus conqueritur, eximias ejus dotes extollit. Est autem hujusmodi, pag. 452.

Ad Henricum Regem Gallia.

In discessu ab Urbe Jo. Belleii Card. Parisini.

*Magnanime o Princeps, ecquid peccavimus in te?
Supplicio insones plectimur ecce gravi.
Eripuisti illum, quem dicere possumus urbis
Letitiam, laudem, lumen; & illecebras.
Et desolatæ, morientis Pallados & spem;
Hinc Musæ hæc clamant, Romaque mæsta simul:
Quo tu, Mæcenat, properans te proripis? & tu
Quid rapis e nostro, Rex, Phætona polo?
Belleum fuerat melius non noscere nobis,
Quam sperasse diu, post caruisse brevi.*

Bellaii in pangendis carminibus felicitatem Sabæus in hunc modum commendat pag. 527.

Ad Joannem Belleum Card. Parisinum.

*Somnia sint testes, belli & simulacra jocosæ,
Quam te Phæbus amat, Pieridesque favent.
Pangere non poterat per summa negotia carmen,
In somno, & lusu carmina culta facis.
Contigit Hesiodo per somnia inesse poetam,
Per somnum vates Amphiaræus erat.
Hi curis vacui fuerant, tu vinculus abenis
Curarum nodis, retibus, & laqueis.*

Ad eundem.

*Jane cubans recinis, ludens & carmina ludis,
Ecquid quum studeas, & vigilabis, erit?*

At

At longe frequentius efuritionem suam Bellajo aperit, quin libere etiam eidem impropere, ut sublequentia Epigrammata ostendunt.

Ad Joannem Belleum Card. Parisinum. pag. 475.

*A te si nequeo verbum extorquere nec unum,
Num sperare tuas posse licebit opes?
Tu mihi dicebas, non unius esse diem,
Quam tecum sanxi fidus amicitiam.
Jurassem eternam, colui quam pectore toto,
Tunc tuus, ut visum est, mutuus ardor erat.
Intepuit, quia fectus erat, vel nullus, & erro,
Quem non cepissent, frons tua, verba, domus?*

Ad eundem. pag. 490.

*Muse ibant tristes, & ego tunc tristior illis,
Dudum explorata Principum avaritia.
Quid faciam? nix alba caput jam tinxit, egestas
Me premit, o miserum terque, quaterque senem.
Invalidus nequeo duos versare ligones,
Marcesco, & vires consenuere meae.
Erubeo pulsare fores, & dicere, egenti
Porgite, mendicis non ego natus avis.
Quamvis ille meas & oves absumpsit, & agnos
Pontificum vere maximus ore Leo.
Tu, Bellæ, inquam, flos fragrantissimus inter
Lilia cana nitens, purpuræque rosas,
Spera, inquis, vos & ne desperate Camæne,
Gallorum larga nobilitate Ducis.
Nam spes, & ratio studiorum in Principe nostro,
Qui decus est Phœbi, Pieridumque chori.
Spero equidem, dixi, inspiciens quod lilia ubique
Cana, & apud Gallos aurea facta nitent.*

Ad eundem. pag. 531.

*Postquam infelicem mater me fudit in auras,
Usque novercata est fors mea dura mihi.
E patria ejecit puerum, puerilia colla
Subjecitque iugo continuata gravi.*

Pau-

*Pauper, egens, & inops semper, nunc fractus ab ævo
 Sum mage, quam fuerim pauper, egens, & inops.
 Purpurei Patres, Reges, summique Monarchæ,
 Bis duo Pontifices verba dedere mihi.
 Si Bellæ etiam, qui tot promissa dedisti,
 Illudes & tu, Cæsarianus ero.
 Succendam & libros, supra caput atque sororum,
 Et Phœbi infringam plectra, lyram, calamos.*

Ad eundem. pag. 552.

*Res non bella fuit, quod tu, Bellæ, negasti
 Vina seni; dices non mea culpa fuit.
 Errarunt servi; quin tu, qui dicere servis
 Debueras, vati fundite vina meo.
 Non tantum bona vina seni, sed larga, penumque,
 Quæ mihi pica canit garrula dulce melos.
 Respondes, causa est oblivio, pejus oberras,
 Namque amor, atque fides immemor esse nequit.
 Peccatum emenda majori senore, vatem
 Nam jugulare senem est, vina negare seni.*

Non desunt tamen Epigrammata, quibus Sabæus a
 Bellajo munere aliquo affectus, eidem gratias agit:

Ad Joannem Belleum Card. Parisinum. pag. 450.

*Non debes, nostræ tibi si placuere camœnæ;
 Gratia summa mihi est, quod placuere tibi.
 Ipse minus debes, si displicuere; relatum
 Nam tibi sat damni, quum tibi displiceant.
 Tu tamen bis, atque bis donas, ut munere discant,
 Displicuisse minus, vel placuisse magis.*

Ad eundem. pag. 509.

*Tempore, quo Reges æterna in sæcula Regi
 Mystica dona ferunt ex Oriente sopbi,
 Tempore eodem aurum Fausto, Bellæ, dedisti
 Munus honorificum, conveniensque tibi.
 Nam sceptro es dignus, testantur plurima, sed plus
 Aurea dona tua hæc, regia & ista diæ.*

Ad

Ad Carolum Cardinalem Lotharingum bina afferam Sabæi hendecasyllaba, precibus, & questibus de more referta, subdanique octastichon, in quo præter modum in eundem exandescit,

Ad Carolum Lotbarin. Cardin. pag. 517.

*Ad te, Carole, temporum, & senatus
Expectatio summa purpurati,
Lubentes veniunt mei labores,
Immo delitæ meæ, & lepores,
Tanquam nuntia, & obsides meæ in te
Observantiæ, amoris intimique.
Ut te iudice judicentur, an sint
Digni accedere Regios penates,
Regisque intuitu frui, osculari
Inviçtasque manus, pios pedesque.
Quod si duxeris esse, mi Palemon,
Dignos Principe Principum, Ducumque,
Ut Bellajus undecunque doctus,
Summi & judicii elegans Poeta,
Virtutum & resonans cbelys tuarum
Sentit, judicat, approbatque, & instat.
Henrici auspiciis, favore, jussu
Ex hoc carcere, gentium in theatrum
Ibunt, ut referant ubique grates
Henrico, & tibi, militentque Regi.
Pulcrum cernere Principes, Tetrarchas,
Reges regia signa tot sequentes,
Regi & plaudere Rhetores, Poetas,
Regi & cœlicolas favere nostro.
Hec sunt quæ dico, dedico, atque sacro
Henrico, minimus licet Poeta,
Tanto inquam minimus Poeta, quanto
Rex est maximus, optimusque Regum.*

Ad eundem. pag. 525.

*Jucundissime Principum meorum,
Qui meis retinent locum in medullis,*

Bel-

*Bellum excipio meum, tuumque,
 Si quid promerui, velis libenter,
 Si non promerui, rogo, obsecroque,
 Communi Domino, tuoque Regi
 Integerrimo, & optimo, atque dio
 Commendare meæ dies senectæ,
 Illos ut foveat favore, & ære,
 Donec vixero, & interim precabor,
 Felici auspice vivat, & triumphet,
 Victis hostibus improbis, superbis.
 Dices, non satis est, Deos precari.
 Urgebo numeris potentibusque,
 Tempia, altaria thure concremabo.
 Num parvi, hæc tibi præmia æstimantur
 Pro victu senis unius minuti?
 Hæc placant Superos, placentque eisdem.
 Si non extiterint Dei, Deæque,
 Hæc sunt, quæ faciunt Deos, Deasque
 Thura, & carmina, & obsecrationes.*

Ad Deum de eodem. pag. 591.

*Iuste hominum iudex Deus aspice, denique vindex
 Respice, quam frustra pulso, peto, & repeto.
 Quos Carolus debet nummos, sum pauper, egensque,
 Aes nequeo a magno Principe habere meum.
 Nescio quid faciam, fac tu, potes ipse potentem
 Flectere, ne dicam cogere, coge tamen.
 Postquam, quem numeris cecini, & super astra locavi,
 Deturbare astris cogor, & a numeris.*

Item ad Cardinales Matifconensem, Turnonium,
 Arminiacum exstant Sabæi Epigrammata, quæ missa
 facientes, unum tantum, antequam e Galliis exceda-
 mus, hic subjungimus utique facietum, & tersum, p. 485.

Ad Gulielmum Pont. Megalonensem.

*Ante fores clausas binis nec profuit boris,
 Jejunos, mensam quum popularis, eram.*

P. II.

A a

Allo-

*Alloquor hunc, illum; dixere, morare parumper,
 Jam Gulielmus adest. Non venis, inde abii.
 Nescio quis nostrum in culpa, expectare molestum.
 Damnosum Siculas deferuisse dapes.
 Dixero si verum, parcas, peccavimus ambo,
 Attamen est venia dignus uterque sua.
 Ille ego discedens, tardans reus ipse fuisti,
 Sed tuus utilior, quam meus error, erat.*

Epigrammata Sabzi ad Italos Cardinales longe pauciora sunt, quam ad Gallos, & ex illis quinque dumtaxat recitabo:

Epitaph. Card. Aleandri. pag. 424.

*Cur tumulo non inscripsi mea nomina quaris,
 Ingratus quum sit, mutus & iste lapis?
 Qualis eram dicent, & quis, pleno ore Quirites,
 Si magis vis, dicent, Græcus, Arabs, Solymus.*

Ad Alexand. Farnes. Card. pag. 580.

*Quum canerem Pauli Princeps te die nepotem,
 Inter thermarum diruta saxa sedens,
 Sæpe mei rediens ad me sermonis imago
 Illudit verbis per mea verba meis.
 Dicebam quis tu? dixit, Tu, forsitan alter
 Faustus, an alter ego? Vox referebat, Ego.
 Dic ubi sis? Ubi sis, mihi respondebat imago,
 Fac, ut te inveniam, rettulit hæc, Veniam.
 Expecto, sed frustra, iterum loquor, illa loquuta est,
 Quæque ego dicebam, reddidit illa eadem.
 Antra intro, nullum vidi, delusus ab Echo
 Erubui, & risi, sed magis erubui.
 Tunc magis accendor cantu te extollere, cernens,
 Quod te cognoscunt concava saxa, & amant.*

Epitaph. Antonii Pucci Card. pag. 529.

*Huc veniens bospes miraberis, unde sepulcrum
 Singultu hoc resonet, luctibus & madeat.
 Hic Pucci ossa jacent Antoni condita, circum
 Tybris, & Aonides flent, Charitesque simul.*

Vir.

*Virtutem, ingenium excellens, moresque benignos
Discito ab insuetis questibus, & lacrymis.*

Ad Petrum Bembum Card. p. 544.

*Et tu, Bembe, veni virtute vocatus ad ostrum,
Præmia & emeriti larga laboris habe.
Sudaſti, requieſce inter ſacra lilia, & illum
Hic cane, qui facit hæc otia tuta tibi.
Nam Paulo auratum debes pleſtrumque, tyrannusque,
Quod te inter mundi lumina tanta locat.
Fortunate ſenex, merito tibi contigit uni
Laurea pro numeris, purpura pro hiſtoriis.*

Ad Muſas pro Bernardino Scotto Card. p. 590.

*Muſæ inopes lacerae, & triſtes attollite vultum,
Sat vos pauperies conficit, atque jugum.
Illuxit mihi ſtella favens, nova, clara, futura
Promittens vitæ tempora læta mea.
Si venient, eritis dites, ſin fata negabunt,
Parca brevi expellet pauperiem, atque ſitim.*

Denique Epigramma ad Card. Campegium telæ judiciaræ moras, & ambages taxat pag. 491.

Ad Alexand. Card. Campegium.

*Non niſi juſta velim; dices, petis ardua; quæ ſunt?
Judicii telam ſolvere poſſe brevi.
Cauſidici, & Scriba, & Judex, & Curia, clamant,
Immo ipſe exclamo, differor, & ſpolior.
Ingeminabo etiam, excorior vivensque, vidensque,
Sentiat ut tellus omnis, & Antipodes.
Telam hanc Penelope, telam hanc contexit Aragne,
Non eſt judicii tela, ſed exiti.*

Haſtenus de præcipuis Sabæi Mæcœnatibus; Poetas ſui temporis, quos ipſe chariores habuit, plura Epigrammata indicant. Quatuor tantum afferemus.

Ad Angelum Claretum. pag. 407.

*Inter amicitiae dulcissima vincula nostrae,
 Angele, stas princeps nobiliore loco.
 Hoc tua vult virtus, & digni nomine mores,
 Et tua inaurato pectine blanda chelys.
 Dux mihi primus eras dulces Heliconi ad undas,
 Quum me torqueret ambitiosa sitis.
 Sub Styge si idolum, circum ossa errabit, & umbra,
 Usque inerunt memores illud, & illa, tui.*

Ad Joannem Cottam. pag. 500.

*Pari non parva mea quondam, mi Cotta, salutis,
 Cotta, sodalitatii primaque cura mei.
 In studia o quoties ego te, lususque vocavi,
 Has scio jam nugas perplacuisse tibi.
 Non tamen absisto, quin toto pectore amem te,
 Tam tuus & nunc sum, quam tuus ante fui.
 Nec locus, aut tempus tanto me abjunget amore,
 Quin & amem, & cupiam dimidium usque mei.*

De Romulo Amafeo, & Fausto Sabao. pag. 513.

*Romulus, & Faustus socii, Phœbique sequaces
 Junguntur nodis ex adamante simul.
 Hoc antiquus amor, tum candida vita, novemque
 Innectunt Musæ vinculum amicitiae.
 Ambo senes, ambo nati infelicibus annis,
 Principe sub docto, & doctus uterque jacet.
 Cogitur esurie hic, hic ne laceretur, abire,
 Faustus e patria, Romulus urbe sua.*

Ad Jo. Franc. Stoaam, & Peregr. Longulum. pag. 420.

*Longum iter, & series annorum longior, ingens
 Pondus, & assidui bibliotheca jugi,
 Eripiunt optata mea solatia vitæ,
 Cbara sodalitatii stringere colla mei.
 Te, Stoa, pari animi, sed pari quam maxima nostri,
 Te, Peregrine, animæ portio summa mea:
 Vos equidem tantum cumulatîs laudibus orno,
 Quantum vos patriam moribus, & studiis.*

At

*At quia non licuit, nec Di assensere petenti,
Visu horum, o numeri, me saturare satis,
Dicite vos saltem, nam me novistis, utrumque
Quam cupiam ardens, quam reverenter amem.*

Amicorum suorum, qui Romæ aderant, nomina colligit Sabæus in Epigrammate, quo illos ad diem natalis sui celebrandum invitat p. 419.

Ad Amicos.

*Cras meus, o cbari, vitæ natalis ocelli,
Annus adveniet, vos properate simul.
Gloria Vida Padi, tuque o scrutator olympi,
Davidicæ interpres Eugubianæ lyre.
Tuque, Alphonse, Deum cui cura est templa tueri,
Cæsar, & o Comi Pastor amate novi.
Si potes, o Bloss, secreta relinquere Pauli,
Pectore tuque, Niger, candidiore veni.
Tu quoque, Ferrari, & tu, Majorane, venite,
Portio uterque animi, tuque, Gulielme, mei.
Lingue utriusque, aderunt vina & sacunda, disertos,
Quæ vos invitans differuisse viros.
Vos afferte sales, dictæria, scommata, risus,
Danda voluptati est crassina tota dies.
Et quia præ foribus stat mors inopina, bibendum est,
Occupet impotos ne via longa necis.*

Hujus Epigrammatis clausula non unus est locus, qui Sabæo liberiores aliquando lusus, parumque religiosos sales placuisse demonstrat. Liber quartus, quem, ut dixi, de Amoribus inscripsit, mollibus, obicænisque jocis redundat. Tres alios de Amoribus libros a se compositos memorat ipse, & amissos deplorat his hendecasyllabis pag. 840.

*Deploratio trium librorum de Amoribus amissorum.
Num dulces patiar latere flammæ,
Et nostros penitus perire amores,
Quos lusi in tenera canens juvenia,*

Et

*Et nunc in gelida fleo senecta,
 Ereptos mihi fraude, furto, & arte?
 Nam quum me Leo maximus Sacerdos
 Vellet mittere nuntium rigentis
 Ad Reges Aquilonis, & Tetrarchas,
 Ut libros redimam situ, & tenebris,
 Musasque in Latium exules reducam;
 Tres libros Epigrammatum meorum,
 Si minus lepidos, tamen facetos,
 Aspersos lacrymis, doloribusque,
 Verum dulcibus, immerentibusque,
 Non scriptos calamo, sed & sagittis,
 Fuso & sanguine vulnerum meorum,
 Commendans socio meo reliqui,
 Tanquam delitias, meosque ocellos.
 Post longum spatium reversus Urbem
 Cum multis spoliis, velut triumphans,
 Quos liqui socio libros requiro;
 Tunc impalluit, & tacet poeta,
 Admirans repeto meos libellos,
 Audacter negat, impudensque jurat,
 Non tres non habuisse, sed nec unum.
 Impugno magis, ille plus negabat,
 Clamans clamito, rursus, atque rursus
 Impugno, tono, redde mihi, latro,
 Libros non modo, sed meos ocellos.
 Tunc me somnia somniasse dicit.
 In jus meque vocare comminatur.
 Infelix quid agam? sinam ne flammam,
 Et meos penitus perire amores?
 Saltem reliquæ furentis ignis,
 Quæ duratis adhuc meis medullis,
 Extra erumpite languide o favillæ.
 Nil præter cinerem mihi relictum,
 Sopitum cinerem, aridum, & sepultum.
 Consultissime Apollo, consulas mi.
 Tu vero Arcitenens puer rapinam
 Communem face vindica, & sagittis.*

Vor

*Vos o Pierides piæ, & pudicæ,
 Quod vos prostituit malus poeta,
 Redde, dicite, quos rapit libellos,
 Furta non faciunt bonum poetam,
 Nam rarissimus est bonus poeta:
 Quaque ex arbore non dolatur Hermes,
 Nec ex floribus omnibus, vel herbis,
 Mella nectaræ legunt melisse.*

Ea Sabæi in obscœnis argumentis tractandis licentia clarius se prodit in iis Epigrammatis, quæ five ex Græcæ Anthologiæ, five ex Ovidianæ Metamorphoseos turbidis fontibus in libros suos derivavit. Poeticarum siquidem fabularum thesaurus, Francofurti editus, pictaque Poesis Ovidiana inscriptus, magna ex parte constat Fausti Sabæi Brixiani carminibus. Inter Græcæ vero Anthologiæ Interpretes Sabæus etiam connumeratur, quantaque cum laude vires suas expertus sit in ea Sparta adornanda, ii facile cognoscent, qui ad aliquot Græca Epigrammata interpretationem Sabæi cum aliorum doctorum Virorum interpretationibus comparabunt.

Fausti facilitatem in scribendo, secundo plausu, dum viveret, exceptam fuisse, testatur Scaliger Poetic. l. 6. at dum subdit, scholas tamen sapere illam juniorum, id de Fausto nostro, non est, cur existimemus, jure posse affirmari. Ut ea Fausti facilitas Lectori magis, magisque commendetur, placet ultimoloco afferre trastichon, quod mihi hæc scribenti occurrit:

De M. Juventio Talpa. pag. 267.

*Talpa ubi post victos Corfos perlegit honores,
 Urbs sibi quos dederat, lætitia occubuit.
 Quid si vicisset Pænos, Gallosque, Strybasque?
 Credibile est, illum bis voluisse mori.*

Sile-

Silere nolo, Sabæi interpretationem ad hederæ fabulam allegari, & recitari in Adnotationibus ad Opera Garcix Lassi, ejus inquam præstantissimi Hispani Poetæ, qui teste Jovio ad Elogiorum calcem, Horatiana suavitate Odas scribere solitus erat.

De Arnobii Disputationibus, Fausti Sabæi studio, in lucem eductis, unde reliquæ omnes Editiones postea propagatæ sunt, ejusque impensa impressis Romæ an. 1552. apud Franciscum Priscianensem Florentinum, alibi redibit sermo. Id solum hoc loco adnotamus, rem satis miram videri, hominem, cui nil frequentius in ore, quam *languco*, & *esurio*, sumptus ad amplam eam, nitidamque Editionem suppeditare potuisse.

III. Jovitæ Rapicii Poësis eo castior, ac sanctior, quo liberior, ac procacior censenda est illa Fausti Sabæi. Vidimus enim, dum in Oratoriis versaremur, Jovitam nostrum, præter libros de Oratorio numero, metricam Paraphrasin etiam in Davidicos Psalmos elucubrasse, ac Reginaldo Polo una cum libris illis nuncupasse. Sapientissimum hunc Cardinalem M. Antonio Flaminio auctorem fuisse, ut ad sacrum illud argumentum eam, qua in pangendis carminibus excellebat, peritiam converteret, a Thuano Histor. Tom. 1. l. 8. proditum reperimus; indeque conjectabit quispiam, & Rapicium eidem Cardinali addictissimum, ut ejus genio gratificaretur, illi ipsi Spartæ manus admovisse. Quæ res quam feliciter ei cesserit, Lector ipse dijudicabit ex Paraphrasi in unum, & alterum Psalmum, quam ejus oculis subjiciam; adjungamque in eos ipsos Psalmos
tam

tam M. Antonii Flaminii, quam Georgii Buchanani Paraphrases: qua ex comparatione si elegantissimis illis Interpretibus Jovita noster palmam minime præripuisse censeatur, fatebitur tamen Lector, hujus Interpretationem dignam esse, quæ minime delitescat (quod illi, nescio quo fato, contigit) sed quæ una cum duabus illis jure, & merito ob styli candorem celeberrimis doctorum Virorum amorem, laudescque assequatur.

Psalmus XXII. Dominus regit me &c.

*Quo mihi curas toties inanes
Sumo? quid tristi metuens senectæ
Erro, & in cassum meliora fessus
Pascua quæro?*

*Me meus pascet Dominus, nec ultra
Deerit: aprico dabit ille campo
Ludere, intactas ubi vagus herbas
Irrigat amnis.*

*Nec greges tantum canis æstuosi
Carpere extenta potuere luce
Ros, brevi quantum tacitæ reponit
Noctis in umbra.*

*Me mihi reddet Dominus, nec ultra
Limitem rectum feret evagari,
Calle, sed dextro per amœna ducet
Strata viarum.*

*Noctæ si densas nymorum per umbras
Valle in obscura sit iter, feræque &
Monstra præsentem mihi comminensur
Undique mortem,*

*Me tuo pastor baculo tueris,
Virga me reddit tua cautioem,
Ulla nō duri facies laboris
Mi nova surgat.*

P. II.

B b

Quid,

*Quid, quod & mensam, atque epulas parasti
Regum: ut unguentis bene delibutus,
Aureis ducam pateris falerni*

Nectaris undam?

*Spelet ut letum malus: & retorto
Hospis avertens se oculo, dolores
Sentiat veros, nec inane vulnus*

Pectoris egri.

*Tu manum semper bonus invocanti
Porriges: ut mox super astra tecum
Des mihi clemens habitare olympi
Cæcula templa.*

M. Antonii Flamini Paraph. in eundem Psalmum.

*Rex cœlitum est pastor meus,
Nihil boni deeris mihi,
Uberrimis in pascuis,
Amœna propter flumina
Me spiritus sanctissimi
Aura beata recreat,
Dulcique mentem pabula
Nutrit suæ scientiæ.
Miserrimus animus meus
Dum longius abis a Deo,
Erraverat procul a via,
Quæ ducit ad cœlestium
Oras beatas, at Deus
Meæ misertus miseriæ,
Benignitate maxima
Quæstuit illum ultro, & sui
Reduxit ad caulas gregis.
Si sola solus per loca
Inermis eam, ubi plurima
Imago mortis territat,
Interritus perrexero,
Custode securus Deo.
Me virga, pastor optime,
Coercet errantem tua,*

Ne

Ne gravius offender cadens,
 Tuo bacillo fulcior
 Me mensa roborat tua,
 Me dulcis exbilarat calix
 Tuus, oleo foveor tuo.
 Nec me, pater dulcissime,
 Per has inexplicabiles
 Vias euntem deseres
 Unquam, sed ad tuam domum
 Duces, ubi vita fruatur,
 Et sempiterno gaudio.

Georgii Buchanani Paraph. in eundem Psalmum.

Quid frustra rabidi me petitis canes?
 Livor propositum cur premis improbum?
 Sicut pastor ovem, me Dominus regit:
 Nil deerit penitus mibi.
 Per campi viridis mitia pabula,
 Quæ veris teneri pingit amœnitas,
 Nunc pascor placide, nunc saturum latus
 Fessus molliter explico.
 Puræ rivus aquæ leniter adstrepens
 Membris restituit robora languidis,
 Et blando recreat fomite spiritus
 Solis sub face torrida.
 Saltus quum peteret mens vaga devios
 Errorum teneras illecebras sequens,
 Retraxit miserans denuo me bonus
 Pastor justitiæ in viam.
 Nec si per trepidas lætifica manu
 Intentet tenebras mors mibi vulnera,
 Formidem duce te pergere: me pedo
 Securum facies tuo.
 Tu mensas epulis accumulas, merum
 Tu plenis pateris sufficis: & caput
 Unguento exbilaras, conficit amulos,
 Dum spectant, dolor anxius.

Bb 2

Me

*Me nunquam bonitas destituet tua,
 Profususque bonis perpetuo favor:
 Et non sollicitæ longa domi tuæ
 Vitæ tempora transigam.*

*Jovitæ Rapicii Paraph. in Psal. CXXXVII.
 Super flumina Babylonis &c.*

*Superba muris qua Babylon novis
 Labentis inter murmura fluminis
 Miratur, atque hortis amœna
 Pensilibus reboare testæ,
 Captiva pubes luximus: & genas
 Corrupti instar fluminis exiens
 Vis lacrymarum: te Sion, te
 Patria, vos Solymi penates,
 Dum stemus: eheu non cithara, aut lyra,
 Non nabla dulces ediderunt sonos
 Abjecta humi, aut suspensa passim
 Arboribus, fide dissoluta.
 Ludebat hostis, qui a patrio lare
 In servitutem traxerat asperam, &
 Mutare nos sietum superbus
 Pierius fidibus jubebat:
 Ceu fas sit, inter scitilium deum
 Tot monstra, Osirimve, aut Phariam bovem,
 Aut Belon, aut latrantem Anubim
 Carminibus celebrare sacris.
 Vigor rigentem destituit manum,
 Et lingua ficcis faucibus hæreat;
 Si barbita tentem, aut canora
 Voce deos cecinisse mutos.
 Non terror atrox, non manus insolens,
 Non ulla vis e pectoris intimo
 Avellet unquam altam Syona,
 Atque Dei patrios honores.
 Nos, siue coa lucifer e domo,
 Nos, siue Iberis hesperus e vadis.*

Sur-

*Surget, nigrantes seu quadrigas
Nox trahet humida, te canemus.
Tu savam Idumen in Solymis malis,
Atque asperantem vocibus impiis
Flendas vel hosti ipsi ruinas,
Percuties memori flagello.*

*Heu quantus horror te Babylon manet;
Heu quot tuorum corpora civium
Euphrate inundans sanguine, heu quot
Scuta virum, galeasque volves?
Cum iusta victor supplicia exigit,
Longis prebensas qui Assyrias comis
Matres, & infantes, ab ipsis
Uteribus sine more raptos,
Allidet ad saxa, at rapidus domos
Et templa divum depopulabitur
Injessus ignis: & parentum
Ante oculos pavitans juvenus,
Confossa duris vulneribus cadet:
Servata lævo sydere in hæc mala
Flebit senectus: nec dolores
Alloquiis aliquis levabit.
Poscet severa olim has Nemesis vices,
Laudetur ut qui diruerit rogos,
Atque ossa ludens dissiparit,
Insiliens cineri superbo.*

M. Antonii Flamini Paraph. in eundem Psalmum.

*Dum nos ferarum gentium crudelitas
Desideratæ patriæ dulci solo
Exterminatos detinet, juvat procul
A civitatibus barbara frequentia
Sedere solos sola propter littora
Euphratis. Hic comantium nostras lyras
Suspendimus ramis salicum, & uberrimam
Vim lacrymarum fundimus, tui Sion
Dulcis recordantes, tuamque maxime
Rex cœlitum orantes opem ore supplici.*

*At interim adiens pastor errantis gregis,
 Cantate nobis, ait, aliqua de canticis
 Vestris, quid istæ pendule tacent lyrae?
 Qui nos queamus, obsecro, animum inducere,
 Ut canticum sanctissimum nostri Dei
 Cantemus istis exultantes in locis?
 Si oblitus unquam fuero sancta civitas
 Tui, mea quoque oblita dextra psallere
 Amabiles nunquam lyra eliciat sonos.
 Adhæreat lingua mea faucibus meis,
 Ne canere possim, nisi ego meminero tui,
 Nisi cuncta acerba erunt mihi, & amarissimo
 Amariora felle, donec mania,
 Tuumque templum restituta videro.
 At tu, nefanda facta qui mortalium
 Ultrice punis dextera, teterrimi
 Idumeorum sceleris usque sis memor,
 Qui, dum periret civitas tua, impios
 Hostes furentes vocibus nefariis
 Sic incitabant, Pergite agedum, & omnia
 Vastate, ferro, & igne cuncta coertite.
 Babylon superba, & omnium miserrima.
 Beatus is, qui talibus pro injuriis
 Te digna solvet præmia, atque idem tibi
 Large reponet, parvulos a pectore
 Natos revellens matrum, & illos aspera
 Ad saxa frangens, teque funditus eruens.*

Georgii Buchanani Paraph. in eundem Psalmum.

*Dum procul a patria mæssi Babylonis in oris,
 Fluminis ad liquidas forte sedemus aquas;
 Illa animum subiit species miseranda Sionis,
 Et nunquam patrii tecta videnda soli.
 Flevimus, & gemitus luctantia verba repressit;
 Inque sinus liquida decidit imber aquæ.
 Muta super virides pendebant nabilia ramos,
 Et salices tacitas sustinuerunt lyras.*

Ecce

*Ecce ferox dominus Solymæ populator opimæ
 Exigit in mediis carmina læta malis:
 Qui patriam exilio nobis mutavit acerbo,
 Nos jubet ad patrios verba referre modos.
 Quale canebarum, steterat dum celsa Sionis
 Regia, finitimis invidiosa locis.
 Siccine divinos Babylon irrideat hymnos?
 Audiat & sanctos terra profana modos?
 O Solyma, o adyta, & sacri penetralia templi,
 Ullane vos animo deleat bora meo?
 Comprecor, ante meæ capiant me oblivæ dextræ,
 Nec memor argutæ sit mea dextra lyræ:
 Os mihi destituat vox, arescente palato,
 Hæreat ad fauces aspera lingua meas:
 Prima mihi vestræ nisi sint præconia laudis:
 Hinc nisi lætitiæ surgat origo meæ.
 At tu (quæ nostræ insultavit læta rapina)
 Gentis Idumææ tu memor esto, Pater.
 Diripite, ex imis evertite fundamentis,
 Equaque (clamabant) reddite trætæ solo.
 Tu quoque crudeles Babylon dabis impia pœnas:
 Et rerum instabiles experire vices.
 Felix, qui nostris accedet cladibus ultor:
 Reddet & ad templum qui tibi damna taum.
 Felix, qui tenero consperget saxa cerebro,
 Eripiens gremio pignora cara tuo.*

Suam, ut diximus, Paraphrasin Rapicius Reginaldo Polo nuncupavit; at suam M. Antonius Flaminius Alexandro Cardinali Farnesio, huncque magna ex parte occasionem dedisse, ut ea a se efficeretur, ipsemet testatur in Epistola Opusculo illi præmissa, ne verbum quidem in ea habens de Reginaldo Polo, cui tamen rem totam defert Thuanus. Flaminius enim ibi narrat, sibi non semel in mentem venisse tentare, possent ne Davidis carmina Latinis versibus illustrari; sed nego-

negotii primum magnitudine, dein valetudinis imbecillitate, ac postea gravioribus studiis veritum se fuisse, ne cogitationem illam perficeret; demum quum superioribus diebus Elegiam quandam scripsisset, & ad ipsum Cardinalem Farnesium, quem sibi alieniorem factum verebatur, misisset, Aloysium Priulum, Virum summa sibi necessitudine conjunctum, ea Elegia perlecta auctorem sibi fuisse, ut eadem illa scribendi ratione Davidis hymnos exornaret. Subdit ibidem Flaminius, se triginta tantum Psalmorum Paraphrasin confecisse, plurium certe confecturum, si per valetudinem sibi licuisset: *Ut enim (inquit ad Farnesium) tecum pro tua singulari humanitate loquar familiariter, illud scire debes, ita rationem ingenii mei comparatam esse, ut nonnisi de nocte in tenebris versus ego facere possim, ut mihi aut hac exercitatione penitus abstinendum sit, aut certe vigilandum. Ex qua quidem re etiam factum est, ut breviores quoque Psalmos oratione illustrandos susceperim, quippe qui longo usu doctus exploratissimum haberem (quæ ingenii mei est intemperantia) quemcumque Psalmum aggressus forem, non intermissurum, quoad illum ad finem usque perducerem, id quod profecto sine magno vitæ periculo in Psalmis longioribus facere non potuissem; lux enim meditantem fere semper oppressisset. Hæc a Flaminio in Epistola Nuncupatoria suæ Paraphrasis narrata Thuani dictum nulla ex parte confirmant, sed ei potius refragantur; unde facile quis adduci posset ad credendum, Jovitam potius nostrum, quam Flaminium a Reginaldo Polo monitum fuisse, ut divinam Davidicorum Psalmorum majestatem Latinis versibus exprimeret.*

Ar.

Arctam tamen amicitiam, ut testatur Thuanus, cum Reginaldo Polo Flaminium coluisse, demonstrant versus lepidissimi, quibus Poli catellam querentem inducit Flaminius, se a domino desertam, & Romam secum ire prohibitam, & alii etiam, qui leguntur in eo ipso libello, qui Paraphrasin complectitur, Venetiis edito an. 1548. cui titulus, *Quinque illustrium Poetarum carmina*; eandemque multo magis testatur Cardinalis Reginaldi Poli Epistola ad Petrum Victorium inter illas *Claror. Viror.* an. 1568. Venetiis editas, in qua M. Antonii Flaminii nomen sub Æmilii nomine delitescere, facile quivis dignoscet ex ipsius Victorii ad Polum Epistola, quam attulit Jo. Michael Brutus in sua *Collectione Epist. Clar. Vir.* an. 1561. Lugduni publicata.

Præter metricam illam Paraphrasin, soluta etiam oratione Psalmos duos & triginta explanasse M. Antonium Flaminium, constat ex Veneta hujus explanationis Editione an. 1538. seque ad eam componendam hortatorem habuisse Matthæum Gibertum Episcopum Veronensem, ad evulgandam vero Reginaldum Polum, dum ex Gallica legatione revertens Veronæ aliquantulum subsisteret, docet ipsemet Flaminius in Epistola ad Paulum III. ei Paraphrasi præmissa. Prosaica hæc itaque publicam lucem debet Poli hortationibus; metrica vero (si ejus quoque conficiendæ hortator accesserit Polus) non alia utique fuerit, quam Rapii nostri illa, cujus occasione de aliis etiam plura diximus. Psalmorum numerus, quos versibus expressit Jovita, minor est illo, quem præfert seu metrica, seu prosai-

P. II.

C c

ca

ca Paraphrasis Flaminii; at suæ Jovita addidit præterea sacros quosdam Hymnos, primum videlicet in laudem Sancti Bernardini, sex deinde in laudem S. Georgii, atque ultimo loco Justitiæ Encomion. Cur Psalmos tantum breviores Flaminius versibus expresse- rit, vidimus supra; non amplius autem, quam duos & triginta, prola explanasse, in causa fuit Hieronymi Fracastorii excellentissimi Medici monitum, qui Flaminio, si longius ire perrexisset, vitæ periculum denuntiavit, ut fidem facit ipse Flaminius in ea ad Paulum III. Epistola.

Tradit eodem loco Thuanus, Spinulam M. Antonii exemplo ad eandem laudem, condendæ scilicet Psalmorum Paraphrasis, fuisse excitatum. Carmina Publii Francisci Spinulæ Mediolanensis edita an. 1563. Venetiis ad manus habeo, inter quæ Paraphrasis illa minime comparet, sed plura aliorum afferuntur Epigrammata, quibus ea magnopere commendatur, scilicet a Paulo Mutio Brixiano, aliisque, qui incœptum a Flaminio opus ad finem feliciter perductum a Spinula gratulantur. De Spinula, quem Brixianum aliqui faciunt, sed omnino perperam, nova aderit dicendi inferius occasio. Unum hic addimus, Flaminium Paraphrasin suam composuisse, dum Tridenti moraretur, ut fidem facit ejus Epistola ad Farnesium, eundemque ad Brixianas oras inde aliquando divertisse, docent ejus versus ad Ludovicum Strozam, quorum initium,

*Strozam Flaminius suus salutat
Benaci liquidam jacens ad undam
Sub myrto bene olente;*

suam

suam vero Paraphrasin magna ex parte elucubrasse Buchananum, purissimi quidem eloquii, sed nequissimæ doctrinæ, ac vitæ hominem, in Monasterio apud Lusitanos, in quod detrusus fuerat ipsius nequitix suæ causa.

Ad Jovitam nostrum redeo, & Lectorem moneo; in Opusculo ab eo conscripto, quod de Grammatica re agentes memoravimus, ita puerilem institutionem enucleari, ut plura in eo ad pueros etiam informandos ad Poeticam disciplinam utilia contineantur. Moneo insuper, Opusculum illud editum an. 1551. Venetiis fuisse, omisso tamen Proœmio, quod ex libro manu exarato recitavimus. Typographus Francisco Donato Venetiarum Principi illud dicavit, hunc pluribus de causis collaudans, & inter cæteras, quod S. C. Viro optimo, & Reip. amantissimo referente, faciendum curaverat, ut in singulis Urbis regionibus, quos ex numero Sexterios vocant, Viri bene literati cum suo quisque hypodidascalo ita publice conducerentur, ut universa totius Civitatis adolescentia sine ullo incommodo habere possit, unde bonis literis, & honestis disciplinis fideliter imbuatur. Jovitam Rapi-
cium ejus Opusculi Auctorem laudat Typographus, & illud plenum bonæ frugis ad amicam sibi civitatem magno ingenio, & arte singulari scriptum affirmat, ac civitatem illam non nominat, quam codex MS. quo usi sumus, declaravit.

Rapicii non in Oratoria tantum, sed in Poetica etiam disciplina præstantiam Thomas Junta Virgilii Maronis Opera ad veterum exemplarium fidem casti-

gata ei dedicans an. 1552. his verbis testatus est: *Tu igitur, qui non hujus modo Poetæ elegantiam, ac doctrinam probe introspectisti, sed quicquid, aut in Oratoribus, aut in Poetis reconditum est, unus omnium optime intelligis, & adeo copiose explicas, ut nihil tibi non lectum, nihil non intellectum probes: nec Poetas solum, & Oratores summa cum laude enarres, illorumque virtutes, ac vitia unus omnium acerrimo judicio dignoscas, & æquissima lance perpendas, sed ipse inter primores nostri ævi Poetas sis, & quod majus est, alios, Poetas, atque Oratores subinde facere nunquam desistas; tu, inquam, qui illius jamdudum elegantiam, & doctrinam probe nosti, Virgilium, qualiscunque est, egregiæ meæ erga te, tuosque voluntatis argumentum accipies.*

IV. Jacobus Bonfadius, M. Antonii Flaminii, de quo modo dicebam, amicissimus, locum sibi vindicat inter præstantes Poetas. Patria ei fuit Gazanum, vicus amœnissimus ad Benacum prope Salodium, nam Majores suos, ex Germania commigrantes, fixisse in eo sedes, testatur ipsemet in Epistola Italica ad Hieronymum Segalam an. 1548. quæ exstat inter Epistolas facetas clarorum ingeniorum a Francisco Turcho collectas. Quare mirari subit, certissimo hoc, aliisque documentis refragantibus, a quibusdam Bonfadium confidenter Veronensibus tribui, ab aliis vero rem in ancipiti adhuc loco positam censerì, num Brixianis potius sit adjudicandus. Vicum illum, ac Benacensem ipsam regionem quo amore dilexerit Bonfadius, constat ex pluribus Italicis ejus Epistolis, quæ in Manutiana, aliisque Collectionibus leguntur. Disertissimam
pro-

profecto, atque elegantissimam quisque judicet, quam dedit ex eo ipso Gazani loco ad Plinium Tomacellum, ut nimirum cum ea ipsa loci amœnitate a Bonfadio descripta hujus stylus certare quodammodo videatur. Narrat, die Sancto Bartholomæo sacra sibi Salodium ad visendos ludos, Arcadiis omnino pares, levi cymba advecto, ut primum Benaci lacus patuit, illico ex ejus animo curas omnes graves, quibus, ut norat Tomacellus, Patavii torquebatur, diffugisse, & in ejus præcordia momento eam ipsam tranquillitatem illapsam, qua beatae mentes ex tenebroso demum, turbatoque mortalis hujus vitæ pelago egressæ perfruuntur, nihil amplius exoptantes, sed sempiterna luce perfusæ; haud propterea mirandum, si Catullus postquam & nobilem Rhodum, & Ægæi maris miracula omnia, Poetica libidisse ductus, phaselo suo conspexisset, redux ad Benacum, hujusque captus aspectu, vota de eo amplius non deferendo, Castori, atque Polluci nuncupaverit; lacum illum ex horarum, aurarumque discrimine novas subinde facies, easque intuentibus jucundissimas, effingere, quippe qui Adriatici, & Thyrreni maris furorem, & fremitum quandoque æmulatus assurgit, quandoque subsidit placidissimi stagni, & lenissimi fluvii instar, Soleque oriente, atque occidente ita aliquando splendet, ut velut alterum Cælum planis porrectum spatiis videatur; ejus lacus ripas amœnis oppidis distinctas perpetui veris speciem præferre, camposque, & colles felicitatis domicilium videri, fructus omnes ibi, longe quam alibi suaviores, viridaria haudquaquam inferiora Hesperidum, Alcinoidi,

noi, & Adonidis deliciis; quoniam vero ita a natura comparatum est, ut jucundi alicujus spectaculi eo dulcior sit sensus, quo horridior aliqua identidem in oculis incurrat imago, eam ipsam naturam Benacensis regionis amœnitati consuluisse, montibus prorsus terrificis eidem ad Aquilonare latus superimpositis; demum adeo multam, & eximiam esse lacus illius, soli, & ætheris excellentiam, ut ea bona simul spectata syderibus æquiparari valeant octavæ Sphæræ, cujus scilicet imago est Benacensis regio, si cœlestia licet humanis componere. Hæc omnia habet Bonfadius in Italica illa ad Tomacellum Epistola, eumque & studiorum suorum, & Romani domicilii socium, ad Benacenses illas voluptates invitat, tanquam ad saluberrimam, qua & ipse quoque parumper indigeret, animi medicinam.

Alia exstat ejusdem Bonfadii ad Comitem Fortunatum Martinengum Epistola, qua magno desiderio incensum se scribit, Academiam statuendi ad Benaci ripas, sive Salodii, sive Materni, sive Tusculani, cujus ipse princeps foret, & in qua Aristotelis Organo, Ethicisque interpretandis, dein politioribus literis docendis operam locaret; unde regioni illi decus, sibi vero & decus, & emolumentum accederet: cui scilicet fallaces Aulæ spes, nec non ampla palatia in tædium jam transierant.

Neque vero Italicis tantum Epistolis patriæ suæ amœnitatem collaudavit Bonfadius, sed Latino insuper Poemate, quod hic recitabo, tanquam specimen egregiæ Bonfadii nostri in Arte Poetica peritiæ, quamvis nullam ejus nominis (sicuti nec etiam Jovitæ Rapicii) men-

mentionem fecerint inter Poetas, quos recensent, neque Scaliger, neque Gyraldus.

Gazanum Vicum describit.

*Mœnia quum Saloi, & Benaci litora linguo,
Dextra iter ingressum per opaca, & florida rura
Me brevis, & facile acclivis via ducit apricum
In collem, Cereri placitum, patrique Lyæo,
Et placitum Altrici semper frondentis olivæ.
Planities jacet in summo cultissima. Primo
Hujus in ingressu oppidulum est. Salaminius olim
Fadius egressus patria, Patavique secutus
Fundistorem urbis, posuisse in litore sedem
Dicitur, atque plagæ mox acri incensus amore
Hunc optasse locum Gazæ, quam dives avito
Tbesauro secum extulerat, tum nomine ab illo
Gazanum dixisse; propinquis collibus arcet,
Claraque magnanimum stabant monimenta virorum.
Sed rerum absumtrix, retroque abstrusa vetustas
Obruta in obscuris secum omnia condidit umbris.
Hinc aciem procul in campos, terrasque jacentes,
Lataque Benaci protendere in æquora possum.
Vicini montes, Boreæ de parte, reducit
Et qua Sol radios, quaque altas abdit in undas,
Circumstant, facies spectanti celsa theatri
Formam offert. Sæpe indigenæ videre sedentem
Pana Deum Arcadiæ, calamos quum inflaret in altis
Rupibus, & Nymphas per sibila leta vocaret,
Nymphas, quæ plexis redimitæ tempora sertis
Pastorum loca sola petunt, silvasque pererrant,
Omnia complentes lusu, dulcique cæcbinno,
Naiades quibus assultant de rupibus imis,
Solem ubi ad Hesperium præpingui e valle volutus
Flestit iter rapido, atque sonanti flumine Clisi,
Quem dulces aurarum animæ comitantur, & alis
Per placidum levibus volitantes æra circum,
Omnem divinis miscent afflatibus oram.*

Dile-

*Dilecta ora mihi, Italiae ridentis ocelle,
 Naturæ letantis opus, sancta ora Deorum,
 Quam letus, gelidos fontes, flexusque tuarum
 Lympbarum, Tempeque soli, cælumque reviso!
 Quamque libens, vix ipse mihi credo, æquoris andam
 Tyrrheni, & Calabrum saltus liquisse nivales,
 Inque tuo incolumis gremio residere virenti!
 Salve, altrix antiqua, boni salvet recessus,
 Et gaudete, Genique loci tu candide fidi,
 Vosque Lares, placidi vestro cum numine amico
 Este mihi; & nostrum tandem lenite laborem.
 Te vero & moneo, & quantum me diligis, Alcon,
 Oro, care Alcon; quamquam tua rura reliquis
 Invitus, partemque sui mens ægra requirit;
 Ne mihi commemores Athesum, neu tecta venuste
 Alta Coloniæ. Juvat hic consumere totum
 Sextilem, & dulces invisere sepe sodales:
 Qui lateri nostro se se agglomerare solebant
 Olim, quum primis colludebamus in annis.
 Horum in complexu vis prisca emergit amoris,
 Ut satis æquo animo non me divellere possim.
 Sed, quum se primum decrescens fragerit ætas,
 Ridebit placido quum Villia Doris in antro,
 Me feret auristuo vaga gurgite cymba repostas
 Flaminii ad sedes, ripæ ulterioris in arvis.
 Huc occurre mihi: simul ad tibi grata vireta
 Formelii, & letos Amathuntidis ibimus agros.
 Rodulpho interea, qui se cælestibus æquans
 Divis, purpureo, atque ardenti in murice fulget;
 Quemque viam monstrantem æqui, magnum inclita pa-
 trem*

Roma colit, statuum patriis in montibus arat.

Flaminii sedes, quas se invifurum scribit Bonfadius,
 sunt illæ ipsæ a Flaminio in superius indicatis hende-
 casyllabis ad Ludovicum Strozam memoratæ, veluti
 donum Giberti Episcopi Veronensis; nam de Giberto
 ibi

ibi Flaminius:

... me cithara bonum Gibertum
 Juvat dicere, cujus hic agellus
 Mibi munere partus, hunc agellum
 Ille donat habere, quo nec alter
 Baccho, & Palladi gratior, nec alter
 Musis otia, & abditos recessus
 Præbet commodius; modo hæc benigni
 Faxint propria dona di, talenta
 Cræsi despicio, Midaeque acervos.

Quid de Bonfadii Poesi senserit Paulus Manutius,,
 docent versus ab ipso de ejus morte conscripti, inter
 quos hi leguntur:

Dulcibus & numeris, & molli doctus avena,
 Quum caneres versus Musis, & Apolline dignos,
 Aërio sacras descendere monte Camænas,
 Atque habitare tuo, Benace, in littore jussit.

Joannes quoque Matthæus Toscanus in Peplo Italiæ
 lib. 3. Bonfadium hoc Epigrammate celebravit:

Non minus intumuit nuper Benacus alumni
 Bonfadii, ac Musis, doctæ Catulle, tuis.
 Bis tamen infelix: rapuit nam Roma Catullum;
 Bonfadium lesbo dat, scelerate Ligur.
 Historia æternum cujus, fera Genua, vivis,
 Immeritum seva lege necare potes?
 Mitius est, quod te spumanti vortice marmor
 Tundit, & es siopulis durior ipsa tuis.

De Historia Jacobi Bonfadii agemus, dum Historica
 persequemur.

V. Nicolaus Siccus Brixianus, cujus celebre nomen
 inter veteres Italicarum Comœdiarum Scriptores, Lati-
 nis quoque Poetis, de quibus modo agimus, merito
 accensendus venit ob carmina fatis culta, & elegantia,

P. II.

D d

quæ

quæ Taygeti (de qua sæpe infra) Collectio complectitur : De eo magna cum laude mentionem fecisse jam vidimus Joannem Marium Marium in Epistola ad Cæsarem Gambaram Episcopum Dertonensem, ex qua præterea discimus Nicolaum Siccum Romæ obiisse, *satis eo hominem vocantibus, ut Vir Clariss. in Urbe Orbis clarissima vitam finiret*. Eam fuisse in Aula Romana Nicolai Sicci existimationem, ut nisi mors obstitisset, quam primum rubro galero donandus foret, haud defunt, qui scribant; nec etiam deerit fortasse, qui suspiceretur, turpe quoddam Epigramma, cujus invidia a quibusdam nostra hac ætate in Nicolaum Siccum derivatur, ac proinde parvulam salacem formicam (quum id ipsum de Joanne Casa, auctore ejus Epigrammatis passim habito, in vulgus spargatur) Romanum ei ostrum præripuisse.

Neque vero literis tantum, sed militari etiam arte, publicisque negotiis gerendis Siccus excelluit. Quare & Vercellensem Urbem e Gallorum manibus fortiter recepit, & demandatam sibi a Ferdinando Rege Constantinopolitanam legationem maxima obivit dextertate, & Præfecturam Justitiæ Mediolani cum eximia integritate administravit. Hæc omnia ex ejus carminibus nobis innotescunt, quorum aliqua hic afferemus, tum ut ea Sicci gesta dignoscantur, tum ut venæ ejus Poeticæ specimen Lectori præbeatur. Christophorum Madrucium Cardinalem, & Principem Tridentinum, nec non Antonium Perrenorum Episcopum Atrebatensem in primis coluit Nicolaus, quare pleraque ejus carmina ad eisdem scripta fuisse comperiuntur.

Ho-

Ex his primo loco occurrit Poema, De origine Pilæ majoris, & Cinguli militaris, quo flumina superantur; mox subsequuntur versus hexametri in Statuam æneam Philippi Regis mira arte per Leonem Aretinum conflata; deinde Epitaphium Francisci Olivæ. Reliqua omnia, exceptis quibusdam distichis, De obsidione Senæ, postremo loco positis, ipsius Sicci gesta complectuntur, quæ ita ipse describit, ut honorum, publicorumque munerum jam valde pertæsus, nil magis quam animi quietem, suique apud Montem Clarium ruris secessum exoptaret. Recitabo primum ejus versus aliquot ad Christophorum Madrucium, quos ita exorditur:

*Rideor a doctis, quod scribens tam rude carmen
Ostendam id multis, nec me ullus jam pudor urat,
Sed jugulem incautos male compto carmine amicos,
Qui temere occurrant mihi, cum visitata papyrus.
Carnificem longo complectens ordine versum
Sub tunica latet, auditorum quæ male perdat.
Decipimur fluiti dulcedine carminis omnes,
Cuilibet est ingens proprii vis insita amoris,
Quæ nos præstigiis ludit fallacibus, & quæ
Errores specie virtutis vestit, & ambit:
Id facimus vates, quod turpis bestia quondam.*

Deinde uno, & altero apologo, quo suam illam in pangendis, monstrandisque carminibus libidinem excusat, hæc subdit:

*Sed nimis hæc longum prælusimus, ut citare velim,
Qui dum discordes, sumpta testudine, nervos
Indocto frustra concordat pectine nervos,
In cruce suspensas circum se detinet aures.
Jam positis redeo nugis ad seria, quæ me
Insomnes cogunt longas producere noctes.*

D d 2

Nam.

Namque urens postquam stimulus me impellit honoris
 Linqvere derisum populo insultante Tribunal,
 Verso animo assidue, quæ me urbi vicina, locusve:
 Excipiat reducem, positus insignibus, & quo
 Nostra sinu cedat sensim inclinata senectus.
 Ut navis vexata diu male flantibus Euris
 Cæca nocte furens, nescit quo vis ferat, & fors,
 Sic ego, quem venti invidiæ luctantis, & æstus,
 Ambitionis agunt, in præceptis indigus artis
 A geminis trepide portum Pollucibus opro.
 Vos mihi, vos estis fulgentia sidera, quæ me
 Per scopulos oris rapidi, per lurida lingue
 Murmura, & infames dominante libidine ventos,
 In tutum vebitis portum virtutis amicæ,
 Tuque. Atrebasque meus; nostri duo lumina mundi.
 Dicite vos animæ illustres, quæ certa carinæ
 Sit statio, quam jam rodit cariola senectus.
 Non vos Insubres inter laudabitis ut sim,
 Æmula ne occurrens gravium mihi turba virorum:
 Audeat, ut voti compos, illudere victo;
 Neve seni ut fecere animalia bruta Leoni,
 Certatim insultet petulanti, & prava juvenus:
 Urbe minus Venetum suadebitis ut teneam me,
 Ne nive candidior; pura pice nigrior Ida
 Sit Veneto mea sancta fides suspecta Leoni,
 Ampla vixi nec sunt Romana palatia cordi,
 Nam nisi vixit hiccepi ibi cingat tempora, vel me
 Purpurei insanum pascit spes magna galeri,
 Quid facerem sine servitio, sine honoribus, hospes
 Parvo animo? neque enim fas est obrepere tantum.
 Stultitiæ, ut possim spe solum pastus inani
 Ista diu versare levi deliria mente
 Unde mihi hæc tantum superest spes certa salutis,
 Ut tandem excussoque iugo, vinculisque solutis
 Aut carru vebam, aut lumbos lassante caballo,
 Pomifero donec Benaci in margine sistar,
 Conductaque lacus nitidi lympham rate sulcem,
 Ad tua confugiens reduci pede liguina, quæ me

Tran-

*Tranquilli status cupidum, placidaeque salutis
Excipiant, & amica meæ dent commoda vitæ.*

Hos ad Madrucium hexametros alii illico subsequuntur ad Episcopum Atrebatensem, quorum argumentum, quantum ipsi Sicco sint odio fasces, & inane tribunal, Justitiæque manu frustra qui stringitur ensis, propterea quod ad tantum gradum evectus, ejus dignitatem proprio patrimonio tueri, quum promissa sibi non adessent stipendia, cogeretur. Inter alia hæc habet:

*Et quamvis nihil hic jam sim nisi fabula vulgi,
Multus verna mihi tamen est pascendus, & idem
Terve, quaterve procax renovandus vestibis anno,
Auleti ornanda domus mea, cum riget annus,
Cum calet, extremis quamvis quæsitæ Britannis
Sordent, nam melius paries ornatur Hiberna
Pelle abeunto bieme, atque æstas cum fervet in agris,
Temperat æstivos pellis vitulina calores,
Aut auro pulchre, aut ferro signata calenti;
Cœnandum laute est: ne, si gravis adveniat vir,
Invisum cupidi, & sordentis nomen inurat;
Nam quamvis multui superet patrimonia sumptus,
Inque dies crescat, quod me gravat, æs alienum,
Attamen (est ut opus, utque est res credula) vulgo
Credor habere ingens argenti pondus. & auri;
Unde nec hospitibus domus est claudenda superbis,
Undique quos fallax invitat opinio, quæ me
Per bibulas populorum aures, per compita ubique
Ut bene felicem mendaci prædicat ore;
Stragulaque exornant thalamos, piæque tapetes,
Ne mea pauperies in lucem prodeat, & ne
Hospitibus nos accenset cariola supellex.
Nec minor hinc inopem stabuli subit altera cura;
Ut sæno pascantur equi, nec desit avena;
Et frigile eniteant multa in præsepibus altis:
Acrius hæc miserum pungunt dispendia, quod non
Solvuntur promissa mihi stipendia, quæ tu*

Mu.

*Munificus mihi larga dari, Cæsarque jubetis;
Undecimus mensis, ni fallor, labitur, ex quo
Germanæ pubi, quæ me comitatur, & anteit,
Immitis nec dat Quæstor licëtoribus aurum;
Interea miseris ne desit lens, olus, aut sal,
Aei præsto, moriens mihi quod pater ante reliquit,
Quæsitum magna virtute, & paupere mensa.*

Affert deinde pumilionis apologum, qui in gigantem, quemadmodum ipse petierat, conversus, mox, ubi se obsessum sensit incommodis, quæ major corporis moles afferebat, ut ea exueretur, poposcit, eo-que apolo allato, versus illos Poeta ita concludit:

*Tu, Perenote, mihi ille es, & pater optimus, & rex,
Qui obsequio victus dulci quondam, & prece blanda
Fecisti e parvo me pumilione gigantem,
Insignem ventre, & damnosum faucibus amplis
Servorum, qui me, & patriam ligurire queant rem;
Hanc mihi tu ingluviem famulorum, & inutile pondus
Præcide, & tennes iterum me transfer in artus,
Per genium, fratresque tuos, perque ossa parentis
Sancta precor, vitæ tandem me redde priori.
Ipsa tibi & musto, & satur autumnalibus uvis
Distabam ruri Venusino carmine, dum tu
In Gallos aditus numerofo milite tentas.*

Elegis, qui sequuntur ad Madrucium, villæ suæ delicias describit Nicolaus, & inter alia hæc leguntur:

*Quale tamen rus sit nostrum prius accipe, quam me,
Madruci, immemorem nominis esse putes.
Atque utinam urbanos ipse aspernatus bonores
Huc venias, rapidis vectus anbelus equis.
A strepitu procul urbano, & discordibus armis
Conspicua in pulchro stat mea Villa loco.
Camporum ad medium Claro cognomine Mons est
Inter Cenomani præcua rura soli.
Undique planities longo circumvaga tractu,*

Per-

Perfimilis placidis est maris aequoribus.
Pascua magna bovum sunt immetata; nec ullus
Terminat agrestis grandia rura lapis.
Hinc de parte Euri muscosa Mintius urna
Quæ mage sunt nobis proxima rura rigat.
Uberis inde agri glebas, de monte volutus
Alluit, alpina Mella superbus aqua.
In medio amborum, multum nisi provocet bumber,
It Chrys placido per mea rura pede,
Hic paribus spatiis denso ordine confita sylva
Populeas crescens explicat alta comas.
Ad latus occidui nemoris satis ampla recumbit
Ære mihi, & multo fracta labore, domus.
Ad centum cubitos altis directâ columnis
Arca quadrato clauditur ampla sinu.
Ædis habet medium gibbosis aspera saxis
Janua, turgenti grata supercilio.
Vestibulum æquales hinc, atque hinc dividit alas,
Dextra mihi, hospitibus læva habitanda meis.
Tablini ad medium radii rota lignea crebris
Volvitur, impulsu prætereuntis aquæ;
Hæc rotat inde aliam, quæ concita grandibus alis
Cit ventos, cum Sol terga Leonis adit.
Dum calet, & lectos hæc molliter afflat beriles,
Et quæ cum multa est mensa parata rosa.
Rivus aquæ stabulum lambit rugacibus undis,
Unde lutoſa meis crura lavantur equis.
Non desunt intus ibalami laquearibus altis,
Quos circum volitat Somnus, & alma Quies.
Sustinet extremos curvati fornicis arcus
Aurata in nitido ducta corona loco
Pulchra sub aurata circum currente corona
Artificis docta est fascia picta manu.

Idem fere argumentum elegorum aliorum ad eundem Madrucium, nisi quod & sua erga Cæsarem promerita clarius explicat in distichis, quæ sequuntur.

Un-

Undique turba frequens sociorum convenit ad me,
 Quos trahit ingenii vena benigna mei:
 Et fert indigne titulis, & bonore carentem
 Post tria lustra inopem me rediisse domum.
 Et quod præstantes juvenes, qui grandia tractant
 Munera, & illustri regia lora manu;
 Non aliquo insigni meritum me munere donent,
 Unde senectuti sint alimenta meæ:
 Conscia ne nostrorum operum gens Itala, Iberos
 Servitii immemores indicet esse mei,
 Turcarum qui regna adii pro Cæsare magno,
 Nec timui inferni tecta subire Dei.
 A fessis & Vercellis velocior Euro,
 Averti audaci Gallica castra manu.
 Et volui, & si passa foret gens invida facti,
 Audebam tacito nocte silente pede
 Hostiles penetrare acies, & mœnibus arcis
 Obsesse intrepidus ferre Casalís opem.
 At meæ præstantes juvenes, Regemque potentem
 Excusat miris lingua disertâ modis.
 Hunc tibi silvestrem per prata virentia versum
 Dictabat claudò naufraga Musa pede.

Nec aliud argumentum elegorum, qui subduntur,
 ad Gonzalum Pyretium. Aliorum vero ad Josippum
 Vidaſchum, Vallis Macræ, in qua tunc habitabat, qua-
 que Ligures a Thuscis dividuntur, amœnitatis delcri-
 ptio. Adest tandem Epigramma ad Mercurium.

Cylleni interpres divum, velocior Euro,
 Qui toties superas, isque, rediſque vias,
 Poſt mille exactos varia regione labores,
 Iſta juvenitutiſ ſint tibi dona meæ.
 Undique cerati taurina ex pelle cotburni,
 Sellaque, diſpoſitos quæ bene cingit equos,
 Et ferula & geminum calcar, parvumque galerum,
 Et cornu, quod ter pendula zona ligat.
 Curſor ego bis adii ſpoliis fiorente juventa

Ter.

*Terrarum quicquid cognitus orbis habet.
Nunc mea cum requiem poscat vicina senectus,
Cumque riget vultus concava ruga meos,
Hæc veteris monumenta mei deserta laboris
Pendeant templo munus inane tuo.*

Tribuitur passim Nicolao Sicco valde elegans de Benedicto Varchio Epigramma etiam in nupera Editione Batava Historiarum ejus Thesaur. Antiquit. & Histor. Ital. T. 8. par. 2. inter Elogia, quæ iisdem in ea præmittuntur; at illud Varchium de se ipso confecisse, certa prorsus res est, quam ejusdem Varchii Vita accurate composita a Sylvano Razzi, & Batavæ illi Editioni præfixa, in qua affirmatur, Varchium sibimet Epitaphium confecisse, asserturque ex eo distichon, quo *sinceri sectator amoris* Varchius laudatur, æque ac in clausula Epigrammatis Sicco tributi; & præterea rem extra omnem controversiam ponit Brixiana, quam superius indicavimus, Taygeti Collectio, Epigramma illud non quidem Sicci carminibus inferens, sed ipsimet Varchio adscribens, & sub ejus nomine recitans. Est autem hujusmodi.

Benedicti Varchii de seipso.

*Si mihi, quæ dederant, neverunt flamina Paræ,
Et Lachesis jam jam rumpere fila parat,
O mihi dent saltem superum pia numina Divum,
Fesulei ut summa condar in arce jugi,
Qua patet immensus partes prospectus ad omnes,
Et cælum nullo ridet in orbe magis.
Illic perpetuo devictum lumina somno
His inscripta notis qualibet urna tegat.
Varchius ingenui semper sectator amoris
Conditur hic, totum, quod cupiebat, habet.*

P. II.

E c

Un-

Unde acciderit, Epigrammatis hujus auctorem passim haberi Siccum nostrum, haud licet divinare. A Varchio tamen magni habitum fuisse Siccum, certum reddunt vernaculi nonnulli ipsius Varchii versus, in quibus eidem Insubriae regnum æqua lance, & salubribus consiliis administranti, ea tribuitur tam in prosperis, quam in adversis rebus, eloquentiæ, ac sapientiæ laus, ut palma præ omnibus ipsi adjudicetur, ut habetur in libello Italica Varchii carmina complectente, Florentiæ edito an. 1555. Tandem ad ejusdem Nicolai Sicci laudem magnopere faciunt, quæ de eo scribit Hieronymus Cardanus in Tractatu de libris propriis, eorumque ordine, & usu, eundem in exordio ita alloquens: *Tu vero quum nobilitati generis animi quoque splendorem adjunxeris, tum studium singulare, peritiamque maximam liberalium, ut vocant, Artium, merito de his judicium facere potes. Ego vero nomen tuum, & gloriam, quantum mihi fas est, ad posteros traducam, ut quemadmodum fortitudine, & prudentia præsentis sæculo notus es usque ad Indos, ita humanitate, & studiorum amore futuris sæculis per me quoque innotescas.*

Antonius Cerrutus Novariensis, cujus exstant carminum libri quatuor an. 1550. Veneriis editi, in quadam Ode lib. 1. Siccum nostrum invitat, ut ad secum celebrandum diem Natalem D. Martini accedat, comitesque adhibeat Olivium, Martiranum, & Mirthium:

*Sicce, sacri chori
Fontisque Aonii decus,
Præfekte atque potens Justitiæ, vices
Exercens bene Caesaris,*

Si

Si magnis vacuus forte negotiis
Convivam cuperem mibi
Te præstare hodie, namque dies monet
Vivamus genialiter,
Franciscus veniat cultus Olivius,
Nostri gloria seculi,
Seu græco ore loqui, seu latio velit,
Seu scribat veteres sales,
Mœstis seu fuerit præsidium reit.
Vitæ dimidium tuæ,
Et consort studii, tecum utinam sacer
Martirani & afforet,
Vir summi ingenii, & judicii gravis,
Condens pulchra poemata.
Et posses pariter ducere Mirtbium,
Tuis putreis ni oleat Deas,
Urbis pernitentem.

VI. Bartholomæum Theanium, cujus sæpe mentionem fecimus, primum locum sibi vindicasse inter Poetas suæ ætatis, affirmavit, ut pariter vidimus p. 148. secund. Part. hujus Specim. Joannes Planerius Quintianus in illustrium Virorum Patriæ suæ enumeratione. Hic enim postquam retulisset, scripsisse Theanium Commentaria de Arte Rhetorica, Declamationes plurimas, nec non Orationem funebrem de Matthæo Avogaro clarissimo Jureconsulto, itemque Orationem de voluntate cognitionis, hæc subdit: *Habet & Poemata plurima, Virgilianam gravitatem, & Ovidianam facilitatem redolentia, nam Brixiam a Gallis captam heroicis carminibus conscriptam edidit.* Carmen hoc de clade, ac depopulatione Brixiana edidit Brixie an. 1561. Ludovicus a Sabio, dicavitque Theanius Camillo Capreolo Jurisconf. & Comiti, cum alloquens hîsc hendeasyllabis:

E c 2

Cur.

*Cur tu verbis addicare nostris
 Illustris Comes, ac benignus Heros,
 Prudent, ingenuus, sagax, facetus,
 Si quisquam penitus cupit notasse:
 In causa potiora sunt habenda,
 Vultus gratior, & nitens venustas,
 Accessus facili, modesta verba,
 Froni lætissima, comitasque rara,
 Vera nobilitas, amanda virtus;
 Quam fides, pietas sequuntur, ornant,
 Pallas strenua lucido tridente,
 Crysalloque fovet, meloque dulci,
 Que passim populus frequenter ore
 Extollit vario sonore, & odit.
 His ergo admonitus, timore pulso,
 Præsens hoc volui dicare munus.
 Quod si, quam deceat, minus videtur,
 Jam nec Romulus, Acca quam paravit,
 Sprevit spiccam Is bonus coronam.
 Hæc sunt primitiæ feracis agri.
 Olim proferet ampliora lætus,
 Grata hæc si fuerint priora nostra.
 Quanquam nil metuo canum latratu,
 Nec morsus rabidos, gregisque inertis
 Incultos calamos, notasque fœdas.
 Primus si patrios cano labores,
 Et lusus refero dei furentis,
 Patronum repeto velis adesse.
 Tanto numine tutius meabo.
 Leve est, carpere quicquid alter affert,
 Sudabit quoties opus relinquens?*

Ei Poemati subduntur in eodem libello heroici ver-
 sus primum ad Dominicum Bolanum Brixie Præto-
 rem, deinde ad Hieronymum Confortum, Artium, & Me-
 dicinæ Doctorem celeberrimum, ut eum vocat, bona-
 rumque literarum cultorem candidum. Clauditur li-
 bellus

bellus quodam Hendecasyllabo, cujus aliquot versus recitabo, ut superioribus juncti pro specimine Poeticæ venæ, quam in Theanio conterraneo suo, sibi que amicissimo laudavit Planerius, deserviant.

Ad Nicol. Siccum, in Monte Claro Musas colentem.

*Dulces versiculi mei labores,
Molles candiduli mei sodales,
Magne delitiæ laboriosos
Inter qui mihi jam fuistis ætus,
Nugarum quibus est satis, superque,
Nullæ sed Veneres, Cupidinesque;
Sicco dicite jam secunda verba:
Maxime Nicoles viridis cui tempora laurus
Cingit, & æternum reparat per secula nomen.
Sicco dicite, maxime o Poeta,
Dulces versiculi mei sodales,
Theanus tuus ille te salutat:
Observat qui te, & tua dulcia carmina adorat.
Tibi nunc propriam expetit quietem,
Ad sint ocia pectori sacro:
Docte Castalides amæno in antro
Ad sint, & tibi Lionora dulcis,
Plusquam Lesbia jam Catulli amores,
Plusquam Lydia flamma Horati, & ardor.
Ait, jam tibi fosciculos suaves
Sumas lætius, herbulasque olentes,
Quas nunc hortulus attulit colendo.*

In Brixiana Taygeti Collectione ex carminibus, quæ leguntur in laudato libello, existant dumtaxat illa ad Bolanum, at contra afferuntur in ea Collectione versus ad Hieronymum Maurocenum Brixie Præfectum, alii ad Jacobum Aquaneum, alii ad Jo: Antonium Taygetum, qui omnes in prædicto libello desiderantur.

VII. Cæ-

VII. Cæsarem etiam Duchum ea ipsa Taygeti Collectio nobis exhibet inter Latinos Poetas, qui ad medietatem circiter Sæculi XVI. floruerunt. Hujus Poësin plures ea ætate commendarunt, & in primis, magna cum eo amicitia junctus, Franciscus Stoa Quintianus, qui aliquot ad eundem hendecasyllabos ita exorditur in eadem Collectione.

*Cæsar Castalidum decus sororum,
Perlegi hendecasyllabon politum
Procurrrens numeris Catullianis,
Et par cultu elego Propertiano,
Dignum ponderibus Maronianis,
Socco grande magis Terentiano.*

Hendecasyllabon, quod laudat Quintianus, inter Duchi carmina in ea Collectione reperitur, illudque meritis a Quintiano plausus rerulisse, sibi quisque facile persuadebit. Est autem hujusmodi:

Ad Quintianum Stoam Poetam.

*Pervenit vagus, impiusque rumor,
Te vitam fragilem, & tuos amicos
Liquisse, ad superosque transvolasse;
Quæ res nos trepidos simul peremit,
Qui te diligimus, pioque stetus
Fudimus, lacrymas piaque multi,
(Pere te sine inutiles futuri)
Cumque non facile ipse cursitare
Possem continuo per urbis oras,
Præclarum, atque tuum, meumque amicum
Truxim commonui cito, & rogavi, ut
Sciret sollicitus, quid esset istud,
Unde hæc fama mala orta, quis sepulchrum
Vidisset? querimonias tuorum
Audisset, satis, & satis docendas?*

At

*At demum populum referre dixit.
 Nil certi tamen adfuit subinde;
 Quod paulum pavidos refecit omnes.
 Ob id quod si inamata Parca vere
 Te nobis rapuisset; hoc fuisset
 Crudeli, celerique nuntiatum
 Et verbo, & calamo, a virisque certis.
 Sed dulces quoniam timent amici,
 Nos rumor dubios, & hæstantes
 Multum detinuit malus; renatus
 Donec redditus omnibus fuisti.
 Nos vero jam hilares, bono poeta
 Servato, dabimus piis quotannis
 Thura altaribus omnium deorum.
 Vivas nunc, memorande Quintiane,
 Musis, & tibi, posteris, amicis.
 Dignus Nestoreos habere & annos
 Phœnicis Pharia, vales quod unus
 Omnes, seu teneris canis camœnis,
 Amplius, seu celebras duces latinos.
 Revertaris ego velim poeta,
 Expectant reditum tuumque amici,
 Ut possint citius tuæ dolorem
 Mortis destruere, & simul jocari.*

Hendecasyllabon hoc subsequuntur illico elegi in
 Mulieres vestes caudatas ferentes, quorum priora affe-
 ram disticha.

*Scilicet hæc nostris deerat quoque fabula damnis,
 Causaque fœminæ maxima nequitie.
 Non erat implicitis sat frontem ornare capillis,
 Et faciem exhaustis fingere pyxidibus?
 Ipsum coccineis intexere vestibus aurum?
 Atque ipsum in varios flectere mille modos?
 Pellibus & Scythicis biemes vitare nivosas?
 Atque æstus pennis pellere Niliacis?
 Cingere ab extremo deductis orbe lapillis*

Non

*Non digitor solum, ac brachia, colla, caput?
 Officiumque pedum curvis mandare quadrigis?
 Magna ancillarum vos comitante manu?
 Ni quoque cauda simul traberetur longior ipso
 Corpore, quæ cœnum perpetuo raperet?*

In libello Brixia edito an. 1570. carmina Academicorum Occultorum complectente Cæsar noster primus compareret, implentque ejus versus, quod eorum major ibi sit numerus, quam in Taygeti Collectione, paginas viginti. Primi describunt laudes ruris, cui prope Sebinum lacum se dederat, *procul a rixis urbis, strepituque forensi*, ut ipse loquitur in priore versu. Ruris commoda itidem laudat in hendecasyllabis ad Hieronymum Bornatum, quos placet recitare, quum Occultæ illius Academix Principes recenscant.

Ad Hieronymum Bornatum Acad. Occultum.

*Vates candide, cultior Catullo,
 Et versu melior modis Tibulli;
 Cur me sollicitas, ut hinc canoros
 Mittam versiculos, facetasque?
 Cum scias tenuem esse me Poetam;
 Cujus fama jacet sepulta, Phœbo
 Qui condit renuente, nec venustos,
 Nec versus faciles, nec arte cultos.
 Nam diris libitina filiorum
 Me (ut scis) funeribus, quiete pulsa,
 Vexavit toties, necemque fratris
 Adjunxit miseram, feram, cruentam.
 Tantis fata etiam addidere damnis
 Bilem atram, & maciem, gravedinemque.
 Unde carminibus miser relictis,
 Atque urbe, atque foro tumultuoso,
 Ruri colo innocuum, & remotum agellum.
 Et quamvis Helyconis alii alumnas*

Et

*Diligam; tamen impie immerentem
 Me spernunt; quoniam viros jocosos,
 Et letos animos beant beatæ.
 Quare sollicita tuis Camænis
 Julum Martigenum, decus potentum;
 Alphonsumve choro novem sororum
 Carum Capreolum; vel elegantem
 Lollium, eloqui parem parenti;
 Soncinum aut celebrem canendo Amores,
 Et Belgam domitum, & feri Sicambri
 Conatus; numerisve perpolitus,
 Sanbonifatium, Catulli euntem
 Per vestigia ad Aonum recessus;
 Vel cultum Federicum adire discæ;
 Clarum aut Taygetum aureo canentem
 Plestro; vel Diomedis ora Sale;
 Quærentumve pete illum (ut ante nosti)
 Quem cunctæ Aonides fovent; vel ipsum
 Quæras Porcaccium probum, & disertum;
 Ricchinum aut tabulis suis Apellem
 Vincentem, atque modis modos Petrarchè.
 Magni sunt etenim hi Poetæ, & horum
 Labris Castalii fluunt lepores;
 Occulteque Academiæ columnæ
 Hi sunt, atque tuos canent honores:
 Interim assiduas preces ego Diis
 Fundam, & vota pia, ut maligna pellant,
 Et curas adimant, molestiasque,
 Ut tandem valeam tuas canendo
 Laudes, ingenium meum excitare.*

Ad manus habeo libellum Natalis Comitum de Venatione, Cardinali Julio Roboreo dicatum, & ab Hieronymo Ruscello, cui eum legendum, & exscribendum ipse Natalis Januæ concesserat, typis Aldi filii Venetiis an. 1551. evulgatum, cui Editioni sequentes versus præmittuntur.

P. II.

F f

Casa.

Cæsaris de Ducibus Civis Brixiani.

Tempora qui quondam pinxit variantia, fraudes

Et venantis equos concinit, arma, canes.

Atque refert vatem Smyrneum carmine; sed si

Calliope dicet prælia, regna, duces,

Quum leve par fuerit scribens, majoribus uso

Cedet & Æneidos, Iliadosque parens.

Ergo cane heroas, juvenum rarissime, solus

Cum possis præcis æquiparare sonos.

VIII. In citata Taygeti Collectione post Cæsarem Duchum, & Nicolaum Sircum, de quibus modo dictum est, subsequitur illico Andreas Mutius Brixianus. Epigramma ad Dominicum Bollanum Brixie Episcopum versibus Mutii in ea Collectione allatis initium præbet, mox legitur duplex Ode ad Marium Trussum, deinde Hendecasyllabon ad Blasium Spongiam Presbyterum, sequuntur postea aliquot Epigrammata, inter quæ bina adversus P. Franciscum Spinulam.

Ad P. Franciscum Spinulam.

Nasuti quidam te dicunt esse poetam,

Derident te omnes, Spinula, qui hoc faciunt.

Tu tamen ut verum simplex admittis honorem,

Si factus non es, fabula vis fieri.

Ad eundem.

Spinula Taygeti tu damnas carmina vatis,

Et si qua in lucem nostra Minerva dedit.

Ad Phœbum & Musas te cogimur appellare,

Nam sine judicio, quod facis, ipse facis:

Ni post judicium vivas in pace quietus,

Dicemus nimia te furere invidia.

Spinulæ hujus mentionem fecimus agentes de Rapi-
cii in Psalmos Paraphrasi, eamque a quibusdam, & in
primis a Paulo Mutio Brixiano laudatam diximus. At
Andreas Mutius, Jo. Antonius Taygetus, alique non
pauci

pauci, tam eam Paraphrasin, quam universam Spinulæ versificationem valde improbarunt. Adversarios suos nominat, & carpit ipse Spinula pluribus locis, præsertim in Ode ad Hieronymum Hugonium Jurisconsultum Brixianum, & in Satyra de Itinere suo. Prior ita incipit:

*Mordear opprobriis falsis, me, candide compar,
Robertus amens vellicet,
Taygeta & laceret cimex, & Bulla Lumati
Conviva rodant perfidi,
Mutius obliquis oculis mea limet ineptus,
Morsu & venenat commoda:
Men' moveant isti, plures aliique, cathedras
Plorare condiscendum
Quos inter jubeo, numerum, consumere natos
Fruges, Lyæi & munera?*

Initium vero Satyræ de Itinere suo hujusmodi est:

*Finibus egressum patriis me Brixia dives
Mœnibus excepit, Corrado præside Paulo,
Tulli ubi nobilibus numerosa volumina ad annum
Exposui. Prosper sapiens, Hieronymus Hugo,
Atque propinquus Eques Marius, Marcellus, & ipse
Hugo, meæ vitæ patres, Divique fuerunt:
Sordidus obliquis oculis ubi Mutius, & me
Taygetus charta cimex læsere cacata.*

Thuanum Spinulæ hujus in Psalmos Paraphrasin quodammodo Flaminii illi æquiparasse, ipsum vero & alios indictam prorsus reliquisse Jovitæ Rapicii Paraphrasin, superius mirati sumus; modo Lectorem monemus, in Londinensi Editione Historiarum Thuani an. 1733. inter Variantes lectiones adnotari, verba illa, & Franciscum Spinulam suo exemplo ad eandem poeticæ laudem invitavit, in aliquibus Editionibus desiderari.

IX. Augusti Coccejani, Brixiani Poetæ, nomen non ex sola nobis Taygeti Collectione innotescit, sed aliunde etiam, ac præsertim ex Pauli Jovii Elogiorum volumine, quum in eorum censu referatur, qui ea Elogia elegantibus versibus vel illustrarunt, vel ornarunt. Imo vero horum veluti princeps Coccejanus ea de causa dici potest, quod in Romulum, qui primus in Jovii Elogiis compareret, ejus carmen legatur.

Augusti Coccejani Brixienfis.

*Heroes, animæ illustres, atque inclita Martis
 Insanientis pignora,
 Æternis properat Jovius quæ tradere chartis,
 Ut clara vivant posteris:
 Æquo ferte animo si primos carpsit honores,
 Sedesque primas Romulus:
 Qui genus ætherio ducens e sanguine, terris
 Semen deorum sparserit:
 Terrarum late dominam construxerit Urbem
 Superbi ad undas Tybridis:
 Regnatorem Orbis populum formaverit armis;
 Almæque pacis artibus:
 Cumque omnes hominum meritis superasset honores;
 Migravit in Cælum Deus.*

Carminibus aliis Coccejani, quæ ad Jovii Elogia leguntur, omiſſis, allatum in Taygeti Collectione recitabo; in quo duo funera illustris Chisoliæ familiæ, patris scilicet, & filii Poeta deplorat.

Augusti Coccejani Brixiani.

*O Melle vaga flumina,
 O fontes vires, qui tremulo pede
 Alte mœnia Brixia,
 Agrosque alluitis, currite, currite
 Exundantibus alveis*

Per

*Per lætas segetes, culta per æquora
Camporum, & lacrymabilem*

*Fortunam egregii sanguinis, & domus
Antiquæ Cbissolæ*

Undis, & lacrymis flete rigantibus.

Nunc quisquis duo funera

Deplorans, miseros ingeminet modos;

Patrem scilicet optimum,

Et pulchram sobolem magnanimi viri,

Et dulci a patria procul

Florentem puerum, vassa scientiæ

Dum juris maria impiger

Adversis Zephyris nauta novus secat:

Qualis Vesuvii in jugis,

Aut in Pausilipi vertice florido,

Liber magne, tibi sacro,

Ardua vitis amans scandere populos,

Diffundit virides comas,

Gaudet tergeminos spargere palmites;

Sic ille ad patriæ, & patris

Nomen, nobilium sic equitum ad decus

Est evectus, & aurea

Lucretus solidae præmia gloriæ,

Dum legatus ad Adriæ

Patres, pro patria mittitur eloquent;

Et dum pro miseris reis

Mollit dura nimis pectora Judicum.

Ex hoc stipite tam probus

Surgebat juvenis, dulcia pignora

Felicitis patriæ, nisi

Obstasset sperum firma necessitas,

Quæ cœli ut vacuas domos

Impleret, lepidum cum patre liberum,

Lugentis patriæ decus,

Hinc raptum merita ad sydera transfudit.

Jacobus Bonfadius in Epistola superius citata ad Fortunatum Martinengum, cui suum de Benacensi Academia

demia instituenda desiderium aperit, meminit Jacobi Chiffolæ, de quo audivisse se scribit, præter animum generosum, scientia quoque, & virtute mirum in modum excellere.

Quanti faceret M. Antonius Flaminus Coccejanus nostri in re Poetica judicium, palam fit ex hendecasyllabis, qui leguntur in libello Flaminii carmina complectente, non illo quidem, cujus supra mentionem fecimus, Veneriis edito an. 1548. sed alio ibidem edito an. 1558. ubi nimirum versus aliquot Flaminii in priore minime impressi reperiuntur.

Ad Augustum Coccejanum.

*Sic te, candide amice, nullus unquam
Cœlesti Soppie, patrique Phœbo
Possit carior esse, dic amabo,
Num vere mihi dixit Hadrianus,
Te describere, quicquid ipse ludo
Molli carmine per jocum, atque risum.
Hoc tu si facis, O nimis beatam
Musam Flaminii, graves, protervi,
Mordaces, critici venena dentis
Vestri nil metuo, quod approbarit
Augustus meus, id probent, necesse est,
Et Phœbus pater, & novem Camœnæ.*

X. Joannis Antonii Taygeti, vestigiis, quod jam facere cœpimus, insistentes, ad quinque Brixianos Vates deducimur, hisque tantum nominatis ad sextum, cui paululum immorandum, illico transibimus. Sunt autem Jo. Angelus Taygetus, Paulus Barattus, Ugolinus Palarus senior, Simon Angelus Suspirius, Bigardus Cornelius. Qui eos excipit Calemerius Balneacattus, nec ipse ob bina Epigrammata a Taygeto recitata peculia-
ri

ri mentione dignus videretur, nisi aliunde etiam ipse nobis innotesceret. Elegans ejus Hendecasyllabon Brixianæ, quam ad manus habeo, Marulli carminum Editioni adjunctum, reperitur, quo cultissimi illius Poetæ partes se suscepisse demonstrat adversus aliorum in eundem maledicas obtreccionem. Michaeli Tarchaniotæ Marullo Constantinopolitano tantam cum Politiano intercessisse inimicitiam, ut modestiæ fines omnes excesserit, ex utriusque Scriptis palam constat. Carmina, quibus Politianus Mabilio insultavit, & ea, quibus Marullus Ecnomum momordit, ad eas similitudines spectare, valde probabile est, licet aliqui de hoc dubitent. De earum similitudinum causis aliæ aliorum sunt conjecturæ. Politianum studio gentis suæ abreptum, universo gregi doctorum Græcorum, in Italia tunc hospitantium, exitiale bellum inferentem, calamum propterea in Marullum acuisse, haud ægre quis sibi persuadeat. Tantas iras Deum Amorem præterea inflammasse, nuperus Scriptor conjectavit. In Marullum acerrime etiam invecus est Jul. Cæsar Scaliger Poetic. lib. 6. eum hisce coloribus pingens: *Marullus totus durus, morosus, aliorum obtreccator, sui admirator simul, & diffidens. Anxius enim quo dicat modo, haberet negotiosus, omnino irruentus.*

A partibus Marulli steterunt Bartholomæus Scala, Petrus Crinitus, Actius Sincerus Sannazarius, quos tamen, seu odio in Politianum, seu amor in Marullum nimis indulgisse, plures existimant. Brixiana, de qua loquimur, Editio præter Georgium Anselmum Parmensem, Jovianum Pontanum, etiam Callem-

rium

rium Balneacattum Brixianum iisdem adjungit, quem certe de partium studio in iis rixis inter Marullum, & Politianum nemo accusabit. En Balneacatti Hendecasyllabon.

Callemarii Balneacatti Brixiani in Marullum Carmen.

*Quid nunc Elysius agit Marullas,
Qui cygno sene dulcius canebat
Permessi ad latices sacros? canitne
Tecum, blande Tibulle? tecum, Alumne
Sulmonis gelidi? & Catulle, tecum
Canit, ter lepidos jocosque promit?
Una & puniceam rosam, albicansque
Carpit lilium, amaracumque odoram?
Hunc & allicit, & moratur illum
Vultu letifico? Ecquis in vireta
Illa gratior ivit a trecentis
Annis? hic erat omnium in labellis
Doctorum, o satis, & super beata
Tam claro hospite, & inclyto vireta.*

Ad calcem pariter Centuriæ Epistolice. Quæst. Marini Becichemi affertur Calimerii nostri carmen de ejusdem reditu ad urbem Brixie, atque ita incipit:

*Nunc nunc e Venetum Marinus oris
Claræ mœnia Brixie revisit,
O lucem niveam, o diem beatum!
Doctæ conspicio Patrem juventæ,
Et cbaram premo dexteram, fruorque
Gratis colloquiis, quibus dolores,
Menti quos dederat meæ ex recessu,
Discedunt procul. I puer, sonoram
Huc affer Cytbaram, libet Marinum
His ad sydera versibus referre.*

Ejusdem Calimerii Epigramma præfigitur Operi P. Pauli Vergerii de ingenuis moribus edito Brixie per Ludo-

Ludovicum Britannicum an. 1528. una cum aliis S. Basilii, S. Hieronymi, Xenophontis, & Plutarchi ad idem argumentum pertinentibus Scriptis. Joannem Baptistam Benivolum, Brixianum, qui omnia in eo libello comprehensa recognovit, Balneacattus in hunc modum commendavit:

Calimerius Bagnacatus Jo. Baptistæ Benivolo.

*Optarem bifidi tetigisse cacumina montis,
Et caput Aoniis immauisse vadis.
Nunc te nunc canerem, nec me, Baptista, pigeret,
In decus, & laudes solvere vela tuas.
Quis magis cunctis doctus discenda catervæ
Tradere? quis turpem pellere barbariem?
Informes veterum facies in lucida membra,
Et bene distinctam vertis in effigiem.
Castigas, auges, refecus, Latioque decori
Das, quæ judicio sunt placitura virum.
Perge, precor, libros sic illustrare, supellex
Æterni causam nominis ista dabit.*

Aliam eorundem Opusculorum Editionem Florentiæ per Franciscum Dinum emissam exornat ad calcem voluminis Epistola Joannis Calphurnii nostri ad Lectorem, cujus initium: *Habes, optime Lector (te enim appello, qui jam pater effectus) quemadmodum liberos tuos & diligenter educare, & præclaris disciplinis, ac moribus instituere possis. Auctores autem, quibus hæc continentur, bujusinodi sunt, ut, quidquid dixerint, fere pro lege habendum sit.*

XI. Joannes Marius Matius, de quo non semel superius dictum est, ut Brixianis Poetis accenseatur, facit non solum ejus carmen ad Bologninum Bolognium, quod in Taygeti Collectione recitatur, sed alio-

P. II.

G g

rum

rum ejus carminum collectio, quam reperio in libello Alexandriae edito an. 1578. Ex eo quosdam primum hendecasyllabos, dein heroicos versus recitabo, qui & Poeticam Matii venam, & una simul aliquid ad Viæ ejus historiam pertinens, nos doceant.

Ad Sodales.

*Nassini, veteres mei patroni,
 Alena, veteres mei sodales,
 Pars vitæ altera, Martinenge, nostræ.
 Et Sicce, Ausonie decus Camæna,
 Vosque, o Pieridum sacræ coronæ,
 Corneli, Capbaneu, Metelle, Paulte,
 Muti, Albine, Roberte, tuque Porci, &
 Bolognine, mei sacri sodales,
 Prædulces animæ, mei lepores,
 Cuncti una Hendecasyllabi salute
 Et salvetè diu, & diu valete.
 Ecquid de patria meo doletis
 Discessu? atque alias cuncti in oras
 Mente estis comites, & arcto amore?
 Me certe validi premunt dolores,
 Atque implent calidis sinus ocelli
 Flentes lacrymulis, quod hinc in urbes
 A vobis alias procul recedam,
 Et dulcis patriæ lacus relinquam,
 Glebas Cœnomanum affatim rigantes.
 Nec vestras valeo sodalitates,
 Tuo, o Cecropi, melle dulciores,
 Complexusque tuos, laresque amatos,
 Mater Brixia, linquere, absque mole
 Multa tristitiæ. Scio, doletis
 Et vos, & graviter mei feretis
 Vos desiderium; attamen levabunt
 Curam, mœstitiamque commeantes
 Cicer, utroque frequentium tabellæ
 Illi, ut res; Marium novæ salutes*

*A vobis, Marii novæ salutes,
 Vos esse in nimio (ab negare in ullo
 Mi notus nequeo) haud sinent dolore.
 In primis animique, mutuique
 Cordis certa fides abesse longe
 Omnes morstitias jubebit, atque
 Securo citbaram ferire plectro
 Cantantem patrii Olli Napæat.
 Hinnitus sed enim vocant equorum,
 Pilentæ ad januam morantur. Ergo
 Prædulces animæ, mei lepores,
 Prædulces animæ, mei sodales,
 Cuncti una Hendecasyllabi salute
 Et salvete diu, & diu valete.*

Monachis Bobii.

*Nulla usquam extremæ tanta est injuria terræ,
 Aut tanta est usquam cœli inclementia, mores
 Quæ queat immutare bonos, hominumque proborum
 Deterat ingenium, restoque a limite flectat.
 Non illaudatum fecit Nilotica tellus
 Busirim, nec te mensis apponere divum
 Humanas pepulere dapes Euxina, Lycaon,
 Littora, quo nati fierent fera busta perempti
 Numina, & ursarum stimulare terga Bootes.
 Natura, & mores bruti fecere scelestos.
 Ecce inter silvas, inter deserta ferarum,
 Atque inter gelidi prærupta juga Apennini
 Quam blandos hominum mores, & dulcia quantum
 Hospitia experti sumus? hic me cœlibe vita
 Insignes Monachi, studiisque, & moribus almis
 Florentes, vultu sic exceperere sereno
 Hospitem, ut Arsacides melius tractaret usquam
 Non queat, aut vani Cæsar dominator Iberi.
 Si vestra Oxygias premerent vestigia terras,
 Aut Anthropolopbagum si calcaretis arenas,
 Hic subito fœdos hominum mitescere mores
 Conspiciam, subitoque feram vanescere vitam,*

G g 2

Natu-

*Naturamque hominum penitus, penitusque locorum
Mutari, & sanctos extemplo exsurgere cultus.
O, nisi me implicitum teneat charissima conjux
Nostra domi, & vigiles curæ, sobolesque tuenda,
Et studiis ornanda decentibus, omnia nostræ
Tempora percuperem tecum traducere vitæ,
Grex sanctæ, & sceleris pure, & vitæ integer, ipso
Vobiscum toto latus consumerer ævo.*

*Huc ego Pierias docto de vertice musas
Parnasi, Pindique, & sacro fonte vocarem
Pegasæo, hic castas agitarent usque choreas
Mecum, hic arguto mulcerent æthera cantu.
Hic canerem egregias dulci modulamine laudes,
Christe, tuas, quamvis longo tua gesta Poetæ
Exsuperent vires, atque ingenium intervallo.
Tum causas rerum occultas scrutarer abunde
Vobiscum, dulces animæ. Hic ego dicere possem,
Omnia purpureis vernali cur floribus arva
Vere novo: rigeant rursus cur illa pruina
Cedente ab nostris tunc Phœbo longius oris,
Ad modo compertos Hispanis classibus orbes
Audaci Genuate auctore: precacibus Austris
Quæ sit materies: celsis quid nubibus imbres
Exprimat: aut tandem lapidescat in ære grando
Quæ ratione: quibus Titan sua lumina causis
Occulat, oppositæ denso cum corpore Lune
Deficit, & media borrescunt in luce tenebræ.
Depictum modico tam vastum in pariete mundum
Proferrem; quantum Phæsis, Tanaisque nivalis
Prolifci, canerem, distent ab origine Nili.
Pervigil at me cura domus, sobolisque tenellæ
Hic prohibet placitam, ut cuperem, deducere vitam.
Cænomanum & revocer quamvis ad mœnia rursus,
Nunc ubi nos pubem Latii, Graiisque Camænis
Excolimus, vobiscum animo tamen usque morabor.
Semper ero hic totus, semper meminisse juvabit
Tam dulce hospitium, venient oblivia vestri
Nulla mihi, semper menti bene fixa manebit*

Frons

*Frons leta, & vultus letus, quis aera tristem,
Quisque serenatis Liguris saxa invia Bobi.
Vivite felices animæ, æternumque valete.*

Libellus, ex quo hæc desupsumus, una simul compactos habet duos alios ejusdem Matii libellos, priorem Italica lingua conscriptum, quo Matius, Academiæ suæ nomine usus, maledicæ cuidam Epistolæ adversus se ob Symbola quædam Astensia, quæ carperat, evulgatæ respondet; posteriorem vero Latine exaratum, quo Artium liberalium dignitatem propugnat contra quosdam temere aulos affirmare, sordidam esse professionem disciplinarum, quas ipse Matius docebat, ac proinde Ludovicum Aretæum ejus filium in Collegium Medicorum Alexandriæ recipi debere, vehementer negabant, etsi de eo admittendo fidem Cardinali Paravicino illius civitatis Episcopo dedissent. Adversariorum suorum verba hæc fuisse Matius refert: *Fidem Cardinali dedimus; mutare sententiam in manu est nostra. Matius pater, & filius bene meriti sunt. At prior, potiorque ratio Collegii est, & studium ejus legum. Destituitur Matius multis partibus necessariis. Earum gratiam vel millies rogati, & polliciti, nec facimus, nec facturi sumus. Neque commendatio Cardinalis vim voluntati, quæ etiam in equo Phalaridis libera est, & cogi non potest, debet adferre.*

Eam Apologiam, seu Propugnationem Matius inscribit Philippo Hispaniarum Regi, & Mediolanensium Duci, & sub initium gloriatur, se in nobilissimis urbibus, Brixia primum in patria sua, deinde Astæ Pompejæ, Ticinî, & demum Alexandriæ publice do-

docuisse, & ex disciplinæ suæ officina, ubicumque docuit, doctissimos, & præstantissimos Viros prodiiisse, eos quoque, qui filio suo tunc adversabantur, quique a se, suoque filio tam in Collegii petitione, quam omni honoris, & illecebrarum genere culti, ab ipso didicerant, quidquid haberent literarum.

XII. Diomedes Sala, Brixianus, illico in Taygeti Collectione subjungitur Jo. Mario Matio, ejusque affertur primo loco distichon, dein tetrastichon, ac postremum octastichon. Publium Franciscum Spinulam, de quo superius dictum est, tam distichon, quam octastichon mordent, nam ita se habent:

De Torquato, cui Spinula Epith. inscripsit.

*Torquati jacet hic corpus, nomenque sepultum,
Horum unum extinxit Spinula, mors aliud.
Tu ne igitur credis laqueos fore vincula Amoris,
Ornite, quos cytharæ nectis Hyella tuæ?
Falleris, illa tibi prædicunt improbe letum,
Tale tuum nexu gutture funus erit.*

Ad Hippolytum Corsinum.

*Ver quot habet flores, pisces mare, sidera cælum,
Tot simul, atque aliis dotibus ipse nites.
Sed quia non dextro meditatur Apolline carmen
Spinula, virtutes non capit ille tuas.
Ut tamen ingenui det munera Mæcenatis,
Ille tibi tumultum condidit ante diem.
Ille tibi tumultum vivo? procul omen abesto,
Nunc, Corsine, tibi Spinula, ait, morere.*

Hæc ipsa argumenta a Diomede Sala tractata, Taygetus quoque non solum tractavit, sed, quod ad Spinulam spectat, in Epitaphium ab hoc conditum de-

Au-

Aufidio ita lufit, ut Diomedem Salam exfcripſiſſe videatur. Scribit ſiquidem, Aufidium, quod ejus tumulo titulum inſcripſerit Spinula, *bis periſſe*, & alio Epigrammate eundem hortatur, ut muſis vale dicens ſe penitus nihil ſcire fateatur, nam hac ratione evadet *Hiſtoricus cunctis verior Hiſtoricis*. Quod vero ſpectat ad Hippolytum Corſinum, Sacerdotem, Juris Pontificii Conſultum, Epitaphium eidem conſcripſit ipſe Taygetus, & præterea fuſius præclariffimi illius Viri laudes perſecutus eſt in Ecloga, quam inſcripſit *Corſinus* ad Paulum Soncinum J. U. Conf. Patritium Brixianum. Ea ita incipit:

*Ad Patrii Mellæ ripas, dum Sirius agros
Findit, & inſauſto mortales ſidere torret,
Corſinus nemorum decus, & ſolatia ruris,
Clauſerat in cæcam morientia lumina noctem.
Ergo omnis cineri facturus juſta ſepulto
Paſtorum de more pius convenerat ordo;
Quos inter Daphnis, Latii quem carminis uſum
Phœbus, & argutæ docuit modulamina cannæ,
Ante omnes ſocii letbo concuſſus adempti,
(Prob dolor) incubuit buſto, crinesque cupreſſu
Incinctus, tales effudit pectore queſtus
Huc ades, & Muſam non dedignatus agreſtem,
Juſtitia column, Phœbique, & Martis alumne,
Soncine, extincti ſortem miſeratus acerbam
Da lacrymas, nec enim (credo) tibi gratior alter,
Quam nuper Corſinus erat, meminique, ſolebas
Præſtantes laudare artes paſtoris, & acre
Ingenium, ac dulcem ſæpe es miratus avenam.*

At præ omnibus Taygeti carminibus hic locum habere debet Epigramma, quo Salæ noſtri Poëſis magnopere commendatur.

Ad

Ad Diomedem Salam Acad. Occultum.

Te, Sala, Hetrusco ferientem carmina plectro,

Laudat in indigenis corniger Arnus aquis.

Te, Sala, Ausonii ducentem robora Musis,

Miratur flavo Tybris ab amne pater.

Tu Sala, & Latiae decus es, Thuscæque camæna,

Ergo quid cessas? eja age, sume lyram.

XIII. Ad exhaustiendam Jo. Antonii Taygeti, quam ad manus habeo, Collectionem, unus mihi superest Taygetus ipse, reliquos enim omnes Brixianos Poetas in ea comprehenses, aut suo jam ordine recensui, ducto exordio a Cæsare Duccho, aut illis præposui, videlicet Stoam, Bonfadium, Theanium, & Siccum, quorum famam satis illustrem Taygeti Collectio potius invenit, quam fecit. Daniele vero Ceretum, cujus Poema *Salix* inscriptus, nec non Elegia ad Beatam Virginem, in Taygeti Collectione comparent, jam pluries memoravimus, dum occasio se obtulit versus ejus ex libello manuscripto de laudibus Brixie recitandi. Quamvis autem Poeticam Jo. Antonii Taygeti venam nonnulla ejus carmina superius allata jam nobis ostenderint, nova tamen hoc loco afferemus, vel ex ea Collectione, vel ex alia Academico-rum Occultorum jam pariter laudata, quæ scilicet Brixianæ literaturæ illustrandæ opportuniore videbuntur.

Quinam fuerint Academia Occultorum Primates, Taygeti ad Alphonsum Capreolum, & ad P. Antonium Soncinum, subsequentes versus nos edocebunt.

Ad Alphonsum Capreolum Comitem, Acad. Occult.

Te te Mæonio juvenis dignissime plectro,

Quem mille Hetrusca celebrant testudine Vates;

Ipse

*Ipse etiam numeris laudarem, Alphonse, Latinis;
Sed me magna nimis conantem exterrita linquit,
Pondere ne laudum procumbat Musa tuarum.
Nam si prisca domus, Majorumque inclyta virtus,
Illustrat seros ventura in sæcla nepotes,
Quis te nobilior, quis prole illustrior alta,
Alphonse, heroum genus, & Diis æqua propago?
Clarus Avis, Atavisque nites, atque hinc tua late
Atria priscorum decorantur imagine Patrum.
Floruit hic Phæbo, & Musis; hic moribus aureis;
Ille fuit patrii quondam pars magna Senatus;
Hic bello insignis Venetum victricibus armis
Præfuit, & lata populos ditione subegit. &c.
Nil igitur mirum, si noster flagrat Apollo
Te canere, & doctis tua nomina texere chartis.
Sors tamen ipsa aliquos mittet placidissima Vates;
Qui Latia freti cythara tibi carmina condant
Dignius, atque suis cælo te vocibus æquent.
Et te Bornati testudo, vel aurea Duccbi
Cæsaris ora canent, Quærenghi aut Musa disertis.
Quod si forte tuas, Alphonse, attingere laudes
Humane nequeant vires, te Delius ipse,
Delius ipse, lyra meritum celebrabit æterna,
Divinum miscens carmen, quo sæpe solebat
Dicere terribiles Jovis, Enceladique tumultus.
Sic tua perpetuis mandabit nomina fastis.*

Ad P. Ant. Soncinum Corvinum Jureconf. Acad. Occul.

*Dum cultum cythara condebas carmen Hetrusca,
Soncine, in Sylvis edite Pieriis,
Mirabar dulci sistentem flumina cantu,
Ducentem & blando saxa, ferasque sono.
Quin te laudabant Musæ, laurique coronam
Nectebat capiti Delius ipse tuo.
Publica sed postquam vigilante negotia cura
Suscipis, atque tibi sumpta severa toga est,
Non secus absentem mater gemis anxia natum,*

P. II.

H h

Tc

*Te metuunt sacrum deseruisse Cborum.
Ab ne crebra fori sceleris jurgia, ne sis
Æternus Phœbi, Thespiadumque dolor.*

Exstat utrumque hoc carmen in posteriore Collectione, scilicet Academicorum Occultorum carmina complectente. In priore autem, quæ ipsius Taygeti studio carmina Præstantium Poetarum comprehendit, adest Epigramma, ex quo occasionem sumemus, aliqua proferendi scitu utique digna, & ad Brixianæ literaturæ decus magnopere conducentia.

Ad Ludovicum Callinum Jur. U. Conf. Patritium Brix.

*Quam debet tumidis pelagi servatus ab undis
Tyndaridum faustis Navita fideribus,
Tam tibi Taygetus, qui se, Calline, fatetur
Quicquid is est, totum muneris esse tui.
Ille etenim quoties ingenti fluctuat æstu
Curarum, ac vasto mergitur Oceano,
Ipse venis, clavumque tenes, navemque gubernas,
Incolumemque cito trans maria alta vebis.
Hinc felix, quæque ipse facis, grata otia adeptus,
Pierius optat te celebrare modis.
Ingens sed laudum pondus, Vir summe, tuarum
Languida non hujus ferre Tbalia potest.
Nunc sume hæc, minimos ut tburis sumit acervos
Omnipotens hominum, cælicolumque pater.*

Inter Epistolas Italicas M. Antonii Flaminii in Collectione Manutiana, & aliis, una adest ad Ludov. Callinum plena utique bonæ frugis, quæ fufius persequitur ea ingenii, ac doctrinæ præsidia, quibus instructos esse decet politiorum literarum Doctores, quæque, si in illis desiderentur, quod plerumque accidit, in causa sunt, ut pueri tempus in Scholis frustra terentes, inde

inde exeant literarum, omnisque omnino eruditionis expertes, absoluto etiam studiorum curriculo. Monet propterea Flaminius, nihil utilius a plerisque Professoribus effici posse, quam si, longius amandatis Scriptis proprio Marte compositis, non alia discipulis themata exhibeant, quam ex Cicerone deprompta, quæque ab iis in Latinum sermonem conversa, teneras eorundem mentes ingenuo, ac nitido illo dicendi genere, quo divinus Orator maxime excellit, informant; cavendumque, ne imitandum illis proponant, seu Erasmi, seu Melanchtonis, seu nonnullorum Italorum styllum, qui Latinæ linguæ pulchritudinem, proprietatem, elegantiam, puritatem, ac copiam prorsus ignorant. Hæc Flaminii Epistola ad Calinum nostrum, mirum quam valde arriserit Bartholomæo Riccio Lugienfi, nam ad ipsum Flaminium scribens Epistolar. lib. 5. testatur nihil sibi jucundius accidere potuisse, quam ut editæ sint Flaminii literæ illæ, quibus a Calino qua ratione filius suus in politioribus literis institui debeat, pereleganter demonstrat, nam eam ipsam viam se in suo Ferrariensi Principe instituendo sequi profiteretur, multis licet iridentibus, frontem contrahentibus, ac palam etiam damnantibus, quos nimirum pudet a pervulgata via, longissima utique, & barbara abduci.

Scripta est ad Ludovicum Calinum Epistola illa a Flaminio ea quidem de causa, ut Mutius ejus filius egregii ingenii adolescens, bene, ac sapienter erudiretur. Mutii Calini nomen, & eruditionem celebrant Pauli Manutii Epistolæ, nam ad Franciscum Luifinum

H h 2

scri-

scribens Manutius Epistolar. lib. 1. de Calino hæc habet: *Calinum, puto non nosti, qui clarissimum juvenem Aloysium Cornelium, singularis viri Joannis Cornelii filium, in Cyprum insulam secutus, tertium jam annum abest; sed mihi hoc, velim, credas affirmanti, ea bona, quæ magister tuus Aristoteles laudabilia esse dicit, omnia fere in illo adolescente aut esse jam, aut brevi, ut ego auguror, futura; rogatque eundem, ut & ipse in confortium recipiatur cum Calino, & Amaltheo, eloquentiam (inquit) tres optimi adolescentes, ætate fere pares, concordii studio, sicuti pulcherrimam virginem, diligite; quod si me etiam socium recipitis, & rivalem in hoc amore fertis, erit præclara consensio, & Latinæ linguæ formam, quam superioribus temporibus turpi barbarie vitiatam, nunc cognoscere vix possumus, post hac, ut opinio mea fert, intactam, illibatamque tuebimur.* Joannem Baptistam Amaltheum, & Franciscum Luifinum, utrumque Foroju-liensem, adhuc juvenes Lilius Gregorius Gyraldus de Poet. nostr. temp. Dial. 2. & ipse commendat, ac bene de iis sperandum scribit, aitque Amaltheum Venetiis apud Lipomanos juventutis institutorem agere, itidem Luifinum adolescentum Corneliorum, huncque inter cætera carmina scripsisse Epodicum de suo ipsius die natali Horatianis numeris ad Calinum. Trium Amaltheorum carmina recitantur in Collectione Joannis Matthæi Toscani.

Murius hic Calinus, de quo Manutius, ad Archiepiscopatum Jaderensem ascendit, quem postea cum Interamnæ Episcopatu commutavit. Eam migrationem Calino gratulatur Paulus Manutius Epistolar. lib. 7. eique

que respondet Calinus Epistola, quæ re peritur inter illas Clarorum Virorum sæpius citatas, falsus, quod prudenter, & amanter scripserat Manutius, se ipsum magnopere gaudere, quod quum vix bidui intervallo ab Urbe abesset amicos suos aliquando visendi, sibi minime defutura foret opportunitas, *si* (inquit) *cum hac iter facere contigerit, ad hospitem maluerint, quam ad cauponem divertere.* In ea Calini nostri Epistola legitur vere aurea sententia Christiano homine, & sacro Antistite admodum digna, quæ hujusmodi est: *Opes, dignitatem, amplitudinem, & reliqua hujus generis commoda, equidem baud tanti facio, quin illis carere facile possim; sæpiusque mihi venit in mentem, me ejusmodi personam a Domino impositam sustinere, ut penitus persuasum mihi esse debeat, si cui hæc desint, magno eum officii onere levatum esse: siquidem laborandum sit, ut quæ ipsa bona videantur, nobis etiam bene eveniant. Quo in genere quoniam paucissimos reperias, qui graviter non offendant, & quæ ad beneficentiam, & sublevandos, ornandosque homines parata habent instrumenta, iis recte utantur; qui sibi polliceri audeat, fore, ut, cum harum rerum copia circumfluat, tam difficili, & lubrica via, sine casu, aut prolapsione aliqua ingrediatur, næ ille amens potius, quam arrogans, si, quod sentio, velim dicere, habendus sit.*

De Mutio Calino, ejusque Scriptis fusius differendum erit in postrema hujus Operis Parre, cui sacra reservavimus. Joannis Antonii Taygeti carmina allegandi, & recitandi opportunitas se inferius etiam exhibebit.

XIV. Hie-

XIV. Hieronymus Bornatus, quem plures, ut superius vidimus, Brixianæ Occultorum Academiae principes celebrarunt, & ipse collegis suis vices rependens, eisdem, præsertim Cæsarem Duchum, Petrum Antonium Soncinum, Jo. Antonium Taygetum venustis versibus ornare non prætermisit. Exstant in libello Academicorum eorum carmina complectente, atque hujusmodi sunt.

Ad Cæsarem Ducchum Jureconsf. Acad. Occul.

*Cæsar candide, qui meis ocellis
 Longe carior es mihi; tuæ nunc,
 Quæso, carmina quæ canunt Camænæ,
 Ut solent medio legi Theatro
 Digna, scribere te tuo sodali
 Caro ne pigeat, rogo, obsecroque,
 Ut curas abigant, molestiasque,
 Quas fert igneus æstus; ipse vero
 Gratus (cum caream lepore Musæ)
 Mittam mille tibi, ferax tulit quæ
 Hortus, aurea mala, roscidosque
 Flores, si libet, hinc tibi rependam.*

Ad Petrum Ant. Soncinum Jureconsf. Acad. Occultum.

*Frustra versculis parum venustis,
 Leporis pater, elegantieque,
 Adumbrate, petis, meis ut ipse
 Canam sollicitos tuos Amores,
 Virtutesque tuas; mihi Camænæ
 Negant nam gelidos suos recessus,
 Et libare vetant meos labellos
 Pontis pellucidi sui liquores.
 Quod si perpetuis cupis libellis
 Æternus fieri; optimi Poetæ
 Querengi hoc lepidas roges Camænæ
 Ut præstent tibi; nam perennius tunc*

No.

*Nomen ære tuum inter alta tollens
Sidera (ut decet) & tuos Amores.*

Ad Jo. Antonium Taygetum Acad. Occultum.

*Nocturne, Aonidum decus sororum,
Atque delitiæ, suos lepores
Phæbus cui ipse dat, elegantiasque,
Cum juncto pede seu tus Tibulli
Condīs carmina, seu modis Catulli
Mellitos oculos canis puellæ;
Abstrusus tuus, ille, cui Camænæ
Negant versiculos, facetiasque,
Multum te rogat, Urbe ut hac relicta
Ad suum properes, Amice, agellum,
Dignum Corytio, & tuis ocellis.
Cæsar huc veniet tuus sodalis,
Cæsar æque meus, Provetium qui
Latus nunc colit, ac beat Camænis.
Hic Ver perpetuum suos tepores
Servat, & varios benigna tellus
Fructus protulit; invidere possint
Quos mihi Hesperides; tuos Amores
Canes dulcius hic modis venustis.
Quare (si sapiēs) viam vorabis,
Nocturne, Aonidum decus Sororum.*

Alium Sodalem suum, nimirum Albertum Lollium,
ejusque Muscum Bornatus tribus Epigrammatis lau-
davit, quorum primum ita se habet:

De Musco Alberti Lollii Acad. Occulti.

*Parnassi quondam, excelsique in vertice Pindi
Clara domus Phæbi, Pieridumque fuit.
His spretis, gratam dum quærunt ponere sedem
Cynthius, Aonidesque, hanc coluere domum.
Felix, o nimium felix, liberrime Lolli,
Nam tibi Musco cuncta lepore vigent.*

Al-

Alberti Lollii Ferrariensis de vitando otio Orationem Italicam ad Academicos Occultos typis edendam curavit an. 1567. Bartholomæus Arnigius Brixianus, ejus Academiæ & ipse sodalis, qui in Epistola ad Alphonsum Capreolum, Cætus ejusdem Præsidem, ei Orationi præposita, & plura habet in ipsius Academiæ laudem, quemadmodum & Lollius in Oratione, & illius originem anno 1563. assignat. De Lollio, ejusque Muleo, nec non de aliis Academiis, quæ annis illis proximis in aliquot Italiæ urbibus constitutæ erant, hæc leguntur apud Gyraldum Dial. 2. de Poet. nostr. temp. *Illæ quidem multum splendoris, ac lucis præferre videbantur, sed paulo post in fumum, & nebulas evanuerunt. Verum & eorum cognomina, quales essent futuræ, significabant. Quare de his nolo verba faciamus; nam quædam vix inchoatæ, esse desierunt: ut quam erigere hic, Albertus Lollius enixe studebat, de qua exstat, & legitur Oratio Ferrini nostri, & item altera ipsius Lollii.* Nostræ Occultorum Academiæ brevem fuisse ætatem aperte constat ex nova Academia Brixie instituta, & Assiduorum dicta, cujus Apparatum literarium pro adventu Præfulis nuper electi Jo. Francisci Mauroceni celebrando Brixiensibus typis an. 1586. evulgatum ad manus habeo, dicavitque illum Gabrieli Cornelio Brixie Præfecto unus ex novis illis Academicis, in Epistola Nuncupatoria affirmans, Assiduorum Academiam erectam fuisse, *ut nobilissimæ Occultorum Academiæ, quæ temporum injuria pene jam deleta est, memoriam renovaret.* Ea, ut vidimus, anno 1563. cæpit, oportet itaque per viginti ad summum annos floruisse. Postea
tamen

tamen quadantenus revixit, quo ipso tempore Errantium Academia jam fuerat exorta.

Sat prolixa Elegia (centum scilicet, & amplius versibus constat) Albertum Lolium, ejusque Museum laudavit Jo. Antonius Taygetus, afferturque inter Carmina Academicorum Occultorum. Vincentii quoque Metelli, Viri eruditissimi, tumulum honoravit Hieronymus Bornatus hoc Epigrammate.

Vinc. Metelli, Viri eruditissimi, Tumulus.

Funde precor lacrymas, mecum suspiria funde,

Quisquis ades, sacris addeque tibus focis.

Delitiae Phœbi Vincentius ille Metellus,

Brixia quem genuit, marmore clausus inest.

Latinas etiam Musas excoluisse Metellum, dignoscimus ex ejus versibus sparsim vulgatis, comparetque ejus nomen inter Poetas Latinos, quos Joannam Aragoniam celebrantes in unum collegit anno 1555. Hieronymus Ruscillus, quibusque coronidem imponit Andreæ Mutii nostri Hendecasyllabon, cujus initium:

Ingens Pieridum decus sororum,

Ruscille, & pater elegantiarum,

Mitto dona tibi meæ Camænæ,

Quæ Templum referantur in tuum illud,

Soli Aragoniæ Deæ dicatum,

Et Templi Dominiæ tuo, meoque

Tandem nomine consecrentur alta

Ad donaria, maximosque honores &c.

XV. Inter Academicorum Occultorum carmina in citato sæpius libello, ea etiam leguntur, quæ Ludovicus Federicus, unus ex illis Academicis, composuit. Hexametri versus primo loco comparent, quibus acri-

P. II.

I i

ter

ter queritur , severius in suam , fuorumque Majorum conditionem ex Brixiani Senatus decreto inquiri , ut in Curia ordinem recipi valeret.

Ad Jo. Antonium Zanettum Jureconsul.

*Nollem forte tuas lassas , dum publica reddis
Judicia , & rerum vexaris turbine longo ,
Illepido sermone meo frustrarier aures.
Sed tibi cum nullo aula domus sit plena cliente ,
Si dulcis sortem es unquam miseratus amici ,
Queis frangar curis , & quos sufferre labores ,
Nunc cogar , paucis , Antoni , si vacat , audi.
Plurima contorquent animum mihi , sed magis illud ,
Quod liber natus , similisque parentibus , atque
Non diri imperio solitus parere tyranni ,
Vilior efficiar nunc servo compede vineto.
Est mihi nam primum præscriptum tempus agendi ;
Monstrandique Domus Federicæ antiqua fuisse
Stemmata , nec quod opus manibus fecisse parentes ;
Ut ne prætereat mensis , sit perspicendum.
Quid faciam ? senibus paucis , quos invida præbet
Vivere mors memores , expono , quid sit agendum ,
Quid respondendum recte , & sine crimine falsi.
Urbe etiam quod sim natus monstrare necesse est ,
Insuper & fuerit quæ nutrix , quisve Sacerdos ,
Baptismi ad fontem qui me sacraverit olim.
Deinde simul Patres , quos sedula cura Senatus
Tres dedit , invenio , meque ad sua commoda promptum
Ostendo , & testes tunc respondere paratos.
Conveniunt tandem , claudus deest impiger ille
Scriba ; cito veniet , referunt , quos mitto vocatum.
Expectant domini , apparet nusquam tamen ille .
Jam clamant , timidi nos expallescimus , ardet
Intus bile jecur , lapsa tandem advenit hora .
Consurgunt , statim nos inde recedimus , ipsis
Lingimus at testes veluti cribro excutiendos .
Hoc quoque nec satis est , annalia publica lustro ,*

Nobi.

*Nobilitas veterum patrum quæ scribitur omnis.
 Inde etiam tincis corrofas promo tabellas,
 Atque situ multo consumptas, quæ mea firmant
 Nobilis, antiqua, & quam longa trabatur origo.
 Cuncta ego perfeci; restat quid? nil modo restat,
 Nec tamen expedit; quid causæ est? Maximus ille
 Ordo vult etiam melius producta probari.
 Herbannum ire parant Proceres, quod forte viri illi,
 Quæ sit conditio majorum, nostraque quæ res,
 Planius exponent; cessant tamen illa, latenter
 Sunt etenim facienda; mihi denique menset
 Labuntur septem nec me tamen expedit ullus.
 Cuncta ego quid referam? mea stat dulcissima Mater
 Exanimis, tandem expectans si forte beatos
 Curia nos faciat, tanto, & dignetur honore.
 Hec tibi, dum vigilēs cogunt me ducere noctes
 Insomnes curæ, querula descripta Camæna
 Carmina nunc dicto; passus quoque tu graviora,
 Sed jam læta, vale, fortem nec despice nostram.*

Sequuntur Elegi, & post ipsos Epigramma, ac dein-
 de Hendecasyllabon, quod hujusmodi est.

Pro adventu Bernardi Georgii Prætoris.

*Molles Pieridum joci, & lepores,
 Et lusus teneri, & sales venusti,
 Et gratæ Charites, Apollo tuque,
 Et vos, qui numeros novem sororum
 Vates, & colitis sacros recessus,
 Huc huc unanimes venite cuncti;
 Et dives veniat, probusque pauper,
 Atque omnes celebrent virum disertum;
 Bernardum, Veneti jubar Senatus,
 Cunctis qui tribuit suum, Soloni
 Virtute equiparandus, & Lycurgo,
 Quem lumen Latine, Atticæque lingua
 Dicimus merito, elegantiorum
 Illo, quem Ausonii colunt, vel illo,*

*Cujus obstupere lingua Aibene,
 Quem Musæ Aonio abluere fonte;
 Quare carminibus canant Georgi
 Virtutes gravibus senes verendi,
 Maturique viri, & puellæ bonestæ;
 Atque illi celebrent virum prudentem,
 Et pro hujus voveant salute multa;
 He ducant lepidas simul choreas,
 Et spargant Violas, Rosasque passim.
 Demum omnes faciant, ut omnis ordo
 Illum suscipiat probe, & decenter.*

In libello an. 1572. edito Venetiis Poemata varia studio Petri Gherardii ad Cardinalem Sirletum in Fœdus, & Victoriâ contra Turcas ad Cycladas parâ complectente, adest pag. 173. Jo. Antonii Taygeti Brixiani Ecloga nautica, *Idmon* inscripta, ad Ludovicum Federicum Jureconf. Patritium Brixianum, quem Taygetus ita affatur:

*At tu, quem dulces venientem in luminis oras
 Astræa, Autumni portas, chelæque relinquens,
 Ipsa suas docuit leges, cuique innuba Pallas
 Diversos cæli motus, stellasque micantes,
 Et dedit occultas rerum cognoscere causas,
 Macste tuis, Federice, actis, & sanguine avito;
 Huc ades, & nostris saveas, precor, optime, votis;
 Non injusta peto, Tu nam persepe recessus
 Aonios lustras, & dum felicia condis
 Ipse tua intentus miratur carmina Phœbus.*

Hæc ipsa Taygeti Ecloga separatim edita fuerat Brixianæ an. 1571. per Vincentium Sabium, curante Simone Angelo Suspirio, Academico Occulto, cujus existat ad libelli calcem Epistola ad Federicum nostrum, & in ejusdem fronte existat Cosmi Lauri, Academici
 pari-

pariter Occulti, Epigramma in laudem ipsius Taygeti.

Antequam Academiam Occultorum dimittamus, aliquid de ejus Mecœnate dicendum, afferendi nimirum versus, quibus labores suos Academici eidem obtulerunt, quique in fronte libelli sæpius citati leguntur.

Ad Jo. Franciscum Commendonum Card. Amplissimum,

Academici Occulti.

*Quod miras animi, ingenique dotes,
Ut tu, possideat peræque nemo,
Quod es fidere clavior micante,
Factis magnanimis tuis, & ipsis
Quod summa es pietate Diis propinquus;
Gestamus te animis, & ore semper,
Atque in interioribus medullis,
Vir amplissime, ob idque nostrum habere
Hunc damus tibi muneri libellum;
Quem quidem vocitare nec venustum
Audemus, neque dicere elegantem,
Tuo ni prius ore comprobetur.
Illo scilicet ore, quo nec ullum
Est disertius, eruditiusve,
Nec sciens magis elegantiarum.
Qui si contigerit tibi placere,
Si videbitur esse amore dignus,
Commendone, tuo, & tuo favore,
O tunc nos ter, & amplius beatos,
O tunc auspiciis bonis profectum
Mellitum, lepidum, aureum libellum;
Quem jam pessima fama non lacesset,
Nec lædent Critici sui venenis
Tanti judicio viri approbatum.*

In eo ipso libello carmina Caroli ex Comitibus S. Bonifacii, Academici Occulti, incipiunt a quibusdam hendeca-

decaſyllabis in laudem ejuſdem Cardinalis, eique He-
xaſtichon pariter Carolus inſcripſit. Commendonum
Cardinalem verſibus etiam condendis excelluiſſe, quin
hos primam fuiſſe ipſius ad Iulium III. Pontificem
commendationem, prodit in ejuſdem Vitæ lib. 1. c. 8.
Antonius Maria Gratianus, narrans Iulium hortis ex-
tra Portam Flaminiam a ſe ædificatis, verſus a Com-
mendono compoſitos inſculpi juſſiſſe, quos nimirum
reliquis omnibus, quorquot non Romæ ſolum, ſed
per Italiam quoque, decora ingenia, ea arrepta ma-
teria, certatim ediderant, præferendos exiſtimavit.

XVI. Inter Brixianos Poetas ut locus aliquis, nec is
quidem poſtremus, Comiti Brunorio Gambaræ assi-
gnetur, facit P. Franciſcus Spinula, de quo ſuperius
pluribus locis: Hic enim non ſolum verſibus ſuis ma-
gnopere excoluit eundem Brunorium, laudavitque ob
poeticæ venæ felicitatem, ſed præterea plura Brunorii
carmina ſuiſmet Poematis inferenda curavit. Iis ita-
que conjuncta viſitur ſubſequens Elegia Poemat. lib. 2.

*Ad P. Franciſcum Spinulam Mediol. Jo. Brunorius
Gambara Brixianus, Comes.*

*Vix tandem patrio retinet te Brixia vultu,
Dives opum, & Veneto lata ſub imperio,
Iſtic ingenuas exerces Palladis artes,
Atque inter Muſas ora diſerta moves.
Iſtæ nempe ad noſtras rumor quidam attulit aures,
Tu tamen buc primum ſcribere debueras;
Ne tantum non nota eſſent tua commoda nobis,
Qui te præ cunctiſ, Spinula, diligimus.
Sed cur iſta magis cæpere oblivia, miror,
Te, quod ab officio tam cito deſtiteris.*

Nec

*Nec tua jam pridem, quorum letabar honore,
Venere ad nostras carmina docta manus.
Hinc reor adversas nobis astare sorores,
Quæ nemus Aonium, quæque Heliconæ colunt.
Vena ingrata fuit sine te Permessidos undæ,
Quare cum doctis nil mihi virginibus.
At te, cui vatum tutela aspirat Apollo,
Scribere facta decet fortia Cenomanum,
Et sacros cineres, Divorumque aurea dona,
Atque urbem gelidæ fontibus irriguam,
Thracius ut celsas qui primus condidit arces,
Gallica Trojanas duxit in arva manus,
Fertilibusque novam posuit sub collibus urbem;
Quam celeri Melo turbidus amne secat.
Aucta opibus crevit, Romana antiquior urbe,
Quamvis & Phrygios utraque jactet avos.
Sic quodcunque tibi veniet de pectore carmen,
Te, precor, omne meæ serviat hoc patriæ.
Culta fave, jam surgit opus, nunc Brixia vati,
Quale sonat dulci Cynthius ipse lyra.
Non ingrata fuit divino Roma poetæ,
Cum caneret fractas Laomedontis opes:
Illi & Parthenope largita est munera vivo,
Quin etiam extincto busta superba dedit.
Et qui Pelignis vates est natus aquosus,
Extremum Scythica clausit in urbe diem,
Illic nec tumuli caruit combustus honore,
Nec lacrymas duri continuere Getæ;
Qui, quanquam rigidum fuerat projectus in orbem,
Publica virtutis præmia ab hoste tulit.
Et caput illius sacra cinxere corona,
Laudibus ornarunt, & monumenta viri.
Hoc vere est, patrios sine cæde extendere fines,
Atque homines semper demeruisse bonos.*

In libro autem Hendecasyllab. leguntur ejusdem
Brunorii hendecasyllabi, quorum initium :

Fran-

*Francisce Aonidum sacer Dearum,
Et Phœbi comes, iste namque dulcem
Donavit citbaram tibi &c.*

In fine autem eorundem Brunorius concinnatam a Spinulæ Psalmodum Paraphrasin, suppletamque Flaminii Camœnam, maturo minime elevatam partu; his verbis extollit:

*O si de facie, te amice, nossem,
Qui desiderio tui videndi
Peruror, cupida ut puella amantis,
In te pascō animum, tuisque chartis,
Nam vatem redolent pium, & beatum.
Lætor præterea, quod ipse vivat
In te, Flaminii, quem acerba nobis
Ab fata eripuerē, sed benigni
Cœlites statuere, ne periret
Poetæ interitu illius camœna
Maturo minime elevata partu,
Quam subinde sinu excipis tenellam,
Atque illam reficis beato amore,
Quo Divorum animi fruuntur usque
Inter agmina cœlitum beata.
Ut jovi sit specie magis venusta, &
Prodeat solito ampliore cultu.
Quare, cum nequeam tibi decenter,
Quas jam debeo, gratias referre,
Nec quos sunt homines, eruntque posthac,
Habere, aut agere, aut referre possunt,
Multa Jeshades tibi rependat
Merenti bona, laureamque frondem,
Expressa ob sua tam laboriosa
Sacra carmina, mysticos & hymnos,
Dis charissimus, optimusque vates.*

Inter Spinulæ Poemata, omnis prorsus generis, edita typis, quæ mihi in manibus sunt, jam dixi superius,

rius, eam Paraphrasin minime comparere. Lucem utique vidit Basileæ primum anno 1548. & de ea Editione, ut puto, in Carmine, quo Spinula modo recitatis Brunorii hendecasyllabis respondet, queritur ipse; dum Germaniam, se satis superque reclamante, suum Poema jejunum prorsus, & impolitum edidisse, scribit, subditque:

*Tamen, si superi mihi faventes
Orio dederint frui cupito,
Expendam omnia, diligensque, lima
Et mordacius utar, ut latinum,
Quod absolvere molior, Poema
Flamini videatur esse totum.*

De Davidis Psalmis a Spinula paraphrastice & scriptis, & scribendis, exstat M. Antonii Majoragii testimonium ad Joannem Baptistam Porrum in hendecasyllabis, qui in Spinulæ ipsius Hendecasyllab. libro leguntur pag. 47. Ita enim in eorum fine Majoragius ad Porrum,

*Triginta hos cape nunc venustiori
Florentes serie, & lepore cantus,
Confectos tibi Spinulæ labore:
Mox totum accipies bene expositum,
Confectum tibi Spinulæ labore,
Romana Davidem lyra canentem.*

Rainutii etiam Gambaræ, Brunorii Comitæ filii, amicitiam coluisse Franciscum Spinulam testantur plures hujus versus eidem inscripti, inter quos adest Epigramma de Joanne Francisco Raynutii fratre, ad Cardinalatus apicem evecto.

XVII. Vincentius Zinus, Brixianis propemodum ignotus, tres carminum libros elucubravit, quos in exiguae molis volumine Veneti typi an. 1560. publicarunt. In his patriam, & conditionem suam Zinus declarat subsequente ad Herculem Ferrariæ Ducem Epigrammate:

*Non ego sum Romæ, mediis nec natus Athenis,
Sed me progeniuit Balneolense solum.
Nec Phæbo vates genitus, genitusve Sibylla,
Melonisque bibi, non Heliconis, aquas.
Zinaque gens nostra est. Vincenti nomine dicor,
Si patriam quæris, Brixia mi patria
Cum mihi plus ævi dabitur, majora dabuntur,
Hæc tibi sunt nuper quæ mea Musa dedit.*

Eundem Herculem Ducem, aliosque ejus familiæ Principes Zinus majori ex parte carminibus suis decantavit, & in Elegia adversus Invidos eum ipsum Ducem, tanquam suum Alcidem, jaçtat, sub cujus clava tutus foret. Hinc est, in iis Zini carminibus frequenter Viros illos doctos celebrari, quibus ea tempestate Herculis, & Renatæ ejus conjugis Aula abundabat, nimirum Portum, Antimachum, Baldum, Pignum, Calcagninum, Ariostum, Strozzas, Gyraldos, Guarinum, Madium, Musam, & Manardum.

In Nuncupatoria autem suorum carminum Epistola ad Nobiliss. adolescentulum Philippum Contarenum, Petri Francisci Zini, doctissimi illius, editisque Operibus, præferim ex Græca versionibus, admodum celebris, Archipresbyteri Lonati, oppidi in Brixiano agro, ac Veronensis postea Canonici, consanguineum se testatur Vincentius his verbis: *His ego te do-*
sibus

tibus illustrem cernens, cum me Lonatum superioribus annis sæpe conferrem, ut Petrum Franciscum Zinum consanguineum meum, apud quem tu optimis disciplinis operam dabas, bonoris gratia viserem, facere non potui, quin te mihi semper amandum, observandumque proponerem. P. Franciscus Zinus docuit Patavii moralem Philosophiam, exstatque typis edita an. 1574. Venerit ejus de Philosophiæ laudibus Oratio, quam habuit in Gymnasio Patavino, quum publicum illius interpretandæ munus aggressus est.

In fronte carminum Vincentii Zini visitur retrastichon a Marco Contareno, Philippi fratre, compositum, quod est hujusmodi:

*Cur desiderio scriptorum, Zine, tuorum
Nos crucias? nimium suppressis illa diu.
In lucem deprome novem jam dona sororum,
Divina ingenii da monumenta tui.*

XVIII. Æque ac Vincentius Zinus, omittitur a Brixianæ Bibliothecæ Scriptore Josephus Milius Voltolina. Hujus Poema, de Hortorum Cultura, tribus libris distinctum, & Vincentii Sabii typis an. 1574. Brixie editum, qua commemoratione, qua laude sit dignum, declarat Euphrasti elogium in Epistola ad Bonianum Gratarolum Poemati illi præfixa: *Non defuerunt (inquit) Viri doctrinis præstantissimi, qui de Hortorum Cultura præcepta doctissime, & elegantissime literis mandaverunt quæ plurima: inter quos. Columella Poeticis numeris ea præcepta tradidit diligentissime, ut jam nihil amplius addi posse videretur. Ætate tamen nostra Josephus Milius Saloensis excellentiore quadam musa*

K k 2

tri-

tribus libris de Hortorum Cultura ita feliciter cecinit ,
ut quotquot ante ipsum scripserunt, omnes unus ipse fa-
cile superaverit.

Quum Poema hoc Voltolinæ Brixiani ipsi, ut dictum
est, propemodum ignoraverint, nil mirum, ejus nul-
lam mentionem fieri a Renato Rapino in Præfat. ad
quatuor libros Hortor. in qua totus est in tractandi a-
le argumenti difficultate exaggeranda, atque inter cæ-
tera: *Quæ vero temeritas tentare rem, quam partim pro-
pter difficultatem eorum, quæ prætermiserat Virgilius,
partim propter eorum, quæ cæperat, excellentiam, perse-
qui nullus posterorum ausus sit?* Ausus id fuerat carmi-
ne Epico non infelici, ut aliqui loquuntur, L. Junius
Moderatus Columella; & quam feliciter illud ipsum
tentaverit Saloensis noster Poeta, speciminis loco sint
versus, quos modo recitabo. Hi primo loco Isabellam
Sociam, cui Poema inscribitur, ad discendam horto-
rum culturam invitant, deinde Bonfadii invocant Mu-
sam, ac postea argumenti partes omnes declarant.

*De Hortorum cultura Liber primus, Josephi Milii Voltolinæ
ad Isabellam Sociam.*

*Huc teneræ, huc huc ferte pedem, mea flamma, puellæ,
Est quibus Hortorum cordi cura, huc, precor, omnes
Currite; Tuque adeo Sociæ pulcherrima gentis,
Virginei decus una chori, Isabella, venito.
Hortorum hic cultus discet; quid scilicet Hortos
Perpetuo letos faciat bene olentibus herbis;
Ni gravibus rennis terram subvertere rastris,
Et brevibus versans pala distinguere sulcis.
Non labor, Hesperides sælices quo minus Hortos
Excolerent, ullus fecit; labor ullus, amatos
Negligere Hortorum cultus, induxit Adonin;*

Alci.

Alcinoûm nunquid, cui jam Phœacia tellus
 Paruit, & populo dixit qui jura superbo,
 Sub pingui puduit lactucam condere terra?
 Aut vacuis digito betas infigere glebis?
 Ille baud erubuit, duro sola frangere raſtro,
 Et ſuper immundum cinerem conſpergere, & herbas
 Extirpare manu nocituras pinguibus Hortis.
 Dulce illi hoc ſtudio, grata illi hæc una voluptas:
 Felix ille Hortos non aſpernatus, opacis
 Conſenuit, vitamque ſenex ſuavit in Hortis.
 Ergo age, tu mea cura veni, Iſabella, tibi ipſos
 Dicimus, Hortorum (ne queſo, deſpice) cultus.
 Bonſadi pia Muſa, colis quæ hæc frigida Tempe,
 Antraque opaca, ſonans rapido qua ſtumine Clisſis
 Gazano vicina tuo prata irrigat, umbras
 Inter, ubi nemorumque comas zephyritides auras
 Perpetuo tecum, comites tibi ludere fama eſt;
 Si tibi de viridi Benaci in littore muſco
 Conſtitui, quæ circum aras, nova ſerta quotannis
 Appendam, ſacriſque ſuper redolentia flammis
 Tibura adolem, precor, hæc niveis allabere pennis;
 Hicque mibi, teneras mecum miſerata puellas,
 Da canere Hortorum cultus, faveasque canenti.
 Quam velit Hortus humum; quæ illius cura colenda;
 Ponere quo ſepes deceat; quoque ordine viſes;
 Nobilis hic optet quas ſedes qualibet arbor;
 Et quæ, quotque modis, hinc condimenta parentur;
 Semina delectu cultæ quo credere terra;
 Quique verbis locis edulibu', qui floribus aptus:
 Naſcentis quæ cura oleris, qui cultus alendo;
 Quo transplantandæ ſint tempore qualibet herbæ;
 Sint veſpertina ſunt ſontibus exbilarande;
 Milieque delicias hic vos formare docebo,
 Smilace. vel mirto, aut hedera, buxove virenti,
 Tandem divitiis Hortorum poma legemus;
 Si modo promiſſum dabitur deducere carmen.
 Vix, quam Milius noſter ingrederetur, difficulta-
 tem,

tem, & salebras, ne uno quidem verbo ipse, ut apparet, indicavit. Contra vero qua ratione eas Lectoribus inculcaverit, atque jactaverit in Præfatione ad suum Poema Rapinus, jam vidimus; idemque, quos sibi canenti plaulus sylvæ, & quercus Galliarum excitaverint, his versibus in fronte libri 2. expressit:

*Vos grandes luci, & sylvæ, aspirate canenti:
 Is mihi contingat, vestro de munere, ramus,
 Unde, sacri quando velant sua tempora vates,
 Ipse & amem meritam capiti imposuisse coronam.
 Jam se cantanti, frondosa cacumina, quercus
 Inclinant, plauduntque comis nemora alta coruscis.
 Ipsa mihi letu fremitu, assensuque secundo,
 Et totis plausum responsat Gallia silvis,*

Quanto rectior, & modestior Milii Saloensis Invocatio:

*Bonfadi pia Musa, colis quæ hæc frigida Tempe,
 Antraque opaca, sonans rapido qua flumine Clysia
 Gæzano vicina tuo prata irrigat &c.
 Huc niveis allabere pennis,
 Hæcque mihi, teneras mecum miserata puellas,
 Da canere Hortorum cultus, favæsq; canenti.*

Equidem Milia Voltolina: potius, quam Rapino eam ipsam laudem deberi quis censeat, qua Horatius in Art. Poet. dignum putavit Poetam ita incipientem, *Dic mihi, Musa, virum*, potius quam Poetam, cujus Poematis initium, *Fortunam Priami cantabo*.

Opus suum Josephus Milius Voltolina Joachino Scaino Juris perito præstantissimo dicavit, tanquam primos Unanimis Academiæ sætus, quam prope intermortuam ejusdem patrociniæ commendat. De Scaini autem laudibus, & de Æthereorum Academia, in qua ipse

ipse Scainus primas tenebat, hæc habet Voltolina :
*Ea enim natus es patria, ex qua, tanquam e seminario,
 Viri in omnibus artibus peritissimi alto transferuntur; ex
 ea familia ortus, quæ Saloi, quasi aliquod lumen; sola
 videatur, Scaina familia, prudentia, sanctitate, pietate,
 religione, ac liberalitate lucere. Tu præterea in celeberrimis
 literarum ludis, Musis Græcis, Latinis, Hetruscis,
 tanta assiduitate, atque diligentia studuisti; ut æqualibus
 tuis omnibus longe præstiteris. In Patavino etiam
 Gymnasio, tam ardenti animo, in præceptis Philosophiæ
 versatus es, ut quicquid Plato, quicquid Aristoteles
 docuerit, optime teneas; itaque ibidem in nobilissima
 Aethercorum Academia maxima Scholasticorum, ac Philosophorum
 corona, summo illorum plausu, lectionem de tempore
 in duos dies consumptam ita exposuisti, ut nulus
 esset auctor, neque Græcus, neque Latinus, neque Hetruscus,
 qui de ea re verba fecerit, quin illorum sententias
 in tuam expositionem collegeris. Quid dicam de legum
 peritia? in quibus tantum profecisti, ut id omnibus, qui
 te de Justitia publice differentem audiere, admirationi maximæ
 fuerit.*

Nomina illustriorum sua ætate Saloensium, Milius
 verbis his, qui in lib. 2. leguntur, indicavit,

*Numve sinum Saloi? similis cui nullus ubique est,
 Qui gentem bello egregiam, studiisque Minervæ,
 Calsonum tulit, Ugonem, Clarumque Paternum,
 Carboneosque duos, & te, Ludovice, fores qui
 Gentis Cerutæ nobis, ni id fata negassent,
 Et patriæ decus æternum, lumenque perenne;
 Teque, Peregrine, & te, Gratarola; sed hic te
 Quod tulit, o Isabella, sinus facile omnibus anteit.*

His

His utique maximo jure accensendus Milius ipse; de cujus Opere, præter verba superius allegata, hæc etiam habet Euphrastus in eadem ad Gratarolum Epistola: *Quare habet lector hortorum perfectam, & absolutam doctrinam mira versuum elegantia conscriptam. Sunt enim versus omnino elegantes, candidi, & cum admirabili suavitate graves, & magnifici. Mirus est auctor in rerum descriptionibus, mirus in fabellis suavissimis confingendis; excitat undique delectationem, ac animi quandam jucundissimam titillationem. Habes judicium meum, Boniane Gratarole, honestum quidem, ac sincerum de horrensibus libellis nostri Milii.*

Milii Voltolinæ Poema occasionem nobis præbet de Augustini Galli Brixiani Opere ad Agriculturam pariter spectante, Italica lingua conscripto, aliquid hoc loco dicendi. Opus illud in viginri libros dividitur, seu in viginti dies, per quos, Brixianis aliquibus Civibus ad colloquendum inductis, res omnis rustica enucleatim explanatur. Exstant ad calcem Operis plures Augustini Galli ad amicos literæ, & amicorum ad ipsum, datæ ab anno 1558. usque ad annum 1568. In iis & plura ad ejus Operis scopum, vitæque rusticæ commendationem spectantia attinguntur, & quibus auctoribus, quibusve de causis Gallus fuerit excitatus, ut eam provinciam aggredereetur, edocemur. Legitur inter alias Epistola Joannis Baptistæ de Romano Venetiis scripta an. 1560. quæ Gallum hortatur, ut quoniam Joannis Tatti Agricultura, quæ paulo ante prodierat, recensque evulgatæ Palladii, & Crescentii Operum in Italicam linguam versiones rei rusticæ cupidis haud

haud omnino satisfacerent, eam ipse accurate, & copiose illustrandam susciperet, unde Itali quoque ad gloriam illam pervenirent, quam Gallos, & Hispanos ea tempestate assecutos fuisse, eorundem lucubrationes testabantur, & præsertim *Opus de Agricultura*, ex Hispano in Italicum idioma nuper conversum, editumque Venetiis a Michaeli Tramezino, Typographo. Suis hisce hortationibus Epistolæ Scriptor desiderium Veneti Typographi, Andreæ Arrivabene, adjunxit, cui nimirum spes inerat, ornato, & utilissimo de agrorum cultu volumine eam suæ officinæ laudem parari posse, qua Jolitorum illa ex commendatissima Cavalchanti Rhetorica in lucem edita gloriabatur. Subdit demum, novam hanc reparatæ Agriculturæ famam Brixia in primis deberi, quum in illa Urbe præclara floreat ingenia, disciplinis omnibus exulta, & ea sit Brixiani agri fertilitas, & cultio, ut parem in tota Italia non habeat.

Quam libenter Gallus hujuscemodi provinciam susceperit, patet ex literis, quibus Joanni Baptistæ de Romano respondit, fassus se ab octo jam annis plura ad id operis collegisse, & scriptis consignasse. In alia autem ad Albertum Lollium Epistola data anno 1565. gratias Deo agit, quod post assiduam duodecim annorum studium, sexaginta sex annos jam natus, *Opus de Agricultura* in lucem proferre valuisset. Dies tantummodo decem prior Editio complectebatur, quibus tres postea sunt additi, ac demum alii septem, sicque ad viginti excreverunt, cujuscemodi præfert Veneta Editio an. 1573. quæ mihi in manibus est.

P. II.

L I

Quo

Quo plausu exceptæ fuerint Galli nostri lucubrationes,
testantur Carmina Quærengii, & Taygeti, quæ subdimus.

Ant. Quærengii in August. Gallum Acad. Occul.

*Semideum soboles, gens fortunata, coloni
Qui colitis sylvas, & ductis finditis arva,
Quæ Pater effuso percurrit flumine Mella,
O manibus date ibura piis, date munera Divis,
Agricolæ, Cereri spicas, laticemque Lyæo
Purpureum, sua dona Pales, suaserta Napææ
Accipiant nymphæ calathis, violasque, rosasque,
Sospes ut Adriaci Gallus referatur ab oris,
Maxima cura decum Gallus, quem rupe sub alta
Olim florentem studio, & puerilibus annis
Agrorum varios cultus, & sidera cœli
Erudiit Pan montivagus, cui Mænala curæ,
Cui memora Arcadiæ parent. Vos ille reclusis
Thesauris, quos ima tenet per viscera tellus,
Spernere divitias Arabum, Syriosque liquores
Jussit, & inventis opibus ditavit agrestibus.
Nam docuit quæ cura bouum, quæ pabula leto
Sufficiant pecori, quid prata virentibus herbis
Vestiat, & pingui glebas sæcundet arista,
Nec non arboribus quæ sit natura creandis,
Quidve ferant Platani steriles, humilesque Genistæ,
Sponte sua aerias tendunt quæ in luminis oras.
Tum super hæc, apibus melior qui cultus habendis,
Unde prius liquido manarunt Nectare celæ,
Ambrosiæque dapes hominum venerunt sub auras.
Nil adeo intactum liquit. Stupere docentem
Sylvanique senes, & capripedes Satyrisci.
Jamque illum Hesperia populi venerantur, & omnis
Gens colit, ut prima Superos ætate solebant,
Cum patrias nondum victor remeasset ad arceis
Liber, & incurvi juvenis monstrator aratri
Cbaoniam toto glandem depelleret orbe.
O fortunati nimium, quibus otia longa
Insontes peperere artes, monitusque verendi,*

Vot

*Vos manibus date thura piis, date munera Divis
Agricolæ, in patriam ut liquidis referatur ab undis
Gallus, & æterni linquat monimenta laboris.*

Jo. Ant. Taygeti ad August. Gallum Acad. Occul.

*Galle, decus patriæ, Musarum gloria, Galle,
Atque idem Phœbi delitiæ, & Charitum.
Qui scriptis terre mandas præcepta colendæ,
Quæque gregi, atque apibus cura adhibenda doces:
Tum canis hesperidum felicibus æmulis hortis,
Ut tollat virides Cythra Sylva comas.
Terra Mari potius miscbitur, & mare cælo,
Quam pereat nomen, Galle diserte, tuum.
Ecce tibi choreas ducunt, ridentque Napææ,
Floridaque in piæis munera dant calatbis.
Grataque sollicitus persolvens vota colonus,
Primitias ruris donat habere tibi.
Pastorumque manus magnorum e semine Divum
Jactat, & Arcadiis læta canit calamis.
Parva loquor, te fama sonat, te nescit Eous,
Te Scythæ, te Lybicus laudat, & Hesperius.*

Itaque non in Italia tantum magna fuit Operis hujus existimatio; discimusque ex Hercule Cato, qui Caroli Stephani Agriculturam ex Gallica Italicam reddidit, Augustini Galli Agriculturam in Gallicum sermonem fuisse conversam, suoque labore Herculem Catum ei nationi vices quodammodo reddere voluisse. Opus suum Augustinus Gallus Emmanueli Sabaudicæ Duci dicavit, & ad calcem Epistolæ datæ an. 1569. memorat Gallus Civem suum Petrum Comitem Advocatum, qui id temporis a Principe illo ad graviora quæque negotia tum belli, tum pacis adhibebatur.

Tandem Lectorem monemus, de præstantissima,

& maxime utili Agriculturæ disciplina Brixianos ea etiam de causa magnopere meritos fuisse, quod Petri Crescentii Tractatum, adeo multis typographicis mendis viziaturum, ut vix legi posset, Comes Jo. Franciscus Gambara, studiis omnibus literarum, ac proinde Agriculturæ etiam addictissimus, summa diligentia in otio Prati Alboini expurgaverit, ut fidem facit Augustinus Gallus in lib. seu die 19. Prævit itaque, aut saltem comitem se addidit Jo. Franciscus noster Francisco Sanfoyno, qui eo ipso tempore in eadem expurgatione operam suam collocavit, quibus, aliisque coronidem imposuit Sebastianus de Rubeis, Academicus Florentinus, nova edita ejusdem Operis emendatione Florentiæ an. 1605. typis Cosimi Juntæ.

Ad Saloensem nostrum Poetam rediens, cujus occasione de Augustini Galli Agricultura sermonem feci, moneo, scriptum ab eo fuisse Poema aliud, cui titulus, *Hercules Benacensis*, quodque Brixienfes Vincentii Sabii typi an. 1575. publicarunt; ad calcem autem Poematis de Hortorum cultura eundem Eclogam, & Hendecasyllabon adjecisse.

XIX. Laurentius Gambara, de quo modo dictum, Brixianus ille est Vates, quem Poeticam rem aggressi indicavimus a M. Antonio Mureto sat celebri, eoque sordido dicterio perstrictum perhiberi. Tam gravi injuriæ refellendæ, ecquisnam erit, qui satis esse non putet Pauli Manurii, eum ipsum Vatem eximiiis præconiis exornantis, auctoritatem? En hujus verba in Epistola ad ipsum Laurentium Epistolar. lib. 4. *Patarvi dum eras, habebas in manibus egre-*
gium

gium illud Poema de novis Insulis a Columbo detectis :
 cujus ego cum exordium multis presentibus legissem , ad-
 miratus gravitatem , & elegantiam carminis , exclama-
 vi , Cedite Romani , in quo adhuc , qui a me dissentiret ,
 inveni neminem . Quo magis te hortor , quanquam , ut
 spero , currentem , ut appropere , habeasque rationem non
 expectationis modo nostræ , verum etiam gloriæ tuæ , cu-
 jus habes a natura præclarum seminarium , quod etiam
 studio excolis , ingenium tuum . Idem in alia ad eun-
 dem item lib. 4. Epistolar. de Basilii Zanchii misera-
 bili intetitu scripta , hujus amicitiam cum Gambarā ,
 & patrem utriusque in Poetica facultate peritiam in
 hunc modum extollit : Vixistis una semper conjunctissi-
 me , alter alteri egregie carus , & fuit uterque vestrum
 ad Poeticam facultatem natura propensus , ac mire factus ,
 ingenio vero ita pares , ut cum nemo tam bonus Poeta sit ,
 quin vobis primas in componendis versibus partes tribuat ,
 (quam confessionem etiam ab invitis exprimit Poematum
 comparatio) uter tamen utri præstet , nondum satis judi-
 care quisquam possit . Hæc , inquam , Pauli Manutii ver-
 ba , vel sola , satis evincunt fallo in vulgus spargi , adeo
 dissenteo ab iisdem judicio Laurentii Ganibarae ver-
 sus a M. Antonio Muteto notari potuisse . Dum enim
 Muretum dico , hominem dico sua Scripta , carmi-
 na etiam , Pauli Manutii censuræ frequenter submit-
 tentem , elegantissimum hujus ingenium , Atticasque
 prorsus aures semper admirantem , & in Italia longe
 unum Manutium , qui cæteris omnibus literatum glo-
 ria antecelleret , prædicantem . Hæc omnia ex Mure-
 ti ad Manutium Epistolis constant , quæ proinde de-
 mon-

monstrant, M. Antonio Mureto neminem minus idoneum fuisse, qui a Manutio dissentiret, idque in probanda Laurentii Gambaræ Poesi, qua in re Manutius ipse affirmavit, neminem adhuc invenisse, qui id faceret. Quid? quod Justus Lipsius, exquisiti utrique judicii censor, adeo Laurentium Gambaram ob Poeticæ venæ felicitatem suspexit, ut rumore de ejus morte in Belgium perlato, actum quodammodo de Italæ Poesis gloria censuerit. Ita enim scribit ad Fulvium Ursinum Epistolar. lib. 2. *Verus ne ad me nuncius accedit, Laurentium Gambaram obiisse? Non verus, spero, nec Musæ permittant. Si tamen est, doleo; primum utriusque nostrum causa, qui amicum, deinde Italiæ vestræ, quæ Poetam amisit, & amisit eo tempore, quo opus minime foret. Vides enim illa regio vestra, quam nunc hoc genere ornamentum non abundet.* Insuper Lylius Gregorius, Gyraldus, etsi in Brixianos Poetas, ut vidimus, non omnino bene animatus, Laurentium Gambaram, cujus Poemata Romæ excusa legerat, & numeris poeticis, ac figuris, & varia eruditione insignem haberi, testatur de Poet. nostr. temp. Dial. 2.

Laurentii Gambaræ carminum ad manus habeo duplicem Editionem Romanam, nimirum an. 1581. & an. 1586. nec non Basileensem an. 1555. per Joannem Oporinum, in qua Laurentii carmina Basilii Zanchii carminibus subjunguntur, utique ex arcta, quam inter se colebant, amicitia. Poemata minora Laurentii pleraque omnia sacram tractant materiam; majora vero sunt sex, quorum argumenta, Columbus, Venetiæ, Caprarola, Expofui, Gigantomachia, Angui s

Ex

Ex Columbo versus complures postea recitabo . Poema , Venetiæ , Jo. Francisko Gambaræ Cardinali , Brunori filio , inscripsit Poeta , atque ita incipit :

*Quæ causa impulerit non nota in regna ferocem
Hunnorum regem Scythiæ traducere gentes ,
Adventus quorum in Carnos , partemque patentem
Italice , primum Venetæ fuit urbis origo ,
Franciscæ , expediam . Non hic tu prælia cantu
Mæonio vulgata leges , non aurea Phryxi
Vellera , sed Veneti primordia prima Senatus .
Non mihi Calliopes opus est , nec Apollinis aura ,
Si vati de more tuo , Franciscæ , favebis ,
Et valeant rupes Heliconis , & unda Aganippes .*

Caprarolæ descriptio ad Alexandrum Farnesium Cardinalem his versibus inchoatur :

*Dum nos te canimus , præclaraque facta tuorum ,
Et positam Cimini latis in collibus arcem ,
Farnesie gentis fidus , columenque , meumque
Præsidium , & semper summis exercite rebus ,
Maxime Alexander , tu vati assiste canenti ,
Hic inter gelidos fontes , platanumque comantem ,
Gratior æstivos qua temperat aura calores ,
Et nemorum placidis percurrit flatibus umbras .*

Poema , cui titulus , Expositi , ad Antonium Perennottum Cardinalem Granvellanum , & in Neapolitano Regno Pro-Regem , de Leuce , & Daphnide in Lesbo insula expositis agit . Illud metaphrasin esse Longi Pastoralium de Daphnide , & Chloe , multaque se addidisse de suo , ut imitatore , non ut interpretem , monet ipse Gambaræ in Præfat. ad Lector. quare non erat , cur Vossius de Historic. Græc. scriberet , Longum in Gambaræ vix agnosci , huncque propterea meliorem Poë-

Poetam, quam Græce intelligentiorem. Gigantomachia ad Nicolaum Madrucium desideratur in utraque Editione Romana, & solum comparet in Basileensi. Anguis autem in omnibus illis deest, & seorsim Venetiis editus fuit, defletque in eo Poeta Jo. Francisci Gambaræ, & Maphæi ejus filii funera.

Columbeidis in quatuor libros divisæ, quibus argumenta præmittuntur ab Aurelio Urso Romano confecta, initium hujusmodi est:

*Perenotte, virum referam, qui littora primus
Ingentis tetigit Cnbe, non cognita nautis
Hactenus, oppositumque polum, novaque astra retexit
Nuper, & inventas cancri sub fidere terras.
Accipe, quæ quondam jussisti carmina, ab Afris
Cum domitis Cæsar dulcem, claramque redisset
Partenopen victor, qui forti milite densas
Tot Turcarum acies validis superaverat armis,
Et pulsum Regem regnis induxit avitis.*

*Non sine te marii immensos invadere fluctus
Tentassem ratibus, nec vasto in gurgite vela
Tendere, sed Melle tenuissem parva fluentia,
Hic ubi Chinæas arces, atque arma, virosque,
Et sinei latos canerem, terramque feracem
Tot frugum, & ferri venas: urbs condita ab alto
Sanguine Cenomanum ducit genus, aspera bello
Quæ fuit, & lætis Italos successibus auxit.*

*Te Carolus semper magno est dignatus honore:
Namque tibi curam soli commiserat omnem
Regnorum, Imperiique simul, bellicque, togæque
Tempore, nunc breviter tibi dicam, quæ genitori
Rettulit ipse tuo longe admiranda Columbus.*

*Jam cælum, & terras tenebrosa involuerat umbra
Humida nox, pelagique sinus, unoque favebant
Ore omnes, & erant mensis sublata secundis*

Poeta.

*Pocula jam, solitoque pius de more sacerdos
 Egerat ingentes submisso vertice grates
 Eterno cœli, & terræ, rerumque parenti.
 Cum primus Granuela inquit, nova gloria gentis;
 Christophore, Ausonidum, dic nunc ex ordine portus,
 Inventos a te, dic regna, tuosque labores,
 Et toties fileant Vates jactare Pelasgi
 Innumeros terræ tractus lustrasse, viasque
 Alcidem, Bacchumque etiam vidisse orientem
 Auroram toties, bello dum territat Indos.
 Hæ vatum sunt ambages, longeque superstes
 Illorum fama est major, quam vivida virtus,
 Et totum implerunt variis erroribus orbem.
 Felix Ausonia tellus, cui contigit uni
 Totius mundi Imperium, nunc & quoque felix,
 Quæ talem te læta tulit sub luminis oras,
 Cui Deus omnipotens alto dignatus Olympo est,
 Tot pelagi monstrare vias, tot regna, tot urbes
 Egregias, quas majorum non viderat ætas.
 Per te namque illæ Cancræ sub sidere gentes
 Unumque, trinumque Deum agnovere, repulsi
 Numinibus, veri quæ gens ignara colebat:
 Quos omnes nostri tinxere salubribus undis.*

Hoc Poema Laurentius Gambara in Epistola, quæ præmittitur, ad Cardinalem Perenottum, testatur se scribendum suscepisse ipsius Perenotti auctoritate, qui scilicet Neapoli sæpe sibi memoraverat Columbi navigationem, cujus historiam Nicolaus ejus pater ab iplo met Columbo acceperat, quum esset Barcinone, & aliquot post annos Carolo V. summa cum ejus voluptate narraverat. Inter Epistolas Bartholomæi Riccii Lugien-sis, scilicet in parvo volumine quatuor earundem li-bros complectente, edito Ferrariæ an. 1562. una adest, & est prima lib. secundi ad Laurentium Gambaram

P. II.

M m

ele-

elegans, & faceta, qua Riccius, quod ad septuaginta jam annos pervenisset, se minime idoneum dicit ad suscipiendam navigationem ad Indos, quo Gambarà una cum suis Heroibus illum transvehere cogitabat, ac propterea satis futurum, si ad ignem cum Columbo totum illud iter legendo sibi conficeret.

Complura Laurentii Gambaræ Poemata Basilii Zanchius indicavit duobus Epigrammatis, quæ sequuntur.

Ad Laurentium Gambaram.

*Laurenti, vita ipsa, oculis mihi cbarior ipsis,
Cui sacer ipse chorus laurea ferta dedit.
Nunc tu, sive canis Phrygii pastoris amores,
Sive tuo Boreas carmine Pityn amat,
Cymothoenque vagus sequitur per cœrula Triton,
Orionque aliis concidit æquoribus,
Sive feros magno ore sonas in bella Gigantes,
Horridaque invictis fulmina missa Jove;
Linque, precor, glaciale solum, qua turbidus Æther
Horret, & incanis Barbara terra jugis.
Jam tibi Laurentes concordis numine Nymphæ,
Et Tybris Vati maxima dona parant.*

Ad eundem.

*Laurenti, pomosa colis dum Tiburis arva,
Scribis Apollinea carmina digna lyra,
Dum canis & nautas, Xantippi & tristia fata,
Dum Mopsum absentem dulcia ad arva vocas,
Venator dum lina docet disponere Tberon,
Scæfari & celeres per juga longa feras,
Leucotboæ divina Venus dum lumina reddit,
Pierias vena divite fundis opes,
Dumque Elegis fontem celebras, quem magnus Julius
Edidit, & rarum surgere iussit opus,
Hic ubi leta capis somnos Laurentia Leuce,
Hic ubi virginis temperat ora liquor.*

Et

*Et cum principibus versaris culte Latini
Carminis, & dulci pascaris ambrosia,
Dum silvas, dum rura legis, dum Martia bella,
Dum Nemesis, & dum Delia in ore sonat:
Felix, cui viridem lauru, myrtoque coronam
Pierides texunt, Pieridumque pater.*

Pariter in Eclogis, quas præstantissimis Poetis, scilicet Pontano, Navagerio, Castalioni Basilii inscripsit, Laurentium eodem honore donavit; nam quarta *Alcon*, sive *Laurentius Gambara* inscribitur. Gambara vicissim & secundam ex suis Eclogis nauticis Basilio Zanchio inscripsit, & in Poemate, Caprarola, de eodem hos habet versus:

*Hic ubi sæpe canit eboreas, & gaudia Divum
Zanchius, aut campos spatiantem narrat Aleibem,
Mirantem cæli tractus, atque ætheris oras,
Et mundi verum auctorem, rerumque parentem;
Dumque canit, Siculus Sampson percurrit eburno
Pectine fila lyra, quem circum Æneia pubes
Exultat, spargitque locum fragrantibus verbis,
Et vatum chorus assurgit, plaudisque canenti.*

Prius illud Zanchii Epigramma professionem indicat Laurentii Gambaræ ad gelidas Germaniæ oras, quam etiam attingit subsequens de eodem M. Antonii Flaminii Hendecasyllabon.

Ad Laurentium Gammarum.

*Quod numen male amicum, amico care,
Hanc mentem tibi misit, ut relicta
Roma, frigore sæviante, adires.
Ad gentem horribilem, truceque? tu ne,
Vates candide, cui Marone digna
Phæbus scribere donat, efferrata
Ista in Barbaria morare? qui jam*

Mm 2

Neget

*Neget sidera celsa posse Olympo
 Labi tartara in ima? at inscientem.
 Ne malus male perdat error, audi,
 Quid Phœbus pater, & novem Camœnæ
 Prædicant tibi, si manere pergis
 Ipsic, ex lepido, & bono poeta
 Fies Menius, & tuos libellos
 Vitabit lue pejus, & veneno
 Quicquid est hominum elegantiorum.*

Laurentii Gambaræ Pœsis tot elogiis præstantium Poetarum sui temporis exornata, eo majorem commendationem meretur, quo magis insigne Christianis Pœtis exemplum præbuit, igni traditis Poematis integris, satis multis usque ad decem versuum millia, quod turpia, & falsorum Deorum fabulas continerent. Id ipsemet testatur in quodam libello, in quo tum de perfectæ Pœsis ratione tractat, tum ostendit, cur abstinendum sit a scribendis Poematis turpibus, & falsorum Deorum fabulas continentibus, ac quam late pateat campus ad pulcherrima alia Poemata edenda. Hunc libellum esse eam ipsam Tractationem, quam Antonius Possëvinus in lib. de Pœsi affirmat se Laurentii Gambaræ nomine, ita ab eo rogatum, scripsisse, non adeo certa res est, ut patebit laudatum Gambaræ libellum comparanti cum iis, quæ ex Tractatione illa sua adtexuit ipsemet Possëvinus Bibliothecæ Selectæ lib. 1. cap. 25. præterquam quod credi quidem potest, Laurentium Gambaram textus quosdam ex Sanctorum Patrum Operibus sibi a Viro sacrarum literarum perito excerpti curasse, non autem libellum integrum ab eo efformari, eumque rerum ipsius Gambaræ

baræ narrationem magna ex parte continentem, cui postea nomen suum præfigere, quodammodo ambiret. Possesvinum Opuscula quædam sub aliorum nomine aliquando evulgasse, Auctores Biblioth. PP. Soc. Jesu nos monent, & tria hujuscemodi allegant, inter quæ minime adest Tractatio, de qua locuti sumus.

Haud silebo, aliud de Columbi navigatione Poema editum fuisse ea ipsa tempestate a Julio Cæsare Stella, nobili Romano, aut saltem ejus Poematis libros duos priores, nam eos tantum exhibet libellus Romæ an. 1589. evulgatus, qui mihi in manibus est, præfertque Francisci Bencii Epistolam ad Lectorem, qua duo illi libri tanquam factus excellentis ingenii, & in Arte Poetica supra suam ætatem, & admirationem omnium exercitati adolescentis, collaudantur, iisdemque suffragia M. Antonii Mureti, Petri Victorii, Angelii Bargæi, Fulvii Ursini, Joannis Tonsi, Antonii Quarrenghi, Martii Curtii, ac demum Garfiae Loaisæ, quibus omnibus Opus suum inspiciendum dederat Jul. Cæsar Stella, accessisse perhibentur. Mirum in ea Bencii Præfatione nullam prorsus mentionem fieri Poematis de eodem argumento compositi a Gambara Brixiano, cujus certe laus est, principem vestigia posuisse, & maximam a Manutio commendationem reportasse. Jul. Cæsar Stella, licet Romana nobilitate fulgeret, haud tamen ægre ferebat (ut patet ex ejus Epistola Italica ad Octavium Rubeum, quæ legitur inter Epistolas ejusdem Rubei a Bartholomæo Fontana collectas) familiam suam pro Brixiana etiam haberi, quod in ea Urbe

Urbe nonnulli ejusdem nominis Cives jam diu floruisſent, atque florent.

Equidem Vincentium Stellam Juris Conſultum Brixianum, ejusque filium Joannem Baptiſtam pluribus carminibus Laurentius Gambarà celebravit. Ad Vincentium illum binæ exſtant Pauli Manutii literæ Epistolæ, lib. 2. qui, dum Afulæ eſſet, ad viſendam Brixiam humaniter ab eodem invitatus, eo deſiderio ſe flagrare reſponder, quod audiſſet, eam eſſe Urbem pulcherrimam, quodque in ædibus ipſius Stellæ ea jucunditate, & lætitiâ ſe potiri poſſe ſperaret, quæ omnem illi mœrorem ex quotidiana, qua tentabatur, febricula contractum abſtergeret. Binæ itidem ejusdem Manutii in eodem libro ad Fabium Vincentii filium Epistolæ, in quibus & Vincentius pater, tanquam magni nominis Vir, ſummis que virtutibus ornatus commendatur, Fabius vero filius, tanquam excellentis ingenii adoleſcens, optime ad virtutem animatus; quæ omnia ſe perſpexiſſe Manutius affirmat, quo tempore diverſatus Brixie fuerat in eorum ædibus. Utriusque pietatem in primis extollit Manutius, patris quidem, qui otii quidquid haberet a foro, publicis que muneribus, totum id in Theologia libentiſſime consumeret; filii vero, qui abhorrens a luſu, venatione, curſu, alea, & literis deditus eſſet, & ea frequenter meditaretur, atque curaret diligenter, quibus vitæ æternæ ſalus comparatur. Hæc habentur in ſecunda ad Fabium Episto-la, plena utriusque ſapientiſſimis monitis, inter quæ illud quam maxime egregium: *Omnino velim te, quam de divinis rebus cogitas, minnere opinionem ſcientiæ, de-*
mitte-

mittere animum, ac mentem, unamque putare certissimam doctrinam, pietatem in Deum, aut benevolentiam, & studium erga illos, qui nobis a Deo commendantur. Ad Honorium Stellam, alium ejusdem Vincentii filium exstat Epistola Bartholomæi Riccii Epistolar. lib. 4. in parvo illo quatuor librorum volumine, de quo supra, scribitque in ea Riccius, ex paraphrasi Ciceronis Orationis pro Marcello ab Honorio confecta, summa admiratione se suspexisse, eorum annorum adolefcentem, ac pene puerum, tam prudenter, tam composite, tam eleganter scribere. In hac ipsa Stellarum familia emicuit, non multo ante hos modo recensitos, Bartholomæus, de Apostolica Sede multifariam benemeritus, & Cardinalis Reginaldi Poli in Anglicana Legatione fidus comes, cujus tumulo hoc inscripsit Sabæus noster Epigramma.

*Dic Romæ, & Patriæ, sic me vidisse sepulchrum,
Hospes, si Romam veneris, & patriam.
Extra cognatos perii, verum inter amicos,
Inter & amplexus, & Domini lacrymas.
Non doleo mortem, sed non potuisse reversum,
Pole, triumphantem cernere te in patria,
Ut cujus dolui exilium, sortemque malignam,
Gauderem tantis plausibus, & reditu.*

Tandem de Lautentio Gambara observo, ejus carmina in fronte præferre nuperas, easque ornatissimas tam Michaelis Mercati Metallothecæ, quam Hieronymi Mercurialis de Arte Gymnasticæ Editiones.

XX. Quod a Laurentio Gambara proditum vidimus, Christianis Poetis, qui turpia, & Deorum fabulas rejecerint, late patere campum ad pulcherrima alia Poemata

mata conscribenda, id re ipsa præstiterunt Monachi duo Brixiani, quos jam jam in medium adducam, ac primo loco Theophilum, cujus versus exhibet mihi libellus, hac nota conclusus: *Impressit Brixie Bernardinus Misinta Papiensis Calcographorum castigatissimus, Hieronymo Donato Prætorè eminentissimo, anno Theogonia MCCCCXCVI.* Præmittitur huic notæ Helix Capreoli ad Augustinum Æmilium Epistola, qua docemur Dialogum, quem de Vita Monastica, & Politica inscripserat Theophilus, ipsius Capreoli hortationibus a Theophilo typis consignatum fuisse, postquam tamen illum Guidoni Ubaldo Urbini Duci, & dedicasset, & obtulisset.

En ipsa Capreoli Epistola.

Helias Capreolus Augustino Æmilio. S. P. D.

BRixianam gloriam quanti semper feceris, quanta ope Cives nostros quacunque virtute præfulgentes, sis amantè, obnixèque prosecutus, Augustine lepidissime, palam est omnibus studiosis. Nam (ut cætera missa faciam) continuè illæ adhortationes tuæ, quasi acres stimuli, quibus me, ut Reip. nostræ ab usque prima origine præclara gesta conscriberem, in dies sollicitasti, nobis vel certissimum rei asserunt testimonium. Quum itaque mihi anno superiore Theophilus nobilissimus Civis noster, egregiusque poeticæ venustatis excultor, Dialogum, quem de vita monastica, & politica inscripserat, & jucunde, & familiariter lectitaret, hortari illum cœpi, ut libellum populo ederet, quum & amicis maximæ voluptati foret, & patriæ nostræ non dedecori. At ille sese id effecturum pollicebatur; sed non priusquam ipsum tutissimo litteratorum confugio Guidoni Ubaldo, Urbini Duci, & dedicasset, & obtulisset. Nuper autem, postquam sapientissimus Princeps, & opus simul, & auctorem ipsum humanissime excepit, non mediocrique officio, & meritis lauda-

laudibus honestavit, Theophilus promissæ publicationis non immemor, nobis exigentibus morem gesturus, opusculum impresoribus tradendum credidit. Cujus ad te idcirco exemplum dono misimus, ut tu, qui es omnium virtutum specimen, & patrii decoris studiosissimus, quasi utriusque vitæ justus arbiter (id quod Theophilus decusum noluit) tuum aliquando nobis judicium asseras, & pro amicissimo homine clypeum adversus Zoilos una mecum sumere fidenter cures, quum intellexeris, festinatæ huic, sed non abortivæ editioni me simul cum ipso auctore fuisse obnoxium. Vale.
Pridie Kal. Octobris MCCCCXCVI.

Adest in fronte libelli Carmen, quo Theophilus Calliopen exorat, ut ejus ope Dialogus ille ad Feltrium Ducem perlatus, humaniter ab eodem exciperetur. Versus aliquos inde excerptam, Theophili assuetum in te Poetica studium testantes.

*Tu mihi conspicua primo sub flore juventæ
Electa es studiis unica cura meis.
Non me somnus iners, non me labor improbus unquam
Terruit, aut dubio semita calle rigens.
Forma, voluptates, fervor juvenilis, opesque
Non mihi te blando surripuere sinu.
Me pia cura tui juvenilibus impulit annis
Per freta, perque truces plurima ferre vias.
Viserè Pannonium jussisti interrita regem,
Et mea belligero carmina ferre seni.
Sed neque me rabidis vulgi exposuisse negabis
Morsibus, ipsa mee conscia mentis ades.
Hæc & plura tibi dedimus, juvet eruta tandem
Præmia militiæ persoluisse mee.*

Recitandi præterea priores ejusdem Dialogi versus, qui ita se habent.

P. II.

N a

Theo.

*Theophili Brixiani, de vita solitaria, & civili, ad invictissimum
Principem Guidonem Ubaldum Monferetrium Urbini Ducem.*

Dialogus. Maurus Eremita, & Pyrrhus Eques.

*Pyrrhe sub ardenti quis te jubet impetus æstu
Ire per abruptos filices, atque invia lustra?
Siste gradum, & molli mecum requiesce sub umbra,
Donec sera dies Phœbeos temperet ignes,
Aptaque frugalis referantur tempora cœna.
Ecce sub algentem propior spelunca recessum
Nos ciet, & leto arridet spectantibus ore.
Hinc Daphnæa virens baccato vertice laurus
(Cerne) Cleonæis aditum fervoribus abdit.
Inde papillatis hedere junctura corymbis
Pumiceam reptans ambit densissima caulem.
Ingredere, & viridi mecum discumbe sub antro.
Panis, & hesterni servata coagula lactis
Sunt mihi, nec decrunt viridantia gramina nobis,
Quæ lentos acuant gustus, nasturtia, mentam,
Asparagos, crithymum, marathron, bulbosque salaces,
Intuba, & andracnæn, cepas, hilaremque melissam,
Lactucasque brevi residens consecvimus horto.
Ingredere, & viridi mecum discumbe sub antro.
Hic scatet illimi fons irradiatus arena,
Qui tribuat junctis Acheloum in pocula palmis.
Hic gelidus tenui ludit spiramine taurus,
Hic viduus turtur, progne, philomela, meropsque
Alternas miscet operoso gutture voces,
Atque Therapnæos modulis imitantur olores.
Ingredere, & viridi mecum discumbe sub antro.*

Sequuntur in eodem libello Elegi plures Encomia-
stici de Vita, & Moribus Divi Bernardi, quibus infe-
ritur Elegia, cui titulus, *Divi Benedicti pro instaura-
tione Monasticæ Religionis prolata supplicatio, & accepta
a Deo promissio.* Elegos istos Theophilus Ludovico
Mar.

Martinengo nuncupavit brevi hac Epistola.

Theophilus Brix. Magnifico Ludovico Martinengo suo.

EN quam petieras libelli mei, immo tui, correctionem examulsum peregrimus. Utri autem nostrum magis debeat nescio, tibi ne, cujus jussu densissimis librariorum mendis est erutus, an mihi, qui secundam ei limam, quamvis tardius, efflagitanti non negarim. Non enim incongruum duxi, ut qui maturum partum Semeles utero expectare fuerat prohibitus, Jovis saltem femori fovendus insueretur. Vale, Brixianæ nobilitatis decus, & nos, ut facis, ama.

Libellum claudunt Hymni novem, quorum priores versus, binos scilicet singulorum, asseram, at prius recitanda, quæ iisdem præponitur, brevis Præfatio.

Theophilus, Brixianus, Rever. Patri D. Simoni Ticinensi, Justinianæ Congregationis Ord. S. Benedicti Præsidenti dignis.

HAbes, Pater humanissime, hymnos (ut mihi injunxeras) sapphico metro conclusos, venia (ut arbitror) digniores, quam laude. Tibi enim non tam fucatæ eloquentiæ pompam, quam historicæ veritatis puritatem exhibendam censui. Vulgatum est enim, Deos ipsos, non tam accuratis adorantium precibus, quam innocentia, & sanctitate lætari, gratioremque existimari, qui delubris eorum puram, castamque mentem, quam qui meditatum carmen intulerit. Vale.

In solemnitate Beatissimi Patris Benedicti.

Ad Vesperas. Hymnus.

*Laudibus cæli resonent canoris,
Templa solemaque modulentur hymnos, &c.*

Ad Nocturnum.

*Quidquid antiqui cecinere vates,
Quidquid æternæ monumenta legis, &c.*

Ad Laudes.

*Rusticum solo, Benedicite, nutu
Traxeras vincolo miserum tenaci &c.*

N n 2

In:

In solemnitate Divi Lucae Evangelistæ.

Ad Vesperas. Hymnus.

*Plausibus turbæ resonent fideles,
Atque concentus alacres frequentent, &c.*

Ad Nocturnum.

*Hic Dei gratum meruit levamen,
Scripta quum legis referant vetustæ, &c.*

Ad Laudem.

*Jamque post casus varios laborum
Nec tamen carnis temeratus unquam, &c.*

In solemnitate Beatæ Justinæ.

Ad Vesperas. Hymnus.

*Virginis sacræ redeunt honores,
Et dies mundo celebris refulget, &c.*

Ad Nocturnum.

*Virginem dirus rapuit satelles
Ante crudelli solium tyranni &c.*

Ad Laudes.

*Jam dies longo revoluta cursu
Conscios sacri tulerat sepulchri, &c.*

XX. Titus Prosper Martinengus, Monachus Benedi-
ctinus, quam pie, quam feliciter & ipse ad sacra ar-
gumenta Poeticam venam converterit, ut ob id etiam
Theophili, de quo supra, Sodalis jure ac merito
dici possit, haud opus est pluribus hoc loco explica-
re, quum ejus Elogium lato calamo persequatur nu-
perus Bibliothecæ Benedictino-Casinenfis Auctor, ad
quem propterea Lectorem remittimus, ut facile inde
percipiat, eas a doctis Viris laudes Prosperum nostrum
assecutum fuisse, quæ aperte comprobant summam ea
temperata fuisse ejus nominis existimationem. Excel-
lebat

lebat siquidem trium linguarum, Latinæ, Græcæ, & Hebræicæ notitia, & adeo excelsum in Græca Poësi verticem ascendisse visus est, ut Pindarus alter, alterque Homerus passim audiret. Tres Tomi Romæ editi apud Franciscum Zanettum an. 1589. & an. 1590. quos ad manus habeo, ejus Poëmata complectuntur. Bini quidem Latina, & tertius Græca. Theotocodia, sive Parthenodia, Opus eximium in laudem Deiparæ Virginis; Theophanea, idest divini luminis manifestatio; & Hymnorum, ac Carminum varii generis magna copia, binos illos componunt; tertius vero Græca complectens, in fronte habet Epistolam Cortesii cujusdam Græcî, qua eadem magnopere commendatur, & ipse Prosper apî æquiparatur dulcissimum mel ex Pindaro, Musæo, Hesiodo, Orpheo, Callimacho, Lycophrone depascenti. Aliorum in Prosperuna Elogia tam Græca, quam Latina omnibus patent in tribus illis Voluminibus. Nos contenti erimus hic adtexere non ita utique obvium P. Spinulæ Carmen jam-bis constans.

Ad T. Prosperum Martinengum, Brixianum, suum.

*Mirare, quod te, Pastor, ornatissimum
Sapientiaque præditum ipse dixerim?
Quid si addidissẽm hic, & alias dotes tuas?
Nam sanctitas in te, atque liberalitas,
Genusque nobile, omnium & mortalium
Contemptus, atque religio conjuncta sunt
Cum temperantia, atque probitate, & fide.
Scientiam linguarum omitto enim trium,
Animique puritatem, & æquum, cognita
Quæ sunt mihi, atque Brixianis omnibus.
Tu Martinengorum ergo lumen, & decus,*

Ut

Ut nesciens puella formosissima
 Suum decorem, pulchritudinem tuam
 Modestia istiusmodi auges maximam.
 Dulces ad umbras Gambaræ hæc sub umbra ego
 Tibi canebam, cum bonus Vates mibi
 Brunorius, cui dixeram, me Brixiam
 Redire velle, frenum equi dixit mei
 Non inveniri: quid stui fallaciæ
 Sodalis? inquam, Prospero doctissimo
 Promisi enim hodie me regressurum bercule.
 At ille, Prosper dixit in somnis mibi
 Castris roganti, se mea causa, & prece
 Musam tuam promissione solvere;
 Tecum sit, usque dum libet. Respondeo,
 Logi, est opus me in civitatem regredi.
 Pergitque dicere ipse, Amicorum omnia
 Communia, ægre Prosper ergo non feret:
 Te uti suis, abibis illo ex Idibus,
 Deditque plures verba sic lucas mibi.
 Demum dies post quattuor, cum nec daret
 Mi frenum adhuc, & pertinacem me utier
 Pro freno alumnus Martis, atque Cynthii
 Zona videret, id mibi iussit dari.
 Fidei igitur Brunorium fractæ reum,
 O Prosper integerrime, baud me, dicito,
 Sero tibi caballus hic si redditur,
 Nam qui impedit volentem, is in culpa est. Vale.

Præter Poësin, severiores etiam literas T. Prospèrum
 Martinengum excoluisse, discimus ex Manutiana Ope-
 rum S. Hieronymi Editione, nec non ex D. Chrysosto-
 mi, & Theophylacti, quin ipsorum Græcorum Biblio-
 rum libris, egregie ejus opera Romæ emendatis, de
 quibus in quarta parte hujus Speciminis dicendum
 erit.

XXI. Ubertinus Posculus, Brixianus, plura com-
 po-

posuit Poemata, quorum ne unum quidem typis editum reperitur. Præ cæteris celebre illud, cui titulum fecit, Constantinopolis: Ipso initio Musam se hortantem inducit, ut quoniam jamdiu per mille pericula conatus fuerat, ea comite, virentem Laurum carpere, & fontibus Castaliis ora intingere, tandem sifteret gressum;

*Et nostros, inquit, modulare modos, jam tempore longo
Prælidens tremulas pleëtro perstringere chordas
Te docui. Veros cantus nunc tempora poscunt.
Non antiqua canas, jubeo; nam vidimus ipsi,
Excindi magnam imperio, belloque potentem,
Sublatamque urbem insignem, manibusque cadentem
Teucrorum, quos ipsa prius subjecerat armis.*

Opus dividitur in quatuor libros. Primus narrat, ut legitur in ejus fronte, *Causam excidii, fraudesque Pelasgum*. In secundo agitur de morte Joannis Imperatoris Constantinopolitani, Eugenii IV. Romani Pontificis, atque Amurathi Turcarum Tyranni, nec non de singulorum successoribus, scilicet Constantino, Nicolao, & Mahumete. In tertio, *Pax facta in terra* narratur, *bellaque capta*. In quarto, Constantinopolis direptio. Clauditur Opus hoc tetrasticho.

*Brixia me civem, Ubertinum Poscula boneſta
Gens tulit, hæc ausus talia qui cecini.
Me Constantini studiis urbi dulcis habebat,
Cum cecidit bello, Teucrum ego præda fui.*

Mentionem Ubertini Posculi fieri reperio inter doctos Brixianos in Panegyrico sæpius citato Danielis Ceteri hoc disticho.

*Aut te Pusculæ decus indelebile gentis,
Cui palmas duplices utraque lingua dedit.*

XXII. Poetarum Brixianorum seriem concludent Bonifacius Bembus, Joannes Calphurnius, & Pylades Buccardus, qui eandem exordiri debuissent, si in ea texenda, propositum nobis fuisset vetustæ, aut recentioris ætatis rigidam rationem habere. Contra vero ad illam dumtaxat ætatem, quam Operis titulus declarat, respicientes, temporum ordinem religiose sectari rem inutilem duximus, dummodo recensio nostra intra statutos nobis fines, nimirum intra ævum, quo bonarum artium renata sunt studia, consisteret. Accedit, quod major illa, aut minor Auctorum verustas vix aliquando, aut ne vix quidem, definiri certo potuisset, nam Auctoris ortus, descriptionis, & mortis epochæ improbo plerumque, quin stulto labore investigatæ, aut incertæ ipsæ manerent, aut incertum nobis relinquerent, quænam ex ipsis in eo temporum ordine digerendo magis foret attendenda, si eas inter se colluctari contingeret; nec enim qui cæteros ortu præcessit, ante cæteros etiam seu scripsisse, seu obiisse, necessario consequitur. In causa autem, cur Calphurnio, & Pyladi, a quibus Bonifacium Bembum haudquaquam disiungere visum fuit, postremum hunc locum assignaremus, fuit mentio frequentissime de iis facta tam in priore, quam in altera hac hujus Speciminis parte, cum carminum etiam ab eis conditorum recitatione non rara; unde æquum visum est, ut in nostra Poetarum serie reliquis aut nulla ratione, aut non ita crebro, antea commemoratis locum darent. Nullum autem hic dabimus Jo. Britannico, Jo. Taberio, Codro Urceo, nam poeticum eorum ingenium satis superque prodiderunt, quæ

quæ de iisdem superius suis locis sunt tradita.

Calphurnius autem, sat celebre condidit Carmen, de quo Baptista Guarinus in Dissertatione de Latin. ling. reparat. ita scribit : *Quid Calphurnio copiosius? quidve eruditius? an ejus carmen mediocri videtur vobis laude dignum?* Exstat hoc Carmen ad calcem Vicentinæ Editionis Catulli, Tibulli, Propertii, Papinii Statii Sylvarum an. 1481. per Joannem Rhenensem, & Dionysium Bertochum. Ejus argumentum, laudes Joannis Inderbachii, Pontificis Tridentini, & interitus beati Simonis infantis a Judæis macerati. Laudes ita incipit Calphurnius.

*Vir Sacer, & nostro Princeps memorabilis ævo,
Cui præclara dedis virtus moderamina justæ
Imperii, & populos rexisse ex ordine plures,
Et fidei vexisse decus venerabile, quod non
Contineat præsens, nec postera delet ætas,
En ego primitias vates tibi defero, fas sit,
Te nugas cœpisse meas, quæ nunc de pectore parvo
Insurgunt, sat erit magnum voluisse laborem
Suscipere, atque animum magno sub pondere vinci.
Non mea Musa tamen laudes æquare canendo
Contendat, nec si faveat mibi doctus Apollo.
Quis tibi par, magni moveat nisi plestra Maronis
Meonidaeque sacri? &c.*

Interitus autem beati Simonis infantis his versibus describitur.

*At quis Mæonio satis explicet ore colendas
Justitiæ vires, pœnas aut crimine tanto
Enumeres dignas, quas gens Judæa coacta est
Perfolverisse tibi, & merito, nam perfida nuper
Ausâ nescas, quantum non sæcula prisca tulerunt,
Aut nostro factum nusquam memoratur in ævo.
Vos, o mortales, vero qui pectore Christum*

P. II.

○ ○

Exco.

Excolitis, placeat vestro cur sanguine pasci
 Judæam gentem, cui mos, ut barbara quondam
 Natio consuevit, latia dum lege repressa est,
 Stat maculare aliquem, diro debinc pane repleri,
 Noster ubi admixtus sanguis, quo corpus odorem
 Deponat tetrum; quid si dominentur, & in nos
 Imperium teneant? scelus est non perdere gentem,
 Atque e vita hominum non extrusisse nefandam.
 Namque dies aderat nobis, qua sacra quotannis,
 Atque resurgentis Domini solemnia fiunt,
 Et lux Martis erat, subito Samuelis ad ædes
 Judæi properant, quibus hi posuere sacellum,
 Scilicet ut solito spectarent more juvencum,
 Qui Levigi fuerat nuper decessus ab agris.
 Inter se vario sed dum sermone volutant
 Plurima, tunc falsi qui nominis Angelus esset
 Incipit effari, nobis ut cuncta supersunt
 Ad solemne sacrum, festæque ad fercula cœnæ,
 Despicere his unum doleo, nec plura locutus.
 Cætera turba atrox vocem percepit, in illum
 Lumina conjectans, cædem quod posceret atram
 Sanguinis humani, sic sedere víctima tristis
 Ludibrio Christi, & facinus, prob grande, paratur.
 Delegere locum, fœdi placuere penates.
 Illi ubi constiterant; post hæc contentio surgit,
 Qua ratione queant infantem abducere, qui mas
 Esset, at in variis donec sententia verbis
 Queritur, extemplo blanda sic voce locutus
 Est servus Samuel: age, Lazare, nostra voluptas,
 Christicolam infantem nobis en surripi, centum
 Aureoli pretium; verum is discrimine tanto
 Abnuat, & pavida stupefactus mente Tridenti.
 Sarcinulis testis sedes, ac tecta refugit.
 Hinc Tobia mandata humeris provincia, nostra
 Usus erat multum qui consuetudine gentis.
 Horrendum hic posita subiit mercede periculum,
 Egrediturque foras, passuque incedit inertis,
 Cuncta oculis lustrans, solusque perambulat urbem.

Si

*Si quis forte infans cara sine matre vagetur,
 Nec comitatus eat, sed fors sit ut improba semper,
 Hinc dignosce, homini præsto quæ occurrit, agendum
 Est quotiens dirum facinus; genitoris ad ædes
 Ecce marem aspexit nullo observante sedentem,
 Qui phœbi nondum ternos expleverat orbes,
 Cujus erat pulchra visum nihil indole majus;
 Huic placide arridens digitum porrexit, & intra
 Perduxit miseros blando sermone penates.
 Gaudia quis fando, quis promas carinine vates,
 Quæ gens dira tulit? siccis nam faucibus illum
 Non secus aspexit, tigris velut orbe repertam
 Hircano lacerat prædam, catulisque relinquit.
 Illico concursu trepido petiere sacellum
 Implentes totas diris ululatibus ædes,
 Nec potuere moras optati ferre cruoris.
 Interea genitor Maria cum matre vagatur
 Andreas, mæstis perlustrans planctibus urbem,
 Exploratque gement, si fori vestigia nati
 Accurrant, aditus omnes, & compita lustrat.
 Astitit bos circum puerilis turba frequenti
 Concurso, & natum divino ex ore monebat,
 Esse apud Hebræos, quo mactaretur ad aras.
 Cumque hominum suspensa foret mens, factus in illos
 Impetus, ac subito ni sera crepuscula noctem
 Traxissent, totas flagrassent ignibus ædes.
 Sed rediere domum jam merso sole parentes,
 Tota expectantes lucis peiora futura.
 Et jam tempus erat noctis, qua cuncta quiescunt.
 Vestibulum ingreditur templi, ventura furore
 Qui falso Moses senio vergente canebat.
 Excipit & genibus puerum, qui victima tristis
 Deprehensus, stat ut agna, lupi cum dentibus hæsit.
 Cætera turba ferox vestes succincta, cucurrit,
 Fibula quas lateri vinxit, manicisque reductis
 Nudavit fædos media plus parte lacertos,
 Et crura ad furas; duris cruciatibus olim
 Sic, Ochrise, occumbis, pateris cur, optime rector,*

Tanta in te fieri, genus hoc quin fulmina perdes.
 Hæu quis non gemitus fundet, cui fata legentur
 Hæc dura infantis? Samuel properavit, & illi,
 Quod zona evinctum, perstrinxit guttura velo.
 Ille manus sacrum caput, hic atque ora repressit,
 Edere ne tristes vagitus posset; at ense
 Quamprimum Moses præputia summa nefando
 Perforat, atque male frustum convellere dextra
 Forcipe festinans nitido cratere reponit.
 Colligitur sanguis, tenero de corpore partem
 Quisque secat, donec visum est excedere vulnus
 Orbem, tunc manibus pueri sæpe oscula claudunt,
 Si strepere auditur; culpæ sevissimus auctor
 Ecce iterum Moses dextro de cruro trementem
 Exsecat, & vivo lacerat de sanguine pulpam.
 Hic una & Samuel distendunt brachia, duram
 Inque crucem tollunt laceratum corpus, acuta
 Quivis pungit acu, ne pars sincera supersit.
 Prætereo in Christum tot verba obscæna, tot inter
 Vulnere contemptus, dira nam voce precantur,
 Sic hostes nostri pereant, sic perditæ Christum.
 Has inter pœnas, tanta & ludibria fessos
 Erigit ille oculos, suspiciat sydera, testes
 Implorat superos, laceri jam corporis artus
 Deficiunt, bumerisque caput declive recumbit.
 Qui postquam æthereos felix volitavit ad axes,
 Ecce iterum quanto plausu, & clamore per ædes
 Insultant, aut hos tenuit quam magna voluptas
 Namque super celsi trascurrunt culmina tecti,
 Oraque, vel geminas tollunt ad sydera palmas,
 Atque Deo innumeras referunt pro crimine grates,
 Quod sacrum obtulerint solemne infans perempto.
 Protinus ad lautæ descendunt fercula cœnæ,
 Occultumque cados subter posuere cadaver.
 Quod pius Antistes totam lustrarier urbem
 Iussisset, sceleris magna hos formido tenebat,
 Quod jam suspecti populo, atque parentibus essent.
 Septima lux aderat; mensa posuere cadaver.

Et

Et sacros cecinere hymnos, quis rictu peractis
 Occultant iterum trepidi, nec gaudia ponunt.
 Ecce diem Titan fidis mortalibus almam
 Extulerat jubare exorto, qua Christus refurgis.
 Queritur Et variis melior sententia verbis,
 Quidquid agant, cum jam crimen vix posse viderent
 Ulterius condi, suspectique omnibus essent.
 Hoc unum placuit, corpus cum veste recinctum
 Flumine submergi, subter quod labitur ædet.
 Mitti ad Pontificem, ductum qui perferat undis
 Infantem extinctum, sed non potuisse relabi
 Exceptum ferri claustris; ite nuncius, illi
 Hec mandata refert; subito Inderbachius heros
 Assurgit, magna comitum stipante caterva,
 Corporeque invento pueri perspecta notavit
 Vulnera, sensu enim fraudem, iussitque catenis
 Judeos tetra præclusi carcere victos,
 Qui meritis passi poenas, namque igne cremari
 Hos voluit, populi tractos ante ora per urbem.
 At sacer ille Simon Petri stat in æde repositus
 Integer, Et nullo vitatur tempore corpus,
 Plurima quod Divo fundit miracula nutu.
 Lumina restituit cæcis, rectumque roganti
 Dat claudo incesum, surdique audita loquuntur.
 I, nunc, Et dubita Christum, gens perfida, votis
 Excoluisse piis, potuit quæ signa dedisse
 Certa magis fidei? non credis, crimina causam
 Dant, ut non videas, nec possint ista probari.
 Sunt quoque Pieridum qui vix a fonte reversi
 Hac in parte meum carmen damnare videntur,
 Quod magis ingenium deceat consumere nugis,
 Sed sat erit, sacer Antistes, si nostra probabis,
 Franciscusque Tronæ celeberrime gloria gentii,
 Finibus extremis qui nunc dat jura Tridenti.

Hos omnes versus recitandos exultimavi, quod nuf-
 iam istius Calphurnii Carminis notitiam habuisse visse
 sunt, qui Acta Sanctorum a Bollando cæpta proseguun-
 tur;

tur; nam ad diem 24. Martii agentes de Sancto Simone puero Tridenti a Judæis necato, Acta ejus passionis tam ab Joanne Mathia Tiberino Medico scripta ex MSS. & Surio, quam Acta post passionem ex Italico libro impresso Tridenti, in medium proferunt, allegantque Janum Pyrrhum Pincium, Mantuanum, priora illa exscribentem, subinde etiam ornatiora reddentem libro 4. de Vitis Pontific. Tridentinor. nec non Ughellium eadem brevius perstringentem; at ne verbo quidem Calphurnii nostri meminerunt, cujus tamen narrationi magna utique constat auctoritas, nam eam historiam descripsisse censendus est eo ipso tempore, quo passio illa contigit; contigit enim, ut habetur in calce Actorum per Tiberinum, an. 1474. Carmen autem Calphurnii editum typis reperitur an. 1481. quo prodit Editio illa Vicentina, & in Præfatione ad illam, de qua infra, Calphurnius se *olim* scripsisse Carmen illud ad Inderbachium affirmat.

Tiberinus hic Brixianis Scriptoribus, licet nostris minime compertus, utique accenseri debet, de quo in citatis Actis Italicis hæc leguntur: *Prætor autem* (Joannes de la Salle, legum Doctor, & nobilis civis Brixianus, ut ea ipsa Acta testantur) *quo maturius in re tanta procederetur, convocari jussit Archangelum Balduinum, Medicum Tridentinum, Joannem Mathiam Tiberinum Brixianum, Poetica, & Oratoria facultate non minus, quam Medicinæ peritiam, illustrem, & Christophorum de Fatis de Terlaco, Chirurgum celeberrimum, ut inspecto diligenter cadavere, & vulneribus trucidati, jurati edicerent, quid sibi de eo facto videretur.* Ea Tiberini nostri

nar-

narratio insuper exhibetur tam a codice manuscripto, in quo hunc titulum præfert: *Joannes Matbias de Claris, magnificis Regioribus, Communitatique Brixienti Sal.* quam a libello Mantuæ impresso, in quo anni nota desideratur, ex alio libello, qui una cum ipso compactus annum 1477. præfert, fortasse supplenda, nam literarum forma in utroque eadem prorsus apparet.

Quoniam vero hic incidit mentio Editionis illius Vicentinæ, unde Calphurnii Carmen desumpsimus, Catullum, Tibullum, Propertium, ac Statium Calphurnii studio emendatos complectentis, operæ pretium est, Lectorem moneri, ad illam ipsam referri, quod ab Hieronymo Avantio, dum ageremus de Catullo, proditum vidimus, dum ait: *Quis enim ante Calphurnii castigationem Catulli Scripta non stomachosus attingebat?* & paulo post: *Hic porro, quantum humani vires ingenii passæ sunt, uno mense elaboravit, ut quatuor illi Poetæ emendatiores haberentur.* Calphurnius ipse testatur susceptam a se in ea Editione curam, ad Hermolaum Barbarum, *Juris utriusque Doctorem peritissimum, Oratorem facundissimum, & Philosophum eruditissimum*, hæc scribens in Præfatione, quæ ad illam legitur: *Superioribus diebus a quibusdam adolescentibus studiosis rogatus, ut Propertium, aut si nollem hunc, Papinii Sylvas lectione quotidiana interpretarer, ne desiderium eorum frustarer, promisi me facturum, quod vellent. Quapropter cum percurrere cepissem id opus, quod Venetiis impressum est, quod hos Poetas clarissimos continet, Catullum, Tibullum, Propertium, & Sylvas; tot mendis refertum esse deprehendi, ut longe plura essent vitiosa, & depravata,*
quam

quam quæ emendata. Nullus certe sensus ex his elici poterat. Consectim conveni nonnullos impressores, & eos cohortatus sum, ut iterum id opus imprimerent ea correctione, qua pollicitus sum. Possum igitur gloriari, me non id emendasse, sed fere totum exscripsisse, ut quisquis deprehendere poterit collato utroque exemplari.

Quod autem prodidit Avantius, quatuor illos Poetas emendatos fuisse a Calphurnio intra unius mensis spatium, id quidem diserte non expressit Calphurnius; at ad illius Præfationis calcem affirmat, se majori celebritate opus illud properasse, quod *Bartolomæus Pajellus Vicentinus, Eques clarissimus, & nostri temporis Poeta cultissimus*, ingenti aviditate id perlegere cupiebat; is est & tui amantissimus, & observantissimus.

XXIII. Pylades Buccardus quam celebre nomen inter Criticos, & Grammaticos fuerit assecutus, quæ de ipso suis locis tradidimus, aperte demonstrarunt. Ut singulari inter Poetas quoque laude floreret, effecit Hesiodi Theogonia, elegiacis versibus ab ipso conscripta. Ad manus habeo duplicem Basileensem Operum Hesiodi Editionem, unam scilicet per Joannem Oporinum, & aliam, cui præmittitur Præfatio Joannis Birchman Bibliopolæ, adjectis in utraque *Genealogiæ Deorum a Pyladè Brixiano, Viro doctissimo, descriptæ, libris quinque*. Uberis hujus, & operolæ Pyladis versificationis afferam pro specimine priores aliquot versus libri ultimi:

*Tantalus e Plote est nympha tibi Juppiter ortus,
Quem natum fama est apposuisse Deis.
Ille quidem superum fertur conviva fuisse,
Arcanis summi nec caruisse patris.*

Quæ

Quæ quoniam est ausus mortalia ferre sub ora,
 Peſſora sunt multo preſſa dolore Jovis.
 Protinus ad Stygios puſſus fuit ille reſeſſus,
 Pomaque & inter aquas eſurit, atque ſiſit.
 Taygeta huic Niobem peperit, quam prole ſuperbam,
 Teque viro, Amphion, dirigiſſe canunt.
 Edidit & Pelopem, tergo qui inſignis eburno
 Fulſit, ubi infernis eſt revocatus aquis.
 Quatuor inde Pelopis ſætus tulit Hippodamia,
 Quam viſtam celeri duxerat ille rota.
 Lyſidicem matrem Alcmene, dirumque Thyteſten,
 Atreumque ſerum, Plithbeniumque ſimul.
 Polluit Atrei thalamos ſclerata libido
 Fratriſ, & Harpagigen, Plithbeniumque tulit.
 Tantalus acceſſit thalamo ſublatus eodem,
 Sed prior & Pelope nata Thyteſte fuit:
 Cui pater impurus ſe ſe commiſcuit, inde
 Sanctior Egiftus non genitore ſatus.
 At miſer Atreus natorum repulanda Thyteſti
 Membra tori objecit fraude recepta ſui.
 Quem mox Egiftus ferro-conſecit, & illi
 Ereptum patri reddidit imperium.
 Filius Atreo Eviolus fuit, atque Melampus,
 Tertius Alceon, mater & omnis abeſt.
 Plithbenio geniti Menelaus, & ipſe Agamemnon,
 Quos Merope exortos matre' fuiſſe volunt.
 Hoſ pater Atreo fratri, quum ceſſit in auras,
 Tradidit, inque ſuam rettulit ille fidem.
 Atridas hinc fama vocat, quos extulit Atreus,
 Ut genitor primis fidus ab unguiculis.
 Ex Helena Hermionem genuit Menelaus, Oreſti
 Paſſam, nec Pyrrho ſurripiente datam.
 Quo tamen occiſo, rurſum banc ſibi duxit Oreſtes,
 Ut nos antiqui temporis acta monent.
 Te, Menelae, patrem fortis vocat & Megapenthes,
 Quem tibi ſætura Lyd'ia ſerua dedit &c.

Opus ſuum Pylades nuncupavit Lucæ Tertio, Pa-
 P. II. P p tri-

tritorum Brixie splendori, & mecænati suo, eique inscripsit Epigramma, cujus postremum est distichon,

*Hunc tu judicio postquam graviore libellum
Terferis, in populum (si volet) ire jube.*

Hesiodo placet Homerum, qui cum eo olim certamen iniisse fertur ad exequias Amphidamantis in Chalcide, hoc loco conjungere, ut de hoc quoque bene meritam fuisse Brixianam literaturam ostendamus. Quum nihil prorsus Homericis typis impressum uspiam (quod ego quidem sciam) prodiisset, primi omnium Brixiani, Græcarum literarum, ut alibi adnotavimus, studiosissimi, Homerum non earum tantum, sed humanæ omnis doctrinæ fontem, quin flumen, & Oceanum, ut publicæ utilitati consulerent, evulgarunt, edita in lucem an. 1474. per Henricum Coloniensem, & Statium Gallicum prosaica Iliadis versione, a Laurentio Valla confecta, atque ex eo volumine, eoque anno Annales Typographici posterioris Editionis epocham Brixianæ Typographiæ, falso tamen, ut alibi indicavimus, & suo loco apertius diceretur, deduxerunt. Præfigitur Editioni illi Justiniani Luzaghi, Brixiani, Epistola ad Virum Clarissimum Bernardum Justinianum, utique digna, quæ hoc loco integra afferatur.

*Clarissimo Viro Bernardo Justiniano, Equiti aurato, ac
Oratori eloquentissimo, Justinianus Luzaghus S.*

Platonis scitum est illud, tritumque verbum, homines scilicet & hominibus nasci, atque cuivis in promerendo, quam in accipiendo, magis insistendum. Quod cum ipsa rerum omnium parens natura multis, variisque modis ostendat; tum illud, & prisci Majores sacris institutionibus suis plane declararunt, qui eos censorio supplicio publi-

blice notabant, quos aut propriis in rebus minus diligentes, aut sibi ipsis dumtaxat cum aliorum calamitate studentes comperissent; illos, quod cæteris utiles fore nusquam putarent, qui sibi, ac rebus suis inertes invenirentur; hos vero, quod libidini suæ nimium obsequentes, humanam societatem, cui omnes natura obnoxios statuit, labefacerent. At e contra bene de aliis, & de sua præsertim republica merentes, cum in hac vita & honoribus, & imperiis honestassent, post mortem quoque in cælo, interque deos eo inajores, potioresque ducebant, quo illi in terris viventes aliis mortalibus beneficentiores, utilioresque fuissent, ut Apollo, Æsculapius, Liber, Hercules, Quirinus, & alii quamplurimi, quos erroribus decepta gentilitas supplicationibus, variisque cerimoniis, uti deos immortales, excoluit. Unde cum aliis ex gentibus, tum ex Romanis in primis permulti fuere, qui pro sua republica, atque amicis, & se, & sua exponentes, nomina sua uti veneranda, ita & immortalia posteris transmisere, ut Decii, Fabii, Scipiones, Scauri, Catones, & alii innumeri. Quo fit, ut detestabilior eorum mihi improbitas videatur, quos optimum, mediocre ingenium, seu aliam promerendi facultatem ab natura, fortunave sortiti, & se malis artibus corrumpendos tradunt, & rebus suis ad aliorum perniciem, vel ad nullum certe commodum inglorii, desidesque utuntur; aut cum ipsi nulla ex parte velint, vel possint quippiam viro dignum excudere, si quando aliquid ab aliis ad communem hominum utilitatem elucubratum nacti fuerint, illud perinde ac Cereris sacrum, humanumve illud cælo delapsum Ancile, abditum, non dicam, servant, sed verius, ne servetur, habent. Homines sane Istonea rota, qua æternum crucientur, dignissimi. A quorum genere tu, sapientissime Senator, tantum dissentis, atque abhorres, quantum illi a recta, probataque vivendi ratione deviarunt. Sed indigetes illos (sic enim olim habebantur) integerrimosque Romanos vitæ sanctitate, & præclaris facinoribus imitatus es. Nam sive privatum, sive publicum munus agens domi, forisque omnibus opem tuam implorantibus præsto affuisti, acrique studio, & opera fovisti. Plerique vero, & generis obscuritate, & re-

rum angustia ante incogniti, ductu, auspiciisque tuis, ad amplas dignitates, modestasque fortunas aspirarunt. Quanto vero Reipublicæ Venetæ ornamento, & utilitati sis in dicenda sententia, causis perorandis, legationibus obeundis, gerundisque magistratibus, dicere non attinet, cum omnis serme Italix angulus, quantumvis remotus, tua resonet magnifica, & præclara gesta. Sive enim ad summos Pontifices, sive ad Imperatores, Regesque excellentissimos, aliosve Principes Orator accedas, non Exorator tantum, sed laudibus insuper, ac dignitatibus auctus ad tuos reverteris. Quibus tamen rebus nusquam insolentior, ea & privatim es parsimonia, & publice mansuetudine, atque modestia, ut nemini te præferas, sed omnes colas, omnes observes. Unde fit, ut quanto minus dignitatibus, atque honoribus studes, tanto honoratior, gloriosiorque sis, & habearis. Neque enim tu tantum præsentis favore, atque opera juvare instituisti, qui & posteritati longe prospiciens multa, vel abs te utilissime lucubrata digessim, vel a Græcis digesta Latina fecisti, ut, sicut in mortalibus te agentem nusquam gloria sit defertura, ita & deinceps perpetuo, & ubique celebratum, gloriosumque per hominum oralatum iri, haud sit dubitandum. Prætereo munus illud Oratorium, te tibi, familiarique tuæ domesticum, ac peculiare fecisse, quod summo olim studio, & exercitatione sibi pater tuus Leonardus Orator, vir in omni scientiarum genere longe doctissimus, quæsierat. Non possum cuncta memorare, neque id ad præsens satis negotium facit. Itaque jam ad alia diverto. Ego Homeri Iliadem Latinam, ut jam pridem noras, per Laurentium Vallensem factam, ita, ut vides, imprimendam, propagandamque, ut mecum sæpe egeras, curavi. Hoc sane jamdiu præstaturus, si cui id operis obeundum Brixie idoneum nactus fuisset artificem, & si quæ fideliora exemplaria comperissem, nec non, ut ingenue fatear, nisi hæc jam pridem literarum studia, domesticis rebus implicitus, si non penitus, majore tamen ex parte rejecissem. Verum enimvero quod & tibi gratum, & omnibus utile fore, si id exponerem, exploratum haberem, illud diutius apud me residere nulla ratione sum passus, ne quod in aliis reprehendere soleo, eo ipse, & alio

aliorum, & proprio judicio damnandus forem. Te vero præcipuum Oratorum decus, singulareque literatorum præsidium, cui hoc qualecumque est munus, inscriberem, dignissimum duxi. Quod cum vir sis optimus, mihiq; benivolentissimus, tum is certe es, qui utraque lingua ita polleas, ut solus Græcorum uberratem, Latinorumque proprietatem consecutus videare. Accedit ad hoc, quod Ilias ipsa, quæ ut ignota, antea in pulvere, & tenebris, nunquam fortasse aliter lucem visura, tinearum esui relinqueretur, per te Italiæ claritati celebranda exhibetur. Quam, cum in Galliis Legationis munere fungere, apud gentes eas tam neglectam, incultamque miseratus, jussu, & impensa tua transcriptam in Italiam, unde, nescio quo fato, ablata fuerat, retulisti. Opus medius fidius elegans, ac præcipuum, & quod maxime omnes literarum studiosos juvare possit. Nam etsi Varis ipsius suavitas, elegancia, dignitas, atque (ut sic dixerim) majestas, non suo, idest latino sermone, haudquaquam, quæ apud Græcos est, appareat, inventionem tamen, & ordinem, sententiarum gravitatem, negotiorum expositionem, rerum concinnitatem, perspicuam brevitatem, figuras cum innumeras, tum verbis, rebusque accommodatissimas, quoquo modo nosse simul, & uti nostri fere omnes poetæ, & ipse in primis Maro Homerum sit imitatus, quidque inde sibi quisque desumpserit, videre, utile pariter, ac jucundum fuerit. Omitto in ipsis poetis pleraque, quæ nonnullis, vel mediocriter eruditis antehac subobscura fuerunt, hujus Operis lectione illustranda. Etenim quamvis, Nigidium, Probum, Asperum, Donatum, Servium, multosque id genus habeamus, qui ea edoceant, hæc ipsa tamen planius, fideliusque apud auctorem suum legere, si non firmitatis, plus certe claritatis habebunt, & gratiæ. Nam quæ apud hujusmodi interpretes dumtaxat adducta leguntur, ea plerumque aut librariorum incuria mendosa reperiuntur, aut compendio minus apta. Accipies igitur, immo recipies (tua enim antea fuerat) Homeri Iliada, & si quando otium, quod rarissime datur, nactus fueris, leges, præque tanti Poetæ reverentia, sicubi visum fuerit, castigabis, melioremque facies. Rem sâne pro summis, immortalibusque tuis in me,

meos.

meritoque meritis, si pretium attenderis, miniam, si sincerissimam in te dantis fidem, promptissimamque, & optimam voluntatem reputaveris, pro summa tua in me benivolentia non utique negligendam. Vale.

Laudes, quibus Bernardum Justinianum in hac Epistola ornavit Luzagus noster, non aliorum tantum doctorum Virorum suffragiis confirmantur, sed præterea solemnem Sixti IV. Pontificis Maximi præconio, quod exstat in honorificentissimis ad eum scriptis ab eo Pontifice Apostolicis literis. Has mihi exhibet rarus ille, ac vere aureus libellus, cujus alibi mentionem fecimus, ipsius Bernardi, & Leonardi Justiniani patris Epistolæ, & Orationes complectens. Nam postquam Pontifex veterem morem laudasset monumentis aliquibus celebrandi memoriam præstantium Virorum, nec non Orationem a Bernardo Justiniano in publico Consistorio habitam, affirmasset *ita gravem, & luculentam, ut omnium judicia, qui eum præsentibus audierant, non in laudem solum, sed in admirationem, stuporemque converterit;* suas literas tandem his verbis concludit: *Sane Nobis visum est in vicem Statuæ cujusdam, aut Coronæ, te hoc Nostro luculentissimo testimonio condecorare, ut te & gravissimum, & eloquentissimum habeamus Oratorem, & præcis illis celebrioribus, vel Græcis, vel Latinis merito comparandum.*

Bernardum Justinianum omni literarum genere ornatum, ac proinde Græcis etiam (in quibus præceptores habuisse Georgium Trapezuntium, & Guarinum Veronensem, earum in Italia reparatores, ex ipsius Bernardi literis edocemur) nil mirum, Gallica etiam legatione fungentem, earundem studium minime se-

po-

posuisse; imo vero ob id ipsum quo honore affectus fuerit a Clarissima Universitate Parisiensi fidem facit ejus ad illam Oratio, eademque testatur, in augusta Galliarum Metropoli nihil Bernardo jucundius fuisse, quam loca antiquis celebrata literis videre, & recognoscere, nobilissima Gymnasia lustrare, in quibus studia literarum, *quæ in diversis gentibus* (ita loquitur in ea Oratione Bernardus) *per varias ætates agitata, pulsa antiquioribus sedibus, & ejecta, huc tandem se recepere; jamque annum septuagesimum quartum, & sexcentissimum firmissimo, & stabilissimo domicilio conquiescere;* indeque occasionem arripit Bernardus ei Universitati gratulandi ob Collegium Italis in illa constitutum, *Vos enim* (inquit) *memores Latinas literas ab Italis accepisse, Italis etiam designavistis Collegium amplum, & illustre, cui tu nunc præcs venerabilis Donate Pater.*

Nil itaque mirum, ut dixi, Bernardum literarum, quo flagrabat, amorem in Parisiensi etiam Legatione obeunda servantem, ac proinde eruditis spoliis comparandis intentum, Homeri Iliadis Versionem, nescio quo fato ex Italia ablatam, & in Gallias avectam, ibique situ, & pulvere oblitam, suo sumptu transcribendam curasse, ut Italicæ celebritati redderetur. Beneficium hoc Reip. Literariæ a Bernardo Justiniano collatum celebratur etiam in Epigrammate ad calcem Brianæ Editionis, de qua loquimur.

*En Graiis tantum quondam celebratus Homerus,
Nunc quoque & Ausonio grammate notus erit.
Primus bonor Valle (namque is traduxit) at alter
Bernardus posthæc Justinianus erit.
Namque hic occiduas Orator missus ad oras,*

E

E Galliis Latias rettulit ipse domos.

*Quamque prius pulvis, quam blattæ, ac tinea preffit,
Ilias in lucem cultior ecce redit.*

Verba illa, *Primus bonor Vallæ*, non ita quidem sunt accipienda, ut Laurentius Valla omnium primus Iliadi in Latinum sermonem vertendæ incubuerit; nam tam Franciscum Petrarcham, quam Joannem Bocaccium, qui Laurentium Vallam ætate præcesserunt, Latinam Iliadis Versionem ad manum habuisse, quin ipsosmet a Græcis hominibus faciendam curasse, certo constat. Non ita vero constat, Laurentium Vallam unum ex illis fuisse, qui ut Nicolao V. Pontifici Maximo morem gererent, Versioni illi manus admove-
runt, primas ferente, ut scribit Pius II. Europ. c. 58. Horatio Romano, Scribatum Apostolicum eam ob rem consecuto, & magnis a Nicolao pollicitationibus ille-
cto. Laurentium siquidem Vallam (quem non quidem Pius, sed posterioris tantum ævi Scriptores Interpretibus illis a Nicolao excitatis accensent) Versionem suam elaborasse ante ipsius Nicolai Pontificatum, facile erit unicuique colligere, primum ex obitu ipsius Vallæ, quem contigisse anno Chr. 1457. ex Jovii auctoritate, aliisque indubitatis monumentis omnino liquet, deinde vero ex iis, quæ in Luzagi Epistola narrantur, de Vallæ Versione in Gallias translata, & de tineis, cum quibus ibidem collectabatur, nunquam fortasse lucem visura, nisi eam ab interitu Venetus Orator vindicasset. Eo munereungebatur Justinianus an. 1460. quinquennio scilicet postquam Nicolaus V. decessisset. Insignis hæc Bernardi Justiniani laus non alio
quam

quam Luzagi nostri testimonio (quod ego quidem sciam) innotescit ; quemadmodum Aloyfio Mocenico Veneto item in Galliis Oratori (ut hoc obiter notem) ob Plinii Epistolarum in Italiam reportatum correctissimum Volumen , atque ita antiquum , ut ad ipsa Plinii tempora referri posse videretur , maximam gratiam habendam esse testem habemus Ald. Manutium in literis ad ipsum Mocenicum , Equitem , & Senatorem amplissimum , suæ Epistolarum illarum Editioni præmissis.

Adnotare etiam placet , inter insignes ea tempestate Homeri Interpretes referendum esse Angelum Politianum , qui scilicet tenera in primis ætate Poetarum Principi vertendo operam navavit , ut ex ejus Scriptis , & eorum , quos æquales habuit , testimoniis certo deprehendimus. Ea Politiani Scripta , hac occasione accuratius quam antea (quod spectat ad Græcanicam ejusdem literaturam) evolventes , aliud quidpiam (de quo haud pudet Lectorem ingenue monere) deprehendere valuerimus , nimirum citatam in priore hujus Speciminis parte pag. 46. Hermolai Barbari Epistolam , datam fuisse ad Joannem Picum , non autem ad Politianum , in quo adeo nullo tempore desiderata fuit Græcæ linguæ intelligentia , ut Homericam ejus Musam , cui admodum adolescens manum admoverat , Marsilius Ficinus , & Jacobus Cardinalis Papiensis miris laudibus in cælum extulerint.

Brixianos nostros Homericorum Poematum studio , & ardore ea tempestate flagrasse , oportet , quippe qui non solum de iis propagandis cogitarunt , quin nihil HomERICI in lucem ulpiam prodissset , non Versiones quidem

P. II.

Qq

Lati.

Latinæ, non Græcus textus (cujus principes Editiones habentur Florentina an. 1488. & Aldina an. 1504.) sed præterea eam ipsam Vallæ Versionem iterum, & tertio intra paucos admodum annos evulgarunt. Ad manus siquidem habeo aliam ejusdem Versionis Editionem, anni quidem, loci, & typographi notationibus destitutam, sed quæ ita similis Brixianæ, de qua egimus, utramque invicem comparanti apparet, ut ex ipsæ notationes, & non aliæ, ipsi quoque convenire censeantur; nec non tertiam a Bernardino Laurino Brixiano Cive nuncupatam Nicolao Corrigiensi Principi, & hac nota in calce insignitam: *Accuratissime, ac solerti cura impressam, ac emendatum hoc opus per Venerabilem Dominum Presbyterum Baptistam Farfengum, impensa vero Domini Francisci Laurini civis Brixiani, anno a Natali Christiano MCCCCCLXXXVII. die vero sexto Mensis Septembris.* Laurinus hic in Epistola, quam Editioni præmittit, multa habet de Meccænatis sui laudibus, quem Mammeæ filio Alexandro comparat, eoque neminem esse ex iis, qui rerum potiebantur, magis erga doctos Viros benevolentia, ac beneficentia animatum affirmat, cui proinde alia etiam, non injuncta ipsi futura, propediem excudenda, se dicaturum pollicetur. Laurini nulla mentio in Biblioth. Brixian. quæ tamen memorat Justinianum Luzagum, a Capreolo etiam in Histor. memoratum, & in Danielis Cereti Panegyr. hoc distichio collaudatum.

*Sed quo te versu, vel quo te ore canemus,
Luciæ lumen Justiniane domus?*

Præter Hesiodum, & Homerum, commendatissimum

num alium Græcæ linguæ magistrum, & Comœdiæ veteris haud dubie principem, Aristophanem, inquam, Brixiana juit literatura; siquidem eas Comœdias in vernaculam linguam verterunt Bartholomæus, & Petrus Rositini a Prato Alboini, dicaruntque Camillo Gambaræ, quem ita Græcarum literarum peritum affirmant, ut Comœdias illas absque ullius versionis ope intelligere facile valeret. Prodiit Venetiis. an. 1545. Brixiana hæc Aristophanis Versio, quum Comici illius nondum ulla vernacula Editio in lucem manasset; Latina vero ante paucos dumtaxat annos manaverat auctore Andrea Divo Justinopolitano, at quam infelici successu, videsis apud Fabricium T. 1. Bibliorh. Gr. ubi de Aristophane. Bene itaque profecto de Græcis literis merita sunt Brixianorum ingenia, quorum scilicet studiis Homerus, Hesiodus, Aristophanes debent, ab iis legi, & intelligi potuisse, qui Græcam linguam ignorarent.

XXIV. Bonifacius Bambus, de quo superius, dum Christophori Barzizii Tractatum de Oratoris Fine referrem, Poësin etiam excoluisse, nos edocet libellus, quo Jacobus Philippus Tomafinus Clariss. feminæ Cassandræ Fidelis Venetæ Epistolas, & Orationes publicavit. In eo refertur ipsius Bonifacii Bembi Elegia ad eandem Cassandram, ex qua versus aliquot seligemus, Cassandræ laudes, & una simul domesticas clades ipsius Bonifacii exprimentes.

*Orpheus ad cantum motasse cacumina quercus,
Thebanamque ferunt saxa secuta Iyram.
Dum loqueris, tu saxa facis, quercusque videri,
Is stupor invadit docta puella viros.*

Qq 2

Su-

*Suscitat ipsa tamen tua me presentia semper;
 Briget & mentem, quantumque mihi est.
 Verum animum subeunt hinc fratrum funera, matris;
 Illinc. Heu misero mater adempta mihi est!
 Heu dulces Fratres! quæ vos mihi dira premit.
 Sori fratres; cur me non tulit hæc eadem?
 At, tu cara parens, potuisti linquere natum,
 Cara parens, saltem me miserata redi.
 Tu mihi divitiæ, tu vitæ summa voluptas,
 Mater eras; misero heu mater adempta mihi!
 Quid faciam posthac? moriar, quid morte beato,
 Sit nedum, misero, gratius, aut melius?
 Virgo vides, quo me oblitum dolor altius agebat;
 Parce oro, aut nostri tu miserere magis.
 Namque tuas laudes dabitur mihi carmina longo.
 Dicere fortassis, candidiore die.*

Hi versus, & Epistolæ nonnullæ, exstantes in eo libello, testantur literarum consuetudinem, quæ inter Bonifacium nostrum, & Cassandram vigebar; lectissimam scilicet virginem illam, cujus ingenium, & doctrinam Viri docti ejus temporis plurimi fecerunt, adeout Politianus, ad eam scribens, *Italiae decus*, ipsam appellare, & cum Musis, Sibyllis, Pithiis, aliisque, quas vetustas jactat, seu vaticinantibus, seu philosophantibus feminis, comparare non dubitaverit, eandemque illi venerationem profiteri, qua Joannem Picum Mirandulanum colebat. Et ipsa Cassandra Bonifacium Bembum *virtutum decus* in quadam Epistola appellavit. Ea ipsa inter celebriora ingenia, quibuscum amicitiam coluit, hoc honore dignata est: & Calphurnium nostrum, quem *eloquentiæ lumen* dixit, & Ceretam nostram, ut fidem facit ipsius Ceretæ ad Bernardinum Laurinum Epistola.

Bonj-

Bonifacium Bembum alia etiam carmina scripsisse, non est dubitandum, nam exstat ejus Oratio ad Juventutem Mediolanensem edita Mediolani apud Merulam, de figurata Oratione adversus quosdam, qui ejusdem Carmen reprebenderant, tanquam in eo nihil definiret. Ea Oratio ita definit, sed de his plura in secundum Ovidii ad Augustum sumus dicturi, si otium fuerit.

XXV. Seorsim a Brixianorum Poetarum serie (quam clausi) Andreas Maro ideo locatur, quoniam mira quidem fundendi ex tempore carmina facilitate inclaruit, at ea, si unum versiculum, unumque Epigramma excipias, haudquaquam scriptis consignata reperiuntur. *Hunc* (ita de eo in Lillii Gyraldi de Poet. nostr. temp. Dial. 1.) *extemporalis facultas commendat, adeo ut superioribus bis mensibus (ut modo dicebam) in Cosmiano Leonis X. convivio ceteros, qui inibi aderant, Poetas, proposita materia, quam referrent ex tempore, obmutescere quasi elingues fecerit, inter quos Lippus. Canit hic quotidie aliqua, quæ iis mihi longe meliora videntur, quæ juvenis manibus exciderunt; tumidior tamen interdum, et duriusculus. Usinam illi fata meliora portenderent.*

Neque vero Lippo illi dūmtaxat, qui a Leone X. jussus cum Marone certare in Medicorum Cosmiana solemnitate, victus cesserat, Maronem nostrum Gyraldus prætulit, sed Pamphilo etiam Saffio, ut videtur, nam de ejus, post laudatum Maronem, in faciendo versibus celeritate illico verba faciens, divinam quidem ejusdem memoriam commendat, sed in eo verissimum fuisse pronunciat, quod Aristoteles prodidit,

dit, plerunque ingenio, ac judicio deficere eos, qui memoria excellunt, *minus enim omnino Saffio judicii, ac lime*. Multo vero magis Maronem Gyraldo prætulisse censendus est Joanni Gazoldo, & Camillo Querno, quos extemporali illa facilitate insignes, ad calcem ejus Dialogi, fugillat tanquam inconditos, & malos Poetas; Gazoldumque scribit ob ineptos versus, & claudicantes male mulctatum aliquando flagris a Leone; Quernum autem, seu Archipoetam, immania ingurgitantem pocula, auribus & pene naribus deformatum, Maronem contra nostrum ab ipso Leone X. Sacerdotio donatum fuisse, paulo post ex Jovio trademus.

Andreæ Maronis eximiam extemporalitatem sæpius celebratam reperio a Pierio Valeriano in libello ejus carmina complectente, ab Octavio Stephanio, cui Valerianus ea commendaverat, edita Venetiis ex ædibus Jo. Tacuini an. 1509. & Aloysio Foscarino Clarissimi Nicolai filio nuncupata. Nam in Hexametris, qui primo loco in eo libello occurrunt, de Studiorum conditione ad Nardinum inscripti, hunc monens, qua ratione popularis aura sit aspernanda, rarisque Censoribus, tribus ad summum, carmina, quæ conderet, submittenda, de Marone hæc habet:

*Seu tecum ludat Maro junior ille,
Qui subito tam multa canit, tam docta calore
Concitus, ut videant, quem jam conferre minores
Audaçter possint majoribus.*

Adest præterea in eo libello Hendecasyllabon ad Dantem III. Aligerum, quo primum Valerianus hunc commendat, *Poetam optimum, civem optimum, & optimum*

num patronum, quo Verona diu beata vivat, dein ad Maronis laudes digressus sic loquitur:

*Quid si illum audieris, velut sodales
Oëto audivimus optimum sodalem?
Nos audivimus, audit hunc & omnis
Doëtorum manus in dies canentem
Mille ex tempore carmina erudita,
Quis nil sit lutulentum, inexploratum,
Nil absurdum, & inane, nil biulcum,
Tanquam Virgilii mora, & labore,
Tanquam tempore culta sub novenni.
Tunc tu pollice utroque, tunc Maronis
Affirmes bene nomini evenire,
Quando, quod veteri absuit, sed unum,
Prælarge novus hic Maro rependat.*

Oëto sodales, quos Maronem audivisse scribit Valerianus, quinam fuerint, ex alio Valeriani Hendecasyllabo discimus.

*O felix torus! O beata mensa!
Quam tot suaviloqui beant Poëtæ,
Quam tot Socratis æmuli frequentant.
Canalis, Ciibare decus supremum,
Cultus Naviger, elegans, canorus,
Emunctus Trypbo, perpolitus, acer,
Motensis vehemens, & eruditus,
Expromptus Maro, floridus, decorus,
Borges grandiloquus, venustulusque,
Nardinus gravis, integer, severus,
Comis Lampridius, facetulusque.
O felix torus! O beata mensa!
Verum, ut sit numero undecumque felix,
Musarum numero decenter aucta,
Donec, que mereat, sequatur umbra,
Nonnum admittite nunc Valerianum.*

Maronis Elogium etiam Paulus Jovius conscripsit
his

his verbis : *Is cum summa eruditorum admiratione ex tempore, ad quam jusservis quæstionem, Latinos versus variis modis, & numeris fundere consuevit. Audax profecto negotium, ac minus impudentiæ, vel temeritatis plenum, nisi id a natura, impetu prope divino, mira felicitas sequeretur. Fidibus & cantu Musas evocat, & quum semel coniectam in numeros mentem alacriore spiritu inflaverit, tanta vi in torrentis morem citatus fertur, ut fortuita, & subitantiis tractibus ducta, multum ante provisa, & meditata carmina videantur: Canenti defixi exardent oculi, sudores manant, frontis venæ contumescunt, & quod mirum est, eruditæ aures, tanquam alienæ, & intentæ, omnem impetum profluentium numerorum exactissima ratione moderantur. Exceptus est fecundissimo plausu, ac idcirco a Leone representatæ facultatis nomine sacerdotio donatus, quum post celebre convivium, cui Regum Legati, Senatoresque aderant, de suscipiendo sacro bello dicere jussus, jucunda figurarum varietate decantavit, orsus hoc nobili carmine:*

*Infelix Europa, diu quassata tumultu
Bellorum.*

Hic est ille versiculus, sonorus utique, & nobilis, quem a Marone compositum superius diximus adhuc exstare. Epigramma, quod itidem exstare diximus, legitur in fronte celebris libri, cui titulus, *Hypnerotomachia Polipbili humana omnia nonnisi somnium esse docet*, atque obiter plura scitu sane quam digna commemorat. Opus hoc quale sit, declarat Leonardus Crassus Veronensis in Præfatione ad illud, scilicet in Epistola Nuncupatoria ad Guidum Urbini Ducem, novum quod-

quoddam , & admirandum Opus appellans , in quo tanta sit non modo scientia , sed copia , ut eo viso non magis Veterum libros omnes , quam naturæ ipsius , occultas res se vidisse , quis existimare possit , hasque non vulgo expositas , & triviis decantandas , sed ex Philosophiæ penu depromptas , & Musarum fontibus haustas , nostrati quidem lingua descriptas , sed ad quam intelligendam opus sit tam Græca , & Romana , quam vernacula . Leonardi Craffi Præfationem sequitur primum in eo Volumine Hendecasyllabon Joannis Baptiste Scythæ , qui & in Pierii Valeriani carminibus memoratur (isque est , in quem Becichemus funebrem Orationem , de qua supra , velut ex tempore , composuit) deinde triplex Operis Synopsis , scilicet Latinis elegis , prosa , & Italico rhythmo exposita ; tandem Maronis nostri Epigramma , singularis utique ejusdem fœtus , qualem singularis prorsus doctrinæ , & styli Volumen deposcebat .

Andreas Maro Brixianus.

Cujus Opus , dic Musa ? meum est , octoque sororum .

Vestrum ? cur datus est Polipbilo titulus ?

Plus etiam a nobis meruit communis alumnus .

Sed , rogo , quis vero est nomine Polipbilus ?

Nolumus agnosci . Cur ? certum est ante videre ,

An divina etiam livor edat rabidus .

Si parcat , quid eris ? noscesur . Sin minus ? baud vos

Dignamur vero nomine Polipbili .

Subsequitur illico tetrastichon :

O quæ de cunctis felix mortalibus una es

Polia , quæ vivis mortua , sed melius .

Te , dum Polipbilus somno jacet obrutus alto ,

Pervigilare facit docta per ora virum .

P. H.

R r

Au.

Auctor ejus Operis, quem Maro pandere recusavit, curiosi cujusdam diligentia effecit, ut nobis innotesceret; is siquidem observavit, initiales singulorum capitum literas in unum collectas hoc acrostichon redere: *Poliam Frater Franciscus Columna peramavit.*

Infelix Maronis exitus ab iis ipsis describitur, quos eidem elogium textentes allegavimus, Gyraldum scilicet, Jovium, & Valerianum, qui propterea in libello de Infelic. Literat. Maroni etiam locum assignat, ibique scribit, Maronem, quum in acerbissimas illas Romanæ direptionis calamitates incidisset, captivum actum, fortunis omnibus expoliatum, & indignissimis modis male habitum, ærumnosissimam inde vitam traxisse, dum Poematum suorum desiderio detentus, eorum recipiendorum spe, Urbe excedere nunquam animum induxisset. Pertinax Maronis consilium de Urbe non deferenda Gyraldus non ad Poematum suorum desiderium, sed ad inanes spes refert, quibus miser pascebatur; hæc enim habet in Poemate de Incomm. Urban. Dirept.

*Nec qui his captus Maro, his pretioque redemptus,
Mœnia nescit adhuc direptæ linquere Romæ,
Dum titulos sperat miser, & spes pascit inanes.
Propositam melius rem nemo ex tempore dixit,
Nec magis ullus habet promptat in carmine vires.*

Andream Maronem vere Brixianum fuisse, quamquam dimidiam patriam ab Euganeis, Foroque Julio repereret, prodit Jovius in ejus Elogio, ad quod Laromi subsequens Epigramma, id ipsum de vera Maronis patria, quæ propterea Catulli cunas parvifaceret, confirmat.

Quod

Quod spectanda data est, non Musa fruenda Maronis,

Phebe, tua est levitas, gloria quanta fuit.

Non volo. Virgilii, qui vel. meditata dolebat

Carmina, matris non satis esse mora.

Ejus at Andrea, solo quo. Brixia. alumno.

Nil facere est cunas ausa, Catulle, tuas.

Cui fuit, in subitotam promptum ex tempore versus

Ingenium, ut quicquid pangere iussus erat,

Aptaret numeris, variataque verba ligaret,

Qualia vix longi temporis esse putet.

At periere brevis brevibus cum versibus Auctor:

Deme, quod aeterno vivit in ingenio.

XXV. Benacenses typi, unde superiores tractationes de re Grammatica, & de re Oratoria, accessiones aliquas receperunt, pariter præsentide re Poetica appendicis materiam subministrant. Tusculano siquidem, præloque ibi a Paganinis, instituto debemus singulare novæ, ac festivæ prorsus Poësis archetypum, quod a Theophilo Folengo conditum ii. typi in lucem primo ediderunt. Quæ ad Theophili Vitam spectant, prolixè allegantur in Biblioth. Benedict. Casin. indeque discimus, eum sæculo valedicentem, Brixia in S. Euphemie Cœnobio cucullum induisse an. 1509: plura primum Poemata Italico sermone composuisse, sed Latino tunc resflorecente, ad Latinas Musas conversum, ingens Epicum Poema elucubrasse, quod flammis illico devovit, propterea quod Virgilium superare, haud illi, ut sperabat, contigisset; Opus itaque aliud novo dicendi genere insigne, animique ingenita festivitate, ac lepore jucundissimum condidisse, in quo Latinis, ac Italicis vocibus, præcipue *Lombardis*. (ut nunc dicimus) undique permixtis, servata metri harmonia

amœnissimo carmine jocose, ac facete multorum sui temporis vitia carpit, occulte tamen, & confictis eorum nominibus; in Siciliam autem profectum, totoque decennio ibidem commoratum, Principi Ferranti Gonzagæ in paucis charum fuisse; ac demum varias tota vita expertum fortunæ vicissitudines, in amœnissimo Sanctæ Crucis Campefii Cœnobio prope Bassanum ad Medoaci ripam se recipientem, ac sacris tantum Musis, & pierati vacantem obiisse ætatis suæ anno non amplius quinquagesimo. Hæc omnia his ipsis verbis habet de Theophili Vita Auctor laudatæ Biblioth. qui prolixius postea profecquitur, quæ ad Theophili lucubrationes spectant. Nos iis omiſſis, ea tantum, quæ ad Benacensem nostram Editionem spectant, attingemus. Complectitur ea quatuor titulos, seu libros, videlicet Zanitonellam, Phantasias, Moschæam, Epistolas demum, atque Epigrammata. Ad calcem legitur Epistola vernacula Auctoris, sub Merlini Cocaii nomine suum occultantis, ad Alexandrum Paganinum. Hunc, acerbe conqueritur, typis suis edidisse ea Scripta, in quibus componendis se magnam temporis jacturam fecisse, usque ad lacrymas dolet. Subsequuntur literæ Paganini ad Auctorem, quibus se excusans, culpam omnem rejicit in eos, qui illorum Operum maxime cupidi, maxime instabant, ut tandem evulgarentur, & præsertim in Federicum Marchionem Mantuæ, qui exemplar suppeditaverat, non tamen adeo emendatum, cujuscemodi erat illud, quod Vulcani escam jam factum audierat. In iisdem literis affirmat Paganinus, multa inhonesta ex Merlini Ope-
re

re subtrahita fuisse ab eo ipso, a quo exemplar typis tradendum receperat. Post eas Epistolas notantur errores typographici, Philomuso corrigente. Editionis notæ hujusmodi sunt, *Tusculani*, apud *Lacum Benacensem*. *Alexander Paganinus*. Anno MDXXI. Die V. Januarii. Benacensis Lacus fertilitas, argumentum est Epigrammatis, quo quatuor Merlini libri clauduntur, & postremum distichon ita se habet:

*Nascitur hic oleum, piscis, piscator, & ipsas
Padellas ferro Brixia diros habet.*

Alexander Paganinus industriam suam non Tusculani tantum, sed Venetiis etiam exercuit, & de re Poetica quam bene meritus fuerit, docent Poetarum Opera exiguo, & nitidissimo charactere ab eo impressa, & in Præfatione ad Martialem de suo illo publicam utilitatem juvandi proposito ita loquitur: *Ceterum quæ prius iisdem edidimus formis, cœu prototypa leviuscula præmisimus, prætentaturi videlicet gratiam vestram. Posthac (quando laborem meum vobis non ingratum esse intelligo) dabo operam, ut optimi, ac electissimi quique Auctores nova hac nostra veluti palingenesia ad eam, quam videtis, & pulchritudinem, & facilitatem vobis redigantur.*

Hactenus de re Poetica, seu de studiis, quibus eam juvit Brixiana literatura, nec enim Poetis nostris, qui Latino sermone scripserunt recensitis, animus est eandem operam ponere in recensendis eorum municipibus, qui vernacula carmina condiderunt. Quum tamen binas ob oculos habeam Collectiones Hieronymi scilicet Ruscelli, & Academicorum Occultorum, qui-

quibus nonnulla præstantium inter ipsos Poetarum carmina afferuntur, operæ pretium erit, eorundem saltem nomina, inde desumpta, hoc loco adnotare.

Veronica Gambarà principem in Ruscelli Collectione occupat locum, ejusque esse versus complures, Victorix Columnæ antea tributos, ad libri calcem affirmat Ruscellus, Cardinalis. Ridolfi, a cujus manibus illos anno 1537. receperat Viterbii, testimonio, quin ipsius Veronicæ Gambaræ, & Victorix Columnæ, quas id ipsum affirmasse Comes Fortunatus Martinengus, & Lucas. Contilius, testati fuerant. Hæ sunt duæ illæ matronæ, quin Principes illustres, *quarum utriusque* (ut loquitur Gytaldus. de Poet. nostr. temp. Dial. 2.) *pro sexus qualitate divina leguntur Pocmata*. Est mihi in manibus Vita Veronicæ Gambaræ ab Jo. Hieronymo Catena Latine reddita, & ex magnis, quibus in ea ornatur, elogiis illud utique singulare, quod Veronica cum Bembo alta, & erudita, adeo in poetica facultate emihuisse dicitur, ut, æque ac Bembo, præclaris omnibus ingeniis, quæ ætas illa tulit, faciem quodammodo prætulêrit. Nata est Veronica apud Pratum Alboini, quod non longe distat a flumine Mella, ex Comite Jo. Franc. Gambarà, & ex Alda, Pix Familix Carpenfis, fratresque habuit Ubertum Cardinalem, Brunorum, Hippolytum, & Camillum; conjugem vero Gibertum, Corrigii Dominum, cui Violanta Pica Mirandulana antea nupta fuerat. Brixianæ hujusce Matronæ, bonis omnibus fortunæ, corporis, atque animi cumulatissimæ, ad calcem ejusdem Vitæ hoc existat Epitaphium.

Gam-

Gambara sub tumulo jacet hoc Veronica Princeps

Corrigii, solo nomine nota satis.

Quam coluit quicumque Heros, quicumque Poeta

Quam tectinit, lapide hoc Gambara contegitur.

Gambara stirps, nomen Veronica, Brixia mater,

Musa Erato, titulus Corrigium, et tumulus.

Post Veronicam Gambaram sequuntur in ea Collectione Petrus Bargnanus, Jo. Andreas Hugonius, Lucia Albana Advocata, Comes Jo. Franciscus Gambara, Vincentius Merellus, M. Aurelius Francius, Bartholomæus Tiberus, Comes Fortunatus Martinengus, Comes Vespasianus Martinengus, Franciscus Pocopagnus, Pamphilus Montius, Pompeus Pocopagni, Camillus Fainta, Hieronymus Bornatus, Jo. Antonius Sacchet-
tus, Balthasar Cazzagus, Hieronymus Fenarolus, Bartholomæus Arnigius, Fabius Mojacola, Emilius Emilius, Mariotus Martinengus, Franciscus Nores, Vincentius Gabianus, Martinus Agatius, Franciscus Stella, Vincentius Porrus, Leo Ceretus.

Collectioni suæ Ruscellus duplicem adjecit appendicem. In priore affertur Carmen incerti, ut ibi dicitur, Auctoris, at eum Brixianum esse monuerat jam ante Ruscellus, professus se illius nomen minime pandere, quod Auctor ipse id veraret, ne mortuo jam Fracastorio, cui Carmen illud tribuebatur, alienam gloriam sibi adsciscere velle videretur. Posterior appendix collectos exhibet versus Dominici Mantuæ Brixiani, quos Ruscellus Hieronymo Martinengo Sanctæ Sedis ad Romanorum Regem ablegato dicavit, data ad eum Epistola an. 1553. cui ut dicarentur, Ruscellus affirmat, Mantuam ipsum, dum viveret, in vôtis habuisse.

Col-

Collectionem suam Ruscellus nuncupavit Virginiae Palavicinae Gambaræ, in cujus laudem multa habet in Epistola ad ipsam, & multa etiam in Brixiae laudem præsertim ob præclara, quæ in ea Urbe florebant, ingenia, & ob singularem in primis Poetarum præstantiam, qua Urbem illam nulli Italicarum civitatum secundam affirmat. Inde factum puto, ut aliorum etiam illustrium Italiae Poetarum Collectioni a se adornatæ, Ruscellus non alium Mæcenatem selegerit, quam Brixianum Patritium, Aurelium nimirum Portulacæ, quem scientiis omnibus perpolitus commendat. Aurelius Portulacæ, Pontificis Max. Pii IV. Cubicularius, sæpius etiam laudatur a P. Francisco Spinula, qui eidem plura inscripsit carmina.

Collectio autem altera, quam indicavimus, Academicorum Occultorum carmina vernacule item edita complectitur; dicaturque Barbaræ Calinæ, cujus laudes iidem veluti certatim prosequuntur. Nobis satis erit ex Latina superius memorata eorundem Academicorum Collectione versus quosdam Taygeti recitare.

*Nam quis te fama præclaro e sanguine natam
Nesciat, atque animi tot bona rara tui?
Illa es, quæ sexum vincis, vestigia cujus
Componunt Charites, subsequiturque Pudor.
Maxima cui Pallas mater, Prudentia nutrit,
Cujus & in labris mellificavis apis.
Quam propter redeunt Vates, Musæque resurgunt,
Ferreæ quas tenebris sæcula condiderant.
Hæc ego, cum sineret fatum, memorare parabam,
Heu heu quam celeri fors mea versa rota est!
Nunc mea Calliope, quod cæperat, interrumpit:
Quæ mibi fors rapidas iniicit atra manus!*

Jam

*Jam video Infernos Manes, noctemque profundam,
Me tenet & stygii concava cymba Senis.
Prob superi, lustris rapiar vix quinque peractis,
Atque erit ætatis tam brevis hora mee?
Sic flos vix natus pedibus calcatur euntis,
Sic avido implumes angue vorantur aves.*

Ut ex Ruscelli Collectione fecimus, ita ex ea Academicorum Occultorum, Brixianorum Poetarum nomina recitabimus. Sunt autem Hieronymus Bornatus, P. Antonius Soncinus, Comes Alphonfus Capreolus, Franciscus Richinus, Augustinus Gallus (hujus tamen, quod neque Musis, neque Philosophiæ vacasset, versus non afferuntur, sed aliorum in ipsius laudem) Jo. Antonius Taygerus, Cæsar Duccus, Ludovicus Federicus, Bartholomæus Arnigius, Diomedes Sala, Julius Martinengus.

In ea Collectione, quam an. 1568. edidit Vincenzius a Sabio, exstant ad singulorum Academicorum carmina Præfationes, eorundem nomina, & insignia, quibus ex Academia legibus utebantur, doctæ, atque eleganter explicantes. Earum expositionum Auctor, Bartholomæus Arnigius; illa tantum, quæ ad ipsum spectat, excepta, ab Academia scilicet Scriba composita. Excelluit Arnigius in Physicis, ac proinde recurret de eo sermo, dum Philosophica pertractabimus. In Hetrusca etiam Poesi admodum valuisse, ipsi ejus versus ostendunt; quare Taygerus in Collect. Præstant. Poetar. quosdam e suis ad ipsum mittens, eos ita exorditur:

*Accipe, quam præsens cupio tibi ferre, salutem,
Arnigi, Hetruscæ gloria summa lyra.*

P. II.

S f

At-

Atque hic præfenti tractationi de re Poetica finem impono, vosque Lectores obsecro, *ne me* (ut Gyraldi Dialogum priorem de Poet. nostr. temp. concludentis verbis utar) *ambitiosum putetis, quod nimis multos collegerim*; nam contra, plures profecto collegissem, si diuturniorem in iis perquirendis operam ponere libuisset, præterquam quod nonnullos quoque, qui tamen ad notitiam meam pervenerant, ultro prætermisi.

At nulla ratione pro coronide Voluminis omit-tendus, eximium Brixianæ Literaturæ decus, Pater Octavius Pantagathus, cujus mentionem facit magna cum laude Gyraldus, vel eo ipso loco, quo Brixianos Poetas taxasse jam vidimus; nam hæc ejus sunt verba: *Brixia multos habet Eruditos, sed non & Poetas, ut ejus filia Verona. Inter Eruditos quidem magnus ubique Pater Octavius, nisi quod stylo abstinet, nec suas opes publica taberna venditat. Versificatores etiam potius, quam Poetas sforvet ipsa Brixia.* An ea nota Brixiani Poetæ sint digni, æqui Lectores, ut superius etiam diximus, dijudicent. Laus certe, quam mere-tur Pantagathus noster, ex postrema hujus Operis Parte, cui Sacra reservavimus, abunde innotescet. Hoc loco solum adnotabimus, eundem ita eruditum, ita literis omnibus excultum fuisse, ut Poeticæ quoque rei intelligentia admodum excelleret.

Quum perennem, uberrimumque optimarum scien-tiarum fontem P. Manutius in Epistola ad Juliam Pogia-num Epistolar. l. 5. appeller Octavium Pantagathum, ac ipsi gratuletur, quod Romæ non minus ex tanti Viri consuetudine, quam ex locorum admonitu, ad
lire.

literarum decus excitaretur ; idemque Epistolar. lib. 2. Octaviano Magio , qui cum Aloysio. Moce- nico , præstanti Viro , Venetæ Reip. Legato Romam se contulerat, item gratuletur non ita ob ipsius Ro- mæ amplitudinem , quæ præstantes olim Viros tulit, quæque Imperii terminos cum Oceano conjunxit, quam ob unius hominis consuetudinem , cujus est humanitas do- ctrinæ par, doctrina vero, quæ potest esse maxima . Is est Octavius meus, qui Urbem, a qua cæteri honestantur, sua ipse virtute nobilitat ; quum hæc, inquam, de Pan- tagatho tradat Manutius, facile credi potest, divinum ejus ingenium Poetica etiam complexum fuisse. Iis ex- celluisse Octavium Pantagathum diserte testatur Onu- phrius Panvinius. l. 2. Fastor. falsus præterea, Operi illi quid quid inesset reconditoris eruditionis, deberi Pan- tagatho, quo nemo (ait ipse) cæcitæte vel ingenio, vel doctrina, vel diligentia præstantior. At disertius illud ipsum testatur Muretus in Commentar. ad Catullum, „ Ego jam vidi hoc totum carmen (loquitur de Berecinthia, & Arti) jam quidem scriptum manu excellentis in omni ge- nere honestarum artium Viri Octavii Pantagathi, in quo alia multa ingeniose admodum emendata erant, tum hic locus ita scriptus, ut eum ipsi edidimus. Magis etiam mihi placuit hæc emendatio, postquam animadverti, Petrum quo- que Victorium eam retulisse in libros suos ; nam quod duobus ejusmodi Viris visum sit, vix est, ut de eo dubitari am- plius queat. Mirificam Catulli suavitatem, & perelegan- tes lepores Pantagathus noster, nisi Poeticam & ipse Artem coluisset, haudquaquam ita adamasset, ut in ejus Poetæ locis emendandis operam poneret ; nec Mu-

S f 2.

retus

retus operam illam tanti fecisset. Eiusdem operæ testem insuper habemus Achillem Statium Lusitanum, nam in Commentariis ad Catullum, versum in Elegia ad Januam,

Brixia Chinæ supposita speculæ,

ita & non aliter legendum monet ex Pontano, ac mox subdit, *Ostavius Pantagathus, Brixienfis ipse, singulari probitate vir, ac præstante doctrina, consultus a me, nomen ipsum Speculæ bodie nullum exstare respondit, at turrim ibi positam vulgo Mirabella vocari, nomine, ut idem censet, ducto ab Specula ipsa, unde longe, lateque prospectus pateret.* De germana ejus versus lectione contendunt inter se Catulli Interpretes, nec desunt, qui in dubium item revocent lectionem versus in eadem Elegia illico subsequenteris,

Flavus quam molli percurrit Flumine Mela,

quæ tamen, ut hic exhibetur, a Mureto, & Statio retenta absque ulla hæsitazione, credi debet ipsius quoque Pantagathi, a Mureto, & Statio in emendandis Catulli locis consulti, suffragio confirmata. Huic autem in statuenda eorundem versus germana lectione non assentiri, piaculum putet; nam si in aliis etiam Catulli locis ab eo emendatis adeo, ut vidimus, ipsius judicio Muretus, & Stadius acquieverunt, ut quodammodo pro oraculo habuerint, multo potiori jure eidem deferendum est in re ad patriæ suæ positionem, eamque, seu ejus agrum percurrentis fluminis nomen spectante. Neque veteres nonnulli Codices manuscripti, & Editio Catulli omnium antiquissima, utrique illi lectioni æque adversantes, negotium, quod Pantagatho minime fecerunt, face-

facere nobis debent; alias æque utramque rejiciendam esse suaderent, quod satis durum; Editio vero illa antiquissima in hac re præponderare eo minus debet, quo certius edocti sumus ex Calphurnii testimonio in Epistola ad Hermolaum (utique Barbarum) Vicentinæ Editioni, de qua superius, præposita, Catullum Venetiis antea editum, quemadmodum Tibullum, Propertium, & Statium, tot mendis refertum fuisse, ut longe plura essent vitiosa, & depravata, quam quæ emendata ab ipso Calphurnio.

Octavium nostrum cultiores Poetæ magnopere celebrarunt, suumque & ipsi veluti Patrem agnoverunt, ut testantur carmina, quæ sequuntur.

M. Antonius Flaminius ad Octavium cognomento Patrem.

Octavi Pater, ad Viterbiensem

*Secessum venias, rogamus omnes,
Polus, Parpalias, Priulus, ipse
Tuus Flaminius, nec esse Romæ
Tutum est, cum rapidus caniculari
Æstu Sol furit, & Viterbi in urbe
Jucundo fruimur tepore veris
Æstate in media, nec ulla certe
Est salubrior ora, nec sodales
Tui habes, mibi crede, amantiores
Usquam, te licet elegantiorum
Nemo non amet unice, colatque.
Cur ergo Pater huc venire cessas?
Num te illa innumerabilis librorum
Tenet copia curiosum? habebis
Et hic Græca volumina, & Latina,
Quæ lassare valent decem ociosos
Plinius, licet usque, & usque, & usque
Noctes, atque dies legas, ut hercle
Facis (ne dubita) tamen novorum*

Haud

*Haud te deficiet librorum aceruus.
Ergo rumpe moras, Pater venuste,
Mellite, optime, nec tuos sodales
Contemptos habe, amore vinci ab ullo.
In primis tibi turpe, quem fatentur
Exemplum memorandum amoris omnes.*

Jo. Baptista Pigna ad Basilium Zanebium.

*Scriptis tibi Jovius, cupere se carmina
De laudibus fortissimorum Principum,
Quæ illustriora facta paucis dicerent;
Eique tradidisse Bargeum Angelum,
Fumanum Adamum, junioremque Jovium.
Ita plura nunc, ut in alias imagines
Vitalis, & Myrtheus, & Thebaldus
Multa intulerunt, ex me aliqua valde cupere.
Sed velle se citissime si quid velim
Mittere, quod in libris suis accommodet.
Ego quoniam properare nolo in re ardua,
Nil prorsus illi tradidi, sed postea
Quedam vident, molestius de Cæsare;
(Molestius, quod illa diligentius
Severioris more patris cernerem)
Hec exaravi Horatii stylum æmulans:
Quæ ideo tibi mitto, ut oculis fidelibus
Ea judices, tradasque Patri Octavio,
Tuoque Pierio, viris doctissimis.*

Hieronymus Catena, de Octavio cognomento Patre.

*Octavi volitat dum totum fama per orbem,
Et quisque ad cælum maxima facta vocat,
Atque novos, versus cantat, laudatque, legitque
Roma, sacrum gaudens cingere fronde caput,
Aonia sensere Deæ, sperate sorores,
Una refert, numquam hic nos cecidisse sinet.
Carmen at ornatum postquam mirata Thalia est,
O utinam noster hic Pater esset, ait.*

Caro-

Carolus Malatesta de obitu Pantagathi
ad Paulum Manutium.

Quis nunc, Paule, meas rumor sic occupat aures?
Decessit nobis fortene Pantagathus?
Heu scelus indignum! quæ demetis omnia salce,
Invidit doctis commoda tanta viris.
Quis nunc exponet nodosa Poemata Vatum,
Sculptaque in antiquis carmina marmoribus?
Quis veterum nummos, mensuras, pondera, ludos,
Nomine quo pisces, quove vocentur aves?
Ploremus cuncti pariter decus unius horæ
Memento Hesperii decidit omne soli.

En itaque quo pacto Pantagathus in Poetarum cœ-
tum a Poetis suæ ætatis receptus fuerit, quin magistri
loco habitus. Laus autem illa, quæ Pantagathi tumu-
lo nominatim adscribitur, quod rationum, dimensio-
numque antiquarum peritissimus fuerit, testem habet
Ambrosianæ Bibliothecæ Codicem manuscriptum, qui
rationem accepti, & expensi continet cum hac Inscri-
ptione *Codex Rationum Octavii Pantagathi*. Memorat
hunc Codicem Fridericus Cardinalis Borromæus in li-
bro, de fugienda ostentatione, ibique multis laudibus
extollit Pantagathum nostrum, Servitarum Ordinis in-
signie decus, *Vir sane eximius, & dignus, a quo omnes
in illo genere erudirentur, nihil unquam typis mandavit.*
*Tantum exire in manus hominum MStæ quedam est pas-
sus, nimirum judicia hominum pertimescens, quum ve-
rius esset, Pantagathi judicium ab aliis timeri, ita legi-
tur in eo Federici Cardinalis Borromæi libro, cujus
breve excerptum exhibetur in Præfatione ad nuperam
Mediolanensem Editionem Operum Caroli Sigonii.*

De

De Octavio itaque suo, re, & cognomine Pantagatho, Brixiana omnis id temporis literatura, ac proinde Poetica quoque disciplina jure poterat usurpare Taciti illud l. 10. c. 1. *Exornat ætatis nostræ gloriam Vir seculorum memoria dignus.*

Finis secundæ Partis.

In Præfatione jam monitum fecimus Lectorem, Philosophica huic loco destinata, rejecta fuisse in alterum Volumen, ne præsentis moles nimis excresceret.

SYNOPSIS

SECUNDÆ PARTIS

HUJUS SPECIMINIS.

GRAMMATICA.

PYLADES BUCCARDUS.

Scripsit *Grammaticæ* librum adversus *Alexandri de Villadei Doctrinale*, quod una cum *Commentario* editum fuit etiam *Colibus Vallis-Trumpie* anno 1526. Affertur ejus *Doctrinalis Proæmium*. Hujus *Doctrinalis Auctoris* vixit *XIII. Sæculo*, illudque composuit, ut *Maximiani Opus* e *Scholis* ejiceret. *Maximiani Grammatici* ætas refertur ad *Anastasio Imperatoris* tempus. Ei tribuunt *Viri docti Elegias VI.* sub *Cornellii Galli* nomine passim editas. De utroque eo *Grammatico Gyraldi* judicium. *Annotationum* libellum, quo *Pylades Alexandri* nugæ confutavit, *Brixie* edidit *Jacobus Britannicus* an. 1500. cum *Epistola* nuncupatoria ejusdem *Pyladis* ad *Heliam Capreolum*. Affertur ea *Epistola*. *Pyladi* adversus *Alexandrum* prælianti sociatur *Joannes Despaüterius* *Belga*, *Grammaticorum* sue ætatis princeps. *Alexandri* barbaries potius fuit sæculi vitium, quam hominis. Scripsit præterea *Pylades Grammaticarum Institutionum Regulam*, & *Scholasticum de ipsis Carmen*. Editio *Brixiana* an. 1498. memorat duas antiquiores, *Venetam* scilicet, & *aliam Brixianam*. *Pylades* Opus commendavit *Ludovico Martinengo Veneto* *Patritio*, ei *Epigramma* inscribens, quod recitatur. *Laudes Ludovici Martinengi* ex *Daniele Cereto* in *Panegyrico*, & ex *Epistola Luca Tertii* ei *Panegyrico* præfixa. Recitatur aliud *Epigramma Pyladis* ad *Jo. Britannicum*. Composuit tandem *Pylades* ad *Scholarum* usum breve *Vocabularium metricis legibus* vincitum, quod *Brixie* impressit *Jacobus Britannicus*. Illud *Pylades Scipioni Tertio*, *Patritio Brixiano*, *Mercatorum Consuli* dedicavit *Epigrammate*, quod recitatur.

P. II.

T t

JOAN.

JOANNES BRITANNICUS.

Composuit Grammaticas Regulas ad filiorum suorum, Darii, Hippolyti, & Pomponii institutionem, quas Brixia an. 1593. impresserunt Angelus, & Jacobus Britannicus. Iisdem præfigitur Epistola ad Marcum Civilem Brixianum, qua Britannicus queritur de quorundam adversus se invidia & iniquitate. Marcus Civilis laudatur in Cereti Panegyrico. Affertur ea Britannici Epistola.

CHRISTOPHORUS BARZIZIUS.

Alius utique a Bergomate ejusdem nominis, Medicinæ in Patavino Gymnasio Professore. Publicavit Grammaticas Institutiones Brixia anno 1492 easque Ludovico Martinengo dedicavit. Recitatur ea Epistola Nuncupatoria.

JO. FRANCISCUS STOA.

Laurea Corona, quam acceperat a Ludovico XII. Galliarum Rege, jam insignis Grammaticale Opus conscripsit, cujus utilitatem commendant bina Epigrammata, quæ recitantur. Orationem asperam, & hispidam adamavit, Baptiste Pii, & Philippi Beroaldi stylum secutus. Magnifice de se, suisque lucubrationibus, metricis præsertim, sensit. Catbedram Papiensem, quam ætatis suæ anno vigesimo tertio, & Coronam lauream, quum vigesimo quinto obtinuit, frequenter jactavit. Se dictum Stoa, quod esset Musarum porticus, & Quintianus facta allusione ad Martialis dictum, affirmat. Quintianum, Brixianæ ditioris oppidum, patriam habuit, ex indubitato Joannis Planerii Quintiani testimonio. Joannem Britannicum, & Fausinum Cintbium audiuit. Domitium Cælium fratrem habuit, de quo ipse, & Planerius. Nemini, qui ea ætate in Grammaticorum censum veniret, sua censura pepercit, nec conterraneis quidem, nec Magistris, non Barbaro, non Politiano, non Manutio. Omnium insensissime insectatus est Pbineum quendam. Affertur ipsius ad Epographias Præmonitio. Jo. Baptista Egnatius ejus elocutionem damnavit. Invebitur acriter in Sacerdotum, & Concionatorum impf.

SYNOPSIS.

331

imperitiam. Quantum ipse aliorum dentibus patuerit, docet ejus ad Epographiam quartam Proœmium, quod recitatur. Obiit an. 1557. ex Planerii ad Paulum Manutium Epistola. Ex eadem, magna Quintiani nominis fama, quæ homines ex ultimis Galliis ad eum videndum pertraherebat. Scripsit Adnotationes contra Commentaria Grammatica Joannis Tortellii, qui Opus suum Nicolao V. deducaverat.

PAULUS SUARDUS.

Ex Joannis Antonii Catbanei suffragio principem locum inter Brixianos Grammaticos meretur. Laudatur ab Augustino Saturnio, de quo infra. Græcas literas doctis viris necessarias esse negavit. Afferitur ejus de hoc argumento Epistole pari ad Petrum Federici. Suspicio quedam adversus ejus doctrinam, seu mores.

AUGUSTINUS SATURNIUS LAZARONEUS.

Hujus Mercurius Grammaticus, quo præsertim Laurentium Vallam oppugnavit, magnis laudibus extollitur ab Joanne Pincio. Joannem Taberium, Brixianum, institutorem habuit, cujus doctrinam euebit ad sydera testimonio ad Operis calcem, quod recitatur. Plura ex ejus Mercurii libris excerpta afferuntur. Ea Auctorem non minus Latine lingue, quam criticæ eruditionis peritissimum demonstrant. Ex veteribus Grammaticis Donatum, & Priscianum baud raro redarguit, ex recentibus vero, præter Laurentium Vallam, Paulum Suardum, Antonium Nebrissensem, Baptistam Pium, Ambrosium Calepinum. Quintilianum plurimi fecit, professus se ejus vestigia quotidie exosculari, ac modo non adorare.

JOANNES CALPHURNIUS.

Nicolai Perotti Grammaticam magnopere commendavit apposita Epistola ad Editionem ejus Grammaticæ an. 1475. vulgatam. Recitatur Epistola illa. Laurentii Valle Elegantias lingue Latine Epigrammate ornavit in Veneta Editione an. 1492. Epigramma illud recitatur. Alia Editio Rudimentorum Perotti prodit opera Agnelli de Tusculano an 1490.

BAR.

BARTHOLOMÆUS PARTHENIUS.

Volumen Maii Parthenopæi editum Neapoli an. 1475. de priscorum Verborum Proprietate, ex Laurentii præsertim Vallæ, & Joannis Tortellii Commentariis depromptum, recognovit. Affertur ex Operis illius Tarvisina Editione Epistola ad Franciscum Thronum.

JOVITA RAPICIUS.

Scriptis libellum de puerili Institutione ad Rectores, & Decuriones Bergomates, quorum in civitate literarium ludum rexerat per annos XV. Affertur ejus Proæmium, nec non Caput de Officio specialium Magistrorum. Commentarios Jacobi Petrecini Castionatis in libellum Terentiani Mauri probavit, eisque Epistolam præfixit, quæ recitatur. Petrecinus eos Commentarios transmittit ad Joannem Planerium.

JOANNES TABERIUS.

Hujus in re Grammatica excellentia commendatur ab Augustino Saturnio. Aldus Manutius ei nuncupat Stephani de Urbibus Editionem, gratulaturque urbi Brixie ob studia Græcarum literarum, quæ in ea florebant, Taberio præceptore.

CORNELIUS DONZELLINUS.

Methodum linguæ Græcæ libris quatuor conscripsit, quos Francisco, & Joanni Principibus Mediceis dedicavit. Affertur Epistola Nuncupatoria ex Editione Basileensi Joannis Oporini an. 1551. Inter Latinos, qui Græcam Grammaticam condiderunt, doctrinæ, & industriæ laudem promeritus est.

BENACENSES TYPI.

Tusculani in ædibus suis Alexander de Paganinis vulgavit an. 1519. Aldi Manutii Grammaticam, quæ ab eodem Paganino iterum excusa fuit anno 1532. Annales Typographici eam officinam non memorant, nisi anno 1523. quo prodiiit Cicero de Officiis &c. cum Comment. diversorum.

ORA.

ORATORIA.

CHRISTOPHORUS BARZIZIUS.

Magna fervente inter Rhetores controversia de Fine Oratoris, aliis pro Ciceronis, aliis pro Quintiliani sententia pugnantibus, librum de ea scripsit Barzizius, Brixia a Presbytero Baptista de Farsengo impressum an. 1492. Recitatur Barzizii Epistola Nuncupatoria ad Heliam Capreolum; nec non Caput decimum Libri primi, & Proœmium Libri secundi, ac tandem Conclusio totius Operis. Subsequitur Bartbolomæi Capreoli, Helie filii, Epigramma, quod pariter affertur. Barzizius hic, alius omnino a Bergomate. Quinam fuerint Bonifacius Bembus, & Matthæus Collatius, quorum Commenta Barzizius refellit, explicatur. Ea ipsa controversia magna contentione agitata fuit pro suggestu a Marino Becicemo Venetiis in Æde Divi Stephani adversus Rapphaelem Regium. Ea occasione memoratur funebris laudatio ejusdem Marini in Joannem Baptistam Scytham recitata in Æde Divæ Mariæ Formosæ ab hora 21. usque ad tenebras. Becicemus non ita magni habitus a Petro Bembo, qui dolet, eum solum Patavii Rhetoricem profiteri, postquam Romulus Amaseus Gymnasium reliquisset, quo nullus inter Italos in ea Arte excellentior, quemque Becicemo mortuo idem Bembus ad repetendam Catbedram Patavinam, Bononiensi, quam obtinebat, utique præferendam invitavit; at frustra.

JOVITA RAPICIUS.

Civitati Brixianæ qua ratione, superata Clarensum suorum obreftatione, adscriptus fuerit, binæ ejus Epistolæ declarant. Scripsit libros quinque de Numero Oratorio, quorum quatuor priores Cardinali Reginaldo Polo dedicavit. Affertur ea Epistola, seu Præfatio ex Aldi Manutii Editione an. 1554. Afferuntur etiam alia Specimina ejusdem Operis. Librum quintum inscripsit Paulo Ramnuso, quem, ejusque avum Paulum, Hieronymum magnum patrum, & Joannem Baptistam patrem, Rapicius magnopere laudat. Eorundem laudes profecutus est Paulus Manutius

tius; ad Joannem vero Baptistam plures exstant Bembi Epistolæ. Una exstat Reginaldi Poli ad Paulum, quæ gratum animum erga Rapicium testatur. Scripsit præterea Rapicius Orationem gratulatoriam ad Venetiarum Senatum pro Bergomatibus, cujus fragmentum recitatur. Item funebrem in Paulum Zanchum. Affertur ex ea fragmentum, Pauli religionem comprobans, & filiorum ejusdem mentionem faciens. Orationem aliam scripsit de laudibus Andreae Gritti, Venetiarum Ducis. Affertur inde fragmentum triplex.

GREGORIUS, ET BENEDICTUS BRITANNICUS.

Hi fratres Joannis Britannici, & Prædicatorum Ordini adscripti, quamplures Orationes funebres, & nuptiales in unum collegerunt. Nec unum ab alio, nec Collectionem unius a Collectione alterius, satis distinxit Jacobus Echard in Biblioth. Scriptor. sui Ordinis. Libellum Benedicti ad manus habuit Antonius Massoulié, & ejus Auctorem in Scripturæ, Patrum, Philosophorum, & Poetarum lectione versatum commendavit. Editus fuit libellus ille Britannicorum fratrum typis an. 1507. Brixie. Præfert in fronte Epistolam Benedicti ad Damianum Nepotem, & aliam ad Nicolaum Belammum Soncinensem. Utraque recitatur. In ea Benedicti Collectione Sermones quinquaginta continentur, post quos sequitur Epistola ipsius Benedicti ad Timotheum Acerbum Veronensem, ubi dolet obitum fratris sui Thomæ, Oratoris ea tempestate clarissimi; & bujus Thomæ subsequitur illius Oratio in funere Comitissæ Pandulphi Seratici, & alia in funere Matthæi Tuscani Bononiæ Prætoris. Copiosior, ac luculentior Gregorii Britannici libellus, impressus Venetiis an. 1505 & Paulo Zane, Brixie Episcopo, nuncupatus, quem in primis laudat ex maxima librorum cujuscumque doctrinæ suppellectile, quæ nihil pretiosius possideret. Recitatur ea Epistola, quæ data fuit ex Aede Divi Floriani an. 1495. Degebant tunc ibi fratres Ordinis Prædicatorum. Paulus Zane Gregorii Britannici diligentiam commendat in literis ad ipsum Gregorium, & ibidem honorificam Joannis Britannici mentionem inicit ob Persum, & Statium jam ab eo illustratos, & ob Commentaria, quæ in diem expectabantur, in Juve-

Juvenalem, & Ovidium. Afferuntur eæ literæ datæ ex Brixiano Episcopo an. 1492. Incipit libellus a pluribus Sermonibus, quos Collector funebres appellat. Subsequuntur literales, quorum primus in Carolum Malatestam, Pisauri Dominum, ad Pandulphum ejus fratrem. Afferitur ex eo fragmentum, quo Caroli gesta ad Brixianæ Urbis historiam spectantia illustrantur. Subsequitur illico Oratio in Constantiam, Pisauensium Dominam, ad Alexandrum Sfortiam, ejus conjugem, quam non solum a felici Principatus administratione collaudat, sed etiam ab eximia divinarum, humanarumque literarum peritia. Afferuntur ex ea Oratione præcipue Constantiæ laudes. Tertius, inter literales illos, Sermo auctorem suum præfert, scilicet Thomam Acerbum Veranensem, habitusque fuit ad Brixianos in funere Joannis Britannici, Equitis Aurati. Pauca quædam ex eo afferuntur. Subsequens Sermo a Fratre Gregorio Britannico compositus, prosequitur laudes Antonii Britannici, Doctoris, ac Philosophi præstantissimi. Fragmentum ex eo recitatur, in quo Antonii professio ad Concilium Constantiense, & præstita in eo Joanni Pontifici opera, nec non Legatio ejus ad Principes, a quibus pro obfesso Byzantio magnam pecuniæ summam collegit, memorantur, ac demum eximia ejusdem doctrina. Oratio in obitu Nicolai Duodo, magni Brixie Præfæcti, auctorem habet Joannem Britannicum. Fragmentum inde recitatur, Nicolai, ejusque familiæ elogium completens. Oratio in funere Caroli Zeni auctoris nomen non præfert, at cum certo constat esse Leonardum Justinianum. Edita ea fuit Venetiis an. 1492. per Bernardinum Benaleum. Rursus in Collectione Patrum Martene, & Durand. Demum in Tomo XIX. Scriptor. Rev. Italicar. Mediolani. At in Gregorii Britannici Collectione quibusdam additamentis ornatur. Nuptiales Orationes quamplures in ea Collectione subsequuntur, quarum prima Joannem Britannicum, altera Christophorum Barziziam præfert auctores, reliquæ ab ipso Gregorio, ut credere par est, composite fuerunt. De Rhetorico in componenda Oratione nuptiali artificio disseruit Becicbemus in Centuria Epistolæ. Quæst. ad Marinum Georgium ejus Mecænatem. Præerat tunc Becicbemus Academiæ Brixianæ, & Hieronymi Donati filiorum institutionem susceperat. Catbedram postea Patavinam obtinuit, & ejus Universitatis nomine recitavit gratulatoriam Orationem ad Andreæ Grittum, Venetiarum

tiarum Ducem, & funebrem in Joannem Petrum Stellam, magnum Venetiarum Cancellarium. *Ætatem suam ingravescentem Becicemus jam causabatur, & ob eam forte a Bembo non adeo opportunus Juventuti in Patavino Gymnasio instituendæ habitus fuerat.*

JOANNES MARIUS MATIUS.

Floruit in Alexandrina Statielensi Academia, quum plures vitæ sue annos inter familiares Hieronymi Gallarati, Episcopi illius Urbis, transgessisset. Scripsit Adnotationes in libros Rhetoricorum ad Herennium, quos contendebat Ciceronis esse, non Cornificii. Inde acerba exorta est controversia inter ipsum, & Antonium Riccobonum. Adversus hunc Matius suam protulit Defensionem, quam Octavio Giliino inscripsit. Affertur ea Epistola. Hanc eandem Quæstionem discusserrat Bartholomæus Theanius, Brixienfis.

OBSERVATIONES MARIÏ NIZOLII.

Has Observationes in Ciceronem Brixiana sibi vindicat literaturæ, non quod ipse Brixienfis esset, ut aliqui tradiderunt, atque ita legitur in Veneta earundem Observationum Editione an 1576. sed quod Observationes illæ elaborate fuerunt apud Pratum Alboini, & ibidem editæ in Edibus Comitum Jo. Francisci Gambare, pecuniam conferente Mattheo Advocato. an. 1535. Recitatur Epistola Nuncupatoria ad ipsum Gambaram Michael Nizolius Marii nepos locupletiore Editione earum Observationum adornavit. Inducuntur rixæ inter Nizolium, & Majoragium.

CORNUCOPIA NICOLAI PEROTTI.

Spectat & ipsa ad Brixianam literaturam ob curam in ejus Editione Veneta an. 1490. impensam ab Antonio Moreto Brixiano, cujus testis Sabellicus, & alii. Aliam item suscepit Alexander Paganinus in Benacensi an. 1522. Ambrosii Calepini, qui ex Cornucopia multa deprompsit, Vocabularii editione. Affertur Alexandri Paganini Præfatio.

POE.

P O E T I C A.

JO. FRANC. STOA QUINTIANUS.

Coronam Poeticam e manibus Ludovici XII. Galliarum Regis recepit, & amplo ab eo ornatus fuit Diplomate, quod recitatur. Poemata sacra Quintiani edita sunt Parisiis an. 1514. quibus præmittitur Epigramma, quod affertur; sicuti & Poematum eorum initium. Tragedia de Passione Domini laudatur ab Julio Cesare Scaligero. Ovidianæ Quintiani Periochæ impressæ sunt Papæ an. 1506. & Joanni Francisco Bruno, Nolano Episcopo, nuncupatæ. In Joannis Planerii Epistola ad Bartholomeum Theanum memorantur quamplura Quintiani Opera. Quintum Curtium restituit, & absolvit. Poema de Encomio Urbis Venetæ magno plausu exceptum fuit. Affertur Præfatio in Panegyricum, cui titulus, Partenoclea, portentosissimum obcurvatis opus. Poema de laudibus Parisiorum Urbis, & aliud de Orpheo, edita fuerunt Parisiis an. 1514. recensente Joanne Salmonio Materno, & Quintianum magnopere commendante. An Quintianus fuerit Rector Universitatis Parisiensis, & Francisci I. Præceptor, in dubium vocari potest.

F A U S T U S S A B Æ U S.

Natus est in Brixiano municipio, cui nomen Clarium. Regibus Francorum Francisco, & Henrico, tam Carminum suorum libros, quam Arnobii adversus Gentes Disputationes nuncupavit. Vaticanæ Bibliothecæ Custodis officio functus est penes septem Summos Pontifices. Recitantur quedam ejus Epigrammata ad Gallie Reges. Item alia plura ad Romanos Pontifices, in quibus de sua egestate frequentissime conqueritur. Incipiunt a Leone X. & desinunt in Paulo IV. Edidit Cosmographiam Julii Oratoris. Ab Hadriano Papa male habitum fuisse, res parum certa. Bibliothecæ Vaticanæ miserum statum deplorat versibus, qui recitantur. Gratiæ agit Julio III. ob dona ab eo recepta. Post Pontifices, & Reges non alios Sabæus studiosius excoluit, quam Gallos Cardinales, ac præcipue Joannem Bellajum, & Carolum Lotbaringum. Af-

P. II.

V u

ferun-

feruntur nonnulla ad eos Epigrammata, quorum non aliud fere argumentum, quam esuritionis suæ querimonia. Recitatur aliud Epigramma, valde facetum, ad Guillelmum Episcopum Matifconensem. Item Epitaphium Cardinalis Aleandri, nec non Epitaphium Cardinalis Puccii, & Epigrammata ad Cardinales Farnesium, Bembum, Scotum, Campegium. Plura etiam scripsit Epigrammata ad Poetas sui temporis, quos chariores habebat. Afferuntur quatuor ex ipsis, & unum præterea, quo plures ex amici suis ad celebrandum diem Natalis sui invitavit. Lusus liberiores, & sales parum religiosi Sabæo aliquando placuerunt. Scripserat tres libros de Amoribus, quos sibi surreptos conqueritur vendecasyllabis, qui recitantur. Plura Epigrammata Anibolæ Græcæ Latina fecit. Libellus, Pieta Poesis Ovidiana, inscriptus, constat magna ex parte Fauſti Sabæi carminibus. Teste Jul. Caf. Scaligero, Sabæi facilitas secundo plausu, dum ipse viveret, excepta fuit. Afferitur tetraſtichon de M. Juventio Talpa. Ejus interpretatio ad hederæ fabulam allegatur, & recitatur in Adnotationibus ad Opera Garcie Lassi. Sumptus ad nitidam Editionem Disputationum Arnobii de suo suppeditavit; quare valde mirandum, ea pressum fuisse egestate, quam usque, & usque suis in carminibus deplorat.

JOVITA RAPICIUS.

Paraphrasin metricam in aliquos Davidicos Psalmos confecit, ac Cardinali Reginaldo Polo nuncupavit. Duo ex ea Psalmi recitantur, subdunturque eorundem Psalmorum M. Antonii Flaminii, & Georgii Bucchanani Paraphrases. Flaminium, ut Polo gratificaretur, suam Paraphrasin elaborasse, scribit Tbuanus in Historiis, at ex Epistola ipsius Flaminii ei Paraphrasi præmissa aliter judicandum videtur. Facile credi potest, Rapicius potius ad id operis excitatum fuisse a Polo, quem tamen certum est auctorem fuisse, ut alia Flaminii in Psalmos Paraphrasin, profanica nimirum, in vulgus ederetur. Metricam in Psalmos Paraphrasin pariter composuit P. Franciscus Spinula, Mediolanensis utique, non Brixianus, ut aliqui perperam tradiderunt. De eo inferius. Rapicii in Poetica disciplina præstantiam testatur est Thomas Junta in Editione Operum Virgilii anno 1552 quam ei nuncupavit.

] A.

JACOBUS BONFADIUS.

Patriam habuit Gazanum, vicum amenissimum ad Benacum prope Salodium. Id omnino constat. Lacus, & regionis Benacensis delicias describit elegantissime in Italica ad Plinium Thomacellum Epistola. Academiam in ea regione institui optabat, cujus ipse princeps foret. Recitatur ipsius Poema, quo Gazanum vicum describit. Flaminium ad aliam lacus ripam habitantem identidem invisebat. Recitantur Pauli Manutii versus de morte Bonfadii, nec non Mattbæi Toscani Epigramma.

NICOLAUS SICCUS.

*Carmina plura valde culta, & elegantia scripsit. Marii Martii de eo elogium. ~~Roma~~ magna fuit ejus nominis existimatio. Falso ei tribuitur Epigramma in salacem formicam. Militari etiam gloria floruit. Præfecturam Justitiæ Mediolani exercuit. Ad Cardinalem Christophorum Madrutinum, & ad Antonium Perenottum, Episcopum Atrebatensem, plura transmisit carmina, quorum aliqua recitantur. Eorum argumentum querela, ut plurimum, ob insignia gesta, quorum nullam mercedem retulisset, quodque dignitatem sibi collatam proprio patrimonio tueri cogere-
tur. Ea dimissa ad fruendas Villæ suæ delicias, quas describit, redactus fuit. Epigramma de Benedicto Varchio non a Sicco, sed ab ipso Varchio compositum credi debet. A Varchio magni habitus fuit Siccus, quemadmodum & ab Hieronymo Cardano, Antonio Cerruto, cujus versus recitantur.*

BARTHOLOMÆUS THEANIUS.

Magnopere laudatur ab Joanne Planerio ejus conterraneo in Epistolis. Edidit Carmen Heroicum de Brixia a Gallis capta, dicavitque Camillo Capreolo hendecasyllabis, qui recitantur, nec non alii ad Nicolaum Siccum in Monte Claro Musas colentem.

CÆSAR DUCCUS.

Hujus Poesin plures ea ætate commendarunt. Scripsit Hendecasyllabon ad Quintianum Stoaam, Elegiam in Mulieres caudatas vestes ferentes, item Hendecasyllabon ad Hieronymum Bonatum, quo Occultæ Academicæ Principes recenset, nec non Epigramma in libellum Natalis Comitum de Venatione. Ea omnia recitantur.

ANDREAS MUTIUS.

P. Franciscum Spinulam insectatus est suis versibus, ex quibus affertur Tetrastichon, & Hexastichon. Afferuntur etiam aliquot Spinula versus, quibus hic adversarios suos nominat, & carpit.

AUGUSTUS COCCEJANUS.

Fuit unus ex præcipuis, qui Jovii Borgia versus illustravit. Affertur carmen ejus de Romulo, nec non aliud, quo funera Cibi solis Domus deplorat, patris scilicet, ac filii. Coccejanium magis fecit M. Antonius Flaminius, ut constet ex Hendecasyllabo, quod recitatur.

CALEMERIUS BALNEACATTUS.

Elegans Hendecasyllabon carminibus Marulli Tarcantioræ adjunxit. Ei savi, nullo partium studio in asperis rixit, quibus Marullus, & Politianus se invicem proscindebant, abductus. Affertur illud Hendecasyllabon, nec non aliud de reditu Marini Bricchemi ad Urbem Brixiam. Item scripsit Epigramma in laudem Jo. Baptiste Benivoli, Brixiani, et Opuscula de Liberos Educatione ab eo recognita quibus Epistola etiam Joannis Calphurnii præfigitur in alia Editione.

IOANNES MARIUS MATIUS.

Scripsit hendecasyllabos, quibus plura Vitæ suæ Historiæ illustrantur ad Sodales suos, & alios ad Monachos Bobii. Recitantur ex libello ipsius Apologiam continente adversus quosdam Professores suæ impugnatores.

DIO

DIOMEDES SALA.

Unus fuit ex P. Francisci Spinulae adversariis, ut patet ex Epitaphio in Torquatum, & ex Epigrammate in Hippolytum Corsinum. Epitaphium Corsino conscripsit Jo. Antonius Taygetus, & praeterea ejus laudes prosecutus est in Ecloga, cujus priores versus recitantur. Idem Taygetus Sala Poesin magnopere commendavit versibus, qui referuntur.

JO. ANTONIUS TAYGETUS.

Auctor ipse fuit Collectionis carminum Academicorum Occultorum. Hujus Academiae primates recenset in versibus, qui recitantur. Idem Taygetus vulgavit Collectionem carminum Poetarum praestantium. In ea est Epigramma ad Ludovicum Calinum, quod affertur. Ludovicus hic forte is ipse, ad quem existat Epistola Italica M. Antonii Flamini, plena utique bonae frugis, de ratione, qua Mutius ejus filius politioribus literis instrui deberet. Mutii Calini nomen satis celebre in Epistolis Pauli Manutii, quod spectat ad politiorem literaturam. Ascendit ad Archiepiscopatum Jaderensem, quem postea commutavit cum Inveranmate. Mutuae de ea migratione, Manutii ad ipsum, & ipsius ad Manutium Epistola.

HIERONYMUS BORNATUS.

Suos in Academia Occultorum Sodales, Duccam, Soncinum, & Taygetum celebravit versibus, qui recitantur; & alii quoque in Albertum Lolium Ferrariensem, nec non in Vincentium Metellum. Academia Occultorum coepit anno 1563. & viginti tantum annis floruit; at postea quadantenus revixit.

LUDOVICUS FEDERICUS.

Unus ex Academicis Occultis. Scripsit Hexametros, quibus quaeritur, severius in suam, Majorumque suorum conditionem inquiri ex Brixiani Senatus decreto, ut in Curia ordinem recipi valeres.

Pro-

Producuntur, nec non bendecasyllabi pro adventu Bernardi Georgii Prætoris. Ad Ludovicum Federicum inscribitur Ecloga nautica Taygeti, cujus aliqui versus recitantur. Exhibentur item versus, quibus Academici Occulti labores suos nuncupant Jo Franciscus Cardinali Commendano. Hunc quibusdam bendecasyllabis laudavit etiam Carolus ex Comitibus S. Bonifacii, unus ex illis Academicis. Poetica Commendoni vena fuit ipsius ad Julium III. prima commendatio.

COMES BRUNORIUS GAMBARA.

Hujus versus propriis intexuit P. Franciscus Spinula, ad quem exstat ipsius Gambaræ Elegia, quæ recitatur, una cum aliquot bendecasyllabis in laudem Spinulæ, bujusque in Psalmos Paraphrasis. Hæc lucem vidit Basileæ an. 1548. ipsa Spinula ignorante. Laudata etiam reperitur a M. Antonio Majoragio.

VINCENTIUS ZINUS.

Patriam, & conditionem suam declarat in Epigrammate ad Herculem Ferrariæ Ducem, quod datur. Familiam Etsensem suis carminibus Zinus frequenter decantat, & doctos etiam Viros, quibus ea tempestate Aula Herculis, & Renatæ ejus conjugis abundabat. Vincentius Zinus sanguine conjunctus fuit Petro Franciscus Zino, Archiprebytero Lonati, ac postea Canonico, ac in Patavino Gymnasio Philosophia Professore, ut fidem facit ipsius Vincentii Epistola nuncupatoria ad Philippum Contarenum. Hujus frater Marcus Contarenus auctor Epigrammatis, quod recitatur.

JOSEPHUS MILIUS VOLTOLINA.

Scripsit Poema de cultu Hortorum maxime elegans. Afferuntur priores aliqui versus. Opus suum non adeo jactavit, ac fecit Nicolaus Rapius in Præfatione, & in Prologo libri secundi. Inscripsit suum Poema Joacchino Scaino, Saloensi civi, & Mecænati suo, cui magnas tribuit laudes. Alios Saloenses ea ætate illustriores indicat in versibus, qui afferuntur. De re rustica egregie item meritus est Augustinus Gallus Brixianus, cujus Opus in Gallicam etiam

etiam linguam conversum fuit. De eo plura. Laudatur ab Antonio Querego, & ab Joanne Antonio Taygeto, quorum versus exhibentur. Crescentii de Agricultura Tractatum, mendis omnino vitiatum, Comes Jo. Franciscus Gambara eo tempore emendavit, ut testatur ipse Augustinus Gallus. Gallus Opus suum dicavit Emmanueli Sabaudie Duci, & in Epistola ad ipsum meminuit Petri Comititis Advocati, qui in ejus Aula ad magna negotia adhibebatur. Milius ad calcem Poematis sui adjecit Eclogam, & Hendecasyllabon. Scripsit aliud Poema, cui titulus, Hercules Benacensis.

LAURENTIUS GAMBARA.

Scripsit quamplura Poemata, inter quæ illud de Columbi Navigatione maximopere laudatur a Manutio in Epistolis, quemadmodum ab Julio Lipsio, & Lilio Gyraldo. Recitatur hujus Poematis initium, nec non aliqui versus ex Poemate, Venetiae, & alii ex Poemate, Caprarola. Poema, Expositi, metapbrasim est Pastoralium Longi, cui fatetur multa de suo addidisse. De Poemate Columbeidis Epistola Bartholomæi Ricii. Gambaræ Carmina laudantur a Basilio Zancbio, quem vicissim Gambara laudat in suis. Utraque recitantur. De Gambaræ ad gelidas Germanie oras profectione affertur M. Antonii Flaminii Hendecasyllabon. Gambara quamplurima sua carmina combussit, quod turpia, & Deorum fabulas continerent. Ejus de Poesis ratione libellus, an Antonio Possevino tribuendus, incertum videtur. Haud multo post Laurentium Gambaram Julius Cæsar Stella aliud de Columbi navigatione Poema edere cepit, cujus duo priores tantum exstant libri à Francisco Bencio, aliorum etiam doctorum Virorum testimonio, valde commendati. Stella ille, licet Romanus, etiam pro Brixiano habendus. Vincentius Stella, & Fabius ejus filius, Brixiani, magna cum laude memorantur a Manutio in Epistolis. Bartholomæus Stella sodalis fuit Cardinalis Poli in Anglica Legatione, de quo affertur Sabei Epigramma. Michælis Mercati Metallorbecæ, & Mercurialis de Arte Gymnastica Editiones ornantur quibusdam Laurentii Gambaræ carminibus.

THEO.

THEOPHILUS MONACHUS BRIXIANUS.

Scriptis carmina, quæ edita reperiuntur Brixie per Bernardinum Misintam Papiensem an. 1496. Præmittitur iis Epistola Helie Capreoli ad Augustinum Æmilium, quæ recitatur, nec non Theopbili versus nonnulli ex Elegia, & ex Dialogo de Vita Monastica, & Politica. In eodem libello exstant Elegi de vita, & moribus D. Bernardi, quibus præmittitur ipsius Theopbili ad Ludovicum Martinengum Epistola, quæ affertur, nec non alia ad P. Præsidentem Congregationis S. Justine præmissa Hymnis in solemnitatibus S. Benedicti, S. Lucæ, & S. Justine, quorum priores versus recitantur.

T. PROSPER MARTINENGUS.

Monachus & ipse Benedictinus. Ejus Elogium lato calamo persequitur Auctor Biblioth. Benedict. Casin. Excelluit literis Latinis, Græcis, & Hebraicis. Ob Græca Poemata ab eo scripta habitus fuit alter Homerus, & alter Pindarus. Omnia ipsius Carmina tribus Voluminibus Romæ editis continentur, in quibus obvia sunt multorum elogia in Martinengum. Ad hunc Franc. Spinula versus quosdam ludicros transmisit, qui recitantur. Severiores etiam literas coluit, de quo alibi.

UBERTINUS POSCULUS.

Plura scriptis Poemata, typis minime edita. Præ cæteris celebre illud, cui titulus, Constantinopolis. Dividitur in quatuor libros. Afferuntur ex eo priores aliqui versus, nec non Tetrastrichon, quo patriam, & conditionem suam prodit. Posculus laudatur a Cereto in Brixie Panegy.

JOANNES CALPHURNIUS.

Omissis Jo. Britannico, Jo. Taberio, Codro Urceo, de quorum Poesi sat dictum in prima hujus Operis Parte, memoratur Carmen Jo. Calphurnii, cujus argumentum, laudes Joannis Inderbachii Pontificis Tridentini, & interitus beati Simonis infantis a Ju-

Judeis mactati. Earum laudum priores versus afferantur. Interitum autem integrum Carmen, quod luculentum est testimonium pro Actorum Passionis beati Simonis veritate comprobanda. Ea Passio contigit an. 1474. Carmen autem Calpurnii continetur in Volumine edito typis an. 1481. & ibi Calpurnius affirmat, se Carmen illud olim composuisse. Eadem Acta scriptis consignavit Joannes Matbias Tiberinus Medicus, Brixianus, Poetica, & Oratoria facultate non minus, quam Medicina insignis eo ipso tempore. Volumen illud, unde Calpurnii Carmen recitatum est, exhibet Catullum, Tibullum, Propertium, & Statium emendatos ipsius Calpurnii cura, quam ipse testatur in Epistola ad Hermolaum Barbarum Editioni illi praemissa, quaeque in priore Parte hujus Operis, ubi de Catullo, commendata fuit, & ab omni dubietate vindicata.

PYLADES BUCCARDUS.

Hesiodi Theogoniam Elegiacis versibus conscripsit, quorum aliquot afferuntur ex libro ultimo desumpti. Opus suum nuncupavit Luca Tertio. Hesiodo Homerus jungitur, ut de eo quoque Brixiana literatura benemerita fuisse dignoscatur. Quum nihil prorsus Homericis typis impressum usquam prodisset Justinianus Luzagbus, Brixianus, in lucem edidit Brixiae an. 1474. Versionem Latinam Iliadis a Laurentio Valla confectam, eamque Bernardo Justiniano, qui eandem Parisiis inventam transcribendam curaverat, nuncupavit. Afferitur ea Luzaghi Epistola Bernardi Justiniani laudes etiam in *Sicut III. Rom. Pont. oraculo*. Gallica Legatione fungens, literarum studium baudquaquam seposuit, ut patet ex ejus Oratione ad Universitatem Parisiensem. Recitatur ejusdem Luzaghi Epigramma in Valla versionem. Hec non omnium quidem prima, at alias Nicolao V. Rom. Pont. jubente elaboratas, praesertim Horatii Romani illam, praecessit. Item Gallicae Legationi Aloysii Moscenici debet antiquissimus Plinii Epistolarum Codex ab eo in Italiam allatus, teste Aldo Manutio. Nova Valle Versionis Editio prodit Brixiae an. 1497. per Baptistam Farsengum Presbyterum, impensa vero Francisci Laurini, civis Brixiani, cujus est Praefatio ei Editioni apposta. Vernacula versio Comediarum Aristophanis edita Venetiis an. 1545. auctores

P. II.

X x

habet

babet Bartholomæum, & Petrum Rostini a Prato Alboini, qui eam Camillo Gambara dedicarunt.

BONIFACIUS BEMBUS.

Hic, de quo supra inter Oratores, Poësin etiam excoluit. Exstat ejus Elegia ad Cassandram Fidelem Venetam, ex qua recitantur aliqui versus Cassandræ laudes, & una simul domesticas clades ipsius Bonifacii exprimentes. Cassandra a Politiano, aliisque maximopere commendata. Præter illam Elegiam alia etiam carmina scripsit Bonifacius Bembus.

ANDREAS MARO.

Poetica extemporaliitate reliquos sui temporis Vates superavit, teste Gyraldo, ac proinde Sæssum, Lippum, Gazoldum, & Querinum. Ob eam donatus fuit a Leone X. sacerdotio. Laudes ejusdem ex Pierio Valeriano, cujus versus recitantur; nec non ex Paulo Jovio, qui unum ejus versum refert. Exstat præterea Maronis Epigramma in fronte celebri libri, cui titulus, Hypnerotomachia Poliphili, quod recitatur, una cum alio Tetraſtico. Infelix Maronis exitus ex Gyraldo, Valeriano, & Jovio. Brixianum fuisse negari non debet, pro quo affertur Latomi Epigramma.

MACCARONICA MERLINI COCAI.

Theopbili Folengi, Mantuani, & Monasticam vitam in Cœno-dio Brixiano S. Euphemie professi, Opus Maccaronicum primam lucem debet Benacensibus Alexandri Paganini typis an 1523. Paganinus non Tusculani tantum, sed & Venetis typographiam exercuit, Aldinarum formarum nitorem æmulatus.

ITALICA BRIXIANORUM PŒSIS.

Eorum Poetarum duplicem habemus Collectionem, unam scilicet opera Hieronymi Ruscelli, & aliam Academicorum Occultorum carmina complectentem. In priore Veronica Gambara principem locum obtinet. De ea breviter. Aliorum autem Poetarum
nuda

nuda nomina recitantur ex utraque illa Collectione.

OCTAVIUS PANTAGATHUS.

Celeberrimum hoc Brixianæ literaturæ decus, vix credi potest quot quantasque laudes sua ætate a doctis Viris obtinuerit, Manutio scilicet, Panvinio, Gyrardo, quorum dicta indicantur. Choro etiam Poetarum jure adjungendus ex Mureti, Statii, Flaminii, Pigna, Catena, Malatesta testimonius, quorum versus recitantur. Catulli carmina manu sua emendata fuisse testatur Muretus, ejusque lectiones, tam ipse, quam Statius venerati sunt, quæ propterea religiose retinendæ, etsi aliquando nonnulli Codices Manuscripti ab eis discrepent, & antiquissima etiam Catulli Editio an. 1472. quam mendis refertam Calpurnius affirmat. Pantagathi bovorifice meminit Cardinalis Fridericus Borromeus in libro de fugienda ostentatione, cujus excerptum afferatur in Præfatione ad nuperam Mediolanensem Editionem Operum Caroli Sigonii.

SCRIPTORES

In altera hac Voluminis parte memorati, & designati numeris.

GRAMMATICA.

FYLADES BUCCARDUS num. I.	Pag. 1
JOANNES BRITANNICUS num. II.	P. 10
CHRISTOPHORUS BARZIZIUS num. III.	P. 14
JO. FRANCISCUS STOA num. IV.	P. 17
PAULUS SUARDUS num. V.	P. 31
AUGUSTINUS SATURNIUS LAZARONEUS num. VI.	P. 34
JOANNES CALPHURNIUS num. VII.	P. 59
BARTHOLOMÆUS PARTHENIUS num. VIII.	P. 61
JOVITA RAPICIUS num. IX.	P. 63
JOANNES TABERIUS num. X.	P. 69
CORNELLIUS DONZELLINUS num. XI.	P. 70
BENACENSES TYPI num. XII.	P. 75

ORÆ

O R A T O R I A.

CHRISTOPHORUS BARZIZIUS num. I.	p.	81
JOVITA RAPICIUS num. II.	p.	91
GREGORIUS & BENEDICTUS BRITANNICUS num. III.	p.	120
JO. MARIUS MATIUS num. IV.	p.	146
OBSERVATIONES MARII NIZOLII num. V.	p.	149
CORNUCOPIA NICOLAI PEROTTI num. VI.	p.	154

P O E T I C A.

JO. FRANCISCUS STOA QUINTIANUS num. I.	p.	158
FAVSTUS SABÆUS num. II.	p.	167
JOVITA RAPICIUS num. III.	p.	192
JACOBUS BONFADIUS num. IV.	p.	204
NICOLAUS SICCUS num. V.	p.	209
BARTHOLOMÆVS THEANIVS num. VI.	p.	219
CÆSAR DVCCVS num. VII.	p.	222
ANDREAS MVTIVS num. VIII.	p.	226
AVGVSTVS COCCEJANVS num. IX.	p.	228
CALEMERIVS BALNEACATVS num. X.	p.	230
JO. MARIVS MATIVS num. XI.	p.	233
DIOMEDES SALA num. XII.	p.	238
JO. ANTONIVS TAYGETVS num. XIII.	p.	240
HIERONYMVS BORNATTS num. XIV.	p.	246
LVDOVICVS FEDERICVS num. XV.	p.	249
COMES BRVNORIVS GAMBARA num. XVI.	p.	254
VINCENTIVS ZINVS num. XVII.	p.	258
JOSEPHVS MILIVS VOLTOLINA num. XVIII.	p.	259
LAVRENTIVS GAMBARA num. XIX.	p.	268
THEOPHILVS MONACHVS BRIXIANVS num. XX.	p.	279
T. PROSPER MARTINENGVS num. XXI.	p.	284
VBERTINVS POSCVLVS num. XXII.	p.	286
JOANNES CALPHVRNIVS num. XXIII.	p.	288
PYLADES BVCCARDVS num. XXIV.	p.	296
BONIFACIVS BEMBVS num. XXV.	p.	307
ANDREAS MARO num. XXVI.	p.	309
MACCARONICA MERLINI COCAI num. XXVII.	p.	315
ITALICA BRIXIANORVM POESIS	p.	317
OCTAVIVS PANTAGATVS	p.	322

F I N I S.



MAG 2002 245